




116100

I

Mag. St. Dr.

cal kono



116100

I


B
25

Donnerstag

Bühnen- u. d. P. ---
Z

~~Le P. P. u. d. P.~~

Z. Olecko.



TRACTATUS
THEOLOGICUS

DOGMATICO-HISTORICO-
CRITICO-SCHOLASTICUS

DE

FIDE THEOLOGICA
EJUSQUE REGULIS

SPE ET CHARITATE

JUXTA MENTEM

S. THOMÆ ANGELICI

DOCTORIS

PER

R. A. P. F. ALBERTUM KRECZMAN

S. T. ~~PRÆSENTATUM~~

Regentem Studii Generalis Grodnensis

ORDINIS PRÆDICATORUM

Usibus Scholarum Thomisticarum

ACCOMODATUS.



VILNÆ

TYPIS S. R. M. & REIPUBLICÆ
apud PP. Scholar: Piar: A.D. 1780.

Dublet 21421 13.I.36
M. G. do L. 4. 7/32
Dublet
APPROBATIO

THEOLOGORUM ORDINIS.

Traſtatum Theologicum Dogma-
tico, Hiſtorico, Critico Scho-
laſticum, qui de fide Theolo-
gica, ejusque regulis, ſpe & cha-
ritate inſcribitur, ab eodem Au-
thore R. A. P. S. J. Alberto
KRECZMAN Regente Stu-
dii Noſtri Grodnensis elucubratum
attente perlegi, eumque etiam pu-
blica luce donari poſſe pari ratione
ac traſtatum de Incarnatione Di-
vina, exiſtimo. Trociſ 5. Aprilis
1780. Anno.

Fr: IGNATIUS HUBCZYNSKI
S. T. Magiſter Ordinis Prædicat;

116100

I



154. 5. 36/37

Summa cum voluptate perlegi tractatum Theologicum de Virtutibus Theologicis à R. A. P. S. T. Præsentato ALBERTO KRECZMAN conscriptum; tanta enim ipsum legenti occurrit doctrinæ eruditio, tanta Ecclesiasticæ historiæ crisis & dogmatum ubertas, quanta omnium, judicio requiri videbatur ad abstrusa quæq; explananda ad ostendendam rei veritatem & ad confundendos quoscunq; errores. Ea propter eundem judicavi dignum prælo mandari. Vilnæ ad S. Spiritum Anno 1780. Die 18. Aprilis.

Fr: JUSTINUS ROSTKOWSKI S. T.
Præsentatus, Regens Studii Viln: Ordinis Præd.

mpp:



CENSURA ORDINARIA.

Tractatum Theologicum de Fide Theologica Spe & Charitate &c. Usibus Scholarum Thomisticarum Accomodatum typis mandari posse censeo

Datum in Seminario Vilnensi A. D.
1780. 1. Junii.

GVILLELMUS KALINSKI C. M.
juris Naturæ & Historiæ Naturalis
Professor.



IMPRIMATUR.

Datum Vilnæ in Cancellaria Consisto-
riali Vilnensi Annō Domini 1780. die
2. Mensis Junij.

PETRUS Samson TOCZYŁOWSKI
Cantor Prælati Cath: & Offici Genera-
lis Vilnensis.

mpp:



INDEX.

Dissertationum, Articulorum, Paragraphorum, Confessariorum, & aliorum titulorum, qui in hoc Tractatu de Theologicis Virtutibus continentur.



Proemium ad Discipulum	Pag:
DISSERTATIO I. De fide Theologica, ejusque actibus.	I
Articulus I. De natura fidei Theologicae	I
Articulus II. De analysi sive resolutione fidei Christianae	7
§ I. An ultima fidei resolutio fiat in humanum rationem?	7
Objectiones solvuntur	11
Confessarium	16
§ II. An fidei nostrae resolutio ultima fiat in spiritum discretionis?	17
Objectiones solvuntur	12
§ III. An resolutio fiat in propositionem Ecclesiae?	27
Objectiones solvuntur	29
Petes I. Utrum revelationes privatae pertineant ad fidem?	34
Petes 2. Utrum fidei possit subesse falsum?	35
Petes 3. Utrum objectum fidei sit necessario ob- jectum?	36
Petes 4. Utrum saltem evidentia in attestant sit compossibilis cum fide?	37
Petes V. Utrum Mysteria fidei sint evidenter credibilia?	38
Articulus III. De Articulis & Symbolis fidei	38
§ I. De articulis fidei	38

I N D E X.

Petes 1. <i>Quæ credenda constituunt specialem articulum fidei?</i>	- - -	39
Petes 2. <i>An articuli fidei successu temporis creverint?</i>	- - -	40
Petes 3. <i>Qui sunt articuli fidei?</i>	- - -	41
<i>Confectarium</i>	- - -	43
§ II. <i>De Symbolis fidei</i>	- - -	45
Petes 1. <i>Quot sunt Symbola Ecclesiæ?</i>	- - -	45
Petes 2. <i>Quis est tenor Symboli Nicœni?</i>	- - -	46
Digressio Critica 1. <i>Utrum Symbolum, quod Apostolicum dicitur, Apostolos Authores habeât?</i>	- - -	48
<i>Objectiones solvuntur</i>	- - -	50
Petes 1. <i>An Apostoli ita Symbolum ediderint, ut suum unusquisq; illorum. articulum seorsim, ac distincte protulerit?</i>	- - -	57
Petes 2. <i>Quis est qualis fuerit hujus Symboli Apostolici usus in Ecclesia, jam tum a primis sæculis?</i>	- - -	58
<i>Confectarium contra Basnagium A catholicum Criticum</i>	- - -	59
Digressio Critica II. <i>De Symbolo S. Athanasi</i>	- - -	63
<i>Resolutio problematica</i>	- - -	64
Petes 1. <i>Quem ergo statuunt secundæ sententiæ defensores Authorem præfati Symboli?</i>	- - -	69
Petes 2. <i>Cur hoc Symbolum non Vigili, sed Athanasii nomine vulgatum est?</i>	- - -	69
Petes 3. <i>Quis est finis Symbolorum?</i>	- - -	70
Articulus IV. <i>De interno actu fidei</i>	- - -	71
§ I. <i>De credendis ad salutem necessariis necessitate medi</i>	- - -	72
Petes 1. <i>Utrum sit de necessitate salutis aliquid credere supra naturam?</i>	- - -	72
<i>Confectarium</i>	- - -	76
Petes 2. <i>Quid censendum de puero nutrito in sylvis &c.</i>	- - -	76

I N D E X

§ II. De credendis necessitate præcepti	-	77
Petes 1. Quæ sunt credenda necessitate præcepti?	-	77
Petes 2. Quando obligat præceptum fidei?	-	78.
Petes 3. Utrum requiratur ad actum fidei eliciendum pia actio voluntatis?	-	81
Confectarium	-	82
Articulus V. De actu externo fidei	-	84
§ I. An liceat aliquando verbo vel facto fidem negare?	-	84
Objectiones Helceseitarum & Clanculariorum solv.	-	88
Petes 1. Quando in proxi censeatur quis simulari & exterius profiteri falsam religionem?	-	93
Confectaria	-	94
Petes 2. An exterius negantes fidem incurrant pœnas latae contra Hæreticos?	-	95
§ II. De præcepto externi actus fidei affirmativo	-	6
Petes Quando obligat hujusmodi præceptum?	-	96
Confectaria	-	97
DISSERTATIO II. De Ecclesia	-	99
Articulus I. Utrum detur Ecclesia vera militans?	-	100
§ I. Utrum fuerit Ecclesia vera in lege naturæ?	-	101
§ II. Utrum fuerit Ecclesia in lege scripta?	-	104
§ III. Utrum detur Ecclesia in nova lege?	-	108
Articulus II. Quinam sunt illi ex quibus vere & proprie Ecclesia conflatur?	-	112
Objectiones Hæreticorum	-	115
Confectarium	-	119
Petes 1. Utrum Catechumeni sint in Ecclesia?	-	120
Petes 2. Utrum Hæretici, apostatæ, schismatici & excommunicati sint in Ecclesia?	-	120
Articulus III.		

I N D E X.

Articulus III. De notis veræ Ecclesiæ	-	122
§ I. An & quæ sint notæ veræ Ecclesiæ?	-	123
Assignantur quatuor	-	123
§ II. Cui Ecclesiæ hæc quatuor notæ conveni- ant?	-	127
§ III. Objectiones hæreticorum	-	138
§ IV. Quid censendum de notis veræ Ecclesiæ, quas statuunt hæretici?	-	148
Articulus IV. Utrum vera Christi Ecclesia de- beat esse visibilis?	-	150
Objectiones solvuntur.	-	153
Petas Utrum visibilitas competat Sectis hæreti- corum?	-	153
Confectaria	-	159
Articulus V. Utrum vera Christi Ecclesia sit inde- fectibilis & infallibilis?	-	163
Objectiones solvuntur	-	168
Articulus VI. Quis sit supremus Iudex contro- versiarum fidei?	-	177
Objectiones solvuntur	-	185
Articulus VII. An & in quibus quæstionibus de- finiendis infallibilis sit Ecclesia	-	200
§ I. An iudicium Ecclesiæ sit infallibile de sen- su librorum seu ut vocant de factis dogmati- cis?	-	202
§ II. Objectiones solvuntur	-	210
Confectarium	-	224
Articulus VIII. Utrum Ecclesia sit infallibilis in canonizatione Sanctorum?	-	227
Petas 1. Quid censendum de beatificatione San- ctorum?	-	230
Petas 2. Qua ergo certitudine tenendum est Ec- clesiam non posse errare in canonizatione & beatificatione Sanctorum	-	231
Petas 3. Qua censura notanda propositio asse- rens Ecclesiam in tali iudicio posse errare?	-	232
Petas 4.		

I N D E X.

Petes 4. Quando habuit initium Sanctorum canonizatio?	- - -	232
Petes 5. An Ecclesia sit infallibilis in doctrina discipulæ?	- - -	233
DISSERTATIO III. De summo Pontifice	- - -	235
Articulus I. De Sancto Petro.	- - -	236
§ I. Utrum S. Petrus constitutus sit à Christo totius Ecclesiæ Caput & Primas?	- - -	237
§ II. Solvuntur Objectiones hæreticorum	- - -	244
Articulus II. Num S. Petrus suam Romæ fixerit Sedem?	- - -	260
Solvuntur Objectiones hæreticorum	- - -	267
Articulus III. An Pontifices Romani fuerint, & adhuc sint veri Successores S. Petri in primatu, & supremo totius Ecclesiæ regimine, & sint Vicarii Christi?	- - -	275
Objectiones solvuntur	- - -	284
Confectarium	- - -	294
Petes Quo sensu Summus Pontifex universalis dici possit Episcopus?	- - -	298
Articulus IV. De infallibilitate seu inerrantia Summi Pontificis in quæstionibus fidei & morum?	- - -	299
§ I. Utrum S. Pontifex gaudeat inerrantiæ privilegio, in definiendis quæstionibus fidei & morum?	- - -	301
§ II. Objectiones solvuntur	- - -	315
§ III. Aliquæ quæstiones resolvuntur	- - -	336
Petes 1. Utrum, qui propositionem à S. Pontifice damnatam defenderet, esset hæreticus?	- - -	336
Petes 2. An Christus jurisdictionem Ecclesiasticam soli Summo Pontifici immediate dederit?	- - -	337
Petes 3. Quid censendum de potestate S. Pontificis in temporalia?	- - -	339
Articulus V	- - -	

INDEX

Articulus V. De præeminentia S. Pontificis supra Concilium gen:	- - -	348
Objectiones solvuntur	" -	355
Confectarium	- - -	366
Articulus VI. Utrum sit de fide Pium VI. esse S. Pontificem, Petri Successorem & Christi Vicarium?	- - -	367
Confectarium	- - -	375
§ I. Synopsis historica De Origine S.R. E Cardinalium	- - -	377
§ II. De Prærogativis Cardinalium	-	381
§ III. De Congregationibus Cardinalium		386
§ IV. De Conclavi	- - -	387
§ V. De Cardinalibus recenter creatis	-	392
Synopsis historica II. De Schismate Orientalis Ecclesiæ	- - -	395
§ I. Photii conspiratio contra S. Ignatium Patriarcham CP.	- - -	397
§ II. Quid in causa Ignatii & Photii gesserit Nicolaus I. S. Pontifex?	- -	400
§ III. Synodus latrocinialis a Photio coacta CPoli contra S. Ignatium	- -	402
§ IV. Nicolaus I. Photianam Synodum irritat. restituit Ignatium, damnat Legatos prævaricatores	- -	405
§ V. Photius Sede dejicitur, iterato intruditur.	- - -	409
§ VI. Cum Photio extinctum Schisma ante Mich. Cerularium non revixit	-	412
DISSERTATIO IV. De Conciliis generalibus	- - -	416
Articulus I. Cujus est convocare Concilium gen. & eidem præsidere convocato	-	418
§ I. Resolvitur quæstio	-	418
§ II. Objectiones solvuntur	- -	427
Articulus II.		

I N D E X.

Articulus II. Qui sunt de jure convocandi ad Concilium	-	-	443
§ I. Resolvitur quæstio	-	-	444
§ II. Solvuntur Objectiones	-	-	448
Petes 1. Quid requiritur ad legitimam celebrationem Concilii generalis?	-	-	456
Petes 2. Quo jure admittuntur ad Concilia S. R. E. Cardinales?	-	-	458
Confectarium	-	-	459
Articulus III. Utrum Concilium generale sit infallibile in definitionibus?	-	-	463
Objectiones solvuntur I. communes I.			
quæ militant contra Concilium Trid.			467
Synopsis historica Conciliorum generalium			482
§ I. De Concilio I, Nicæno Oecumenico I. & Sardicensi	-	-	483
§ II. De Concilio II. Oecumenico CPolitano. I.	-	-	498
§ III. De Ephesino Concilio Oecumenico III.			501
§ IV. De Calcedonensi Concilio Oecumenico IV.	-	-	506
§ V. De Concilio II. CPolitano Oecumenico V.	-	-	509
§ VI. De Concilio III. CPolitano Oecumenico VI.	-	-	512
§ VII. De Concilio II. Nicæno Oecumenico VII.	-	-	515
§ VIII. De Concilio IV. CPolitano Oecumenico VIII.	-	-	521
§ IX. De Concilio I. Lateranensi Oecumenico IX. in Occidente I.	-	-	523
§ X. De Concilio II. Lateranensi Oecumenico X. in Occidente II.	-	-	525
§ XI. De Concilio III. Lateranensi Oecumenico XI. in Occidente III.	-	-	527
			§ XII.

I N D E X

§ XII. De Concilio IV. Lateranensi Oecumenico XII. in Occidente IV.	-	-	529
§ XIII. De Concilio Lugdunensi I. Oecumenico XIII. in Occidente V.	-	-	531
§ XIV. De Concilio Lugdunensi II. Oecumenico XIV. in Occidente VI.	-	-	534
§ XV. De Concilio Viennensi Oecumenico XV. in Occidente VII.	-	-	536
§ XVI. De Concilio Florentino Oecumenico XVI. in Occidente VIII.	-	-	537
§ XVII. De Concilio Lateranensi V. Oecumenico XVII. in Occidente IX.	-	-	541
§ XVIII. De Concilio Tridentino Oecumenico XVIII. in Occid. X. omnium ultimo.			545
Synopsis historica Conciliorum generalium partim legitimorum partim illegitimorum.			549
§ I. De Concilio Sirmienti	-	-	549
§ II. De Concilio Ariminensi	-	-	551
§ III. De Concilio Quinisexto sive Trullano quod erratica Synodus dicitur	-	-	552
§ IV. De Concilio Francofordiensi	-	-	556
§ V. De Concilio Pisano	-	-	557
§ VI. De Concilio Constantiensi	-	-	559
§ VII. De Concilio Basileensi	-	-	571
§ Summus De Conciliis generalibus reprobat	-	-	574
DISSERTATIO V. De Ecclesiæ Catholicæ Patribus & Doctoribus	-	-	576
Articulus I. De dotibus Ecclesiæ Doctorum & PP.	-	-	577
Confectarium	-	-	585
Articulus II. Utrum consensus Patrum sit regula infallibilis fidei?	-	-	586
§ I. Observanda aliqua præmittuntur	-	-	586
§ II. Resolvitur quæstio	-	-	588
§ III. Solvuntur Objectiones	-	-	596
			Con-

I N D E X

Confectaria duo	605
Articulus III. <i>Regulæ nonnullæ in legendis SS.</i>	
<i>Patribus observandæ</i>	609
DISSERTATIO VI. de Spe	621
Articulus I. <i>Quid est Spes, quod ejus ob-</i>	
<i>jectum?</i>	622
Petes 1. <i>An licitum est spem in homine, aut aliâ</i>	
<i>creatura reponere?</i>	625
Petes 2. <i>Utrum alteri sperare salutem sit actus</i>	
<i>spei?</i>	625
Articulus II. <i>De subjecto spei</i>	627
Petes 1. <i>Quid si cui damnationis suæ fieret</i>	
<i>revelatio?</i>	631
Petes 2. <i>Quam certitudinem habet spes?</i> ibidem	
Petes 3. <i>Qualis in peccatoribus est spes</i>	635
Petes 4. <i>Quo tempore hujus mandati observa-</i>	
<i>tio?</i>	636
Articulus III. <i>De timore, Spei dote</i>	638
§ I. <i>Quadruplex timor explicatur</i>	639
§ II. <i>An timor servilis sit salutaris?</i>	642
Petes 1. <i>Utrum timor servilis & initialis sint</i>	
<i>idem in substantia?</i>	650
Petes 2. <i>Quinam timor est donum Spiritus S.</i>	651
Petes 3. <i>Daturne timoris præceptum?</i>	651
Articulus IV. <i>De vitis spei oppositis</i>	652
Petes 1. <i>Estne semper hæresi conjuncta despe-</i>	
<i>ratio?</i>	653
Petes 2. <i>An licite desperet ille, cui facta de</i>	
<i>propria damnatione revelatio?</i>	653
<i>Advertendum</i>	654
DISSERTATIO VII. De Charitate	655
Articulus I. <i>Natura charitatis Theologicæ ex-</i>	
<i>plicatur</i>	656
Articulus II. <i>De dotibus Theologicæ chari-</i>	
<i>tis</i>	657
Articulus III. <i>De proprietatibus charitatis</i>	663
§ I.	

I N D E X.

§ I. De augmento charitatis	666
Petes 1. Utrum charitas in hac vita possit esse perfecta	667
§ II. De diminutione & amissione charitatis	669
Articulus IV. Utrum in hac vita detur status amoris puri?	670
§ I. Synopsis historica recentiorum Quietistarum.	670
§ II. Resolvitur quæstio	673
§ III. Objectiones solvuntur	681
§ IV. Confectarium	698
Articulus V. De charitate erga proximum	703
§ I. De præceptis charitatis erga proximum.	
Petes 1. Præceptum illud obligatne, ut peculiaribus actibus internis proximum diligamus?	704
Petes 2. Obligatne perse hoc præceptum ad proximi dilectionem	705
Petes 3. Præceptum istud, quo jubemur per se proximum in communi, amore interno & formali prosequi, quam frequenter obligat?	706
Petes 4. Quoties præceptum istud obligat per accidens?	706
Petes 5. Quid significat præceptum urgere ad proximi dilectionem in particulari, quantum ad animi promptitudinem	707
§ II. Regulæ servandæ in dilectione proximi	708
Confectarium	714
§ III. Ordo in charitate servandus	715
Petes 1. An quis se ipsum magis quam proximum diligere debeat?	719
Petes 2. Teneturne homo vitam corporalem magis diligere, quam vitam corporalem proximi	719
Petes 3. Teneturne cum vitæ periculo & bonorum	rum

INDEX.

<i>rum temporalium jactura quis succurrere extre-</i>	
<i>mae necessitati spirituali proximi</i>	- 721
Petes 4. <i>Qui sunt in dilectione praefereendi?</i>	725
§ IV. <i>De inimicorum dilectione</i>	-
Petes 1. <i>An dabatur in veteri lege praeceptum</i>	
<i>diligendi inimicos?</i>	- 727
Petes 2. <i>Quid imponit praeceptum hoc, ut affir-</i>	
<i>mans est, quid vetat ut negans est?</i>	- 728
Petes 3. <i>Licetne aliquando inimicum non</i>	
<i>salutare?</i>	- 729
Articulus VI. <i>De correctione fraterna</i>	-
Petes 1. <i>Quae sunt conditiones ut praeceptum</i>	
<i>fraternae correctionis urgeat & obliget?</i>	731
Petes 2. <i>Utrum tam iusti, quam peccatores</i>	
<i>corrigere debeant proximum delinquen-</i>	
<i>tem?</i>	- 732
Petes 3. <i>Utrum Praelati Ecclesiastici peccent,</i>	
<i>subditos corripientes, dum ipsi sunt peccati</i>	
<i>labe polluti?</i>	- 732
Petes 4. <i>Tenenturne subditi suos corripere</i>	
<i>Superiores?</i>	- 733
Petes 5. <i>Qui sunt superiores qui speciali jure</i>	
<i>ad correctionem tenentur?</i>	- 733
Petes 6. <i>Hæc major Superiorum obligatio ef-</i>	
<i>ficetne, ut in mores subditorum inquirere de-</i>	
<i>beant?</i>	- 734
Petes VII. <i>Quis est ordo in correctione frater-</i>	
<i>na servandus?</i>	- 735
Confectarium	- 738
Articulus VII. <i>De vitiis charitati oppositis</i>	741
§ I. <i>De odio DEI & proximi</i>	- 741
Confectarium	- 743
§ II. <i>De acedia</i>	- 745
Confectarium	- 747
§ III. <i>De vitio invidia</i>	- 747
Confectarium	- 748

I N D E X.

§ IV. <i>De discordia, contentione & schismate.</i>	749
Petes 1. <i>Quid est discordia?</i>	749
Petes 2. <i>Quid est contentio?</i>	749
Confectarium	750
Petes 3. <i>Quid est schisma?</i>	751
Confectarium	751
§ V. <i>De Bello</i>	753
Petes 1. <i>Quæ requiruntur conditiones ad belli justitiam necessariæ?</i>	754
Petes 2. <i>Quæ notitia de belli justitia necessaria militibus est ut parere Regi præcipienti vale- ant?</i>	754
§ VI. <i>De rixa, seditione, & duello</i>	755
Epilogus, & finis	759



Pag.	Versus.	Errata	Corrige.
11.	- - 5	- - -	sequeretur.
27.	- - 11.	- - -	doctrinam & voluntatem Dei
29.	- - 2	- - -	Ecclesie commoveret Ecclesie Catholice commoveret
35	- - - 5	- - -	Ecclesie quid Ecclesia est quid
39.	- - - 27	- - -	Habeat habeant.
53.	- - - 26	- - -	Visibilem Invisibilem
88	- - - 6	- - -	Ad Antonium Ad Antoninum
89	- - - 15	- - -	Ad salutem Ad salutem
95	- - - 10	- - -	Maehometis Maehometis.
105	- - - 12	- - -	Colligentur Colligantur
110	- - - 21	- - -	Pachalis Paschalis
114	- - - 12	- - -	Inter Corinthos Inter Corinthios
118	- - - 5	- - -	& ejus & ius
127	- - - 3	- - -	Authorem Authorem
180	- - - 7	- - -	Literari Literali
188	- - - 21	- - -	Efficacissimas Efficacissima
202	- - - 14	- - -	Doctrina Doctrina
214	- - - 27	- - -	Continetur verbo Continetur in verbo
227	- - - 3	- - -	Enlluart Billuart
228	- - - 18	- - -	modio odio
231	- - - 8	- - -	Mature Maturo
234	- - - 3	- - -	universals universalis
259	- - - 5	- - -	Cæpha Cæphæ
299	- - - 1	- - -	Dico Eici
308	- - - 6	- - -	Apollianorum Apellianorum
343	- - - 5	- - -	temporalibus in ordine temporalibus & disponere de rebus temporalibus in ordine.
367	- - - 4	- - -	Immediatè Deo Immediate à Deo
370	- - - 4	- - -	ut successor ut est eius successor.
371	- - - 25	- - -	& si quidem & siquidem
383	- - - 9	- - -	seu in Apostolatus seu ut in Apostolatus
383	- - - 20	- - -	teneant tenent
390	- - - 19	- - -	Clemens IV. Clemens VI.
394	- - - 1	- - -	non pigneat hic observandum observandum non pigneat hic observare

399	-	-	28	-	um	-	-	-	-	cum
401	-	-	9	-	commisit	-	-	-	-	commisit
403	-	-	23	-	saecuribus	-	-	-	-	saecularibus
405	-	-	7	-	hanc	-	-	-	-	hunc
409	-	-	9	-	Reliquorum sedium	Reliquarum sedi-	um			
412	-	-	2	-	Rova	-	-	-	-	Nova
416	-	-	5	-	cogregatorum	-	-	-	-	congregatorum
419	-	-	12	-	Cæos	-	-	-	-	Cælos
419	-	-	23	-	esset dicit	-	-	-	-	esse dicit
421	-	-	2	-	concilium	-	-	-	-	concilium
424	-	-	25	-	Machiae	-	-	-	-	Mathiae
493	-	-	1	-	Baptism	-	-	-	-	Baptisma
	-	-		-	item invalidum	-	-	-	-	invalidum
550	-	-	21	-	Dumnantur	-	-	-	-	Damnantur
559	-	-	13	-	vicleffista	-	-	-	-	vicleffas
568	-	-	21	-	adiumenta	-	-	-	-	adutamenta
585	-	-		-	ultimo	-	57	-	-	- 37
607	-	-	8	-	dilucuto	-	-	-	-	diluculo
603	-	-	3	-	fortitudo	-	-	-	-	fortitudo
671	-	-	14	-	inferebant	-	-	-	-	inferebat
689	-	-	11	-	in Cælis	-	-	-	-	in Cælo
712	-	-	21	-	inviceni	-	-	-	-	invicem
735	-	-	25	-	Cariositate	-	-	-	-	Curiositate
737	-	-	20	-	Hinc	-	-	-	-	Hic
738	-	-	17	-	nequit	-	-	-	-	nequit
743	-	-	16	-	privatam	-	-	-	-	privatamq:
744	-	-	23	-	libris	-	-	-	-	liberis
762	-	-	23	-	nutricuntur	-	-	-	-	nutriuntur
763	-	-	1	-	vocibus	-	-	-	-	vicibus



PROEMIUM.

Ecce Charissime Discipule post Dissertationes de DEO Trino, Creatore visibilium & invisibilium; post Dissertationes de gratia Salvatoris, post explicatam Oeconomiam ineffabilis Mysterij Incarnationis Verbi Divini, lubens tibi offero Tractatum de Virtutibus Theologicis, eo quidem alacriori animo, quod ipse nativo quodam, & quasi hæreditario jure ad te redeat. Hic enim est, qui tui causâ jam dudum, ut ita dicam præformatus erat, tibiq; ad calamum datus, hic idem ipse, cui primam originem, idem progressum, & publicam tandem lucem dedit S. Religionis erga te amor.

Et verò cum omnis Theologiæ pars utilis sit ac necessaria, ea certe, quæ de Divina Fide, Spe, ac Charitate agit nulli omnino cedit, & quo ad eruditionem comparandam, mores componendos, DEUMq; laudandum & assequendum; nam *accedentem ad DEUM credere oportet.* Hebr: 11. Enimvero & quid tot Dissertationes de DEO rebusq;

Divinis, si ipse non cognoscatur? Quorsum ut plenitudo totius boni prædicator? si animus ad illud bonum capeffendum, spe non erigatur? Sed quæ erit spei fiducia, si terminum, in quo illo bono fruendum est, charitas non attingat.

In subsidium fidei Theologicæ venire potest Philosophia & ratio, non quidem ut Magistra, ad cuius nutum Religionis dogmata definienda sint; sed ut ancilla, quæ dominatrici fidei subserviat, non præsit. Fidei quippe authoritas ut ex se firma est, & inconcussa, nec aliunde, quam à prima Veritate attestante immutabili certitudine donatur, ita è contrario humana ratio nullo lumine fidei illustrata omnino cæca est, præceps ac infirma.

Hinc merito discas rationi quidem locum dare in rebus ad Religionem spectantibus, sed ita tamen ut Authoritas primatum teneat; *Authoritas fidem flagitat, & rationi præparat hominem; ratio ad intellectum, cognitionemq; perducit. Quanquam neq; authoritatem ratio penitus deserit; cum consideratur, cui sit credendum, ait S. Aug: lib: de Relig: cap:*

cap: 24. Quid verò rationabilius est, quam DEO T. O. M. loquenti assensum suum præbere, captivando interim intellectum in obsequium? ut monet Apostolus.

Accurate ergo distingue fidem a ratione, nec unquam in mentem veniat, fidei veritates rectæ rationi oppositas esse, ut homines increduli dogmatizare solent dicentes: *nihil credendum esse, nisi in ratione probetur fundatum, fidem-que rationi subjiciendam esse.* Hæc ratio, ut fert eorum opinio, est dux una, cujus ductû satis & abunde cognosci potest religio, quæ hominem ad beatitudinem evehere possit. Ita & scribunt & loquuntur Divinæ fidei Adversarij, qui Naturalistarum nomine hac ætate per Europam grassantur; quorum libri eò magis perniciosi sunt, quo se ad speciem, impietatis hostes profitescentes, summisq; laudibus rationem, & Religionem imaginariam, quæ parum aut nihil ab Atheismo differt, profiteantur. Post antiquos Fidei Christianæ hostes, *Celsus, Lucianum, Porphyrium* aliosque, noti sunt in hoc impietatis genere *Tyndalus, Collinsius, Wol-*

stonus, Volterus, Helvetius, Roussojus, aliiq; plurimi, qui dum fidei Divinae existentiam impugnant, hac ipsa ratione fundamenta ipsa naturalis religionis, cujus alioquin sese vehementes Patronos profitentur, evertunt.

Tibi Author sum, ut S. THOMÆ Opera diligenter pervolvās, qui jam pluribus ante, materiam hanc pertractaverat, eoq; admirabili & omni exceptione majori ingenii acumine, quo ut *Volfius* alioquin Acatholicus homo ait, in evolvendis, discutiendisq; argumentis, vel maximè sublimibus, excelsisq; præstabat, prævidit, quidquid jam nostra ætate in hac materia excogitatum dictumq; fuit; & fieri non posse, ut fides adversetur rationi. Vide lib: 1. contra Gentes cap: 7.





DISSERTATIO I.

DE FIDE THEOLOGICA EJUSQUE
ACTIBUS.



Idem olim, qua Christiani suæ Religionis Mysteriis assensum præbebant, irriderunt & nunc irrident Idololatæ, quos Christiani nominetenus sequuntur moderni Pseudo-Philosophi, Naturalistæ, & Atheistæ.

ARTICULUS I.

De natura fidei Theologicæ.

Ne in nominis Ethymologia anceps hæreas, to *fides*, varias habet signific-

ficationes in S. literis; 1. sumi solet
 pro *fidelitate*, quæ est *virtus præbens con-*
stantiam in servandis promissis & conven-
tionibus, hoc modo fidem sumit Apost:
 ad Rom: 3. *Nunquid incredulitas eorum*
fidem Dei evacuabit? 2. Pro *Veracitate*,
 hoc sensû 1. Apoc: Christus appella-
 tur. *Testis fidelis* 3. Pro *promissione fide-*
litis objecto. 1. ad Tim: 5. *primam*
fidem irritam fecerunt 4. Pro *conscientia*,
 sic communiter dicitur possessor bonæ
 vel malæ fidei, hoc sensû dixit Apost:
 Rom: 14. *Omne autem, quod non est ex*
fide, peccatum est; id est, quod non sit
 ex conscientia, quâ existimatur esse
 licitum, peccatum est. 5. pro *gratia gra-*
tis data, 1. Corint: 15. *alteri (datur)*
fides in eodem Spiritu. Porro talis gra-
 tia consistit in quadam excellenti cer-
 titudine circa res fidei Catholicæ, qua
 homo fit idoneus ad alios in illius do-
 ctrina erudiendos. 6. Pro *dono Spiritûs*
S. cujus nomine intelligitur actus in-
 tellectûs cum suavitate elicitus, pro-
 ferens magnam certitudinem de rebus
 fidei. 7. Pro *fiducia* & in hoc sensu
 abutuntur voce *fides* Novatores, dum
 ajunt

ajunt homines justificari per fidem, qua confidunt sibi remitti peccata per Christum. Hæc acceptio fidei pro *fiducia* in hoc sensu hæretico rejicienda est; admittenda tamen tanquam effectus fidei, imo & spei; ex eo enim quod Deo credimus, & in eum speramus, concipimus fiduciam in ipsum. 8. Pro *ipsis rebus creditis* sic v. g. Christum incarnatum esse fides est. 9. Pro *habitu*, quo inclinamur ad assentiendum revelatis, vel pro *actu*, quo defacto assensum præbemus Deo revelanti, & hæc est fides Divina seu Theologica. Sic vero hanc fidem definitam legimus. Hebr: 11. *Sperandarum substantia rerum, argumentum non apparentium.* Ubi to *argumentum* intellige firmam adhæSIONem rebus non apparentibus; quia ut ait S. Thomas, *per auctoritatem Divinam intellectus credentis convincitur ad assentiendum his quæ non videt.* Unde hæc fidei definitio deducitur: *est habitus supernaturalis intellectui infusus, quo veritatibus à DEO revelatis assensum præstamus.*

Ex his facile intelligis, circa res quales fides Theologica versatur, nempe

pe principaliter circa ipsum DEUM; quia *accedentem ad DEUM credere oportet*. Hebr: 11. Sed quoniam hic accessus fit per media, proinde fit quoque consequens, omnem rem revelatam fidei objectum materiale esse. Objectum vero formale *quod* sive ratio *quæ* fidei est DEUS, ut in se prima veritas est excedens rationem naturalem; ratio autem sub *qua* fidei sive ratio formalis credendi, idem ipse DEUS est ut prima veritas in dicendo, & revelando ea, quæ non apparent. Omnis enim fides innititur authoritati dicentis; ideo enim alicui credimus; non quia est justus, vel sapiens, sed quia verax, consequenter id, cui innititur fides Christiana, est authoritas DEI tanquam veracis, seu quod idem, quia est prima veritas in dicendo. Unde Christus exigens fidem à Judæis, proponit DEI veritatem in dicendo tanquam motivum: *Qui me misit verax est, & ego, quæ audiui ab eo, hæc loquor in mundo*. Joan: 6.

Hic velim advertas, quod in hoc complexo *prima veritas*, sive *veracitas in dicendo & revelando* duo dicit; nimirum,

pri-

primam veracitatem, & locutionem sive revelationem. Motivum ergo credendi non est exterior locutio & revelatio, sed ipsa Divina veracitas. Quamvis enim non credamus alicui nisi dicenti & revelanti secretum, non tamen ideo credimus, quia loquitur & revelat, sed quia existimamus eum veracem in dictis suis, proinde revelatio se habet ad modum conditionis nobis applicantis veracitatem DEI, & sine qua credere non possemus.

Certum quidem est, quod cum DEUS revelat Beatis, quæ per lumen gloriæ non vident, ipsi revelatis assensum præbent eâ solâ ratione, quia DEUS revelat, & tamen fides in eis locum non habet, sed id insuper indubitatum est Beatos assentiri revelatis per revelationem claram, eis ostendentem ea, quæ revelantur ad modum, quô Prophetis revelantur clarè multa contingentia. Sic Prophetæ lumine propheticô perfusi videbant Christi passionem futuram, ejusq; circumstantias & quidem clarè; quod autem ille, qui passurus erat, esset DEUS, hoc obscurè & per fidem cognoscebant;

bant; sicq; in illis erat fides, ex ea parte, qua illi suberat aliquid æternum, & prophetia ratione temporalis, quod videbatur; Beatis autem nihil est obscurum; nam & temporale eis clarè revelatur, & æternum in Deo revelante per visionem beatam intuentur clarè.

Habes indè discrimen inter revelationem, cui fides innititur, & prophetiam; nam prima est obscura & ænigmatica, quoniam fides non videt, quod credit, proinde intellectus credentis captivatur in obsequium fidei, ex doctrina Apostoli. At revelatio prophetica per se non petit obscuritatem, sed potius claram rei, quam prædicit, visionem. Ex hoc capite Prophetæ dicuntur *Videntes* in Libris Judicum; & Prophetia sæpissime vocatur *Visio* in Scripturis. Fit consequens, in CHRISTO, in quo ratione claræ visionis beatæ fides non erat, fuisse Prophetiam; quia de ratione Prophetiæ est quidem annuntiare ea, quæ procul sunt à communi sensu vel secundum locum, vel secundum tempus hominum, quibus prænuntiantur; non tamen, quod sint procul & obscura ipsi Prophetæ.

AR.

ARTICULUS II.

De Analyfi five resolutione Fidei Christianæ.

Analyleos five resolutionis nomine intellige *mentis regressum ad inquirendum motivum, illiusq; determinativum ad assensum.* vg. si a te quærat, unde tibi constat Deum esse trinum? ais, quia Deus, qui verax est, hoc dixit; at quia, potest ulterius quæstio promoveri: unde constat hoc vel illud DEUM dixisse? respondebant olim Manichæi, & nunc multi Pseudo-Philosophi, quia hoc rationi congruum est, nunc Lutherani & Calvinistæ, quia Scriptura testatur; alii, quia Ecclesia nos docet.

§ I.

An ultima fidei Divinæ resolutio fiat in humanum ratiocinium?

Ut jam dixi Manichæi apud S. Augustinum lib. de Utilitate credendi superstitiosum esse ajebant, fidem ante rationem imperare, hoc ideo, quia nihil credendum esse docuerunt, præterquam id quod ratio suaserit. Hunc errorem adoptatum ab Abailardo legimus
in

in Epist: 190. *S. Bernardi, fidem, ait S. Doctor de Abailardo definit æstimationem, quasi cuiquẽ in ea sentire, & loqui, quæ lubeat, liceat.* Horum vestigiis insistent moderno sæculô plurimi Pseudo-Philosophi, qui Naturalistarum nomine assumpto in illud doctrinæ caput conspirarunt: *nihil esse credendum, nisi in ratione probetur fundatum*, ipsam primam fidei regulam Divinam nempe Scripturam, ajunt, rationi subijciendam esse. Contra hoc hominum incredulorum genus acturi, hic pauca dicemus, plura dabimus in Tractatu de religione revelata. Igitur.

DICO: FIDEI NOSTRÆ RESOLUTIO IN HUMANÆ MENTIS RATIOCINIUM NEQUIT, NEC FIERI POTEST. *Ita fides Catholica.*

Prob: 1. Juxta Scripturam fides Christiana non fundatur in sapientia hominum, dicente Apostolo 1. Corint: 2. Et prædicatio mea non in persuasibilibus humanæ sapientiæ verbis, sed in ostensione Spiritûs & virtutis, ut fides vestra non sit in sapientia hominum, sed in virtute Dei, quam nemo Principum huius sæculi cognovit. Hinc
idem

idem Apost: 2. Corint 10. vult esse fideles *in captivitatem redigentes omnem intellectum in obsequium Christi*, atqui si &c. fides nostra 1, esset fundata in sapientia hominum 2. importuna & nullatenus necessaria esset captivitas intellectus in obsequium Christi & fidei, si ea tantum crederent fideles, ad quæ credenda ratione naturali moverentur. Proindé Christus laudaturus fidem Petri, qui eum Filium Dei vivi confessus fuerat, reposuit confitenti: *Caro & sanguis non revelavit tibi* (hoc est, hanc veritatem confessionis lumine ac naturali ratiociniô intellectus Petre non es assecutus) *sed Pater meus, qui in Cælis est. Ergo.*

Prob. 2. ex communi consensu Patrum missis aliis, paucos refero, S. Augustinus lib. 1. de moribus Ecclesiæ cap. 2. contra hæreticos disputans tali modo arguit: *Unde igitur exordiar? Ab autoritate an à ratione? Naturæ quidem ordo se habet ut cum aliquid discimus, rationem præcedat autoritas.* Nam ut ait Serm. 51. de Verbis Domini in Editione nova Serm. 139. cap. 1. *Fides enim debet precedere intellectum ut sit intellectus fidei præmium. Propheta enim*
aper-

apertissime dixit? (Isaia 7.) nisi credideritis non intelligetis. S. Chrysost: Hom: 83. in Math. Credamus Deo inquit ---- etiamsi sensui & cogitationi nostræ absurdum esse videatur, quod dicit, & superet sensum & rationem nostram sermo ipsius. Idem habet Cyrillus Alexand. libr 4. in Joan. cap. 4. & alii.

Prob. 3. ex absurdis sequelis, Si enim fidei nostræ resolutio in humanæ mentis ratiocinium reduci posset, sequerentur 1. cognitione fidem generari 2. Fidem Divinam infallibilem non esse 3. Mysteria Fidei nihil mysterij habere. 4. Intellectum creatum fore primam veritatis mensuram; atqui hæ sequelæ sunt absurdæ. Ergo. Prob. min. Prima namq; sequela evertit naturam fidei; ubi enim cognitio præcedit, fides locum non habet, ut nōrunt omnes.

Secunda patet, quia vis intellectûs humani, quæ foret regula fidei, infallibilis non est ut quotidiana docet experientia. Tertia probatur: Mysterium enim est arcanum & absconditum ab intelligentia communi, quod si comprehendatur, sicut arcanum & absconditum, ita Mysterium esse desinit.

Hinc

Hinc consequens foret opera Dei imo ipsam Divinam naturam ab intellectu humano comprehendi posse, quod est hæresis *Eunomii*. Si autem opera Dei comprehendi possent, sequerentur
1. DEUM supra naturam operari nihil omnino posse 2. Naturam Dei infinitam non fore, quemadmodum intellectus creatus infinitus non est, infinitum enim a finito comprehendi non potest. Quarta sequela manifesta est. Indubitatum ergo est illud *S. Augustini* monitum *Epist. 118. alias 56. ad Dioscorum cap. 5.* quod fides ducere debet rationem, non ratio fidem: & contrarium docere, ait, hæreticorum omnium quasi regularis ista est temeritas. Ergo.

Obijcies 1. Quodcumq; proponitur ut fide credatur divina, examinandum est, ut prudenter credatur; ergo. *Prob. Ant:* Corde levis est, qui id, quod ad credendum proponitur, non examinat, nam *qui cito credit, levis est corde Eccl: cap: 19.* ergo.

Resp. exponendo textum. Qui cito credit homini, *conc. Deo nego.* Litera-
lis

lis ergo sensus est; homini qui falli, & fallere potest non esse citò credendum, sed prius explorandum qualitatem personæ, quæ loquitur, & testatur, Unde Ecclesiastico sermo est de fide humana non Divina. Si enim certè constat DEUM loqui, qui nec fallere nec falli potest, eò prudentius, quò citiùs credendum est.

Subsumes: Atqui cito credens Deo levis est corde: *Prob.* Credens Deo, prudenter assentiri debet ejus dictis; sed si citò credit prudenter non assentitur ejus dictis; ergo.

Prob min. Qui vult prudenter assentiri dictis, debet juxta regulam Apost: ad Thessal. 5. *Omnia probare, & quod bonum est, tenere;* atqui cito credens omnia non probat ut id, quod bonum est, teneat; ergo.

Resp: exponendo textum. Omnia probare quando proponitur credendum aliquid, quod universa semper tenuit Ecclesia, & certe constat id a Spiritu S. proficisci, nego; secus *Conc.* Contingit enim, quod aliqui se Prophetas Dei venditantes plurima ex parte Dei se nobis nunti-

nuntiare mentiuntur, præter traditam doctrinam, & ab Ecclesia probatam (ut Novatores facere consueverunt) ab his exigenda sunt prætensæ missionis signa & indicia; contra hos loquitur Apostolus fideles commonefaciendo, quod etiam Joan: in 1. Epist: cap. 4. præstitit dum probare jubet Spiritus, si ex Deo sunt.

Dices: Etiam quando proponitur aliquid, quod universa tenet Ecclesia licet examinare & probare. *Prob. B. Virgo MARIA* mysterium Incarnationis à Synagoga creditum examinavit, & Angeli dicta probavit. *Lucae 1. cogitando qualis esset ista salutatio.*

Resp. ad prob. dist. ant. examinavit quantum ad ea, quæ sciebat a Deo proficisci; *nego.* quantum ad circumstantias ipsius Nuntii, *conc.* Mysterium Incarnationis B. Virgo cum Synagoga credidit; at prudenter examinavit seriem rei gerendæ, cogitando qualis esset ista salutatio; quia primo aspectû timere poterat, an qui loquebatur, esset verus an ementitus DEI nuntius, quia tam magnum Mysterium in se complendum

nuntiavit. Verum statim ac cognovit verbum Angeli esse verbum Dei, absq; hæsitatione, & ulteriore examine credens, *ecce inquit, ancilla Domini fiat mihi secundum verbum tuum.* Quare nec citius, nec tardius credidit, quam oportuit.

Instabis: Atqui etiam ea, quæ per revelationem à Deo proficisci scimus, rationi debent subjici; *Prob:* Etiam ea quæ a Deo per revelationem proficisci scimus ex evidenti ratione credi debent; ergo. *Prob: Ant:* Si enim absq; evidenti ratione ea, quæ Deus revelat, credi deberent, plura credi poterant contra manifestam rationem, excusandiq; erunt infideles, si plura contra rationem credant; ergo.

Resp: nego utramq; *prob:* Nam ea, quæ credenda per fidem proponuntur sunt quidem supra, non contra rationem. Sed ais unde hoc innotescit? Inde quod licet demonstrari non possint, ostendi tamen potest, ea rationi non repugnare. Tandem ea esse à Deo dicta, & proinde prudentissime credibilia motiva credibilitatis evincunt; nihil au-

tem

tem horum habent infideles, quod eos excuset.

Objic: 2. 1. Petri 2. Apostolus jubet esse paratos ad reddendam rationem de ea, quæ in nobis est, spe, & ideo de ea, quæ in nobis est fide. Confirm: ex S. Aug. qui lib. 14. de Trinit: cap. 1. docet: rerum naturalium notionem fidem gignere, nutrire, & roborare; ergo.

Resp: Hujusmodi rationes jubet Petrus à doctoribus fidelium reddi, quæ videlicet cum fidem antecedunt, infideles non trahant, sed inducant; cum vero sequuntur, vim fidelibus non afferant, sed adjiciant robur. Disciplina namq; Christiana non est omni ex parte similis Pythagoricæ, cujus Alumni nulla rationis antecepta informatione, nullaq; omnino reddita causa, auctoritatem Præceptoris mordicus tenebant. Indoctorum ista consuetudo, eaq; Saracenorum, Paganorum, Hæreticorum, ut cæca & temeraria suæ sectæ dogmata sine judicio amplectantur; non erudiuntur isti, sed quasi veneficiis & incantationibus in insaniam agitantur. Nos Christiani habemus, ut jam dixi, & a-

libi plura dicentur, clarissima motiva credibilitatis, de quibus Apostolus & Augustinus loquitur; nam propugnat S. Augustinus quod rebus naturalibus exploratè perceptis & cognitis statim intelligitur, fidem cum natura nullo modo pugnare, sed mirifice consentire. *Vide Canum lib. 12. cap. 5. ad 2.*

CONSECTARIUM

1. **V**ehementissime errare eos ac decipi, qui philosophicis rationibus Mysteria incomprehensibilia fidei comprobari, & explicari posse effutiunt, quorum e numero comparet *Kekermannus* Dantiscanus in *Sistematē Theologico* cap. 3. *Mysterium SS. Trinitatis* contra Socinianos naturæ lumine nobis innotescere asseverans. Quo cum manus junxerunt, quamvis alio ex titulo, *Naturalistarum* turbæ, quia Mysteria nihil Mysterij habere dogmatizant cum impio *Spinosa*, aliisq; ejusdem furfuris hominibus circa usum recentis *Philosophiæ* in revelatis Mysteriis pertractandis. Hos in ter eminet *Ludovicus Me-*

Mejer medicus, Parens Libri: Philosophia Scripturæ Interpres, ejusq; discipulus Ludovicus *Volfogenius*, utere; Cartesianus, qui alter asserere non dubitat, tantum abesse cæce credenda esse supernaturalia, ut potius rigorosam expetant demonstrationem.

2dum. Nec tamen existimes fidem adeo esse inimicam rationi, ut ei contraria sit. Fides enim esto sit supernaturali rationem, eidem tamen nullo modò contrariatur, quoniam verum non contrariatur vero; & quamvis ea, quæ docet, non ratione, sed autoritate dicentis credenda sint; patitur tamen, ut ostendatur, ea naturali rationi non repugnare, & sic argumentò negativo fides ipsa confirmatur. Ita enim se gerunt Catholici Doctores, prius credunt mysteria fidei, & deinde difficultates, quæ occurrunt, examinandas proponunt.

§ II.

An fidei nostræ resolutio ultima fiat in Spiritum discretionis?

Protestantes ultimam fidei resolutionem, tum quò ad propositionem cre-

dendorum, tum quò ad assensum rebus propositis volunt fieri debere in S. Scripturam, quod sic solent explicare; regulam discernendi credenda fide Divina a non credendis, moventem ad assensum vel dissensum esse Spiritum particularem privatumq; quem Spiritum discretionis appellant, sive internum motum Spiritus S. cuilibet fidei assistentis, ut si pio & humili corde ad Scripturæ S. meditationem accedat, errare non possit in discernendo, quid sit credendum, quidvé non. Contra quos.

Dico: Ultima fidei resolutio non fit in Spiritum discretionis, qui cuilibet privato fidei adfit.

Prob: Regula, in quam fiat ultima resolutio fidei est modus regendi Ecclesiam; atqui modus iste regendi Ecclesiam per Spiritum privatum internum est alienus tum à modo, quò Deus se gerit in gubernio mundi, quem regit per Principes & Judices; tum à modo quem Christus pro regimine Ecclesiæ præscripsit, præsertim *Joan: 11.* ubi Petro ter dixit: *pasce agnos, pasce oves meas.* Si enim quilibet ex Christi agnis, quæ

quælibet ovis in terno Spiritûs S. motû regitur, quid opus est, ut exterius à Petro in fide & doctrina pasceretur? Ulterius, modus regendi Ecclesiam, est modus unitatis & pacis; atqui modus regendi per Spiritum privatum non est pacis & unitatis, quinimo confusionis & contradictionis, ut patet: Lutherus enim contradicit Calvinô, Calvinus Luthero, & vicissim unus alium condemnat, atq; ut hæreticum traducit; & quod plus est, nedum Lutheranus Lutherano, verum etiam Lutherus sibi ipsi, in rebus fidei contrarius est; & ut alia mitam, pauca refero, anno 1520. lib: de Captivitat: Babyl: docet *Lutherus* duo esse Sacramenta, si tamen juxta Scripturam loquendum est, esse unum tantum. Sed Anno 1522. in locis communibus Melanchtonis dixit esse duo, hoc ipsum Anno 1530. affirmavit in Catechismo; in Confessione 1530. Carolo V. oblata profitebatur esse tria; in Lib: de Potest: Papæ agnovit septem. Et sic in aliis multis ludit Lutherus. Vide *Cochlæum*, qui de his integrum volumen conscripsit, imo de sola communione sub

una

una vel utraq; specie, 36. contradictiones invenit *Casparus Querhamer Saxo laicus* vivente adhuc *Lutherô* editas.

Confirm: In libris Canonicis inveniuntur multi textus ad speciem contrarii, aut explicatû difficiles, qui ex Spiritus privati discretionem conciliari non possunt. Conveniant namq; simul in unum Lutheranus, Calvinista & Catholicus, & in medium proferant hæc verba; *Hoc est corpus meum*, quibus Christi existentia in Eucharistia exprimitur; Spiritus privatus Lutherani Christum ibi esse per consubstantiationem sive impanationem affirmabit; per figuram adesse asseret Spiritus Calvinistæ, Catholicus affirmabit per transubstantiationem; cui credendum? Catholici qui sensum Ecclesiæ, quam regit Spiritus S. sequuntur, concordēs sunt; è contra Novatores, qui Spiritû privato ducuntur, adhuc invicem digladiantur, nec adhuc, quæ sit vera intelligentia, invenerunt. Tandem peto ab Adversarijs, unde sciunt a Deo promissum Spiritum S. cuilibet fidei, qui ei specialiter assistat, ne erret in rebꝯ fidei? Nos ut probemus

mus Spiritum S. assistere Ecclesiæ specialiter, ne erret, inter cætera adferimus verba Christi ad Petrum *Lucæ 22. Rogavi pro te, ut non deficiat fides tua, & tu aliquando conversus confirma Fratres tuos.* Si autem Spiritus S. cuilibet fidei præsto est, cur pro solo Petro Christus rogat? Cur cæteri sunt confirmandi per Petrum?

Obji: amo. Spiritus S. regit & dirigit quemq; fidelem; ergo *Prob: Ant: 1. Corint: 3.* quilibet fidelis vocatur templum DEI, quod Spiritus S. inhabitat; ergo.

Resp: dist: prob: vocatur templum DEI ratione gratiæ, donorum supernaturalium, imo ob præsentiam Spiritus S. inhabitantis, *conc:* ratione infallibilitatis in discernendis & examinandis rebus fidei, *nego:* Hæc enim infallibilitas, hæc discretio promissa est à Christo toti Ecclesiæ, & capiti ejus, non verò unicuiq; personæ in particulari. Unde *Math: 18.* Christus ad Petrum futurum aliquando Ecclesiæ caput dixit: *tu es Petrus, & supra hanc petram ædificabo Ecclesiam meam.*

Dices:

Dices: atqui assistentia Spiritûs S. cuilibet fidei promissa est in rebus fidei. *Prob:* Math: 10. dicit Christus ad Discipulos: *Cum steteritis ante Reges & Præsides nolite cogitare &c. non enim vos estis, qui loquimini, sed Spiritus Patris vestri, qui loquitur in vobis;* atqui hic est assistentia Spiritus S. cuilibet personæ promissa; ergo.

Resp: Ibi sermonem esse de Apostolis, quibus ad prædicandum mittendis Spiritus S. ea omnia suggesturus erat, quæ ipsos Christus docuit; unde Apostoli non innitebantur privato instinctui, tanquam medio credendi, sed doctrinæ Christi, cujus evidentiam credibilitatis per lumen propheticum habebant. Et admissô, illud privilegium assistentiæ Spiritus S. Apostolis datum fuisse tanquam primis Ecclesiæ columnis, nihil inde concludi potest, pro Spiritu privato cujuslibet fidelis, imo contrarium evincitur; nam hi, qui inerrantiæ privilegio præventi erant *Act: 25.* Concilium coegerunt, cui Petrus præsidebat, disceptationem instituunt, ut veritatem eruerent, Paulus

lus Jerosolimam vadit ad conferendum cum Apostolis Evangelium, quod non ab homine didicerat, sed immediate à Christo per revelationem, ne forte in vanum curreret, aut cucurrisset.

Instabis. Qui sunt docti a Domino, non a proximo; qui habent Spiritum unctionis, quo omnia judicent, & ipsi a nemine judicentur, qui habent Spiritum Christi, illi habent spiritum discretionis; atqui hoc contingit in fidelibus, ergo. *Prob: min: 1. Isaia 54.* DEUS dicit: *ponam universos filios tuos doctos a Domino.* Idem legitur Joan: 6. cap: 2do. Jerem: 31. *Dabo legem meam in visceribus eorum, & in corde eorum scribam eam, & non docebit ultra vir proximum suum.* Idem legitur cap: 8. ad Hebr: 3tio. Joannes in 1. Epist: cap: 2. hortatur fideles: *maneant (unctio) in vobis, & non necesse habetis, ut aliquis doceat vos; sed sicut unctio docet vos de omnibus.* 4to. Apost: 1. Corint: 2. dicit: *Spiritualis autem judicat omnia, & ipse a nemine judicatur.* Ibidem; 5to. *Nos autem Spiritum Christi habemus; ergo.*

Resp: 1. Dist: Maj: Qui sunt &c. illi
ha-

habent Spiritum discretionis in sensu Novatorum *nego*; in sensu Ecclesiæ *concedo*. Patebit ex dicendis.

Resp: 2. Opponendo similes textus *Math. 13. vobis datum est nosse mysteria regni cælorum, illis autem non est datum. Hebr 5. Rursus indigetis, ut vos doceamini, quæ sunt elementa exordii sermonum Dei.* Et paulo ante dixit Apost: se habere *grandem sermonem de Melchisedech*, sed illos esse imbecilles ad audiendum. Ex quibus apparet non omnes esse docibiles in sensu Novatorum.

Resp: 3. Citatis locis promitti solum majorem docilitatem fidelibus novi Testamenti, quam fuerit in veteri, ita tamen ut docilitas ista esset juxta ordinem & modum, quem Christus in Ecclesia reliquit, ut essent Pastores & Doctores quidam, qui alios docerent, non autem, ut omnes habeant propriam scientiam & Spiritum; alioquin enim illud planè otiosum esset monitum Apostoli *Act: 10. Attendite vobis & universo gregi, in quo vos Spiritus S. posuit Episcopos regere Ecclesiam Dei.*

Resp: 4. ad singula; *ad 1. & 2. patet;*

tet: ad 3. Unctio illa, de qua Joannes, non est Spiritus discretionis, quem excogitarunt Novatores, sed fides ipsa ab Apostolis illis tradita, a qua ne excidant, monet, cum ipsa doceat omnia, nec ulterius egent, ut doceantur, quasi diceret; sufficienter docti estis ea, quæ credere debetis, ab Apostolis, nec oportet, ut aliam doctrinam audiatis. Imo si fideles illi Spiritum prætensæ discretionis accepissent, cur ipsos monet sollicitè Joannes, ut caveant a falsa doctrina, quam per hunc Spiritum nosse & declinare possent. *Ad 4.* Homo Spiritualis quatenus verè agitur & regitur à Spiritu S. rectè omnia judicat, & dum manet in unctione Spiritus, qui eum docuit, non eget doceri ab alio; sed quis certus est, se semper agere ut Spiritualem, sive agi a Divino Spiritu. Multi se a Divino Spiritu agi putant, qui vel a malo vel proprio aguntur, ut *3. Regum 22.* legimus. Providè igitur monemur *1. Joan: 4.* non omni Spiritui credere, sed probare Spiritus, si ex Deo sunt. Igitur si debemus probare

bare & dijudicare Spiritum, ipse non potest esse judex noster, cum non liceat Judicem judicare. Loquitur ergo Apost: de doctrina sua spiritualiter intelligenda, deq; consideratione rerum spiritualium, avertendo intellectum à sensualitate animali & carnali; non autem de judicandis rebus fidei, præsertim in particulari; hoc namq; judicium non pertinet ad quemvis fidelem. *Hinc patet ad 5.*

Quæris: Quare ergo *Apost: 1. ad Thess: 5.* hanc generalem statuit regulam: *Omnia probate, quod bonum est, tenete.* Hac enim regulâ docet, quemq; probare posse, num illa res sit fidei, nec ne?

Resp: Nullo modò hoc intendit Apost: sed sensus est, ut quis prudenter, & non perperam operetur, præsertim, si nondum habet certam & determinatam regulam in operando, eam invenire debet conari, conferendo & examinando omnia; id si facerent Novatores, nempe si rite omnia conferrent, & examinarent ex quib9 Ecclesia Catholica cognosci potest, sine dubio

me-

meliora reperirent, & ad Ecclesiam, unde exierunt, redirent.

Obji: 2. Illud Joan: 7. Si quis voluerit voluntatem ejus facere, qui misit me, cognoscet de doctrina mea, utrum ex Deo est, Item cap: 10. Oves vocem meam audiunt & sequuntur me; ergo.

Resp: ad 1. textum. sensum illius esse, quod si quis ab impedimentis sæculi hujus obscurantibus intellectum sese expediverit, facile doctrinam Dei cognoscet, & assequetur; sed modo tamen & via ordinaria, scilicet, ex Doctoribus, quos posuit Spiritus S. regere Ecclesiam Dei. *Ad alterum.* Oves Christi vocem ejus audiunt, si eos, quos ille misit audiant, sic enim ipse Dominus docet: *Lucæ 10. qui vos audit, me audit.*

§ III.

An resolutio fidei fiat in propositionem Ecclesiæ?

Jam supra dictum, motivum credendi & assentiendi revelatis esse auctoritatem & veracitatem Dei revelantis, non Ecclesiæ testimonium seu propositionem.

nem. Hic ergo quæstio solum procedit de motivo, seu regula discernendi quæ sint revelata.

Dico: Resolutio fidei fit in propositionem Ecclesiæ, ut regulam discernendi revelata à non revelatis.

Prob: Hanc assertionem manifeste docet Apost: ad *Ephes: 4.* *ut non simus parvuli fluctuantes, & circumferamur omni ventô doctrinæ in nequitia hominum, in astutia ad circumventionem erroris.* Ex quo sic: Necessario admitti debet generalis regula discernens credenda ab iis, quæ credenda non sunt, ne fideles sint fluctuantes, & circumferantur omni ventô doctrinæ; sed talis regula non est Spiritus discretionis, qui potius Spiritus confusionis dicendus est; sed Ecclesia Catholica, contra quam, nè portæ quidem inferi prævalebunt *Math: 16.* *Maj: patet.* Alias Christus sufficienter non providisset suis fidelibus. *Min: prob:* Soli Ecclesiæ specialem assistentiam suam Christus promisit *Math: 28.* *Vobiscum sum usq; ad consummationem sæculi.* Hanc Ecclesiam vocat Apost: *Columnam & firmamentum veritatis* *1. ad Timot:*

Timot: 3. De ea S. August: ait. Evangelio non crederem, nisi me Ecclesiæ commoveret autoritas. Fidem a sola Ecclesia tradi, & ex omni Scriptura muni-ri affirmat S. Cyrillus Jerosol: Hic ve-lim observes. Cum dicimus Ecclesiam esse regulam credendorum, hoc est intelligendum juxta legem ordinariam, & respective ad omnes fideles; nam Deus ipse per se Angelis viatoribus re-velavit Mysteria fidei; similiter primis Parentibus, & Apostoli immediatè ac-ceperunt a DEO notitiam credendo-rum, ut patet ex verbis Christi Math: 10. Caro & sanguis non revelavit tibi (Petre) sed Pater meus. Et Paulus de se ipso ad Gal: 1. scribit: Ego enim non ab homine accepi illud (Evangelium) neq; didici, sed per revelationem JE-SU Christi.

Obj: in favorem Novatorum. Nos com-mittere circulum vitiosum in fidei no-stræ resolutione, nam credimus reve-lationem propter autoritatem Eccle-siæ, & credimus autoritatem Eccle-siæ propter revelationem.

Resp: 1. Nos credere autoritatem

C

Ec-

Ecclesiæ non solum propter revelationem, sed etiam propter notas ipsius Ecclesiæ, & motiva credibilitatis; unde nullus est circulus. 2. Etsi credamus authoritatem Ecclesiæ propter revelationem, non tamen sub eadem ratione, sub qua credimus revelationem propter authoritatem Ecclesiæ, sed sub diversa. Credimus revelationem propter authoritatem Ecclesiæ, ut applicantis & proponentis nobis revelationem; credimus authoritatem Ecclesiæ propter revelationem, seu veracitatem Divinam tanquam motivum formale assensûs, & sic in diverso genere. Causæ enim sunt sibi invicem causæ in diverso genere.

Utraq; responsio familiari exemplo nuntii deferentis regias literas solet explicari. Quando dubitatur de nuntii veracitate, inquiruntur ejus indicia, ubi de illa constat, acceptantur literæ Regis propter veracitatem nuntii; at contentis literarum non creditur propter veracitatem nuntii, sed propter veracitatem Regis; & si in literis Regis asseratur veracitas nuntii, ea firma-

matur & magis creditur propter veracitatem Regis. *Ad casum:* Ecclesia proponit hoc & istud à DEO revelatum, de veracitate & authoritate Ecclesiæ nobis constat ex ejus notis, & motivis credibilitatis, ob quam authoritatem in proponendo infallibilem acceptantur & creduntur hæc esse in Scripturis vel traditione revelata; ipsis autem revelatis sic, credimus propter veracitatem Dei revelantis. Et quia in Scripturis continetur veracitas, & infallibilitas Ecclesiæ, illam ulterius & firmitus credimus, propter authoritatem & veracitatem Dei revelantis. Hinc evidens est notitiam veracitatis Ecclesiæ, licet per Scripturam firmetur, ab ea tamen non pendere necessario; nascente enim Ecclesia non erat Scriptura, & tamen nota & certa erat veracitas Ecclesiæ, sed primitus habetur ex notis & motivis credibilitatis, licet per Scripturam confirmari non diffiteamur, sicq; ex una parte nullum esse circulum, & ex alia non esse vitiosum, in quo creditur ad idem sub diversa ratione; sicut è contra con-

tingit in Spiritu privato Novatorum; qui dicunt se scire hanc scripturam esse veram, quia id ipsis dictat Spiritus privatus; & dicunt se scire, quod habeant Spiritum privatum, quia id dicit Scriptura. Nec.

Inferas certitudinem fidei nostræ esse summam & Divinam; atqui talis non foret, si pendet a veracitate Ecclesiæ, quæ primitus tantum habetur ex notis & motivis credibilitatis; ergo. Nam.

Resp: nego min: Nam Ecclesiæ propositio præcedit solum tanquam præambulum explicans, quid sit revelatum, hoc semel explicatô, & exposito, fidelis intellectus assentitur revelato, non propter Ecclesiam proponentem, id enim est quid extrinsecum assensui fidei, sed propter veracitatem Dei revelantis; sicut supra dictum, assensum præberi literis Regis, non propter veracitatem nuntii, sed Regis.

Quæris cum Ecclesia omnibus proponat revelata, quare ergo unus credit, & non alter?

Resp: Hoc fieri inde, quod i. plures
non

non satis attendunt ad notas Ecclesiæ proponentis, & motiva credibilitatis non examinant. Sicut enim in discutiendis præambulis, ad notitiam primorum principiorum requiritur aliquod lumen naturale *vg.* dum Magister præmittit exempla, paritates, suppositiones & alia, ut ea discipulis exponat; sic in dijudicandis certò notis Ecclesiæ, & motivis credibilitatis, ultra lumen naturale requiritur aliud supernaturale, cujus illustrationi, plures claudunt mentis oculos. 2. Quia facta etiam propositione revelationis per Ecclesiam; ipsa revelatio & res revelatæ remanent obscuræ, & ideo requiritur pia motio voluntatis, ut applicet intellectum assensui. Hinc enim factum est, quod *Joan: 12. Cum tanta signa fecisset Christus, coram eis non credebant, imo Paulum prædicantem resurrectionem mortuorum, Atheniensium plurimi risu exceperunt. Quare? quia ut dicitur Deut: cap: 29. non dedit vobis Dominus cor intelligens.. Ex his.*

Resolves difficultatem practicam; quomodo salvetur fides in pueris & ru-

dibus? Hi enim plerumq; non credunt propter veracitatem Dei revelantis, neq; hoc DEUM revelasse, quia Ecclesia proponit, sed ut plurimum credunt, quia sic sunt edocti, vel à Parentibus, Magistris &c. vel quia alii credunt sic.

Resp: Quod si revera ita sit, eorum fides non est Divina, proindè ad id sedulò attendere debent Parochi, & Confessarii; plures enim formulas fidei, spei & charitatis, contritionis, exactè recitant significationem terminorum non apprehendentes. Hinc meminerint in suis instructionibus non solum exigere a pueris & rudibus formulas fidei, sed insistere & sæpius interrogare, cur credant? Idem dic de spe, Charitate & contritione, & aliis. Vide Constitutionem Benedicti XIV. datam Anno 1742. 7. Februarii quæ incipit: *Etsi minime.*

Petes I. Utrum revelationes privatæ pertineant ad fidem?

Resp: Revelationes privatæ, quæ modo fiunt in Ecclesia de rebus ad Deum ut authorem supernaturalem ordinatæ per-

pertinent quidem ad fidem, ut est virtus Theologica, non ut est Catholica.

Ratio 1. P. Quia talis fides testimonio DEI revelantis innititur; propositio autem Ecclesiæ quid accidentale fidei ut virtutis Theologicæ, ut patet in Angelis, primis Parentibus &c. qui habuerunt fidem Theologicam absq; propositione Ecclesiæ.

Ratio 2. P. Quia fides Catholica, hoc est universalis, versatur tantum circa veritates communes toti Ecclesiæ & per Ecclesiam proponendas. Unde si DEUS alicui modò revelaret quidquam spectans ad Religionem, iste, cui facta esset revelatio, teneretur credere, non alter, quamvis juraret id sibi esse revelatum; quia non proponeretur ab Ecclesia, quæ est regula discernendi revelata, ut dictum.

Petes 2. Utrum fidei possit sub esse falsum?

Resp. Nec ex parte DEI revelantis, nec ex parte credentis potest falsum fidei subesse, hoc est, fides non potest inclinare ad assensum falsum, nec illum elicere.

Ratio 1. P. Quia non est Deus quasi homo,

mo, ut mentiatur, neq; ut filius hominis, ut mutetur, Num. 23. Cùm ergo DEUS. nec fallere nec falli possit, neq; falsum revelare potest. Ratio 2. P.

Cum enim ratio formalis fidei sit prima veritas in dicendo, quæ ut modo dictum, non potest revelare falsum, fieri non potest, ut fides inclinet ad assensum falsum, vel illum eliciat.

Petes 3. Utrum obiectum fidei sit necessario obscurum? Et quomodo obscuritas se habeat ad illud.

Resp. 1. ad 1. affirm. Quia fides est argumentum non apparentium. Hebr. 11. & ex S. Augüst: Tract. 40. in Joan: fides est credere quod non vides. Nam obiectum fidei non potest per se movere intellectum ad sui cognitionem, cùm non sit ad instar primorum principiorum, quæ ex ipsis terminis innotescunt, neq; ad instar conclusionis, quæ ex principiis per evidentem consequentiam deducitur; multo minus quid sensibile, quod sensibus percipitur; ergo illam obscuram & inevidentem esse oportet.

Resp.

Resp. 2. ad 2dum. Obscuritas est conditio necessario requisita ad fidem. Non enim credo DEUM trinum in personis, quia non video, sed quia DEUS revelavit; sicut non credo Romam existere, quia non video, sed quia fide dignus mihi dixit. Obscuritas ergo et inevidentia requiritur ad fidei obiectum ut conditio necessaria omnino. Ad solvenda ea, quæ hic opponi possunt, vide *Art. 1. huius differ.*

Petes 4. Utrum saltem evidentia in attestante sit possibilis cum fide? Evidentiam in attestante intellige evidentiam ipsius revelationis, ita quod mihi clare constet, quod sit à DEO.

Resp. Fidem posse compati cum evidentia in attestante. *Ratio.* Quia ut ait *S. Thomas hic quæst. 5. Art. 2.* Si aliquis Propheta prænuntiaret in sermone Dei aliquid futurum, & adhiberet signum (ut Moyses exhibuit coram Pharaone signa varia) mortuum suscitando; ex hoc signo convinceretur ille intellectus videntis, ut cognosceret manifeste hæc dici à DEO, qui

qui non mentitur, licet illud futurum, quod prædicatur, in se evidens non esset, unde per hoc ratio fidei non tolleretur. Hic ergo S. Doctor non loquitur de evidentia credibilitatis, ut quidam interpretantur, sed de ipsa evidentia revelationis in se, quod denotant verba: hæc dici à DEO &c.

Petes 5. Utrum Mysteria fidei sunt evidenter credibilia?

Resp. affirm. Constat ex Psal. 92. Testimonia tua credibilia facta sunt nimis.

Unde Christus Joan. 10. Loquor vobis, & non creditis; Opera, quæ ego facio in nomine Patris mei, hæc testimonium perhibent de me. De hac materia plura dicentur in Tract. de Relig.

ARTICULUS III.

De Articulis & Symbolis fidei.

§ I.

De Articulis fidei.

Quamvis omnia, quæ in Divino Verbo sive scripto sive tradito continentur, Mysteria, sint fide tenenda, tamen quia propter eorum multitudinem ad cer-

certum numerum reduci commodé non possunt, ideo per certos & determinatos articulos distingui solent; articulus enim est *coaptatio multorum, quæ habent connexionem ad invicem, ut subsunt eidem rationi formali, & ordinem ad unum dicunt*. Unde credibilia fidei dicuntur per articulos distingui, inquantum dividuntur in partes habentes aliquam coaptationem ad invicem, ne oriatur confusio in intellectu nostro ex multitudine eorum, sicq; facilius reddatur instructio fidelium; habeatur in omnibus credentibus uniformitas; ac in promptu cuiq; fidei adsit fidei professio contra Hæreticos.

Petes. I. Quæ credenda constituunt specialem articulum fidei?

Resp. Ea, quæ habent duas conditiones sequentes: *prima* est, quod principaliter pertineant ad fidem, ut sunt illa quorum visione beati erimus in Cælo, & per quæ ad illam beatitudinem perducimur: *secunda*: quod habeat aliquam specialem difficultatem ad credendum. Hinc, quod Filius DEI sit mortuus, & quod resurrexit, duo sunt

sunt Articuli, eo quod utrumq; distinctam difficultatem ad credendum afferat; quod autem sit passus, mortuus & sepultus, unus est articulus; quia hæc eandem difficultatem includunt. Unde Articulus fidei definiri potest: *Propositio Catholica primario ad fidem pertinens, & specialem habens difficultatem ad credendum.*

Petes adô. An fidei articuli secundum successionem temporis creverint?

Resp. i. Non crevisse quoad substantiam. Quia illa solum sunt de fide, quæ sunt in sacra Scriptura revelata, vel talia sunt per traditionem Divinam, quæ autem in scriptura continentur, semper sunt eadem, nec licitum fuit aliquid addere scripturæ; quæ verò emanaverunt ab ore Dei & Christi, & quæ cognoscuntur per traditionem, sicut Paulus narrat de institutione Eucharistiæ. *i. Corint: ii. Ego enim accepi à Domino, quod & tradidi vobis, quoniam Dominus JESUS in qua nocte tradebatur &c.* sunt etiam eadem, nec licet in eis aliquid addendo innovare; ergo fidei articuli quoad substantiam
non

non creverunt. Unde ait S. August. in Psal 50. Tempora variata sunt, non fides. Epist. 109. ad Optatum idem S. D. dicit: Eadem namq; fides est & nostra & eorum, quoniam illi hoc crediderunt futurum, quod nos credimus factum.

Resp. 2do. Articulos fidei crevisse quoad explicationem; tum quia ut ait S. Thomas hic, omnia in figuris contingebant in veteri testamento, quod erat teste Apostolô umbra futurorum. Unde Mysterium vg. SS. TRINITATIS & INCARNATIONIS solum adumbratum, debuit explicité in novo Testamento exponi & proponi; tum quia propter hæreses etiam vel in ipso novo Testamento opus fuit explicare fidem, ne fideles incaute impingerent in errorem; unde consubstantialitas Filij explicata est in Concilio Nicæno I. contra Arianos, consubstantialitas Spiritus S. in Concilio I. Constantinopolitano contra Macedonianos &c.

Petes 3. Qui sunt articuli Fidei?

Resp: S. Thomas hic art: 8. 14. Articulos fidei in Symbolo contentos explicando enumerat hoc ratiociniô: Ea quæ

quæ pertinent ad fidem, vel nos beatos reddunt, & sunt occulta Myſteria Divinitatis; vel nos ad finem beatum conducunt, & eſt Myſterium Incarnationis. Porro circa Maieſtatem Divinam tria nobis credenda proponuntur; *1mo.* Unitas Divinitatis, hic primus eſt articulus. *2do.* TRINITAS Perſonarum, hic habes tres articulos ſecundum tres Perſonas, proinde quatuor articulos. *3tio.* proponuntur nobis opera Divinitati propria, quorum primum pertinet ad eſſe naturæ, & ſic nobis proponitur articulus creationis; en habes quinque articulos; ſecundum verò ſpectat ad gratiam, et ſic proponuntur nobis ſub uno articulo, omnia pertinentia ad noſtram iuſtificationem, habes ſex articulos. Tertium pertinet ad eſſe gloriæ, ſic nobis proponitur articulus de reſurrectione mortuorum, habes ſeptem articulos. Similiter circa humanitatem Chriſti ponuntur articuli ſeptem, quorum primus de Conceptione Chriſti; ſecundus de Nativitate Eius; tertius de paſſione eiſdem, morte, & ſepultura; quartus de deſcenſu ad inferos; quintus de reſur-

urrectione; sextus de ascensione; septimus de adventu ad iudicium. Alii articuli fidei reducuntur ad istos; sic v. g. articulus Eucharistiæ ut est Sacramentum sanctificans, reducitur ad effectus Incarnationis; & ut est miraculosa, ad Omnipotentiam Dominicam ait *S. Thomas* hic art: 8. ad 6. Qui vero 12. articulos numerant tres articulos de tribus personis sub uno comprehendunt, & articulum glorificationis in duos distinguunt, unum de resurrectione carnis, alterum de glorificatione animæ. Similiter ex parte humanitatis duos articulos Conceptionis & Nativitatis sub uno comprehendunt. Hunc numerum statuit Catechismus Romanus sive Concilii Trid:

CONSECTARIUM.

1. **D**um Ecclesia aliquid definit, ut fide tenendum, novam revelationem a Deo non accipit, alias si acciperet, in condendis definitionibus non foret necesse tanto studio perquirere revelationes factas in Scripturis, contentas in traditionibus ac in communi

muni Patrum intelligentia; nec in illo casu loqueretur a seipsa, sed Deus per ipsam tanquam per instrumentum, quomodo locutus est per Prophetas; sed Ecclesia revelationem olim factam proponit, non quidem authoritate, quam habet a sanctitate, virtute & eruditione fidelium, quæ *humana* dici solet; sed authoritate, quam habet infallibili assistentia Spiritus S. ex quo privilegio in propositione credendorum ab omni errore immunis dirigitur à Spiritu Sancto.

adum. Articuli implicite propositi, tunc credebantur solum implicite, ut primum vero Ecclesia eos explicavit, & explicatos proposuit, obligatio fuit eos credere explicite, alias notam hæreseos incurrisset, & modo incurreret discredens. Sic v. g. ante definitionem Stephani I. Pontificis ii, qui tenebant baptismam ab hæreticis collatum verbis Christi non valere, errabant quidem, sed non erant hæretici; tales tamen fuerunt qui hunc errorem spargebant post Ecclesiæ decisionem, quæ non est quidem articuli alicuius innovatio, sed explicatio, expositio, & determinatio.

§ II.

De Symbolis fidei.

Nomine Symboli venit: *credendorum summa in brevem & facilem methodum reductorum ad instructionem rudium.* Eô enim scopô condita sunt Symbola, ut fideles facilius animo teneant credenda, & præ oculis habeant fidei regulam, ne astutiâ hominum circumferantur omni ventô doctrinæ. Symbolum enim est signum seu tessera, qua distinguuntur fideles ab infidelibus.

Petes 1mo. Quot sunt Symbola Ecclesiæ?

Resp: Celebriora Symbola quatuor esse. Primum est *Apostolorum* ab Apostolis editum, non scriptô sed de ore in os traditum. Secundum *Nicænum* in I. Concilio generali Nicææ editum a 318. Patribus contra Arii blasphemias. Tertium *Constantinopolitanum* contra Eunomianos & Macedonianos, quorum primi Spiritum S. alienum esse a Patre, nec a Patre immediate procedere asserabant, sed solum remoté, sicut nepos ab avo; secundi verò una cum primis

D

Spi-

Spiritus S. divinitatem negabant, ideo noluerunt Eum cum Patre esse adorandum.

Hic observa quia tunc temporis nemo hæreticorum negabat Spiritum S. procedere a Filio, sed solum de processione a Patre erat quæstio, nihil de hac re Patres exprimendum putaverunt. Quando autem hæc vox *Filioq;* addita fuerit Symbolo, habes in Tractatu de Sanctissima Trinitate. Quartum tandem Symbolum est; quod nomine S. *Athanasii* circumfertur, ab Ecclesia receptum.

Petes 2do. Quis est tenor Symboli Nicæni?

Resp: Sequentis est tenoris: *Credimus in unum Deum Patrem omnipotentem, omnium visibilium, nec non invisibilium factorem. Et in unum Dominum IESUM Christum Filium Dei unigenitum, hoc est, ex substantia Patris; DEUM de Deo, Lumen de Lumine, Deum verum de DEO vero, natum non creatum, homoussion, hoc est eiusdem cum Patre substantiæ, per quem omnia facta sunt cælestia & terrena. Qui propter nos homines & propter nostram salu-*

salutem, descendit, & incarnatus est, & homo factus, passus est, & resurrexit tertia die, ascendit in cœlum, venturus inde, iudicaturus vivos & mortuos. Et in Spiritum Sanctum. Eos autem, qui dicunt, erat tempus, quando non erat, & priusquam nasceretur, non erat, & quia nullis existentibus factus est, aut ex alia substantia vel essentia dicunt esse trepton, hoc est convertibilem aut mutabilem filium Dei, hos anathematizat Catholica & Apostolica Ecclesia. Symboli Constantinopolitani idem est tenor, excepto quod pauca sint mutata, & ea, quæ Divinitatem Spiritûs Sancti profitentur, sint addita, proinde sæpe apud Scriptores utrumq; pro uno sumitur, & est illud quod in Missa legitur & canitur.

Observat autem S. Thomas quod quia Symbolum Nicæno-Constantinopolitanum est explicativum Symboli Apostolorum, & fuit conditum fide iam manifestata, & Ecclesiâ pacem habente; ideo publicè cantatur in Missa; Symbolum autem Apostolorum, quia tempore persecutionis editum fuit, fide nondum publicata, occultè dicitur in precibus

Canonicis, quasi contra tenebras errorum præteritorum & futurorum.

DIGRESSIO CRITICA I.

Utrum Symbolum, quod Apostolicum dicitur, Apostolos Authores habeat?

Gerardus *Vossius* libro de tribus Symbolis dissert: 1. negat ab Apostolis editum, sed solum eo nomine dicitale, quia Apostolicæ doctrinæ compendium est, ac præ aliis gaudet verbis Apostolorum & Evangelistarum; ante *Vossium* *Calvinus* lib: 2. Institutionum cap: 16. indicavit se non agnoscere Apostolos huius Symboli Authores. *Calvinum* *Magistrum* secutus *Chamerius* lib: 9. de can: cap: 10. *Esse ab Apostolis Symbolum sic compositum, si non est falsum, certo quod proximum falso esse, nemo negat, incertum est.* *Erasmus*, quod an ab Apostolis proditum sit? dicit se nescire in Præfat: Paraphrasis S. Mathæi.

Dico: Symbolum quod Apostolicum dicitur Apostolos Authores habet.

Prob: Quod ex traditione habemus id firmiter tenendum est; atqui ex traditione, eaq; non interrupta habemus Sym-

Symbolum, quod Apostolicum dicitur, ab eis promanasse; ergo. *Prob: min: S Irenæus sæculi II. Scriptor lib: 1. contra hæreses: Ecclesia enim, inquit per universum orbem usq; ad fines terræ seminata & ab Apostolis, & a Discipulis eorum accepit eam fidem, quæ est in unum DEUM Patrem omnipotentem. Tertullianus Sæculo II. lib: de Præscrib: cap: 37. ait: In ea regula incedimus, quam Ecclesia ab Apostolis, Apostoli à Christo, Christus à Deo tradidit. Porro per regulam intelligit Symbolum Apostolicum, ut constat ex libro de velandis Virginibus cap: 1. Regula, ait, fidei una omnino est sola immobilis & irreformabilis, credendi scilicet in unum Deum omnipotentem, mundi Conditorem, & in Filium eius JESUM &c. Idem testantur sequentium sæculorum scriptores, ut Lucifer Calaritanus lib: 2. ----- ubi hoc Symbolum appellat formam disciplinæ, & regulam fidei per Apostolos traditam S. Ambrosius Epist: 7. ad Siricium Pontif: M. Credatur Symbolo Apostolorum, quod Ecclesia Romana intemeratum semper custodit & servat. Cælestinus 1. Pontif: M. in Epist:*

ad Nestorium vocat *Symbolum ab Apostolis traditum*, S. Leo Epist: 13. ad Pulcheriam, Concilium Ephesinum in Relatione ad Theodosium, S. Maximus Homilia de Traditione Symboli. Non potest autem congruenter ab *Apostolis traditum* dici, nisi reipsa illud ediderint. Sed & illud reipsa ab illis *editum, collectumq;* aperte testatur S. Leo iam citatus. *Catholici Symboli brevis & perfecta confessio, quæ duodecim Apostolorum totidem signata est sententiis.* Cassianus lib: 6. de Incarn: cap: 3. & 4. S. Isidorus Hispal: lib: 2. de Eccl: Officiis cap: 22. Rufinus in Expositione Symboli, quorum sententias vide apud *Natalem Alexandrum Tom: 3. Historiæ Dissert: 12.*

Confirmat assertionem Regula ab Augustino tradita lib: 4. de Bapti: cap: 24. Quod universa tenet Ecclesia, nec à Conciliis institutum, sed semper retentum est, nonnisi auctoritate Apostolica traditum rectissime creditur; atqui à nullo Concilio aut Pontifice hoc Symbolum editum fatentur Adversarii ergo.

Obiicies 1mo. Si Symbolum hoc Apostolos haberet authores, non ipsi in
Epi-

Epistolis, nec B. Lucas in Actibus Apostolicis tanti rem momenti ignorare sivissent Ecclesiam Catholicam; atqui Apostolorum nemo, nec B. Lucas Symboli meminit; ergo.

Resp: nego mai: Multa enim alia sunt ab Apostolis facta, quorum nec S. Lucas, nec ullus Apostolorum meminit. Aliunde argumentum inficiale nullius est ponderis, nisi positiva habeat adiuncta momenta. *Vel d' st: mai:* S. Lucas aut alii Apostoli eius meminissent, si scripto traditum esset ab Apostolis, *concedo*, si pertineat ad Traditiones non scriptas *nego*. Porro Symbolum ad Traditiones non scriptas refertur. *Symbolum* ait Hieron: Epist: 61. ad Pamachium, *fidei & spei nostræ, quod ab Apostolis traditum, non scribitur in charta, aut atramento, sed in tabulis cordis carnalibus.*

Dicit Basnagius. Si Symbolum Apostolorum esset fætus, in Scripturarum Canonem referretur; atqui non; ergo. Si.

Resp: cum Natali. Symbolum non quidem scripsisse Apostolos per se, sed brevem illam fidei formulam, de qua inter se convenerant, Discipulos viva voce docui-

docuisse, a quibus vicissim quasi per manus ad posteros transiit.

Instat idem. Sed nec Epistolas quamquam Canoni insertas per se scripserunt Apostoli, sic v.g. Epistolam ad Ephesios *Tychicus* excepit; ad Romanos *Phæbes* &c. Ergo.

Resp: cum Illust: *Mansi:* dist: Nec Epistolas perse scripserunt, at dictarunt tamen, & quidem eo fine, ut in scripto traderentur Ecclesiæ, *concedo*, fecus, *nego*. Epistolas proinde dictarunt Apostoli, ut in Scripturam redactæ servarentur, in publicis cætibus identidem legendæ ad solamen & eruditionem fidelium; Symbolum vero dictarunt, ut memoriæ mandaretur, quo de fide interrogati fideles haberent in promptu, quid responderent.

Pergit Basnagius Si Apostolos Authores haberet Symbolum, dogmata fidei omnia contineret, tum ea, quæ præsentibus; tum ea quæ futuros Hæreticos arguere possent, atqui non, cum contractum sit, & pauca contineat; ergo.

Resp: Mentem Apostolorum fuisse summa fidei capita in Symbolo comple-

plecti, id proinde omnino curârunt, ut brevissimam formulam conficerent, ne vulgarium hominum mentem prolixitate fatigarent. Eo consiliô dogmata alia, quæ scitu maxime necessaria tunc iudicabant, clarè explicarunt, alia subobscurè tantum & implicite in potestate Ecclesiæ relinquentes, ut cum necessitas exposceret, ea ipsa exponeret.

Urget heterodoxus. Si hæc formula revera Apostolis tribuenda foret, nunquam permisisset Ecclesia, ut ex illa voces aliquæ subducerentur aliæ pro aliis substituerentur, quin & aliæ ab ea diversæ, ut est Nicæno-Constantinopolitana, & S. Athanasii, cuderentur; atqui tamen hæc omnia facta esse negare nemo potest; ergo. *Maiorem* manifestam esse triumphat, ex eo quod diversimode in diversis Ecclesiis legeretur: nam in vulgari solum legitur: *Credo in DEUM Patrem omnipotentem, Creatorem Cæli & terræ*; Symbolum orientale habet *unum*: in Aquileiensi & Romano, *Creatorem cæli & terræ* omittuntur, nam post *Omnipotentem* additur *visibilem & impassibilem*, & sic in aliis multis.

Resp:

Resp: dist: maj: Ex illa vocum subductione & substitutione solum colligitur, quod Ecclesiæ Symbolum integrum non habebant, *concedo*; quod Apostoli authores eius non sint, *nego*. Nec mirum, quod enim ex traditione habetur, non cito, sed solum successione temporis habetur, maxime ubi de multis agitur. Porro in sola Ecclesia Romana habetur eo ordine, iis sententiis, & iisdem plane verbis, quibus est ab Apostolis traditum. Rationem dat *Rufinus* in Explicatione Symboli, quia nullæ hæreses é Roma eruperunt, & ideo majori explicatione non indiguit. Quemadmodum enim Symbolo a Nicænis Patribus condito, addi aliquid Constantinopolitanis Patribus visum est, quod id tunc expedire iudicaverint ad hæreses retundendas; ita pariter committi a nonnullis potuit, ut Apostolico Symbolo aliquid adderent, vel detraherent, prout commodum rei præsentis, & opportunum ducebant.

Ad id quod addit *Basnagius* de diversis Symbolis; Alias quidem fidei formulas Ecclesia probavit, non rejiciendo Apo-

Apostolicam tanquam minus aptam, sed quod opportunum duxerit, fidem Divinitatis & Incarnationis IESU Christi, nec non de Spiritu S. adversus novas hæreses paulò latius explicare.

At ait: Quò iure Apostolicæ Institutionis formulæ Constantinopolitana prælata est in Missis?

Resp: Ideo forte, quod circa tempora Synodi II. generalis mos obtinere cæperit, ut in Missis Symbolum recitaretur; tunc verò ad rem præsentem magis opportuna judicata est formula Constantinopolitana ad reprimendos Arianos, Eunomianos, Photinianos, & Macedonianos tunc grassantes.

Insistit heterodoxus Criticus. Hoc Symbolum institutionis Apostolicæ non esse, quod vocem: *Catholicam Ecclesiam* includat, cum supponatur a nobis conditum esse, antequam Apostoli in diversas Provincias secessissent; quo tempore Ecclesia Catholica non fuit.

Respondenti Natali illam voculam postea forte adiectam esse, cum iam fides latè diffusa nomen *Catholicæ* iure sibi vendicaret; regerit *Basnagius*, id
qui-

quidem factum admittens, sed ex adiectione ista colligit Symbolum Apostolicæ institutionis esse non posse, quia ait irreligiosum duxissent illi veteres fideles aliquid addere formulæ Apostolicæ. At.

Resp: Nulla hic irreligiositatis occasio occurrit, cum irreligiose se non gesserint erga Moyfis libros antiqui fideles sive *Esdras* sive *Josue* sive alius quisquam, quos tamen voculas aliquas a primævo Authore alienas induxisse, manifestè constat.

Objicies 2. In Symbolo quod Tertullianus repræsentat non habentur capita de Christi descensu ad inferos, de Spiritu S. &c. Ergo non fuit eodem modo traditum Ecclesiis, proinde Apostolicum non est. *Ant:* patet ex libri *de velandis Virginibus* cap: 1. Libri *de Præscrip.* Et lib: *contra Praxeam* cap: 2.

Resp: Tertullianum non enumerare omnes Symboli Articulos traditos ab Apostolis, sed solum eos, qui illi argumenta suppeditabant adversus hæreticos tunc grassantes. nempe Pra-

xeam , Valentinianos , Marcionitas , Appellitas. Alias responsiones lege apud *Natalem* jam citatum.

Petes 1. An Apostoli ita Symbolum ediderint , ut suum unusquisq; illorum, Articulum seorsim ac distincte protulerit.

Resp: negativè. Sed omnes in communè contulerunt, & in eandem cujusq; articuli sententiam conspirarunt. Nam Jacobus Frater Joannis , cui tribuunt adversæ sententiæ Patroni articulum numero 3. *Et in JESUM Christum Filium ejus unicum Dominum nostrum*, antequam Apostoli Symbolum conderent, Martyrio sublatus fuerat, *Act: 12.* Insuper momenta , quibus pars adversa nititur , spuria sunt. Nam Epistola Clementis ad Jacobum Fratrem Domini reipsa Clementis non est , ut consentiunt Critici, cum in ea S. Petri obitûs mentio fiat, qui non nisi aliquot annis post Jacobum illum occubuit. Idem dic de Serm: 115. S. Augustini de *Tempore*, ubi singuli Apostoli singulas sententias proferentes referuntur, ille enim Sermo S. Augusti-

stini non est, & cujuscunq; authoris est, certe vitiatum & interpolatum esse multis ostendit *Natalis Dissert: 12. Sæculi 1.*

Petes 2. Quis & qualis fuerit hujus Symboli Apostolici usus in Ecclesia jam tum a primis Sæculis?

Respondet Serry ad annum 325. quô Symbolum Nicænum conditum est, Symbolum Apostolicum Catechumenis addiscendum tradebatur, atq; ita in ea fidei professione Ecclesia generatim baptizabat; at verò ut cæpit Nicænum Symbolum in usu esse, maxime auctum a Patribus Constantinopolitanis, non una omnium Ecclesiarum fuit disciplina. Orientales misso Symbolo Apostolico Nicænum tradebant Catechumenis, atq; in illius professione baptizabant. Imo hoc solum quotidiano in usu habuisse Orientales, testis est *S. Basilii Seleuciensis* Episcopus in Epistola Synodica ad Leonem Augustum. *Ubique, ait, hoc solum circumfertur & prædicatur, nempe Nicæno-Constantinopolitanum.* In occidentali Ecclesia a primis temporibus,
te-

teste S. Augustino, Rufino & aliis, ad hæc tempora, Apostolicum Catechumenis traditur, exceptis Ecclesiis Hispaniarum, quæ ex Decreto Concilii Toletani III. morem Græcorum secutæ sunt, ut contra Gothos, & Vandalos Arianos, Hispaniam infestantes haberent tesseram clarioris sive magis explicatæ fidei, quæ Nicæno Symbolo continetur.

CONSECTARIUM.

Errat ergo *Basnagius* persuasus II. vel III. Ecclesiæ sæculo in acceptis referri debere Symbolum Apostolici nomine insignitum, sed breve & concisum, auctum deinde, ut ipse existimat, novis accessionibus, adversus subinde hæreses insurgentes. Ita ait Criticus heterodoxus *Carpocrati* mortuorum ad vitam revocationem neganti, oppositum illud dicit: *Carnis resurrectionem*; Donatistis alterum: *Ecclesiam Catholicam* & illud *Sanctorum communionem*. Hæc utiq; tam facile a *Basnagio* excogitari potuerunt, quam probari difficile. Quis enim II. vel III. Sæculi Scriptor tanta

ta valuerit authoritate, ut conditam a se fidei formulam per universam Ecclesiam approbaret, atq; admitti cogeret? Id utiq; vix factum admittemus; factum vero de Symbolo, ut in omnibus Orientis & Occidentis Ecclesiis idem omnino recitaretur, nisi quod alicubi voculæ tantummodo quædam variabant Rufino teste. Nullum five Concilium five Decretum Romani Pontificis designatum est ab antiquis, cujus authoritate id traderetur Ecclesiis per orbem dispersis. Si vero publica authoritas absuit, nulla satis congrua ratio succurrit, ut tanta concordia reciperetur ab omnibus, nisi quod ab Apostolis esset. Sed ait *Basnagius*: Symboli hujus dilatandi causam fuisse, quod authores licet alios haberet, ab Apostolis doctrinam tamen contineret plane Apostolicam. At nunquid ut fidei formulam, Apostolicam doctrinam continentem, conderent, adjutorio alicujus privati Theologi opus habuerunt, nempe per orbem dispersæ Ecclesiæ, five in eo omnes convenisse credemus, ut à privato conditam eandem admitterent?

S.

S. Gregorii vulgo *Thaumaturgi* capita fidei, vel *Symbolum* nihil non de fide purum continebat, acceptum insuper à *B. Virgine* per visum illi apparente noverant plurimi, nihilo tamen fecius ad alias *Ecclesias*, si forte pervenit, certò tamen à nullo fidelibus sibi subjectis traditum legimus, utcunq; *Apostolicam doctrinam* continere judicaretur. Maneat ergo firmum *Symbolum Apostolicum* & doctrina & authoritate tale esse.

At supra ajebat *Basnagius* *Symbolum* illud primò brevissimum fuisse, postea exurgentes hæreses occasionem dedisse alia addendi. Sic dicit vox *Catholica*, *Donatistis* mentientibus in foliis *Donati* partibus, hoc est, in *Africæ* certis oris veram *Ecclesiam Christi* permanfisse, opposita est, quæ vox *Rufini* ætate in *Symbolum Ecclesiæ Aquilejensis* nondum irrepserrat, cum ejus non meminerint in *Expositione Symboli*. Fallitur imo potius falli vult *Criticus Acatholicus*, hanc enim voculam in *Symbolo* noverat *Rufinus*, quam eam latius non explanaverit;

ita enim ille: *Sequitur* (in Symbolo) *Sanctam Ecclesiam Catholicam*. In hoc ipso verò Opusculo tradit Rufinus, Symbolum in Ecclesia Romana servatum additamenti nihil admisisse unquam, quod nullæ ibi hæreses exortæ sunt, ex quo fit consequens vocem *Catholicam*, quam pariter retinebat Romanum Symbolum, nec adscititiam fuisse, neq; contra Donatistas tunc recens natos appositam, alioquin hanc additionem notasset *Rufinus*, notasset etiam *S. Augustinus*, qui de hac voce sæpius agit contra Donatistas. Sed nec inde colligere potest Basnagius vocem *Catholicam* adjectam esse, quod eo tempore, quo nos dicimus Symbolum ab Apostolis editum, Ecclesia *Catholica* hoc est *Universalis* non fuerit, utpote coarctata *Palestinæ* finibus; nam etiam tunc Ecclesia *Catholica* vocari poterat, non quidem actuali universalitate, sed universalitate a Christo promissa, decreta, & præcepta. Cum Christus Apostolis præcepisset *Marci* 15. *Ut euntes in mundum universum prædicarent Evangelium omni creaturæ*, atq; ita Ecclesiam

in

in universum mundum extenderent; universalem etiam Ecclesiam dicere potuerunt, universalitate dogmatum atq; doctrinæ, quod ea omnia doceat Ecclesia, quæ sunt homini necessaria ad salutem. Aut etiam universalem universalitate temporum, quod sit Ecclesia in omne ævum duratura, dicente Christo; *Ecce ego vobiscum sum omnibus diebus usq; ad consummationem sæculi* Math: 28. Potuerunt ergo Apostoli edito Symbolô *Ecclesiam Catholicam* dicere.

DIGRESSIO CRITICA II.

De Symbolo Athanasii.

Dico 1. **P**robabile est Symbolum sub nomine S. Athanasii quod circumfertur, genuinum esse ejus opus.

Prob: assertio ex autoritate. 1^{mo}. Nam Gregorius Nazianzenus, in oratione de Laudibus S. Athanasii dicit scripsisse egregiam fidei professionem, quam Ecclesia Orientalis & Occidentalis veneratur. *2^{do}.* S. Augustinus testibus Baronio & Bellarmino in Enarr: super Psal: 120. totam periodum hujus Sym-

boli sub nomine S. Athanasii laudat. 3^{to}. S. Hilarius in Fragmentis S. Athanasio illud tribuit. 4^{to}. Concilium Toletanum ex hoc Symbolo nonnulla recitat. 5^{to}. Synodus Augustodunensis illud sub nomine S. Athanasii laudat. 6^{to}. Gregorius IX. Pontifex, & Eugenius IV. ut genuinum veneratur. 7^{mo}. Suffragatur S. Thomas hic quæst: 1. Art: 10. Ergo.

Dico 2. Probabile est etiam Symbolum quod dicitur S. Athanasii non esse genuinum ejus opus. Ita recentiores critici, qui assertionem sequentibus stabilire conantur.

1^{mo}: Demonstrationis loco esse potest altissimum veterum Patrum & Scriptorum Ecclesiasticorum silentium, nemo enim Athanasio suppar aut coævus symboli meminit; non Nazianzennis in oratione de Laudibus ejus; non Cyrillus, aut Patres Ephesini contra Nestorium; non S. Ivo; non Concilium Calcedonense contra Eutychianos, in quo tamen symbolo Nestorianismus & Eutychianismus apertis terminis damnantur. His adde silentium Latinorum contra

Græ-

Græcos post Photii Schisma de Processione Spiritus S. disputantium usq; ad Gregorii IX. tempora. 2do. Repugnat ratio temporis, quò minus Symbolum hoc S. Athanasio tribuatur; est enim editum eo tempore, quo Hæresis Nestoriana & Eutychiana emerferunt, ut patet ex terminis Symboli; illæ autem hæreses plurimis annis post tempora S. Athanasii sunt enatæ. 3tio. Ipse Athanasius in Epist: ad Antioch: abhorret ab omni alio Symbolo condendo, contentus formulâ Nicæna. 4to. Stylus & nativus Sermonis contextus non est Græci hominis. 5to. Non concordant primæ sententiæ Patroni quò tempore, & qua occasione S. Athanasius illud ediderit. Ergo.

Ad Probationes primæ assertionis respondent Patroni alterius assertionis, & quidem.

Ad 1mum. Negant S. Gregorium loqui de Symbolo S. Athanasii, sed fuisse Synodicam Epistolam nomine suo & Episcoporum Ægypti, quæ & Nicænum Symbolum, & alia nonnulla ad

Pneumatomachorum hæresim oppugnandam documenta continebat.

Ad 2dum. Negant S. Augustinum ex nomine S. Athanasii periodum citare; absolute enim loquitur: *Alius autem est ille sol, non factus, sed genitus, per quem facta sunt omnia.*

Ad 3tium. Hæc additamenta in fine Fragmentorum non esse S. Hilarii collectanea, sed alterius, unde nec habentur in antiquis codicibus.

Ad 4tum. Synodus illa anno 630. habita est, quo tempore a Scriptore Latino Symbolum istud jam editum fuisse concedunt. Aliunde Synodus nullum Authorem indigitat, ex quo verba mutuata sunt; forte Author Symboli verba Concilii propria sibi fecit.

Ad 5tum. Hæc Synodus posterior fuit Toletanâ nam Anno 670. habita.

Ad 6tum. In hoc duo distinguunt, unum juris & fidei, alterum facti & criticæ. Juris, fideiq; quæstio est, num Symbolum illud puram Catholice Religionis doctrinam complectatur. Facti scientiæq; criticæ, controversia est, num ab ipso Athanasio, vel

vel alio Scriptore fuit elaboratum. Quæstio prima facile dirimitur auctoritate Gregorii IX. & Eugenii IV. qui Symbolum illud Græcis & Armenis tradiderunt, ex hoc enim colligitur puram & integram esse illam fidei professionem. Quæstio altera quæ solum est facti, sitne ab Athanasio editum Symbolum? non proinde præfatorum Pontificum auctoritate resolvitur, etsi Athanasii nomen præferat; quia de ea tituli præfixione (cum hæc nec ad fidei dogma, nec ad disciplinæ regulam ullo modo pertineat) nulla Ecclesiæ cura fuit, nec esse debuit, nec de Authore, sed de dogmatibus in eo expositis quæstio olim fuit. Ecclesia enim quæstionibus juris judicandis intenta majestatem suam ad minutilas illas quæstiones facti expendendas minime demittit, nec aliquid certi de iis statuit, dummodo fidelibus nocumento non sint. Ex titulo ergo præfixo non concluditur Symbolum genuinum factum esse S. Athanasii.

Ad 7mum. Ajunt S. Thomam Symbolum ob nominis titulum S. Athanasio

fio tribuisse, an autem esset verum ejus opus non expendisse secundum accuratiores criticæ regulas, quia ad ejus institutum non pertinebat. Sed.

Dices in favorem 1mæ sententiæ. Symbolum S. Athanasii admissum esse à Græcis ut genuinum in Concilio Flor: sed contra illud duo reposuerunt. *1mum.* versiculum de processione Spiritus S. a Filio fuisse assutum a Latinis. *2dum.* multo irreligiosius in S. Doctorem; Athanasium plus æquo incaluisse, mero, dum illud scriberet sic *Genadius* ipse Græcus testatur in *Defensione Concilii Flor:* cap: 1. sec: 5.

Respondent 2dæ sententiæ Patroni fatendo hæc duo Græcos reposuisse, verum & tertiam evasionem invenisse Græcos, nimirum supposititium esse ajebant, quapropter Græcis amplius ex hoc capite nullum negotium à Latinis facessitum est, etsi ob alia duo responsa, quibus vim ejus declinare nitebantur, acriter exagitati fuerunt. Verbo *Bessarion* Græcus natione, sed in Concilio Florentino Catholici dogmatis strenuus Propugnator, in oratione ad Patres ha-

habita, quæ adducere potuit ex Patribus Græcis, adduxit, de Symbolo hoc ne quidem mentione facta.

Petes 1mo. Quem ergo statuunt secundæ sententiæ Defensores Authorem præfati Symboli?

Resp: Varii varios statuunt Authores. Passim nunc illud attribuunt, *Vigilio* Tapsensi in Affrica Episcopo. Hic enim dum Constantinopoli exularet sub finem V. Sæculi, cum audisset, quantas strages ageret hæresis Ariana sub dominatione Vandalorum, Arianorum, & Nestorianam ac Eutychianam luem videret late diffundi, Pastoralis Officii partes existimavit periclitanti populo suo suppetias ferre, ponendo ob oculos professionem fidei non solum adversus perfidiam Arianam, sed etiam adversus Nestorianam & Eutychianam.

Petes 2dò. Cur ergo hoc Symbolum non Vigilii sed Athanasii nomine vulgatum est?

Respondent. Ideo ipse Vigilius hanc expositionem Athanasianam nominavit.

1mo. Quod summam Athanasianæ fidei contineret; *2dò.* ne de condita hujus

jus fidei formula in suspensionem apud Hæreticos veniret, ac propterea in apertum vitæ discrimen adduceretur. Vide *Natalem* Tom IV. Hist: Sæculi IV. cap: 6. *Grauesonium* Hist: Sæculi IV. *Annotatum* lib: 4. de Patribus &c.

Petes 3tio: Quis est finis Symbolorum?

Resp: Triplex. *1mus*. Instructio fidelium. *2dus*. Hæreticorum profligatio. *3tius*: Major Fidei explicatio. Symbolum Apostolicum secundum S. Chrysostomum & Augustinum primo fine; Nicæno-Constantinopolitanum secundo; tertio S. Athanasii conditum est. Porro Symbolum non est Scriptura Canonica; Spiritus enim S. non dictavit literam, sed solum inspiravit sensum. Quæ tamen continet, sunt de fide, quia est doctrina viva voce tradita a Christo Apostolis, & ab Apostolis ad fideles transmissa.

Sunt & aliæ fidei professiones a multis conciliis emanatæ, a I. Concilio Antiocheno, a Carthag: IV. Toletano XI. & Tridentino, sed quia specialiter sunt ad confutandos Hæreticorum

rum errores particulares, sicut & ad majorem fidei Catholicæ expressionem, inter Symbola non annumerantur.



ARTICULUS IV.

De interno actu fidei.

Duo sunt in fide distinguenda, *actus* nempe & *habitus*. Prior est motus in DEUM, quo aliquis in ipsum tendit, ut primam veritatem, & cui revelanti assensum præbet: posterior est virtus inclinans intellectum humanum ad assentiendum his omnibus, quæ revelata sunt. Sicut actus sic habitus potest esse informis, vel etiam vivus; informis quidem si a charitate sit sejunctus, de quo S. Jacobus in Epist. ait: *Fides sine operibus, Charitatis & gratiæ, mortua est*; vivus autem si a Charitate animetur, & in hoc sensu intelligendum illud Rom: i. *Iustus autem ex fide vivit*, id est: ex Fide, quæ per charitatem formata operatur opera vitæ æternæ.

§. I.

De credendis ad salutem necessariis necessitate medij.

Petes 1. **U**trum sit de necessitate salutis credere aliquid supra naturam?

Resp; Fuit semper necessarium omnibus adultis necessitate medij ad salutem credere, aliquid supra rationem naturalem. Id patet ex Apost: Hebr: 11. *Sine fide impossibile est placere Deo; credere enim oportet accedentem ad DEUM, quia est, & requirentibus se remunerator sit.* Hinc Trid: sess: 6. cap: 7. cum dixit baptismum esse Sacramentum fidei, addit, *sine qua nulli unquam contigit justificatio.* Quamvis enim DEUS potuisset hominem salvare absq; sui cognitione supernaturali & amore, secundum præsentis providentiæ leges, noluit tamen, idq; congruenter hominis naturæ, ut probabitur in *Tractatu de Religione revelata.*

Resp: 2. Fuit omni tempore necessarium necessitate medij ad salutem credere fide supernaturali determinate & explicite hæc duo, nempe: DEUM esse authorem gratiæ, & remuneratorem gloriæ,

riæ, patet ex Apostolo citato, ubi agit de fide supernaturali, quia antea eam definiverat, quod sit *rerum sperandarum substantia, & argumentum non apparentium*. Ex his sequitur: non sufficere ad salutem, quod quis credat in communi, aut in confuso, quidquid credit Ecclesia, si interim nihil determinate & in particulari de Deo cognoscat, aut credat; quia absq; explicita cognitione, quod DEUS existat, quod sit remunerator bonorum, & malorum vindex, non potest ipsum debite colere, neq; actiones suas in eum, ut in finem dirigere.

Resp: 3. Posita sufficienti Evangelii prædicatione fides explicita Mediatoris Christi, ex Divina voluntate est omnibus necessaria necessitate medii ad salutem. Quia ut legimus Actuum 4. *Non est aliud Nomen sub cælo datum hominibus, in quo oporteat nos salvos fieri.* Ipse Christus Joan: 6. ait. *Qui credit in me, habet vitam æternam.* Et Apost: testatur: *Unus est enim DEUS, mediator Dei & hominum Christus Jesus.* Rursus Christus Marci ult: *Qui crediderit & baptizatus fuerit salvus erit, qui vero non crediderit condemnabitur.*

Hinc

Hinc S. Bernardus Epist: 77. ait: *Cautè igitur & vigilanter: Qui verò baptizatus non fuerit, sed tantum, qui vero non crediderit, condemnabitur, innuens solam interdum sufficere fidem ad salutem; & sine ipsa sufficere nihil.* Hoc ipsum aperte innuere videtur Trid: sess: 6. cap: 6.

Resp: 4. Supposita Evangelij sufficienti promulgatione idem sentiendum est de fide explicita SS. TRINITATIS. Sequitur ex dictis. Nam 1^{mò}. Christus iussit prædicari Evangelium, ut qui crediderit & baptizatus fuerit, salvus esset; atqui Christus præcepit omnes baptizandos esse in nomine Patris, & Filij, & Spiritus S. ergo. 2^{dò}. Non potest haberi fides explicita quod Filius DEI sit incarnatus, quin explicitè credatur Mysterium SS. TRINITATIS. 3^{tiò}. Mysterium SS. TRINITATIS est primarium obiectum fidei nostræ; Incarnatio secundarium; ergo si &c. 4^{tò}. S. Thomas idem ex professo docet 2. 2. q. 2. 6. & art: 7. propugnat omnes, ne uno quidem excepto, debere explicitè credere Incarnationem. Idem. exigit pro fide SS. TRINITATIS Art: 8. *Dicendum ait, quod*

quod Mystrium Incarnationis Christi explicite credi non potest sine fide TRINITATIS... Ideo etiam post tempus gratiæ Divinæ tenentur omnes ad explicite credendum mysterium TRINITATIS, & omnes, qui renascuntur in Christo, hoc adipiscuntur per Invocationem TRINITATIS.

Resp: 5. Fides explicita utriusq; Mysterij est necessaria necessitate medij non solum ad secundam salutem scilicet glorificationem, ut visum est Cano & Banesio, sed etiam ad primam scilicet justificationem.

Nam Joan: 3. Christus non solum dicit, quod qui incredulus est Filio, non videbit vitam, hoc est; glorificationem, sed etiam quod ira DEI manet super eum, hoc est, remanet peccator injustus. Hinc Trid: docet fidem horum Mysteriorum ita necessariam esse, ut nulli unquam sine illa contingat justificatio. Aliunde justificatus est filius DEI adoptivus, & habet proinde jus hæreditatis ad glorificationem; habet enim gratiam, quæ est semen gloriæ; fit consequens, quod si fides implicita sufficit ad justificationem, sufficiet etiam ad gloriam, quod non

non admittunt adversarii. Argumenta quæ hic opponi possunt vide apud *Canum* ad finem Librorum de locis Theol; in Prælectione de hac re. *Serrium* Tract: de Fide Præl: 7. & 8. *Billuart*. Ea vero quæ objiciunt Sociniani, Remonstrantes cum Indifferendistis, & Naturalistæ in Tract: de Relig: revel: resolvuntur.

CONSECTARIUM.

Eos, qui præfata Mysteria, quoad substantiam ignorant, etiam si invincibiliter, esse absolutionis incapaces, & omnes confessiones in hac ignorantia factas esse nullas & iterandas, nec sufficere ea aliquando credidisse, si de facto nunc ignorantur; ut patet ex propositionibus 64. & 65. damnatis ab Innocentio XI. Summo Pontif.

Petes Quid ergo censendum de puerro enutrito in sylvis, aut inter barbaras gentes, si faciat, quod in se est in fuga mali & prosecutione boni?

Resp: S. Thomas in hoc casu & similibus recurrit ad extraordinariam revelationem. *Certissimè tenendum est*, ait quæst:

14. de

14. de Verit: a. 11. quod ei per internam inspirationem revelaret ea, quæ sunt ad credendum necessaria, vel aliquem fidei prædicatorem ad eum dirigeret, sicut misit Petrum ad Cornelium &c. Si autem talis non faceret, quod potest, nec ad agnitionem fidei, nec ad salutem perveniret juxta illud S. Aug: lib: de cor: & gra: cap: 7. *Ab hac damnatione non se liberabunt, qui poterunt dicere se non audisse Evangelium.*

§. 2dus.

De credendis necessitate præcepti.

De credendis necessitate medii jam dictum, ad quæ referri debet fides explicita de immortalitate animæ, nam Deum bonorum Remuneratorem, & malorum Vindicem is non crederet, qui animam post hanc vitam superstitem fore, fide non teneret. Ergo.

Petes 1. Quæ sunt credenda necessitate præcepti?

Resp: 1mò. Omnes articuli contenti in symbolo Apostolorum, quia hoc fine conditum est ab Apostolis illud Symbolum, ut docet praxis Ecclesiæ cap: Baptizandos de Consec: d. 4ta. 2dò. Præcepta

cepta Decalogi & Ecclesiæ, quia ea omnes fervare tenentur. 3^{tiò}. Oratio Dominica, ut sciant ea, quæ a Deo petere debent. 4^{tò}. Sacramenta necessariò suscipienda, nempe: baptisma, Eucharistia, Pænitentia, quia alioquin rite is non susciperet, qui ea, vel dispositiones ad illa ignoraret. Idem est iudicium de aliis Sacramentis, dum ea vult suscipere. Hæc porro quivis scire, seu credere debet explicitè saltem quò ad substantiam ex præcepto obligante ad peccatum mortale.

Petes 2dò. Quando obligat præceptum fidei?

Duplex est præceptum fidei, nempe: *affirmativum* assentiendi veritatibus revelatis; aliud *negativum*, non negandi fidem. De hoc secundo certum est obligare pro semper. De primo est quæstio; juste enim proscripta est propositio ab Innocentio XI. *Fides non censetur cadere sub præceptum speciale & secundum se*. Altera: *Satis est actum fidei semel in vita elicere*. Tertia: *Sufficit illa Mysteria TRINITATIS & Incarnationis semel credidisse*. Nec Christus dixit: qui non crediderit, quan-

quando erit pœnitendum &c. sed simpliciter & absolute, qui non crediderit, condemnabitur. Sicut ergo dantur prœcepta per se obligantia de actibus aliarum virtutum, ita etiam de actibus fidei.

Resp: 1. Prœceptum fidei affirmativum obligat per se adultum, rationis compotem statim moraliter ad credendum. Quia 1. Fides est medium necessarium ad salutem. 2. Quia is qui differret elicere actum fidei, se exponeret periculo positive dissentiendi agnitæ veritati. Dixi *statim moraliter*, quia cum pueris non est nimis scrupulosè agendum, cum contingere possit, eis non fuisse sufficienter proposita fidei Mysteria. Infideles adulti, quibus est fides sufficienter proposita, moram trahentes citius hoc prœceptum infringunt; imo contra negativum sæpè peccant, aut saltem in periculum peccandi se ingerunt, ut jam dixi.

Resp: 2. Juxta magis piam ac tutiorem sententiam quisq; fidelis saltem in solemnioribus Festis vi hujus prœcepti per se obligantis eliciat actum fidei circa omnia revelata. Nihil enim determina-

te statui potest hac in re, cum Theologi mire varient, in assignando tempore, quò hoc præceptum obliget.

Resp: 3. Præceptum affirmativum fidei obligat per accidens, quoties urget aliquod præceptum, quod sine actu fidei impleri, non potest, tunc enim est medium ad illud implendum. v.g. quando urget præceptum pænitendi aut suscipiendi aliquod Sacramentum; item dum eliciendus occurrit actus spei, charitatis, religionis, ut orare, Missam audire, aut celebrare &c. in his enim & similibus casibus eliciendus est actus fidei, si non expressus, saltem ut in actu exercito credat DEUM esse, quem orare intendit; Sacramentum a Christo institutum esse, quod suscipiendum aut ministrandum occurrit. Ut tamen actus fidei expresse eliciatur per accidens saltem obligat hoc præceptum, quando urget vehemens tentatio, contra fidem, aut alteram virtutem, quæ non nisi expresso fidei actu superari possit. Quamvis enim si sit tentatio contra fidem, obligatio ad hoc oriatur ex virtute fidei directe, non tamen directe ex præcepto affirmativo, sed

sed ex periculo infidelitatis, proinde directe ex negativo fidei præcepto.

Petes 3. Utrum requiratur ad actum fidei eliciendum pia actio voluntatis?

Nota: Ad fidem spectat credere ea omnia, quæ in Divinis revelata sunt scripturis, sive spectent Mysteria, sive historiam, sive miracula, sive DEI promissiones. Ita enim definitum habetur a Trid: contra Novatores.

Resp: Ad assensum fidei requiritur pia motio voluntatis. Hoc enim expresse indicat scriptura. Lucæ 24. *O stulti & tardi corde ad credendum.* Act: 16. De Lydia Purpuraria, *Dominus aperuit cor intendere his, quæ dicebantur a Paulo.* Auditis actum fidei etiam ad cor seu voluntatem pertinere, quatenus determinat intellectum, ut mysteria contempletur; hæc quidem determinatio est quo ad specificationem; quod autem illum determinet etiam quoad exercitium ibidem cap: 17. Legitur de Atheniensibus, quibus Paulus resurrectionem mortuorum futuram prædicabat. *Quidam vero viri adhærentes ei, crediderunt.* To adhærentes ei, denotat affectum voluntatis ad fidem

requisitum; *crediderunt*, ipsum fidei assensum significat. Huc omnia ea pertinent, quibus contra Pelagianos & Semi-Pelagianos probant Patres & Théologi initium fidei esse a gratia. Ex hoc habes.

CONSECTARIUM.

Hanc motionem vocari *piam* quia nempe est ab auxilio gratiæ, alioquin non foret supernaturalis, & initium fidei & salutis esset a nobis, quod est damnatum in Semi-Pelagianis. Unde Concil: Arausic. II Can: 5. definit contra ipsos. *Credulitatis affectum esse gratiæ donum*. Et Trid: sess: 6. cap: 6. quod peccatores *Divina gratia excitati, & adjuti* *libere moventur in Deum credentes*. Hæc tamen *motio pia* non est amor charitatis, ut contendunt quidam Neoterici, alioquin peccator, in quo amor ille non est, non posset elicere actum fidei, quod est damnatum ab Alexandro VIII. in hac propositione. *Quando in magnis peccatoribus deficit omnis amor, deficit etiam fides, & etiam si videantur credere, non est fides Divina, sed humana*. Item in Quesnello propositio 51. *Fides non operatur nisi*

nisi per charitatem. Et propositio 52. Fi-
des non est absq; amore & fiducia. Quid
enim obest, quo minùs credam inimi-
co, quem aliunde veracem reputo. Est
ergo hæc pia motio complacentia seu
affectus, non erga bonitatem in se, quod
requiritur ad amorem charitatis, sed
erga summam DEI veracitatem, vi cu-
jus determinat intellectum ad assentien-
dum ea firmitate, quæ superat omnem
firmitatem ortam ex quovis actu huma-
no scientifico vel experimentalis. Hinc
fit, quod cum actus fidei sit supernatu-
ralis, si habeat alias condiciones ad me-
rendum, quas vide in Tract: de Gratia
Diss: 8. de Merito sibi adnexas, sit plu-
rimum meritorius; nam ut ait Apost:
Hebr: 11. Sancti per fidem vicerunt regna,
operati sunt justitiam, adepti sunt repromis-
siones. Hinc docet S. Thomas hic q. 2.
a. 9. Actus nostri sunt meritorii inquantum
procedunt ex libero arbitrio moto à Deo per
gratiam. Quia, ait, ipsum credere est actus
intellectus assentientis veritati Divinæ, ex im-
perio voluntatis a Deo motæ per gratiam.

ARTICULUS V.

De actu externo fidei.

Actus externus fidei, qui alias *pro-*
fessio dici solet, elicitur a fide, cum
 sit ejusdem naturæ cum interno, & lin-
 gua extrinsecus exequatur, quod mente
 concipitur, ut docet S. Thomas hic q.
 8. a. 1. De Duobus fidei præceptis hic
 agendum, *negativo*, scilicet quod est de
 fide non neganda, & *affirmativo*, de fide
 confitenda.

§ I.

*An liceat aliquando verbo vel facto fidem
 negare?*

Helcefeitæ, alias Sampsei dicti, au-
 thore Elxai Pseudopropheta, inter
 alios errores, & hunc sparserunt, simu-
 lationem in professione religionis lici-
 tam esse, hinc Eusebius lib. 6. cap. 38,
 ita Helcefeitam describit: *Fidem negare
 indifferens quiddam esse asserit. Qui enim
 interiore cogitatione recte de fide sentiat, ta-
 metsi ore fidem perneget, tamen animo illi fir-
 me adhæsurum.* Hos secuti sunt Priscillia-
 nistæ, quorum tessera illud erat: *jura*
per-

perjura, secretum prodere noli. Secta Libertinorum hac ætate plurimum dilatata pro dogmate statuit, licere fidem exterius negare, interius retentâ. Hoc idem sentiunt multi Calvinistarum, & Anabaptistarum, hi enim teste *Staphylo* lib. de Lutheranorum concordia existimant sibi licere, si rogentur, an sint Anabaptistæ, negare se tales esse, satisq; omnino esse, si ipsimet clam, quod credunt, sciant; palam vero profiteri non esse opus; dicti propterea *Clancularii*. Huic errori novas addidit vires doctrina permittentium, ut licitam restrictionem mentalem, in casu gravi, cumq; gravissimus reputetur ille, ubi acerbissimæ pænæ stabiliuntur contra Catholicos in regionibus Hæreticorum, inde mussitari est cæptum, an liceat hanc doctrinam applicare ad periculum persecutionis vitandæ, nimirum exterius Romanam Ecclesiam negando, reservata tamen interius restrictione, *ut tibi dicam, ut pœnas effugiam*, interim tamen corde firmo tenendo fidem Catholicam. Contra quam doctrinam erudite scribit Card. Orsi O. P. Cum quo.

Di-

Dico: Nullo prætectû ac nullo casû licet exterius verbô vel factô fidem negare, & si interius retineatur in corde.

Prob: Irrefragabili argumento. Præcepta negativa obligant pro semper, quale est illud generale, *declina a malo*, maximè cum sit intrinsece peccatum, quidquid adversus ea committere; sed non negare fidem verbô, aut factô eatenus ad præceptum negativum pertinet, quatenus negare sit enormis fidei proditio. & malum pœnam æternam inducens juxta illud Christi Math. 10. *Qui autem negaverit me coram hominibus, negabo & ego eum coram Patre meo* Luc. cap. 9. *Qui me erubuerit, & sermones meos, hunc filius hominis erubescet;* atqui, qui exterius verbô vel factô fidem negat, & si interius retineatur in corde, negat Christum coram hominibus, quos secretum cordis latet, erubescit Christum & ejus sermones; ergo merito Christus talem negabit coram Patre, & illum erubescet; hoc autem maxima pœna est; ergo externa fidei negatio est maxima culpa.

Confirm: 1. Cum animi nostri sensus
fa-

factô verius exprimantur quam verbô ,
hic profectô idem disertius & apertius
negat , qui se vg. idololatram prodit
publico idololatriæ exercitio , quam si
nudo & simplici verbo se talem diceret;
huius enim dicenti non facile creditur,
nisi dictum factis comprobarit; atqui ta-
men verbo negare fidem non omnes
saltem, simulationis cohonestatores li-
citum dicunt ; ergo multo minus factô
&c. 2. *ab exemplis.* 2 Mach: cap: 6. Ele-
azarus simulationem omnem execratus
est, qua facillimè comminatæ sibi mor-
tis periculum devitasset. Alterum adest
in persona Cephæ seu Petri a Paulo A-
postolo reprehensi ob simulationem lon-
gè leviolem , quam de qua hic; lege
caput 2. Epist: ad Galatas. Exempla
nobis exhibet plurima, Historia Eccle-
siastica in Libellaticis , qui data pecu-
nia libellos obtinuerunt a Præfectis te-
stantes mendaciter illos thus idolis ado-
levisse, tamen sedata persecutione tan-
quam gravissimi criminis rei , publicæ
pænitentiae subjecti sunt. Sancti Marty-
res , qui innumeri sunt, hanc simula-
tionem, ut sibi illicitam, suo exemplo
de-

detestati sunt, ut S. Sabba apud Metaphrastem renuit comedere carnes, & si non immolatas Marti, sed aliunde appositas; S. Athanasius apud Bolandum, Eustraticus apud Surium; verbo S. Justinus Mart. in Apol. 2. ad *Antonium*, sententia est, *Christianos emori malle, quam aut mentiri, aut Inquisitores fidei fallere dolosa, simulatoq; responso*. Quod si licuisset, paucos Ecclesia habuisset Martyres, cum innumerabiles sint. Merito hanc simulandi artem SS. Patres execrati sunt ut, in Arianis Patres Ariminenses &c. S. Aug. lib. contra Mendacium. cap. 2. in Manichæis, Apolinaristis, Pelagianis. S. Hieronymus in Priscillianistis. Merito ergo S. August. lib. 6. de Civ. cap. 10. Senecæ idola colentis simulationem redarguit; Seneca colebat in omnium oculis, *quod reprehendebat, agebat, quod arguebat; quod culpabat, adorabat* --- Eo damnabilius, quo illa, quæ mendaciter agebat, sic ageret, ut eum populus veraciter agere existimaret.

Obij. amo. Externa & simulata fidei negatio non tollit conjunctionem animæ cum Deo; ergo. *Prob. Ant.* Hujusmo-

modi conjunctio fieri potest actû fidei interno. Ergo.

Resp: dist: ant. Hujusmodi conjunctio animæ cum Deo per amorem & Dei, & proximi manifestatum, *conc.* per solam fidem internam *nogo ant. dist. conseq;* similiter: Ita S. Thomas hic q. 3. a. 2. ad. 1. *Finis fidei*, ait, & aliarum virtutum referri debet ad finem charitatis, qui est amor Dei & proximi; & ideo quando honor Dei, vel utilitas proximi hoc exposcit-- debet fidem exterius confiteri.

Dices. Atqui conjunctio animæ cum Deo per fidem solam interius retentam sufficit ad salutem. *Prob. 1mo.* Licitum est fugere tempore persecutionis. *2do:* Tempa Hæreticorum adire, eosq; concionantes audire *3tio:* Vesci carnibus diebus ab Ecclesia prohibitis, in partibus infidelium ad vitanda vitæ pericula. *4to:* Infidelium vestes portare; sed hæc tamen adverfantur fidei confessioni; ergo.

Resp: negando minorem universaliter sumptam, quoad omnes partes. Et vero *1mo:* Fugere tempore persecutionis per se, non est malum, sed potius
quæ-

quædam fidei professio, ne periculo fidei amittendæ sese committat. Excipe tamen casus aliquos in quibus fugere non licet, quando omissio professionis fidei cederet in injuriam Dei, vel in detrimentum proximi &c. *2do*: pariter non est negare fidem, si justis ex causis quis eorum sana ingrediatur ad audiendos eorum sermones, si tamen absit perversæ fidei periculum. *3tio*: Præceptum solum Ecclesiæ est certis diebus abstinere a carnibus, contra quod prævalet jus naturale de servanda vita, dummodo non interveniat simul jus divinum, v.g. si cui apponerentur carnes, ut hoc signo comestitionis haberetur pro infideli, tunc fas ipsi non esset, id attentare. *Ad Ult*: Usus vestium indifferens est. Nisi vestes per se sint institutæ ad significandam talem Sectam religionis motivô.

Instabis: Multa sunt in Scripturis exempla simulationis alterius religionis, permixta & quandoq; laudata. *Prob: 1mo*. Elizeus concessit Naaman ut Rege adorante in templo Remmon, & ipse cum eo adoraret in eodem loco 4. Reg. 2. cap. *2do*: Jehu Rex Israel simulavit se

Cul-

cultorem Eaal: *Achab coluit Baal parum; ego autem colam eum amplius.* 4. Reg. 10. atqui hæc erat religionis falsæ aperta simulatio; & propter hoc Jehu remuneratus est a Deo; ergo.

Resp: ad 1^{um}. dist. maj. Ibi nomen adorationis improprie sumitur pro corporis incurvatione, *conc.* propriè pro cultu Deo debito, *nego.* Civile obsequium hoc fuit Regi non idolo exhibitum; simulatio autem fuisset falsæ religionis, si gessisset aliquid Naaman, quod proxime ad sacrificium falso Numini oblatum pertineret, vel ad impios ritus, ut si vinum sacrificanti Regi porrexisset, quod non fecit.

Ad 2^{dum}: ex facto Jehu nihil colligere possunt Adversarii ad simulationem in causa religionis & fidei cohonestandam. Triâ namq; sunt quæ non profunt, sed obsunt Simulatoribus; *primum* quod Jehu piis Regibus non annumeretur, quorum gesta sunt nobis ad exemplum proposita, ut ibidem legitur: *Secundum* quod hoc factum referatur quidem, sed non laudetur aut approbetur. *Tertium.* si forte laudaretur, ob finem optimum lau-

laudaretur, destruendi nimirum Cultores Baal, non ob medium ad finem illum obtinendum. Nec enim facienda mala, ut veniant bona. Verbô, remunerationem accepit, quia Dei voluntatem executus est strenuè, sed mediô utens malo Jehu merito culpandus fuit.

Obij: 2. Apostolorum exemplô licitam esse simulationem religionis edocemur; ergo. *Prob:* *Ant:* Apostoli post antiquatam legem veterem, nonnullos istius ritus & observabant ipsi, & a Fidelibus Christianis observari permittebant; atqui hoc nonnisi simulatione & fictione factum intelligi potest; ergo.

Resp: Nego min. Imo non animô ficto & simulato, sed sincero legales ritus ad aliquod tempus observarunt, non quidem ut in eis spem salutis ponerent, sed ut qualemcunq; illis venerationem exhiberent, & extinctam jam atq; *emortuam Synagogam cum honore ad tumultum ducerent*; ut loquitur S. August: cum quo S. Doctore tria tempora legis sive status sunt distinguenda; primum tempus & status ad mortem Chri-

Christi, quando fuit viva, & suo modo fructifera; alterum à morte Christi ad sufficientem legis novæ promulgationem, quando equidem fuit mortua, sed non nociva, nisi illis qui spem in ea poneret; tertium post sufficientem Christianæ legis promulgationem, & protunc mortifera facta, absq; peccato superstitionis observari non potuit; in primo statu verè & cum fructu, in altero verè sed sine fructu observabant legem Apostoli, nusquam in tertio. Vide plura apud *Serrium* Disp: 1. de Fide Præl: 10. & 11. *Natalem* Diff: contra Helceseitas, *Billuart* Tract: de fide.

Petes 1. Quandonam in praxi censetur quis factò simulare aut profiteri exterius falsam religionem?

Resp: Hæc est regula generalis; usurpare signa, ritus, cæremonias, vestes, actiones, quæ sunt principaliter distinctiva sectæ à secta, seu quæ sive ex se, sive ex institutione, aut ex circumstantiis sunt primario significativa professionis falsæ fidei, est illam falsam fidem exterius profiteri, & ideo nunquam est licitum. Quæ verò distin-

G

guunt

guunt non Sectam à Secta, sed gentem a gente, seu quæ per accidens tantum indirectè & secundariò sunt professionis falsæ fidei significativa, quamvis sint vitanda, ne demus aliquibus occasionem existimandi nos negasse fidem, dum tamen justa adest causa huic deceptioni præponderans, possunt licitè usurpari. Ex his habes.

CONSECTARIA.

Anum. **J**usta de causa potest Catholicus induere vestes aliarum Nationum, quæ non sunt destinatæ præcise usibus suæ religionis; quia eas assumit, non ut profiteatur earum religionem, sed ut auferatur occasio inquirendi de religione. Idem dic de illarum vexillis in bello, ut tali stratagemate decepti vincantur. Item licitum est interesse sepulchris hæreticorum exhibendo eis honorem civilem. Item probabile est licitum esse, non audire Sacrum v.g: diebus Dominicis in terris hæreticorum, ad evitandum grave malum, quia id variis ex causis posse Catholicos, notum est hæreticis.

Idem

Idem dic & probabilius de ēsu carni-
um diebus vetitis nisi in contemptum
religionis ad id adigerentur. Nec est
reus negatæ fidei, qui negat se esse
Sacerdotem aut Religiosum, secus si
negaret se esse Catholicum, aut Papi-
stam.

2dum. Flectere genua coram idolo,
ei thus adolere, etiamsi intentio dirigatur
ad Christum; gestare imaginem Macho-
metis in collo appensam, fumere cæ-
nam Hæreticorum, Psalmos in eorum
fanis cantare, organis pulsare, contra-
here matrimonium coram ministro be-
nedicente nuptias secundum ritus suæ
Sectæ nunquam est licitum.

Petes 2. An exterius solum negan-
tes fidem incurrant pænas latas con-
tra hæreticos?

Resp: Negative. Quia hæ pænæ la-
tæ sunt contra infidelitatem simpliciter
talem; tales autem verè infideles aut
hæretici non sunt, non datur enim in
eorum intellectu error. Hujusmodi ta-
men homines debent se gerere pro ex-
communicatis coram illis, qui eorum
externam fidei negationem noverunt.

Hinc quia Ecclesia judicat de exter-
nis, tales ut veri Hæretici absolvun-
tur a S. Tribunali Inquisitionis.

§ II.

*De præcepto externi actus fidei affir-
mativo.*

Dico: **D**atur præceptum naturale &
Divinum de confitenda exte-
rius fide aliquando. Assertionem probat
S. Thomas ex illo Apostoli Rom: 10.
*Corde creditur ad justitiam, ore autem fit
confessio ad salutem.* Ex quo sic: Juxta
Apost: eadem est necessitas confessio-
nis fidei ad salutem, ac est fidei inter-
næ ad justificationem; atqui fides in-
terna necessaria omnino est ad justi-
ficationem; ergo confessio fidei exter-
na necessaria est ad salutem. Unde i-
bidem ait Apost: *Si confitearis in ore
Dominum JESUM, & in corde tuo cre-
dideris - - - salvus eris.* Sed.

Petes. Quando obligat hujusmodi præ-
ceptum?

Resp: Juxta S. Thomam tunc potis-
simum urget hoc præceptum, quando
per ejus omissionem vel debitus cultus

&

& honor DEO subtrahitur, vel utilitas proximo impendenda. Intellige de subtractione non pure negativa, sed privativa, id est quando ex omissione hujus confessionis sequeretur ignominia DEO, vel periculum Divini honoris, aut proximi utilitas negligeretur. *Putat, ait S. Thomas, si interrogatus de fide taceret, & ex hoc crederetur vel non habere fidem, vel quod fides non esset vera, vel alii per ejus taciturnitatem averterentur a fide.*

CONSECTARIUM.

1^{um}. Videns profanari Eucharistiam, Imagines &c. DEUM, aut fidem contemni, Hæreticorum & Libertinorum colloquiis. adstantium fidem periclitari, tenetur contradicere, & fidem confiteri, si sic possit ista impedire.

2^{dum}. Ab autoritate publica interrogatus de fide, illam sincere confiteri tenetur. Dixi *publica Autoritate*, quia a privato interrogatus, secluso scandalô, potest ambigue respondere, aut dicere: *quid ad te?*

Hæc intellige de præcepto Divino confitendi fidem. Ex præcepto autem Ecclesiastico Concil: Trid: sess: 24, cap: 22. de Refor: & ex Bulla Pij V. *Sacro-Sancta* tenentur professionem fidei emittere promovendi ad beneficia curam animarum habentia, ad Canoniciatus & Dignitates Cathedrales, Item Doctores & Professores in Academiis.


Illa de fide ejusq; actibus ac præceptis sufficiant, restat ut de fidei regulis agamus; porro illæ 1. Sacra Scriptura & traditiones, quæ vocari solent regula inanimata de qua alibi acturi sumus in Tract: *de Relig: revelata*. 2. regula est Ecclesia Christi. 3. Summus Pontifex S. Petri in Romana Sede successor, Christi in terris Vicarius. 4. Concilia Æcumenica. 5. Sancti Ecclesiæ Patres.





DISSERTATIO II.

DE ECCLESIA.

cclesia Græcè, Latinè convocatio dicitur, sive quod omnes ad se vocat, ut *Rabano* visum est, seu quod quicunq; in eam conveniunt, non ex meritis & justitia sua, sed DEI vocatione, quæ fit per gratiam conveniunt.

Porro dupliciter sumi potest, universalissimè prout non solum viatores, verum etiàm comprehensores & Angelos complectitur. Hi enim omnes in una societate DEO adhærent. Ecclesia sic accepta varios habuit status, 1^{mò}. in lege naturæ nempe sub Patriarchis; 2^{dò}. in lege scripta sub Sacerdotio Aaronico, 3^{tiò}. in lege Evangelica, sub Christo, Apostolis, & Rom: Pontifice.

Item alium statum habet in terris spirituales militiam exercens, & vocatur *Ecclesia militans* sive societas fidelium homi-

num

num sub uno capite Christo, ejusq; in terris Vicario Rom: Pontifice ordinata. 1. hominum quia hujus militantis Ecclesiæ nec Angeli, nec beatæ animæ sunt membra. 2. fidelium, hoc est, fidem Divinam in baptismo acceptam in se habentium. 3tiò. societas ad significandam unionem, vel internam, quæ habetur per fidem & dilectionem, vel externam, quæ consistit in administratione, & receptione Sacramentorum, & aliis ad verum cultum pertinentibus. 4. sub Christo, ipse enim invisibile Ecclesiæ caput, & cum Ecclesia sit visibilis, oportet illam habere caput visibile, quod est Christi in terris Vicarius. Alium statum habet Ecclesia in purgatorio, ubi probatur igne, & purgatur. Alium in cælo, & est congregatio fidelium extra statum viæ, qui jam vident facie ad faciem, quod credebant in via. Hic ergo unicè agemus de Ecclesia militante.



ARTICULUS I.

Utrum detur Ecclesia vera militans?

Cum vera religio concreata sit cum primis Parentibus, juxta illud S. Aug:

Aug: Erat condens naturam, & largiens gratiam; Ecclesia, in qua sola veram religionem reperiri licet, ut jam dictum, varios subiit status 1. ab Adamo usq; ad Moysen, qui status naturæ dicitur. 2. a Moyse ad Christum, qui status legis nuncupatur. 3. a Christo ad mundi finem, qui gratiæ status merito appellatur. Igitur.

§. I.

Utrum fuerit Ecclesia vera in lege naturæ?

Per statum legis naturæ intelligimus, non dictamen rationis cuiq; inditum ad faciendum bonum ordinis naturalis, sed statum, in quo homines moti a Spiritu S. seclusa lege scripta, bonum salutis operari poterant, & de facto operabantur.

Dico: Fuit Ecclesia in lege naturæ.

Prob: Illa aggregatio est vera Ecclesia, quæ omnes homines fideles a mundo condito, concludit, ac quæ DEUM tum sacrificiis, tum sacramentis veneratur; atqui in lege naturæ talis erat aggregatio, quæ omnes fideles concludit, & DEUM tum sacrificiis, tum sacramentis venerabatur, ergo. Prob: min. 1. pars 1^{mo}. ex S. Gregor: M. Hom:

Hom: 19. in Evang: *Quis, loquitur, Patrisfamilias similitudinem rectius tenet, quam Conditor noster... qui habet vineam universalem scilicet Ecclesiam, quæ ab Abel justo usq; ad ultimum electum.... quot Sanctos protulit, quasi tot palmites emisit.*

Prob; 2. Eadem pars min: DEUS omnes homines vult salvos fieri & per Christum Mediatorem salutem consequi; ut enim ait S. Aug: Serm: 3. in Psal: 36. Omnes, qui ab initio sæculi fuerunt justi, caput Christum habent. Illum enim venturum esse crediderunt, quem nos venisse jam credimus, & in ejus fide & ipsi sancti sunt, in cujus & nos. Ergo in lege naturæ erat talis aggregatio, quæ omnes fideles concludebat.

Prob: min. Altera pars. Fideles in statu naturæ legis DEUM sacrificiis venerari solitos fuisse edocemur ex toto libro Geneseos, exemplo Abel Gen: 4. Enos ibidem. Henoch cap: 5. Noe cap: 8. Abraham, Isaac & Jacob. Nec mirum, posito quod Adam non peccasset, fuissent tamen semper sacrificia (inquit Angelicus) quandoquidem creatura in quocunq; statu DEUM debet agnoscere, ut supremum bonorum omnium fontem, quod

quod potissimum fit sacrificiis. Sacramenta utiq; sic propugnat S. Aug: lib: 5. contra Julianum cap: 1. *Nec ideo tamen credendum est, & ante datam circumcisionem famulos Dei, quandoquidem eis inerat Mediatoris fides in carne venturi, nullo Sacramento ejus opitulatos fuisse.*

CONSECTARIUM.

Ut jam dictum ex S. Aug: vera Ecclesia initium sumpsit in primis parentibus, qui post peccatum commissum *per sapientiam sanati sunt*, ut dicitur Sap: cap. 9. Postea crevit in *Abel* justo, ad cujus sacrificia DEUS respexit, Gen: 4. Eandem illustravit *Enos*, qui *cæpit* (solemniori ritû) *invocare nomen Domini*; ibidem. Postea in *Enoch* incrementum cæpit, qui cum DEO ambulans, hoc est, illi serviens translatus est, Gen: 5. Refloruit in *Noe* justo. Emicuit in Abraham, Isaac & Jacob, qui quidem sic erant grati & accepti DEO, ut nominari DEUS eorum dignatus sit Exodi 3. *Ego sum DEUS Abraham, DEUS Isaac, & DEUS Jacob.* Hic ergo Ecclesiæ status complectebatur omnes homines fideles,
ab

ab initio mundi, usq; ad legem datam in monte *Sinai*, imo ex gentibus fideles, quos Judæi *Noebitas* appellare solebant, usq; ad Christi adventum salutiferum. Vocatur autem status naturæ, non ideò, quod præcepta supernaturalia non habuerit, fuerunt enim mandata fidei, spei, & charitatis, ac pænitentiae, sed quod literis exarata non fuerint, at cordibus insculpta, & de ore in os tradita.

§. II.

Utrum fuerit Ecclesia in lege scripta?

Dico: Fuit Ecclesia in lege scripta.

Prob: Ecclesia est corpus, in quo multi sacris quibusdam signis sensibilibus ad colendum DEUM coadunantur, qualia sunt Sacramenta, ait S. Aug: & sacrificia, ut per se patet; atqui erant in lege scripta Sacramenta & sacrificia, ergo. *Prob: min.* quo ad 1. p. Innocentius III. cap: *Majores*, agnoscit circumcissionem ut Sacramentum. Angelicus 1. 2. q. 102. art: 5. hoc probat ratiocinio, veterem legem habuisse Sacramenta: Nomine Sacramentorum intelligimus signa gratiæ, quibus homo præparatur
ad

ad colendum DEUM, vel per modum ministri, vel per modum suscipientis; atqui talia erant in lege scripta signa: consecrabantur namq; Sacerdotes & Levitæ, ut ministerio Altaris vacarent, populus vero ad colendum DEUM per Circumcisionem instituebatur. De hoc momento ait S. Aug: lib: 19. contra Faustum cap: 11. *In nullum nomen religionis seu verum, seu falsum coadunari homines posse, nisi aliquo signaculorum vel sacramentorum visibilibus consortiis colligantur.*

Prob: min. Quod ad 2. p. Sacrificia tum in recognitionem supremi dominii DEI in nos; tum ad gratias pro beneficiis rependendas, tum ad nova ab ejus bonitate impetranda, tum demum ad obtinendam peccatorum veniam, perpetuo & sempiterno cultu offerebat Synagoga; ut patet ex libro Levit. ubi cap: 1. ritus & modus offerendi holocausta delineatur. Cap: 2. ritus oblationis Sacrificiorum similæ oleo conspersæ; cap: 3. ritus hostiæ pacificæ litandæ; cap: 4. ritus offerendi hostias Sacerdotis, Principis, & multitudinis per ignorantiam peccantis; cap. 5. ritus hostiarum pro peccatis

catis ex silentio veritatis, immunditiâ, errore, juramento, & sic de cæteris. Ergo.

Dices: In Synagoga, sive statu legis scriptæ nec fides, nec gratia fuit, ergo neq; Ecclesia, cum sine his duobus Ecclesia subsistere non possit. *Prob: ant:* 1. in Synagoga non erat fides, sed solum instructio & præparatio ad fidem, juxta illud ad Gal: 3. *Lex pedagogus noster fuit in Christo.* 2. Nec gratia erat, juxta illud Joan: 1. *Lex per Moysen data est; gratia & veritas per JESUM Christum facta est:*

Resp: Nego ant: Si status legis fidē & gratiâ vacuus fuit. quô jure Abraham Pater credentium dicendus erit? de quo tamen Apost: prædicat; *credidit Abraham DEO, & reputatum est illi ad justitiam.* Quô jure, aut titulô sic complacuit in Abraham, Isaac, & Jacob, ut Deus illorum voluerit nuncupari? ut fileam sanctitatem Prophetarum, quorum gratia specialis hæc erat, ut scrutarentur etiam profunda DEI.

Ad 1. Textum: Lex Pedagogus erat ad Instructionem de Mysteriis, & pro-

promissionum Abrahamæ factarum, non ad ipsam fidem suscipiendam, quam citra dubium habuerunt Judæi. Hoc manifestum est ex Apostolo, qui ad Rom: 4. ait: *Credidit Abraham &c.* ergo lex eatenus erat, pro Judæis Pedagogus, quatenus eos edocebat justificari per fidem in Christum venturum, a quo & promissam æternitatem erant accepturi. Sic interpretatur locum Apostoli *Angelicus* in Caput 3. ad Gal: *Per legem*, inquit, *Judæi tanquam imbecilles pueri, per timorem pænæ retrahantur a malo, & promovebantur amore & promissione temporalium ad bonum. Judæis autem promissa erat benedictio futuri seminis de hæreditate obtinenda; sed nondum advenerat tempus ipsius hæreditatis consequendæ, & ideo necessarium erat, quod conservarentur ad tempus futuri seminis, & cohiberentur ab illicitis, quod factum est per legem.*

Ad 2. textum. Gratia per Christum facta est, id est, gratia ima, gratiæ omnis fons & principium, de cujus (Christi) plenitudine accepimus omnes sive in lege naturæ, sive scripta, sive gratiæ

tiæ existentes. 2. gratia emptæ & pretio magno soluta per sanguinem Christi. 3. gratia abundantissima. 4. Quia lex nova exhibet gratiam, & ex opere operato justificat; gratia vero legis, quæ dabatur ex fide in Christum venturum, non justificabat per se, sed solum ex opere operantis. Hinc gratia a veteri lege non excluditur. Vide S. Thomam in caput 1. Joannis.

Hinc pulchrè ait S. Chrysostomus hom: 13. in Joan: *Vel accepimus gratiam pro gratia, id est pro veteri novam. Sicut enim est justitia, & justitia adoptio & adoptio circumcisio & circumcisio; ita gratia & gratia, sed illa quidem ut typus, hæc verò ut veritas. Hoc autem induxit ostendens, quoniam & Judæi gratia salvabantur, & nos omnes gratiâ salvi sumus &c.*

§ III.

Utrum detur Ecclesia in nova lege?

Dico: **D**atur Ecclesia in nova lege a Christo Domino fundata, & specialibus prærogativis decorata.

Prob: 1. Ex figuris veteris Testamenti:

ti: *Primò*. namq; imago Ecclesiæ Christi est paradisus terrestris, qui locus omnium bonorum aggregatione perfectus, designabat Ecclesiam, ex qua perenni fluxu, & refluxu gratiæ animæ Christianæ adveniunt, ut æstû passionum temperata, fructum meritorum afferat in patientia, dicente Christo Apostolis Joan: 15. *Posui vos, ut eatis, & fructum afferatis, & fructus vester maneat.* Hinc S. Aug: lib: 4. de Bapt: c. 1. illam figuram celebrat: *Ecclesia paradiso comparata, indicat nobis posse quidem, ejus baptismum homines etiam foris accipere; sed salutem beatitudinis extra eam neminem vel percipere vel tenere. Nam & flumina de fonte paradisi - - - etiam foras largiter manaverunt - - - ita fit ut cum paradisi aqua sit extra paradisum; beatitudo tamen non sit nisi intra paradisum.*

Secundò: Ecclesiæ figura est Heva, quæ sicut è latere Adami educta est, ut initiaret cum viro Ecclesiam, & primam colentium DEUM verum societatem, sic è Christi latere fluxerunt Sacramenta, & per Sacramenta novæ le-

gis Ecclesia, ut argumentatur S. Aug: Tract: 9. in Joan:

Tertiò: Ecclesiæ typus est arca Noe, in qua omnis generis creaturæ corporeæ viventes erant, & salvatæ sunt, extra verò existentia viventia, perierunt; quâ similitudine designatur Ecclesia, quæ est congregatio omnium nationum. Hac comparatione ulus est Princeps Apostolorum 1. Epist: 3. Ubi tamen notandum, in hoc solum comparationem inter arcam & Ecclesiam esse; quod nemo extra eam salvetur, non autem, quod omnes in illa existentes salutem consequantur.

Quarto. Ipsa Synagoga in suis Sacrificiis, Sacramentis, & Sacerdotibus Christi repræsentabat Ecclesiam. Diversa Sacrificia pro diversis expiandis peccatis instituta, Sacramentum pœnitentiæ designabant. Agnus pachalis erat figura Christi, qui in ara crucis tanquam victima pro omnibus & singulis hominibus oblatus est. Circumcisio fuit imago circumcisionis spiritualis. per sacrum regenerationis lavacrum ad remissionem peccati originalis operan-

randæ, ut ad Colos: 2. docet Apost: Magnus Sacerdos, erat Christi typus, expressius verò Melchisedech legis naturæ Sacerdos, ut Apost: docet in Epist: ad Hebr:

Quintò. Christus variis parabolis suam manifestavit Ecclesiam, jam Math: 13 similitudine agri, in quo triticum & zizania permixta sunt crescere usq; ad messem, quò significatur, bonos & malos, justos & peccatores in Ecclesia Christi esse, ut explicat S. Aug: Jam exemplò sagenæ missæ in mare, & ex omni genere pisces congregantis, Math 13. Jam convivii nuptialis Math: 22. ad quod omnes promiscue, & nullo exceptò invitati sunt; omnes quippe ad vitam vocat Christus, omnes verò credentes benignè suscipit, & complectitur Ecclesia.

Sextò. Huc spectat linteum continens omnis generis animalia in terras submissum, & mox in cælum elevatum, in visu ostensum S. Petro Act: 10. Duplex piscatio Petri, jussu Christi facta, una Luc: 5. altera Joannis 21. Vestis inconsutilis Christi, quæ ex omni

parte unita, Ecclesiam, cujus centrum est Christus, & una in ipsum fides, significat.



ARTICULUS II.

Quinam sunt illi, ex quibus verè & propriè Ecclesia confletur?

In partibus Ecclesiæ recensendis tres errores fuisse Historia Ecclesiastica nos docet: *Primus* eorum fuit; qui non putarunt illic Ecclesiam habere partem, ubi non est solida vitæ puritas & integritas, tales olim fuere *Cathari* & qui ad horum vesaniam accedebant *Donatistæ*, tales hodie ex *Lutheranis* sunt *Anabaptistæ*, qui cum *Pelagianis* perfectam omnino, in hac etiam vita justitiam esse volunt; cum *Catharis* & *Donatistis* nullam in Ecclesia infirmitatem ferunt. *Alii* fuere, qui solis prædestinatis ad gloriam, locum in Ecclesia concesserunt, cujus erroris *Coryphæi* præcipui reperiuntur *Joannes Wicleff*, & *Joannes Hus*, damnati in Concilio Con-

Constant: quos plures Sectarii moderni sequuntur. *Postremi* solos probos ad Ecclesiam pertinere arbitrati sunt, improbos autem nullo modò, id post veteres quosdam asserunt multi Lutherani.

Dico: Non ex solis prædestinatis & probis constat Ecclesia, sed etiam peccatores & infirmos complectitur.

Prob: Christus Ecclesiam comparavit. 1. Regi facienti nuptias. 2. Familiæ. 3. Reti. 4. Agro. 5. Areæ. 6. Decem virginibus; atqui ad nuptias etiam ille introgressus est, qui missus est in tenebras exteriores, hoc est in infernum; ad familiam quoq; suam Christus pertinere docuit, qui conservi sui non misertus traditus est tortoribus; in reti etiam comprehensi pisces non seliguntur nisi in littore expositi, ubi Angeli separabunt de medio justorum malos, & mittent in caminum ignis; ager quoq; non prius expurgatur à zizaniis ab inimico homine superfeminatis, nisi post collectam messem, & in aream advectam, tunc demum alligantur zizania in fasciculos ad comburendum; in area tamdiu triticum delitescit, donec vannò & cri-

brô repurgatum reconditur, paleæ autem comburuntur igne inextinguibili; non decem virgines, sed quinque admiffæ, reliquis quinque janua est claufa, ergo.

Affertio etiam patet ex Apostolicis scriptis. Utiq; Ecclesiæ fuerunt, quarum Angelos, hoc est, ministros in Apocalypfi Deus ad pænitentiam admissi criminis cohortatur cap. 2. & 3. Apostolus ad Gal: c. 1. & 3. eas utiq; Ecclesias vocat, quas idem ipse arguit errore depravatas: inter Corinthos quoq; non una erat peccati species, sed plurimæ, neq; levia erant errata, sed flagitia: *Omnino auditur inter vos fornicatio, & talis fornicatio, qualis nec inter gentes, & tamen* Apostolus eos non solum Ecclesiam, sed sanctam Christi societatem agnoscit, & prædicath 1. Corint. 1. & 5.

Nec dicant: Illi contentiosi quos re-darguit cap. 1. & ille incestuosus cap. 5. non erant de Ecclesia. At per hoc Adversarii vim inferunt textui; dicit enim Apostolus *Omnino auditur inter vos &c.*

Nec iterum dicant: quod inter eos erat, & in medio eorum, sed non intra Ecclesiam.

Con-

Contra. Apost. judicavit illum Corinthium incestuosum; ergo intus fuerat; ergo membrum Ecclesiæ. Subdit namq; ibidem: *quid enim mihi de iis, qui foris sunt judicare?* Quod autem Paulus illum judicavit, negari non potest, nam subdit: *jam judicavi ut præsens eum, qui sic operatus est,* ergo.

Objic: 1. Ecclesiam ex solis prædestinatis constare S. Aug. asserit, ergo. *Prob. ant.* S. Aug. lib. 5. contra Donat. cap: 17. cum S. Petro Apost. 1. Epist. cap. 2. comparat Ecclesiam arcæ Noe, in qua octo animæ salvæ factæ sunt per aquam; atqui illæ octo animæ solæ erant in arca; ergo soli etiam prædestinati in Ecclesia.

Resp: Comparatio facta est quoad aliqua. Arca enim in eo Ecclesiæ typus est potissimum, quod extra eam nullus servatus sit, non in eo, quod omnes intra eam facti sunt salvi. Ita S. Hier. in Dial. contra Luciferianos. Unde etiam Petrus Apost: ne quis in errorem Novatorum incideret, locutus est cautè adjiciendo: *Quod & vos nunc similis formæ salvos fecit baptisma: non car-*
nis

nis depositio sordium, sed conscientiae bonae interrogatio.

Dices: Atqui qui sunt in Ecclesia, ejusq; membra omnes salvi fiunt. *Prob.* S. Aug. ibidem vocat Ecclesiam hortum conclusum, fontem signatum; atqui in horto concluso, fonte signato, qui esse possunt præter prædestinatos sive salvandos? ergo.

Resp: Ecclesiam sic vocari non ratione omnium, qui sunt ejus membra, sed ratione electorum. Per figuratam dictionem multa, quæ parti conveniunt, in totum solent transferri v.g. gentem bellicosam dicimus, non quod omnes tales sint, sed multi; sic etiam homo dicitur mundus, vel immundus, si facies sit munda, vel immunda. Inde ergo venit, quod vocabula quibusdam Ecclesiæ partibus convenientia, Ecclesiæ ipsi tribuuntur, hinc dicitur Sancta ratione bonorum, hortus conclusus ratione electorum.

Inferes: Ergo pari jure Ecclesia dici potest immunda, peccatrix &c. si immundi & peccatores in ea inveniuntur.

Resp: nego illatum: discrimen est.

Nam

Nam cum boni prima atq; optima sint pars Ecclesiæ Christi, imò verò cum sint Regni cælestis Principes, quamvis in mundo sint despectissimi, verè ac jure ea, quæ in eos conveniunt, in totam Ecclesiam transferuntur, non tamen econtra; præcipuè sicut Ecclesia, ea tantum communia habet, quorum est Christus tanquam caput; ita ab iis solum nomenclaturam sumit, ut est sanctitas, puritas &c. Mala autem & peccata sicut a Christo non procedunt, sed ex fragilitate cujusq; proveniunt, ita Ecclesiam denominare non debent.

Instabis: Ecclesia è filiis DEI conflatur utpotè cum non sit aliorum Mater, quam quorum DEUS Pater est; atqui soli prædestinati sunt filii DEI, qui scilicet sunt hæreditatem percepturi; *si filii,* ait Apost. Rom. 8. & *hæredes quidem DEI, cohæredes autem Christi.*

Resp. dist. maj. è Filiis DEI qui per baptismum Christo & Ecclesiæ sunt geniti, *conc:* qui ad hæreditatem sunt prædestinati, *nego.* Etsi Filii DEI secundum prædestinationem quandoq; nominentur, at propria eademq; frequens est

est denominatio a præfenti iustitia. Videmus etiam filios verè exhæreditari; non ergo omnino colligitur, filius est, ergo percipiet hæreditatem; nisi addas, & ejus, quod accepit, non amisit. Quoniam autem Filius Dei non semper probus intelligitur, sed is quoq; interdum qui paternæ bonæ prodegerat, ideo adhibui distinctionem. Ex his enim sic genitis per baptismum, improbi quidam & stulti sunt, quos Patris Matrisq; cura parturire iterum gestit, donec formetur in eis Christus. *Nonne. Deut 32. inquit: ipse est Pater tuus? at generatio perversa erat, & infideles filii.*

Objic: 2. Veram Christi Ecclesiam perfectam & immaculatam esse oportet, quam Apost: ad Ephes. 5. sine macula & ruga describit; ergo.

Resp. cum S. Aug. lib: 2. Retract: cap. 19. dist: Ecclesiam quæ jam sit, nego. Quæ præparatur, ut sit, quando apparebit etiam gloriosa, conc. Non autem modò in tantis scandalis, in tali permixtione hominum pessimorum est gloriosa. Mundat ergo eam Christus la-

ua.

*vacrò aquæ abluens peccata præterita - -
facit eam occurrere in eam gloriosam sine
macula & ruga.*

CONSECTARIUM.

Reprobos & infirmos, peccatoresq;
membra Ecclesiæ esse, quæ in Christi
nomine per baptismum cogitur, qui est
fidei Sacramentum, non equidem viva
& perfectæ, Ecclesiæ capiti per chari-
tatem unita, sed imperfecta, & quam-
vis non mortua, mortificata tamen, so-
la fide conjuncta, nempe de numero
earum ovium, de quibus Psal. 71. *Ira-*
tus est furor tuus super oves pascuæ tuæ,
quæ non sunt oves omnino secundum
prædestinationem; de quibus hominibus
fidelibus dici potest illud 1. Joan: 2. *ex*
nobis prodierunt, sed non erant ex nobis,
hoc est, ex nobis exierunt, sed non e-
rant ex nobis, seu in Ecclesia, secun-
dum prædestinationem scilicet, quamvis
essent secundum fidem & Sacramento-
rum communionem. Hi profectò quam-
vis Ecclesiæ sint membra, habent enim
influxum capitis per fidem, tamen non
sunt eæ partes Ecclesiæ, quæ cum Chri-
sto

sto mansura est in æternum: *Ipsi*, ait S. Aug. lib: 3. de doct. Christ. cap. 321. *non pertinent ad illud modo tabernaculum, tunc domum.*

Petes. 1. Utrum Catechumeni sint in Ecclesia?

Resp. Catechumenos non esse actû in Ecclesia, quippè qui nondùm sunt baptizati nam baptismus facit membrum Christi utpotè fidei Sacramentum, & janua aliorum omnium Sacramentorum. Aliquo tamen modò nempè in voto possunt dici esse in Ecclesia, cùm ingredi postulent, & habeant fidem, & quandoq; charitatem:

Petes 2. Utrum Hæretici, Apostatæ & Schismatici, & Excommunicati sint in Ecclesia?

Respondeo: Hæretici & Schismatici, vel sunt publici vel occulti. Hæretici publici sunt, qui palam & notoriè erroribus ab Ecclesia proscriptis adhærent; occulti verò, qui fidem exterius profitentur, quam interius negant. Schismatici publici sunt ii, quorum notoria est rebellio in legitimos Pastores; occulti verò, quorum non est notoria.

Cer-

Certum est Hæreticos & Schismaticos occultos (idem dicendum de Apostatis) esse Ecclesiæ membra, & ad illius corpus pertinere; quia eandem cum ipsa fidem exterius profitentur, participant iisdem Sacramentis, atq; exterius legitimis Pastoribus subjiciuntur. Et certè si præcisè propter defectum fidei internæ, internumq; Schisma & Apostasiam aliquis non est in Ecclesia, duo sequentur absurda, primum est, quod statim, ac Pastor aliquis seu Episcopus aut ipse summus Pontifex in aliquam Hæresim occultam incidet, omni destituetur autoritate, nullamq; prorsus in Ecclesia obtinebit amplius jurisdictionem; ac proindè invalidi erunt ac nulli omnes actus, qui à vera jurisdictione dimanare debent: quod quidem quàm sit absurdum, satis intelligitur.

Alterum absurdum istud est, quod nemini unquam constare poterit, qui nam hominum cætus sit vera Ecclesia; quomodo enim dignosci poterit, in quibus sit vera & interior fides? unde sequeretur invisibilem fore Ecclesiam.

At fateor Hæreticos, Schismaticos & Apo-

Apostatas esse in Ecclesia imperfecte duntaxat, & quantum ad corpus ejus seu partem externam & visibilem. Publicos vero & excommunicatos publice denuntiatis nequidem ad corpus Ecclesiæ externum pertinere.



ARTICULUS III.

De notis veræ Ecclesiæ.

Nomine notæ seu notionis intelligunt Theologi quandam proprietatem rei alicui ita propriam, ut per eam & ipsa cognoscatur, & a quolibet alio discernatur: sic vg. in Divinis, Paternitas primæ convenit personæ & soli, hinc illam designat, & ab aliis personis discernit. Dum ergo agimus de notis veræ Ecclesiæ, investigamus certa signa, ex quibus colligere possimus aliquem cætum veræ Ecclesiæ rationem habere. Alio modo hic procedendum cum iis, qui S. Scripturas rejiciunt, cum iis enim procedimus per rationem proponendo eis motiva credibilitatis, quibus quisq; lumen rationis sequens

mo-

moveri debet, ut credat hanc Ecclesiam esse veram, quam tot ac tanta motiva suadent; alio modò cum Hæreticis, cum iis enim agendo per scripturas demonstramus, veram Ecclesiam habere certos characteres & notas, quibus dignoscatur, atq; eas soli Rom: Ecclesiæ convenire.

Munus ergo harum notarum est, non ut Ecclesiam reddant in se evidentem, alias ab omnibus agnosceretur, nec esset objectum fidei, sed ut reddant Ecclesiam evidenter credibilem, ita ut sit evidenter credibile Ecclesiam cui illæ notæ conveniunt, esse veram Ecclesiam. Ergo.

§. I.

An & quæ sint notæ veræ Ecclesiæ?

Dico. Quatuor potissimum sunt veræ Ecclesiæ notæ, quod sit una, Sancta, Catholica & Apostolica. Sic Concil: Constantinopolitanum in Symbolo Credo - - Et unam, Sanctam Catholicam & Apostolicam Ecclesiam.

Vera Ecclesia est una.

Juxta illud 1. Corint: 12. *In uno Spiritu omnes nos, in unum corpus baptiza-*

ti sumus. Ad Ephes. 4. Unus Dominus, una fides, unum baptisma, unus DEUS & Pater omnium. Optatus Milev. lib: 1. Sponsus Christus, est unius Ecclesiæ, sicut in Canticis Canticorum ipse testatur, qui cum unam laudat, cæteras damnat. Idem probant parabolæ art. præc. allatæ. S. Cypr: lib: de Unit: Ecclesiæ & Epist: 76. S. August. in suis operibus contra Donatistas. Insuper Ecclesia vera debet esse una unitate concordiae, & consensionis in eundem finem ultimum, & in eadem media ad illum, in eadem, Sacramenta, eundem cultum, eadem præcepta ad salutem necessaria, alias esset domus confusionis, contentionis & schismatis. 2dò. una unitate ordinis, seu dispositionis ordinatæ plurium sub eodem regimine unius capitis unum ovile, unus Pastor Joan: 10.

Vera Ecclesia Sancta.

1^{mo}. Dicitur Sancta, ratione Capitis & Sponsi Christi, qui est Sanctus Sanctorum. 2dò. quia consecrata est Deo, cujus supremum respicit cultum, & ipsius promovet honorem. 3^{tiò}. quia in ea doctrinæ & Sacramentorum

re-

reperitur sanctitas. 4to. quia extra illam nulla salus, nulla sanctitas, quæ in materia fidei & morum consistit.

Vera Ecclesia est Catholica sivè Universalis.

Christus fundans Ecclesiam suam Apostolis Act: cap: 1. ait: *Eritis mihi testes in Jerusalem & in omni Judæa & Samaria, & usq; ad ultimum terræ.* Vera ergo Ecclesia universalis est 1mo. ratione loci, quia est per totum orbem diffusa: *Euntes in mundum universum.* Math: 16. 2do. ratione conditionis personarum, quia cujusq; conditionis homines Judæos, Gentiles, cujuscunq; etiam nationis ad se vocat, & accedentes complectitur. *Postula a me & dabo tibi Gentes hæreditatem tuam, & possessionem tuam terminos terræ.* Psal: 2. *Redemisti nos DEO in sanguine tuo ex omni tribu, & lingua & populo, & fecisti nos DEO nostro Regnum* Apoc: 5. 3tio. ratione durationis quoniam ad finem sæculi est duratura: *Ecce ego vobiscum sum usque; ad consummationem sæculi.* Math: ultimo. 4to. ratione doctri-

næ, quia docet, quæcunq; sunt credenda, facienda, & vitanda.

Vera Ecclesia est Apostolica.

Ratione scilicet originis & successio-
nis non interruptæ, quia 1^{mo}. fun-
data est a Christo, qui ad Hebr: 3.
dicitur: *Apostolus confessionis nostræ*. 2^{do}.
quia ab Apostolis est propagata & fir-
mata, atq; ab eis derivata, usq; nunc
perseverat. Hinc fit quod Christus est
fundamentum Ecclesiæ primarium, jux-
ta illud 1. Corinth: 3. *Fundamentum
aliud nemo potest ponere, præter id quod
positum est, quod est Christus JESUS;*
Apostoli autem fundamentum secun-
darium, & ideo fideles dicuntur, *su-
perædificati super fundamentum Apostolo-
rum* Ephes: 2. Hanc notam veram di-
gnoscenti Ecclesiam passim urgent Pa-
tres, Tertullianus lib: de Præs: cap: 32. Si
quæ, ait, *Ecclesiæ audent interserere se æta-
ti Apostolicæ, quia sub Apostolis fuerunt,*
*possumus dicere edant origines Ecclesiarum
suarum, evolvant ordinem Episcoporum suo-
rum, ita per successiones ab initio decur-
rentem, ut primus ille Episcopus aliquem*
ab-

ab Apostolis, vel Apostolicis viris, qui tamen cum Apostolis perseveraverint habuerit Athorem & Antecessorem.

§ II.

Cui Ecclesiæ hæ quatuor notæ conveniunt?

Dico: **H**æ quatuor notæ soli Romanæ Ecclesiæ conveniunt, non sectis Hæreticorum.

Prob: Quo ad 1. P. Sola Ecclesia Romana est una unitate consensionis in in ultimum finem, & in eadem media, nempe eandem fidem, eadem Sacramenta, eundem cultum &c. unum supremum Pastorem Rom: Pontificem tanquam visibile Ecclesiæ caput, & a Christo institutum in terris Vicarium agnoscit & veneratur; ergo. *Ant: per se patet*, nec a Novatoribus potest negari: Omnes enim Romano-Catholici eosdem articulos credunt, septenarium Sacramentorum numerum confitentur, Rom: Pontificem ut visibile Ecclesiæ caput, & Christi in terris Vicarium agnoscunt & venerantur.

Prob: Quo ad 2. P. Sola Ecclesia Rom: habet notam sanctitatis 1. Quia

est sancta ratione sui capitis Christi, aliorum suorum fundamentorum, nempe Apostolorum, eorumq; Successorum, nec non SS. Patrum, qui illam adversus hæreses defenderunt; & Martyrum, qui sanguine suo eandem sigillarunt. 2do. Est sancta ratione finis, scilicet cultûs Divini, cui tota consecratur; ratione Sacramentorum, Legum, Sacrificiorum, Cæremoniarum, quæ omnia sanctitatem spirant. 3to. Ratione doctrinæ; nec enim unquam falsum docuit, sed solummodo ea, quæ in sacris literis, & traditionibus continentur. 4to. Est sancta sanctitate vitæ, morum ac bonorum operum, quæ omnia Christus Dominus in sua Ecclesia requirit: *Christus enim passus est, ut mundaret sibi populum acceptabilem, sectatorem bonorum operum.* Tit: 2. Siquidem Rom: Ecclesia negat solam fidem ad salutem sufficere, excitat omnes ad observandam legem Divinam, quam observatu possibilem, & Divina adjuvante gratia facilem esse docet; commendat omnibus exercitium bonorum operum; suadet Evangelica consilia, quibus

bus ad sublimem sanctitatis gradum pervenitur. Adde in hujus sanctitatis confirmationem innumera miracula a Christo & Apostolis patrata, ac in S. Scripturis relata, deinde ea, quæ operati sunt viri sancti & Apostolici, quæq; referunt *Tertullianus* lib: ad Scapulam cap: 4. & *Apol:* 2. cap: 5. *Euseb:* lib: 5. *Hist:* cap: 5. *S. Basil:* lib: de Spiritu S. cap: 29. *S. Hier:* de Viris illust: *Aug:* lib: 22. de Civ: cap: 8. & alii tam exacte, ut proinde non sine impudentia & temeritate falsitatis argui possint.

Prob: Quò ad 3. p. Ecclesia Rom: est Catholica seu universalis, & quidem si nomen spectetur, Rom: Ecclesia Catholica nominatur non solum a suis, sed etiam ab omnibus inimicis ait *S. Aug:* de vera Relig: cap: 7. Imo sensus & consensus totius orbis stat pro Ecclesia subjecta Sedi S. Petri, quod ipsa uti nominatur, sic sit Catholica. *1^{mò}*. Ratione loci, quia est per totum orbem diffusa: *fides vestra annuntiatur in universo mundo*, ait *Apost:* scribens Romanis. *2^{dò}*. Ratione hominum salvandorum,

siquidem nullus, qui extra Ecclesiam Rom: mortuus est, potest afferri, qui salutem sit consecutus. 3^{tiò}. Ratione durationis, quia a Christo fundata vicissitudines equidem varias subjit, sed in mundi finem durabit.

Prob: Quòad 4. p. Sola Ecclesia Romana est Apostolica. 1^{mò}. Quia a Christo Domino supra Petrum tanquam petram ædificata est, contra quam portæ inferi non prævalebunt. 2^{dò}. Ecclesia Romana est Apostolica ratione successionis non interruptæ Pastorum suorum ab Apostolis. Unde S. Aug: jam citatus ait: Tenet me (in Ecclesia Romana) ab ipsa sede Petri Apostoli, cui pascendas oves Dominus commendavit, usq; ad præsentem Episcopatum, successio Sacerdotum. Hinc Episcoporum ac Pastorum successionem in Ecclesia Dei ita necessariam affirmat. S. Hier: in Dialogo contra Luciferianos, ut sine illa Ecclesia subsistere non possit. Ecclesia, ait, non est quæ non habet Sacerdotes, id est; legitimos, ratione canonice ordinationis & successionis. Hinc S. August: contra Epist: Fundamenti exclamat:

mat: *O! infelix anima cui te committis, cur non potius te subdis Evangelicæ veritati ab ipsis Apostolorum temporibus, usq; ad hæc nostra per successiones legitimæ commendatæ? 3tiò. Romana Ecclesia est Apostolica ratione doctrinæ ab Apostolis derivatæ. Porro Ecclesiam priorum sæculorum fuisse Apostolicam, & Apostolorum tenuisse doctrinam, fatentur hæretici. Ipsis ergo incumbit probare & ostendere, quandonam hæc tam notabilis mutatio facta est? Quod est illud dogma, quod proponere cæpit Romana Ecclesia, antea non creditum? Quis illius mutationis Author? Quis locus? quod tempus? quos habuit Adversarios & Impugnatores? Hæc nobis ostendant Hæretici in Ecclesia Romana. Quoties aliqua hæresis serpere incepit, mox se opposuere Catholici, & nedum scriptis verum etiam sanguine illam impugnarunt; & dum Roma dogmata Apostolicæ doctrinæ adversa propalaret, nova Sacramenta fingeret, totus mundus quasi gravi sopore correptus siluisset! Quis crederet?*

Con-

Confirmantur, hæc omnia: Ecclesia Romana in prioribus Sæculis, adhuc tempore Concilii Constantinopolitani I. in quo assignatæ sunt quatuor notæ veræ Ecclesiæ, erat vera Ecclesia Christi, & competeabant illi præfatæ quatuor notæ, ut fatentur Hæretici; atqui vera Christi Ecclesia deficere non potest, ut dicetur; ergo.

Quòd autem prædictæ notæ Sectis Hæreticorum non convenient deducitur. *imo.* Quia 1. non habent unitatem in credendis fidei articulis, siquidem v. g. Lutherani, Calvinistæ. &c. in una civitate aliter credunt, quam in alia; imo in una civitate una domus aliter credit quam alia; quod majus est, in una domo subinde tot sunt fides diversæ; quot sunt capita. Nec mirum; quia 2. non habent, nec agnoscunt in terris Vicarium Christi, cui obediant tanquam regulæ, in decidendis ac proponendis fidei articulis infallibili; hinc fit quod quisq: juxta privatum Spiritum credat, quod placet. 3. Non habent unitatem in iisdem Sacramentis, siquidem ipse Lutherus jam unum adstruit lib: de
Ca-

Captiv: Babil: deinde ibidem ponit tria, Baptismum, Panem & Pœnitentiam; tandem concludit tantum esse duo, Baptismum & Eucharistiam. Confessio August: art: 5. asserit tria; alii demum plura, alii pauciora admittunt, & hæc adeo nota & evidentia sunt, ut ita dicam, palpando inferri possit, Sectas Hæreticorum non habere unitatem, quæ est nota veræ Ecclesiæ Christi, adeoque non sunt vera Ecclesia Christi.

2dò. Non habent sanctitatem 1. ex parte suorum Authorum; ipsi namq; eorum sequaces ultro fatentur Lutherum, Zwinglium, Calvinum multis flagitiis inquinatam vitam duxisse. Nota sunt orbi, Lutheri ambitio, superbia, apostasia, maledicta, sacrilegia &c. Idem dicendum de Zwinglio; qui verò pessimam vitam Calvinus cupit nosse, legat *Hieron: Bolsecum*, & *Florimundum Remundum* è Calviniano Catholicum. 2. Non habent sanctitatem miraculorum, nisi quis miraculum dixerit, quod Calvinus *Brulœum* ex vivo fecerit mortuum, apud Bolsecum in vita Calvinus. Hinc merito in Diatribe de libero Arbit: ait Erasmus *Nullus eo-*

tum.

rum adhuc extitit, qui vel equum claudum sanare potuerit. 3. Non habent sanctitatem doctrinæ; nam sectariorum doctrina continet multa dogmata falsa, v.g. mandata Dei esse servatu impossibilia, ut dicebant *Anomiani*. Cum *Simonianis* docent, bona opera esse inutilia; cum *Novatianis* nullum esse Pænitentiae Sacramentum præter baptismum; cum *Donatistis*, Ecclesiam defecisse; cum *Arianis* non esse orandum pro mortuis; omnem austeritatem, jejunia, vota nihili habenda cum *Joviano*, & *Vigilantio*; imo nullum esse peccatum quod homini noceat, præter infidelitatem, qua quidem viâ (ait *Dubravius*) Lutherus brevi temporis spatiò totum illum terræ angulum, in quo versabatur, fidefragis, perjuris, adulteris, incæstuosis, & sacrilegis implevit; ut Lutherani cæteri; Sectarii hoc opere testentur manifestè, quod aureis fane verbis elocutus est August: Non ex aliis, ait, hominibus fiunt hæretici, quam ex iis, qui in Ecclesia si permansissent, propter vitæ turpitudinem nihilominus periissent.

3tio. Non habent Catholicitatem. 1. Non habent ratione personarum, quia
ad

ad se non omnes vocant, cum prætendant quemq; in sua Secta posse salvari.

2. Non ratione temporis, ubi enim ante Calvinum & Lutherum erat eorum Ecclesia? 3. Non ratione loci; latent quippe in angulo Europæ, in aliis autem mundi partibus non sunt, aut si quidam in his exteris nationibus inveniuntur, habentur pro Hæreticis, & seductoribus. Nec mirum: *Negotium enim, inquit Tertullianus, non est hæreticis convertendi, sed nostros evertendi.*

4to. Non habent Apostolicitatem. 1. Non habent hoc ratione doctrinæ ab Apostolis derivatæ; siquidem disseminant errores, quos vetus Ecclesia Apostolica damnavit, ut jam dictum; & sæpè Calvinus lib: 3. Instit: cap: 4. & 5. fatetur de satisfactionibus, de Cælibatu Sacerdotum, de oratione pro mortuis, de jejuniis Quadragesimæ. 2. Nec ratione successionis Apostolicæ in suis Pastoribus, cui enim successit Lutherus? cui Calvinus? Unde meritò dicimus ipsis cum Tertulliano lib: 1. Præscrip: cap: 32. *Edant origines Ecclesiarum suarum, evolvant ordinem Episcoporum*

rum suorum, ita per successionem ab initio decurrentem, ut primus ille Episcopus aliquem ex Apostolis, vel Apostolicis viris, qui tamen cum Apostolis perseveraverit, habuerit Auctorem & Antecessorem. Certè retrogradiendo pervenient ad Jovinianum, Vigilantium, Aetium, Simonem Magum & alios, qui cum Apostolis non perseverarunt. 3. Nec ratione missionis legitimæ in suis Pastoribus. Hæc enim esset vel ordinaria, vel extraordinaria; non ordinaria, a quo enim eam habuissent? Non ab Ecclesia Romana, quando ab ea recesserunt; quia protunc vel defecit, & fuit hæretica, & sic non erat vera Christi Ecclesia, per consequens caruit autoritate mittendi; vel non erat hæretica, & sic Sectarii sunt Schismatici, Hæretici, & Excommunicati, atq; ideo omni Autoritate regendi Ecclesias privati quàm in Ecclesia habere potuerunt. Aliam societatem vel Ecclesiam, a qua habuerunt missionem ordinariam ostendere non possunt. Non etiam habuerunt missionem extraordinariam; hæc enim vel in scripturis exprimi debet, vel miraculis probari; qua-

qualis fuit missio Moyfis, Prophetarum, Christi & Apostolorum eius; atqui neq; in Scripturis expressa habetur, neq; miraculis comprobata hucusq; fuit missio Lutheri & Calvini, cum nullus eorum extiterit, qui vel equum claudum sanare potuerit, ut mox dictum ex Erasmo; ergo.

Dico 2. Sedes Romana est centrum unitatis Ecclesiæ Christi ita ut non possit esse una absq; subordinatione & dependentia a supremo ejus capite Romano Pontifice.

Prob: ex SS. PP. S. Irenæus lib: adversus Hær: cap: 3. dicit. Ad hanc Ecclesiam Romanam propter potiore principalem necessesse est omnem convenire Ecclesiam; hoc est: omnes, qui sunt undiq; fideles. S. Cyprianus lib: de Unit: Eccl: Exordium ab unitate proficiscitur, & Primatus Petro datur, ut una Christi Ecclesia, & cathedra una monstratur. Optatus Milev: lib: 2. contra Parmenionem: Negare non potes, scire te in Urbe Roma Petro primo cathedram episcopalem esse collatam - - - in qua una Cathedræ unitas ab omnibus servaretur, nec cæteri Apostoli singulas

gulas sibi quique defenderent, ut jam Schismaticus & peccator esset, qui contra singularem Cathedram alteram collocaret.

Petes. Cur ad unitatem Ecclesiæ non sufficit adhærere soli Christo ut capiti?

Resp: Equidem Christus est caput Ecclesiæ sed invisibile; cum autem Ecclesia sit corpus visibile, requiritur, ut habeat caput visibile.

§. III.

Objectiones Hæreticorum.

Obji: 1. **V**era Ecclesia potest consistere, modo detur concordia in articulis fundamentalibus, & primariis; ergo apud illos est vera Ecclesiæ unitas. *Prob: Ant:* Primitiva Ecclesia, quæ utique erat vera, perstitit, etsi Apostoli inter se non fuerint concordēs; ergo.

Resp: *Dist:* *Prob:* *Ant:* non fuerint concordēs quo ad Articulos fidei, *nego:* circa facta quædam particularia, uti an Petrus recte fecerit simulando Iudaismum? an Marcus fuerit assumendus in socium Missionis Evangelicæ, *conc.* Sic Petrus, Paulus, & Barnabas discordes

des erant ad Gal: 2. Act: 15. Imo & si fideles se opposuerint Apostolis circa observationem Legis Moyſaicae Act: 11. quia abrogatio hujus tunc non erat definita non repugnabat unitati fidei.

Dicunt. Etiam apud protestantes reperitur concordia in credendis Articulis fundamentalibus; ergo habent sufficientem unitatem fidei.

Resp. nego ant: Determinare enim non possunt, quinam articuli sint fundamentales; cum nec verbulô S. Scriptura distinguat inter fundamentales & non fundamentales. Item nego quod aliquis fidei Articulus etiam minimus relinquatur homini liber ad credendum vel non credendum; quia DEUS etiam in minimis fallere non potest. Aliunde alios articulos fundamentales assignant Lutherani; alios Calvinistæ; Anabaptistæ alios, alios Sociniani; imo inter Lutheranos unus hos, alter illos, hodie tales, gras alios pro talibus habet. Imo anno 1631. in Synodo Charentonenſi ex Lutheranismô & Calvinismo facta est unio, una communio, & Eccle-

clesia, quamvis notum sit eos in pluribus dogmatibus dissentire, præsertim circa Eucharistiam.

Objiciunt 2. Nec Ecclesia Romana est sancta, quia in ea magna grassantur vitia; ergo sanctitas non est nota veræ Ecclesiæ.

Resp. nego Ant. Nihil enim sanctitati Ecclesiæ obest, quod in ea plurimum grassantur vitia; nam ubi triticum, ibi etiam paleæ; ubi segetes, ibi zizania. Manet igitur Ecclesia sancta, esto sint in ipsa mali, quia suis fidelibus præscribit præcepta, doctrinas, & media, quibus ad veram sanctitatem pervenire possunt, eosq; ad omnium virtutum & bonorum exercitium hortatur, prohibet peccata, & scelera rigide puniunt. Econtra sequendo dogmata, Novatorum nullus sanctitatem veram acquirere potest; cum contrariantur rationi & scripturæ; unde ne unus quidem hæreticus per tam longum tempus sanctitate conspicuus evasit, sed omnes mali fuerunt religionis vitio; econtra in Romana Ecclesia multi equidem sunt mali, sed suo, non religionis vitio; cum plu-

plurimi etiam sint boni probi & sancti.

Obijciunt 3. Ideo Ecclesia Protestantium non foret Catholica, quia per orbem non est diffusa, sed hoc est falsum; ergo. *Prob: min.* In omnibus totius orbis partibus reperiuntur Protestantes; ergo.

Resp: ad *Prob.* dist; *Ant.* Reperiuntur protestantes neo-conversi ad fidem, *nego;* ex Europa spe lucri illuc se transferrentes, *conc:* Affricam totam, Asiam percurrere, quos ibi invenies Protestantes? certe nullos præter mercatores, & mercaturæ Consules, & alios Advenas ex arctissimis Angliæ, Hollandiæ & Daniæ limitibus adventitios.

Dicunt. In variis orbis regionibus etiam multi Protestantes neo-conversi ad fidem reperiuntur; ergo. *Prob.* Protestantes Angli habent suos Missionarios in America, Dani in Indiis Orientalib9; ergo.

Resp. 1. Nullus eorum adhuc sanguinem in Apostolatu fudisse legitur; nullius etiam miracula, quæ legitimæ missionis & Apostolatûs sunt signa (ut ait

K

S.

S. Greg. M.) audivimus. 2dò. Dist.
Ant. Habent Missionarios, qui in ditio-
nibus Angliæ subjectis aliquos ad se
alliciunt, *conc*: qui barbaris independen-
tibus fidem annuntiant, *nego*. Ut enim
supra dictum est ex Tertulliano: *Nego-
tium non est Hæreticis convertendi, sed no-
stros evertendi*. Si suam Ecclesiam Ca-
tholicam esse volunt, ostendant nobis
apud exteras gentes, easq; barbaras,
prætenstæ suæ missionis effectus, quod
nunquam præstabunt. Gratis dato,
quod hoc præstiterint, adhuc eorum
cætus Catholici nomine reipsa insigni-
ri non potest; eò quod ad Ecclesiam
Catholicam non sola sufficiat univer-
salitas loci, sive diffusio per orbem; sed
insuper requiritur universalitas doctri-
næ, quæ omnia recta, omnia sancta &
credibilia complectatur, a qua quidem
universalitate quam remotissimus sit
cætus A catholicorum, quis non videt?
Ut fileam universalitatem temporis,
quam pariter non habent cætus hetero-
doxi; cum originem suam ad Petrum
& Christum referre nequeant.

In:

Instant: Etsi fides Protestantium totum orbem non pervaserit hucusq; nihil obstat, ne impofterum sic dilatetur; ergo. *Prob. Ant:* Romana fides non simul, sed successive suum habuit incrementum; ergo.

Resp. Magna est disp. Quod enim per paucos annos duodecim Apostoli præstiterunt, totum mundum replendo Verbi Dei semine, hoc Protestantes plus quam per duo sæcula præstare non potuerunt; & certe si numerent ipsi tot sæcula, quot Apostoli annos, neq; etiam tunc præstabunt. Cum enim Ecclesia ipsis fatentibus jam senuerit, si eorum cætus Ecclesia est, quomodo in sua senectute crescet, quæ in sua juventute tam exilis fuit.

Replicant. Eo tempore, quo Ariano-
rum Secta omnia miscuerat, etsi Ecclesia vera intra solius Italiæ limites, & his non plane sola fuerit conclusa, nihilominus Romanæ Ecclesiæ defensores etiam protunc Ecclesiam Romanam Catholicam permansisse prætendunt; ergo nihil oberit Ecclesiam prote-

testantium Catholicam esse, quantumvis per totum orbem diffusa non est.

Resp. 1. Nego, quod intra limites Italiae Ecclesia vera fuerit conclusa. Præterquàm enim, quod Italia magna ex parte saltem erat Catholicæ fidei addictissima, in omnibus mundi partibus tunc cognitis, erant homines veræ fidei cultores. In omnibus dico, non solum in Tartaria, Colchide, Armenia, Persia, India, &c. verum etiam in ipsis Provinciis Constantio summo Arianismi protectori subiectis. Erant enim quidam illo tempore, testibus S. *Athanasio* & *Hilario*, & sane multi, qui obscuris verbis delusi putarent, hoc credi ab Arianis, quod ipsi credebant, & hi erant veri Catholicæ fidei alumni; non pauci etiam fuerant, qui ex timore cedentes simulatè consenserunt Arianis, qui quidem graviter delinquentes, itidem sententiâ & animò veri erant Catholici; fuerunt postremò alii, numero quidem pauci respectû aliorum præsertim Arianorum, sed tamen per totum orbem more exulum ita dispersi, ut nulla Provincia Imperii Romani fuerit,

rit, in qua quam plurimi Catholicæ fidei Professores non invenirentur. Ergo. 2do. Inverto argumentum contra Protestantes: cætus Arianorum temporibus illis etsi intantum invaluerit, ut per potissimas Imperii Romani late patentis provincias fuerit diffusus, tamen hac loci universalitate non potuit obtinere, ut vel ex hoc titulo Catholicus diceretur; ergo a pari, dato non concesso, quod Acatholicorum modernorum secta in variis orbis regionibus inveniat, adhuc cætus Catholicus dici non potest.

Objiciunt 4. Esse diffusum per totum orbem convenit etiam falsis religionibus; ergo Catholicismus non est nota veræ Ecclesiæ.

Resp. Trans. Ant. dist. conseq. Ergo non est nota sumpta simul cum aliis notis, *nego*; seorsim, *subdist.* non est vera nota, *affirmative* quasi ibi eo ipso datur vera Ecclesia ubi reperitur, *conc:* non est vera nota *negative*, ita ut ubi non reperiatur, nec vera reperiatur Ecclesia. *nego.* Dixi *Transcat*: nam *vg.* Ethnicismus, Turcismus, & Judaismus

revera per totum orbem diffusi non sunt; quia cum scindantur in species infimas, quasi innumeras, quò ad unam vix per integrum Regnum diffunduntur. Quod ipsum de Lutheranismò & Calvinismo dici potest, ut jam supra dictum. Hinc ad rem præclare S. Aug: lib: de Past: cap. 8. dixit: *Ecclesiam esse ubiq; hæresim ubiq; sed Ecclesiam ubiq; eandem*, (eadem dogmata tradentem) *hæresim verò diversissimam*, nimirum aliam hic, aliam alibi; quod verissime commendat judicium Seren: Ducis Saxoniae Georgii de Lutheranis jam tum ab initio in centum sectas divisis, asserentis Lutheranos hodiernos nescire, quid crastina luce credituri sunt. Adde, hic est solum sermo de notis veræ Ecclesiæ distinctivis a sectis Christianorum seu ab Hæreticis.

Objiciunt 5. Etiam si Ecclesia vg. Lutherana non possit ostendere successiōnem Pastorum ab Apostolis, nihilominus potest dici Apostolica; ergo. *Prob: Ant:* Ecclesia Christi jam tempore Apostolorum erat Apostolica, & tamen tunc nulla erat successio; ergo.

Resp.

Resp. dist: Ant. Nulla erat successio actû, erat tamen futura, *conc.* secus, *nego.* Quippe jam tunc Ecclesia Christi exigebat continuam per secutura tempora successionem Pastorum propter promissionem Christi factam, quia secuturis temporibus sine illa actuali successionem non posset ostendi, quo modo moderni Ecclesiæ Præsules illam potestatem accepissent, & derivassent a Christo. Hinc ait S. Cypr. Epist. 76. ad Magnum; *Pastor haberi quomodo potest, qui nemini succedens, & a se ipso incipiens, alienus fit & profanus.* Talis est Lutherus.

Objiciunt 6. Missio Divina deest Pontificibus Romanis, & Romanæ communionis Episcopis; nam 1. Papa eligitur a Cardinalibus, qui sunt institutionis humanæ. 2. Episcopi plerumq; a Regibus eliguntur; ergo.

Resp: Aliud est electio, aliud ordinatio; per ordinationem non per electionem datur missio. Et licet summus Pontifex a Cardinalibus, Episcopi a Regibus eligantur; ab Episcopis tamen, qui sunt juris Divini ordinantur secundum

dum formam a Christo præscriptam, vicijus ab ipso authoritatem accipiunt, ubi sunt semel canonicè instituti.

§ IV.

Quid censendum de notis veræ Ecclesiæ, quas statuunt Hæretici?

Hæretici cum videant veræ Ecclesiæ notas in Symbolo enumeratas suis cætibus applicari non posse, alias duas comminiscuntur, nimirum sinceram verbi Dei prædicationem, & legitimum Sacramentorum usum. Nec dubitatur apud Catholicos, an in sola vera Christi Ecclesia sincera verbi Divini prædicatio, & legitimus Sacramentorum usus reperiantur; nullus enim id jure negare potest; sed quæritur, utrum hæc duo assignari possint pro genuinis Ecclesiæ notis, quibus vera Christi Ecclesia dignosci, & ab aliis Sectis distinguui possit.

Resp: Neq; sincera Verbi Dei prædicatio, neq; legitimus Sacramentorum usus sunt genuine Xti Ecclesiæ notæ.

Prob: Conditiones ad veram Ecclesiæ notam sunt potissimum tres. *1ma*
de-

debet esse propria non communis. 2. Debet esse notior Ecclesiâ. 3. Sit sensibilis obvia, & cognitu facilis; atqui has conditiones sincera Verbi Dei prædicatio & legitimus Sacramentorum usus non habent; ergo. Non *1^a mam*. Quia nulla unquam fuit Hæreticorum Secta, quæ non judicaret apud suam Societatem veram esse doctrinam Christi, veraq; ejus Sacramenta reperiri; atqui fieri non potest ut veræ Christi Ecclesiæ propria sit nota illa, quam tot diversæ Sectæ sibi vendicant. Non *2^a dam*: Quia vera Christi Ecclesia, quæ tot habet notas, nobis prius innotescit, quam vera Christi doctrina, & legitimus Sacramentorum usus; cum non possit nobis innotescere, quæ nam sit Scriptura S. & quænam sint Sacramenta, nisi per Ecclesiæ autoritatem; ergo ipsa Ecclesia notior est, quam Verbi Dei prædicatio. Nec *3^a tiam*. Quia Christi doctrina, ex qua sola habemus numerum Sacramentorum, est humanæ menti impervia, nec omni hominum generi accomodata; cum de ea ejusq; sensu tot graves concertationes, inter ipsos doctissimos oriantur,
ut

ut mittam Novatores; sic Calvinus admittit Epistolam ad Hebræos, etsi dicat non esse Pauli factum, Epistolas Jacobi, Judæ, secundam Petri, secundam & tertiam Joannis, Apocalypsim, quos tamen libros rejicit Lutherus; ergo.

Dices: Per veram Christi doctrinam & legitimum Sacramentorum usum semper vera Ecclesia secernebatur a falsa Secta; ergo.

Resp: Nego Ant. Ut enim dicit S. Aug. lib. 3. contra Petilianum cap. 5. *Nullus prædicans nomen Christi & gestans ac ministrans Sacramentum Christi sequendus est contra unitatem Christi.*



A R T I C U L U S IV.

Utrum vera Christi Ecclesia debeat esse visibilis?

Quæstio hic procedit de Ecclesia Christi universali, & tota (nam quo ad Ecclesias particulares nullum est dubium) fueritne, aut saltem aliquando esse possit tam occulta, ut pauci duntaxat, illiq; aliis incogniti reperi

riantur veram Christi fidem profitentes? Affirmant miseri Novatores, & hoc ideo, ne si Ecclesiam visibilem indefectibilemque admitterent, cogerentur ostendere suos proximos Antecessores, qui fuissent in vera visibili Christi Ecclesia; non possent autem alios nominare, quam Catholicos, qui ante ipsos fuerunt, & consequenter fateri deberent, Ecclesiam Catholicam, a qua ipsi per Apostasiam defecerunt, fuisse & esse veram Christi Ecclesiam, quod cum facere nolint, audacter scindunt nodum dicentes, semper quidem fuisse veram Christi Ecclesiam, sed invisibilem, & semper veros aliquos Evangelicos, suæ Sectæ professores fuisse, sed occultos latuisse, soli Deo cognitos. Contra quos.

Dico: Fides Catholica docet, veram Christi Ecclesiam debere esse visibilem.

Prob: 1. Illa Ecclesia necessario & semper debet esse visibilis, in qua Episcopi & Pastores visibiliter debent gubernare suos subditos, visibiliter docere, Sacramenta administrare, peccantes corrigere, contumaces ab aliorum com-
mu.

munione separare; & vicissim in qua subditi debent agnoscere suos Pastores, eorum mandatis morem gerere, Sacramenta ab eis percipere &c. atqui hæc semper fieri debent in vera Christi Ecclesia; ergo. *Min. Prob. ex S. Script. Act. 20. Attendite vobis & universo gregi, in quo vos Spiritus S. posuit Episcopos regere Ecclesiam Dei. Math. 18. Dic Ecclesiæ, si Ecclesiam non audierit, sit tibi sicut Ethnicus & publicanus. Hebr. 13. Obedite Præpositis vestris, & subjacete illis, ipsi enim pervigilant, quasi rationem pro animabus vestris reddituri.*

Prob. 2. Tum quia omnes sub æterna maledictione. tenentur se adungere veræ Christi Ecclesiæ; atqui si fuisset invisibilis, nullus eam cernere, nullus eam reperire, & consequenter nullus pro illo tempore potuisset salvari; contra illud Apost. 1. ad Tim. 2. dicentis de Deo. *Qui vult omnes homines salvos fieri, & ad agnitionem veritatis venire.* Tum quia si vera Christi Ecclesia facta est invisibilis; ergo defecit vera Dei Ecclesia; cum hæc a principio juxta ipsos fuerit visibilis; postea facta invi-

sibilis, & consequenter etiam Hæretici meritò dubitare & timere deberent, ne etiam ipsorum Ecclesia facta sit invisibilis, & defecerit, ipsis non advertentibus, & proinde non sit amplius vera Ecclesia; sicuti ipsi fingunt Ecclesiam Catholico-Romanam fuisse visibilem, & defecisse non advertentibus Catholico-Romanis.

Objic: 1. Lucæ 10. dicitur. *Regnum Dei non venit cum observatione*; atqui Ecclesia Christi est Regnum Dei; ergo Ecclesia Christi non venit cum observatione, ergo non est visibilis.

Resp. Non ubiq; Regnum Dei idem est ac Ecclesia, uti nec ibi Luc. 17. sed intelligi debet de adventu Christi, qui tam humilis fuit, ut ab hominibus observatus non fuerit, ut patet locum consideranti.

Dices: S. Scriptura comparat Ecclesiam 1. *Thesauro abscondito.* 2. *Lunæ* quæ sæpe redditur invisibilis; ergo juxta Scripturam Ecclesia non est visibilis.

Resp. Comparatio est quoad aliqua tantum. 1. Ecclesia comparatur thesau-

ro abscondito non ideo, quia latet; sed ideo, quia inventa delectat, & ditat, ut thesaurus inventus, qui inventori prius erat incognitus, 2^{do}. comparatur lunæ, non ideo quasi aliquando obscuretur tota, ac reddatur invisibilis; sed 1. Quia habet suum lumen doctrinæ, & sanctitatis a Christo, sicut luna a sole habet lucem. 2. quia ex parvo initio crevit in magnam fidelium congregationem, ut videmus crescere lunam. 3. quia patitur vicissitudines suas, nimirum pacis & persecutionis, ut luna suas; nam non omni tempore est æqualis splendor Ecclesiæ, sed etiam aliquo modo obscurari, secundum aliquam sui partem infirmam; & quasi suas pati eclipses potest; non tamen ita, ut videri & dignosci exterius nequeat amplius, sed semper ejus lux penetrat nebulas & nubes persecutionum; eo enim ipso, quod persecutiones patitur ab Hæreticis, visibilis esse debet, cum Hæretici id, quod est invisibile persequi directe non possint.

Instabis cum Brentio. Id, quod credi debet, non est visibile, sed Ecclesia credi.

di debet; ergo. *Maj. pat.* Quia *fides est argumentum non apparentium.* Hebr. 11. *Min:* videtur certa ex Symbolo Apostolico: *Credo Sanctam Ecclesiam Catholicam.*

Resp. 1. Retorqueo. Id quod credi debet est invisibile, sed baptisma Christianorum credi debet; ergo non est visibile. *2do:* Nego maj. Sunt enim aliqua, quæ & fides docet & experientia visibilis ostendit. Hinc *3tio:* dist. maj. Id quod credi debet secundum eam rationem, secundum quam creditur, non est visibile, *conc.* Secundum quam non cadit sub fidem, *nego.* Dist. min. Sed Ecclesia credi debet secundum rationem suam Spiritualem & supernaturalem, *conc.* secundum rationem externam, physicam & naturalem, *nego.* Sic etiam de baptismo dicendum. Sic & Christus videbatur quidem, secundum quod homo quilibet videri potest, sed fuisse illum ipsum, quem Prophetæ prædixerunt, Messiam, & incarnatum Verbum, profecto sola fide percepit Petrus Math: 16. & non ex carne & sanguine.

Suhsumes: Atqui Ecclesia Christi tota

ta est invisibilis. *Prob:* Ecclesia de qua hic loquimur est militans; ergo.

Prob: conseq: Ecclesia militans exercet militiam spiritualem adversus hostes invisibiles; ergo.

Resp: Dist: 2. *Prob:* Exercet militiam spiritualem adversus hostes invisibiles solos, *nego.* Etiam visibiles, quales sunt caro & mundus, & quidem per arma etiam sensibilia, qualia sunt Sacramenta, opera bona externa, *conc.* Eo modò homo non est simpliciter invisibilis, etsi quòad animam invisibilis sit.

Objic: 2. Textus Scripturæ in probatione allati loquuntur tantum de visibilitate Ecclesiarum particularium; ergo ex illis minime deducitur, quòd etiam Ecclesia universalis, de qua sola hic quæstio debeat esse, visibilis.

Resp: Trans: Ant: Nego conseq. Nam si Ecclesiæ particulares non possunt esse invisibiles, multominus invisibilis esse poterit Ecclesia universalis, quia quales sunt partes, tale totum sit, necesse est. Et licet particulares Ecclesiæ possint omnino deficere & in er-

rores labi, non tamen possunt reddi invisibiles, & simul perdurare, & esse partes veræ Ecclesiæ, seu, universalis; quippe ille cætus, qui desinit exterius profiteri fidem, rite usurpare Sacramenta, obedire legitimo capiti, desinit pariter esse Ecclesia particularis, seu esse pars Ecclesiæ universalis.

Objic. 3 Ad Hebr: 12. Ecclesia dicitur mons inaccessibilis & intractabilis; ergo invisibilis.

Resp: Cum Theophilacto Apostolum loqui de Ecclesia triumphante, ut patet ex contextu.

Objic: 4. Professio exterior fidei, Sacramentorum administratio, & alia quæ exhibent Ecclesiam visibilem non sunt necessario connexa cum fide, ut patet in Hypocritis, proinde fidem interiorem non manifestant; ergo.

Resp: Dist: Ant: Fidem interiorem non manifestant in aliquibus particulis, *conc:* in corpore Ecclesiæ, *nego.* Etsi enim certum non sit, an hic vel ille qui fidem exterius profitetur, quod illam intus habeat; est tamen indubitatum, non ratione connexionis natu-

L

ralis,

ralis, sed ex ordinatione Divina, quod vera fides sit in eo corpore, seu societate, quæ fidem exterius profitetur, & habeat certas notas, quod sit vera Christi Ecclesia. Nec.

Inferas: Ergo potest etiam videri cætus Prædestinatorum. Nam.

Resp: Nego 1. Quia nunc non datur cætus Prædestinatorum solorum in unum coadunatus, est enim in hac vita triticum mixtum paleâ, segetes zizaniis. 2do, Dato supposito, adhuc nego: Quia non sunt certæ notæ cætum Prædestinatorum distinguendi, sicut sunt dignoscendi Ecclesiam seu cætum fidelium.

Petes: Utrum visibilitas competat sectis Hæreticorum?

Resp: Non competere eo gradû, quô competit Ecclesiæ Christi, quia 1mo. non sunt toti orbi conspicuæ, cum in angulis Europæ lateant. 2. Neq; semper fuerunt visibiles; ante Lutherum namq; & Calvinum ubi videbantur? 3. Neq; insigniora in eis habentur signa sicut in vera Christi Ecclesia, vg. perpetua & imperturbata successio suorum

rum Pontificum, congregatio Concilio-
rum, ejectio hæreticorum &c.

CONSECTARIUM.

1^{um}. **A**catholicos, qui fingunt veram
Christi Ecclesiam circa tem-
pora S. Gregorii M. fuisse factam in-
visibilem, & in paucis occultis veris
Evangelicis latuisse, usq; ad prætensæ
reformationis tempora factæ a Luthe-
ro, dirè torqueri & vexari; dum obli-
gantur edicere & ostendere, ubi nam
per illos mille & amplius annos pau-
ci illi Evangelici (in quibus tunc con-
sistebat Ecclesia invisibilis) latuerint?
Quod cum per bina jam sæcula pro-
vocati facere nequeant, miserè fin-
gendo, se & alios continuò fallunt,
ac tandem perdunt. Nam occulti illi
fideles vel profitebantur exterius suam
fidem, quam gerebant in animo? &
tunc Ecclesia non fuit invisibilis; cum
ex ista professione externa possit digno-
sci cætus fidelium; vel non profiteban-
tur, sed communicabant cum infide-
libus (qui juxta Novatores erant Ca-
tholici priores) in externo religionis

exercitio, nimirum in usu Sacramentorum, jejuniis, celebratione Festorum &c. Et tunc fuerunt meri hypocritæ, homines perfidi, & salutis incapaces, juxta illud Christi Math: 10. *Omnis qui negaverit me coram hominibus, negabo & ego eum coram Patre meo.* Et aliunde: *Corde creditur ad justitiam, ore autem fit confessio ad salutem.* Rom: 10. Proinde in his non potuit consistere vera Ecclesia.

Nec dicas: Quod quilibet ex membris Ecclesiæ illius invisibilis, fuerit solus & separatus ab omni alio, & elicuerit confessionem fidei internam. Nam hoc effugium manifeste vanum est, nec stare potest, si novatores velint esse Viri cordati; talis enim solus & separatus utiq; debet instrui in vera fide saltem primitus (quoniam *fides ex Auditu* Rom: 10.) *vg.* filius a suo parente, debuit baptizari, & provideri aliis Sacramentis necessariis &c. quod non potuit fieri sine externa professione fidei; fit consequens, vel hoc ipsò Ecclesiam non mansisse invisibilem. Maxime quia illa ipsa separatio a com-
mu-

munione externa cum infidelibus, ut vocant Catholicos, est sufficiens professio fidei, uti fuit apud tres Pueros Babylonicos, statuum Nabuchodonosoris adorare nolentes; ergo Ecclesia etiam Lutheranorum v.g. mansit visibilis; ergo debent ostendere suos proximos Antecessores, qui fuerunt in Vera Ecclesia Christi, & quia alios nominare non possunt, quam Catholicos, a quibus se separarunt, fateri debent Ecclesiam Catholicam, a qua ipsi defecerunt, fuisse & esse veram Ecclesiam.

Adum. Multominus veram Christi Ecclesiam posse ita deficere, ut penitus extinguatur, nullo prorsus fidelium cœtû relicto; sed duraturam usq; ad finem mundi, adeoq; esse perpetuam & quidem necessariò. *Ratio:* Quia extra veram Ecclesiam nulla salus, nam *sine fide impossibile est placere DEO.* Hebr: 11. Hinc & salvari impossibile est nisi qui DEUM colat eò modò, quò vult coli. Insuper secundum suaves Divinæ Providentiæ leges, in hominum potestate debet esse, quod possint salvari

omni tempore, usq; ad finem mundi; quoniam DEUS eos creavit ad felicitatem æternam, proinde debet illis providere de medio, quod est vera Ecclesia; consequenter hæc semper debet perdurare in mundo; proinde illa, quæ aliquando fuit vera Christi Ecclesia, debet talis permanere usq; ad finem mundi; & talis olim saltem fuit Romano-Catholica, juxta ipsorum Adversariorum confessionem, ideo talis debet permanere usq; ad finem mundi, præcipue quia Christus id ei promissit Math: 16. & ult: Joan: 13. &c. *Nec obest:* quod Synagoga Judæorum tempore Christi totaliter defecerit; & abrogata sit per fidem Christi, & legem Evangelicam; nam hæc non habuit promissionem a DEO de sua permanentia usq; ad finem mundi, ut habet Christi Ecclesia. Insuper Synagoga fuit tantum figura Ecclesiæ Evangelicæ, proinde debuit cessare adveniente figurato. Vide *Bellarmin.* lib: 3. cap: 13.



ARTICULUS V.

Utrum vera Christi Ecclesia sit indefectibilis & infallibilis?

Quidam ex Novatoribus profitentur quidem Ecclesiam visibilem esse, omnino & absolute indefectibilem, at contendunt, sic eam obscurari posse, ac penitus extinguui, ut non sit amplius visibilis. Horum suppositum impugnavimus immediate supra. Proinde hic agendum est contra eos, qui dicunt Ecclesiam prout comprehendit reprobos & prædestinatos, & deficere, & fallere posse. Quæstio igitur est, utrum Ecclesia sit infallibilis in credendo & docendo, sive quod idem est, utrum Ecclesia habeat infallibilitatem tam passivam, quam activam.

Dico 1. Ecclesia Christi visibilis non potest deficere aut errare in rebus fidei & morum credendis.

Prob: 1. P. Ecclesia est Christi Sponsa quam sibi in sempiternum desponsavit, ut dicitur Oseæ 2. *Sponsabo te mi-*

hi in sempiternum. Item vocatur Regnum, quod durabit in æternum: *In diebus autem Regnorum illorum, suscitabit DEUS cæli Regnum, quod in æternum non dissipabitur.* Dan. 2. Præterea vir sapiens in Evangelio describitur is, qui ædificavit Domum suam supra petram; atqui Christus est vir Sapiens, qui Ecclesiam suam super Petram ædificavit, contra quam nec portæ inferi prævalebunt, Mat: 16. Imo quando Synagogæ in Veteri testamento promissa legitur æternitas, principaliter referri debet ad Ecclesiam Christi; cum illa fuerit tantum umbra & figura illius; neq; Synagoga, cui factæ sunt promissiones perennitatis, periit quò ad fidem in Christum Redemptorem, sed in melius mutata fuit. Ergo.

Confir: In Symbolo Apostolico *credimus Sanctam Ecclesiam Catholicam*, qui proinde articulus debet esse verus omni tempore usq; ad finem mundi, quia ad finem mundi debemus hunc sicut reliquos fidei articulos credere. Aliunde si Christi Ecclesiam everterent ejus hostes,

stes, id Christo illius Sponso, Fundatori & Conservatori foret probrosum.

Prob: 2. P. Ecclesia est Christi corpus ad Ephes: 5. ergo a capite suo regitur; atqui si erraret in rebus fidei & morum credendis, non jam ad alium quam ad Christum hic error referri posset; ergo. *Sequ: 1. patet.* Nam Spiritus veritatis est hujus corporis anima, *unus*, ait Apost: ad Ephes: 4. *Spiritus, unum Corpus.* *Sequ: etiam 2. constat:* Quod si enim Spiritu veritatis Ecclesia agitur, ad errorem quomodo poterit moveri? Præclaram deinde habet promissionem Ecclesia, quod nunquam sit à Christo deferenda, imo quod in omnem sit duenda veritatem, Joan: 14. Nec.

Dicant: Ejusmodi Verba de solis Apostolis esse intelligenda. Nam etiam ad successores referri debere, illa satis indicant: *Qui maneat vobiscum in æternum*, ibidem: *Ecce ego vobiscum sum omnibus diebus usq; ad consummationem sæculi* Math: ult: Hinc confutata manet altera Hæreticorum responsio, dum ajunt Ecclesiam quidem primitivam in fide errare non potuisse; at Ecclesia quæ
nunc

nunc est, & erit, errare poterit. Quoniam pollicitationes Christi de præsentia sua, de Spiritu veritatis, de regno æterno, de corpore, cujus ipse futurus erat caput, non ad Ecclesiam modò, quæ fuit tempore & immediatè post tempora Apostolorum, verùm etiam ad Ecclesiam Catholicam, quæ futura erat in finem sæculi, pertinere, necessum est, ut jam dictum. Sed.

Replicant. Esto Ecclesia universalis, id est, collectio omnium fidelium hunc veritatis Spiritum sempiternum habeat, qui proinde illi assistat, eam dirigat, ne in errorem labatur; nullo tamen modò hoc privilegium extendi etiam debet ad solos Ecclesiæ Principes & Pastores ut docent Catholici. At antequam refutetur hæc replica, de qua plura infra.

Notandum. Ecclesiam non ipsam modò Catholicorum omnium concionem sive collectionem esse, quæ per baptismum Christo & nomen dedit, & peculiaris respubl: consecrata est; verum etiam Principes & Præfectos ipsos, Episcopos scilicet, in quibus reipubl: hujus

hujus autoritas potissimum residet; nec hoc sine scripturæ testimonio asserimus. Nam præterquam quod communi omnium opinione civitas id maxime est, quod in ea est principale, ita ut quod Principes ac Gubernatores Civitatis faciunt, id tota civitas facere dicatur; hujus rei in Scripturis S. illud exemplum luculentissimum est 3 Regum 8. *Congregati sunt omnes majores natu Israhel cum Principibus tribuum, & Duces familiarum in Jerusalem - - - convertitq; Rex faciem suam, & benedixit omni Ecclesie Israhel.* Simile legimus Exodi 19. cap:

Contra. ex illo Apost: ad Ephes: 4. Et ipse dedit quosdam Apostolos &c in ædificationem corporis Xti donec occurramus omnes in unitatem fidei &c. ut jam non simus parvuli fluctuantes. Ex quo sic. Si Pastores ac Doctores huc, atq; illuc errarent, a rectoq; fidei tramite discederent, oves profecto etiam ipsæ errarent, nec aliter quam sine Pastore dispersæ vagarentur. Neq; enim fieri potest, ut membra reliqua eo non deferantur, quò & oculi suam vim, & aciem intenderunt, & caput sese inclinando de-
flecterent.

flexerit. Ergo si Pastores simul omnes a veritate discederent, oves suas Christus, vel maximé destituisset. Præterea si Pastores omnes, in aliquo errore versarentur, iidem omnino populum, aut de statu fidei, fide enim stamus juxta Apost: moverent, aut certe nutare, vacillare, & fluctuare facerent, consequenter domus Christi non esset *columna & firmamentum veritatis*. Adde, quædam ad doctrinam fidemq; pertinent, quæ populares prorsus ignorant, & solum implicité credunt, ut Patrem & Filium esse unum principium Spiritûs S. & alia; atqui si in his deficeret fides omnium Pastorum, totius Ecclesiæ fides deficeret; ergo. Fixum ergo maneat, Ecclesiam Christi neq; errare, neq; deficere posse, nam ut ait S. Cyprianus lib: de Unit: Eccl: cap: 5. *Adulterari non potest Sponsa Christi, incorrupta est, pudica est*. S. Aug: lib: 1. de Symbolo cap: 6. *pugnare, Ecclesia, potest, expugnari non potest. - - - Manet in sua radice: portæ inferi non vincent eam*.

Objic: 1. Vetus Ecclesia ante Christi adventum sæpissime lapsa est in errores;

rores; ergo. *Prob: ant: Exodi 23. A-*
aron summus ipse Sacerdos, aliq; ex
plebe, sive maiores, sive minores vitu-
lum conflatilem adorarunt. Pariter Je-
remiæ temporibus Ecclesiam a veri Dei
cultu descivisse deplorat Propheta: cap:
2. Confusi sunt Domus Israhel ipsi, & Re-
ges eorum, Principes & Sacerdotes, & Pro-
phetæ dicentes ligno: Pater meus es tu; &
lapidi: tu me genuisti - - - omnes dereli-
quistis me dicit Dominus.

Resp: ad 1mum 1. Nec Moyfes, nec
Josue, in quorum gubernatione illud
tempus erat positum, in populi insaniam
consenserunt, plurimis é plebe etiam
huic furori repugnantibus; nam ad
Moyfis vocem: Si quis Domini est, jun-
gatur mihi, congregati sunt ad eum om-
nes filii Levi, quos cum Dominus ju-
stitiæ suæ ministros fecerit in ultione,
hos certum videtur in eo scelere cæte-
rorum focios & consortes non fuisse.
2do. Protunc Aaron Sacerdotio non-
dum fuerat initiatus, nec adhuc ei
erat superhumerales impositum, rationa-
liq; aptatum, in quo erat doctrina & ve-
ritas; nihil ergo mirum &c. 3tio Ar-
gumen-

gumentum non est contra nos, si quidem Aaron metû peccavit, non infidelitate, quod & Petro postea accidit.

Ad 2dum. Quod graviolem habet difficultatem S. Aug: lib: de Unit: Eccl: cap: 12. Donatistis sic respondit: Plerumq; sermo Divinus impias turbas Ecclesiæ sic codarguit, tanquam omnes tales sint, ut nullus bonus omnino remanserit. Inde quippe admonemur in suo quodam numero dici omnes, id est, omnes filios gehennæ. Hæc S. D. Hujusmodi ergo Prophetarum oracula hunc sensum habent, quoniam in comparatione malorum, adeo pauci boni sunt, ut nulli esse videantur, Scriptura una reprehensione populum totum comprehendit, quamvis in eo nonnulli sint boni. Deinde prædictio propemodum erat illa, non reprehensio; describitur enim populus ille, non qualis tunc erat, sed qualis post Messiae adventum futurus erat. *Canus* de locis Theol: lib: 4. cap: 4.

Subsumes. Atqui non implicat omnes Ecclesiæ Pastores fidem amittere. Ergo. *Prob:* Tempore Dominicæ passio.

sionis Apostoli omnes fidem amiserunt;
Prob: Ant: Nam quod illo tempore in
sola B. Virgine fides permanferit, can-
dela illa significat, quæ in Officiis ea-
rum dierum sola non extinguatur; unde
Discipuli lumen, quod amiserunt, rece-
perunt, ergo.

Resp: dist: 1. Prob. Fidem, quæ per
dilectionem operatur, amiserunt, vel
etiam deficiendo in fidei confessione,
trans: per infidelitatem, *nego:* Huc igitur
referri debet consuetudo illa Ec-
clesiastica omnes cereos extinguendi,
præter unam. Quanquam *Rupertus* lib:
de Div: Officiis asserit extinctos cereos
priores, significare Prophetas a Judæis
interemptos; ac cereum illum, qui ad
breve tempus absconditur, significare
Christum. Quod autem Apostoli om-
nes in infidelitatem non inciderint, vel
inde patet, quod Jacobus juxta He-
bræorum Evangelium ab hora, qua bi-
berat Domini calicem juraverit se non
comesturum panem, donec Christum
videret resurgentem, ut Author est S.
Hier: in Catalogo Scriptorum; Petrus
etiam & Joannes auditō nuntiō cucur-

rerunt ad monumentum. Sanè vero etiamfi Apostoli tunc temporis fide caruissent, quod dicendum non est, nihil tamen contra nos concluderetur. Nam ut S. Aug: in Psal: 114. admonuit: tum Apostoli defecerunt; cùm nondum erant duces Ecclesiæ, nec illud impletum fuerat: *Ego confirmavi columnas ejus.*

Dices: Math: 16. Christus prædixit Apostolis. *Omnes Scandalum patiemini in me.* Luc: 24. *Verba mulierum annuntiantium Christi resurrectionem visa sunt Apostolis quasi deliramenta.* Marci cap: 16. traditur: Christum exprobrasse Apostolis incredulitatem & duritiam cordis, quia iis, qui viderant eum resurrexisse non crediderunt; ergo per infidelitatem Apostoli omnes fidem amiserunt.

Resp: Hos textus intelligendos esse de aliquibus non de omnibus. Nam Discipuli inquit Math: cap: ult: in Galilæam abierunt in montem, ubi constituerat illis JESUS, & videntes eum adoraverunt, quidam autem dubitaverunt, *quidam,* ait, *non omnes.* Convenienter hæc dubitatio ab aliquibus interpretibus, non
ad

ad Apostolos, sed ad alios, nescio quos, Discipulos ex septuaginta solet referri. Theophilacti ac Remigii sententia est, illam dubitationem ad tempus, quo Discipulis Christus ante apparuerat esse referendam; id quod Marcus intellexit, dum ait: *increpavit incredulitatem &c.* Sive enim apparitio hæc, quam Marcus describit, in die Ascensionis fuerit, ut multis placuit, sive antea, sicut nonnulli docent, dubitandum non est, quin eas increpationes hic Marcus recapitulando perstrinxerit, quas seorsim alii Evangelistæ scripserunt: *quia ijs, inquit, qui viderant eum resurrexisse, non crediderunt.* Constat autem ex aliis Evangelistis incredulitatem & duritiam, ex ea scilicet causa, quia his, qui viderant eum resurrexisse, non crediderunt, non ad omnes Apostolos pertinere, ut in solutione prioris argumenti dictum.

Instabis. Apostoli eorumq; successores Pastores instituti, homines sunt, fallere proinde falliq; possunt, consequenter errare; ergo.

Resp. dist: ant. fallere falliq; possunt si secundum naturæ suæ imbecillitatem

spectentur, *conc.* supposita Divina gratiâ & providentia, quâ homines in veritate fidei continentur, *nego.* Tota namq; fidelium concio homines sunt, Prophetæ & Evangelistæ homines erant; sed quoniam Spiritum veritatis acceperunt, in falsam fidei doctrinam venire non poterant. Sic ergo Ecclesiæ Doctores universi, homines sunt, sed quoniam Divino Spiritû gubernantur in vera dogmata, nequeunt in falsa declinare.

Insistes. Ipsamet Ecclesia innuere videtur se fallibilem esse ratione Pastorum, qui homines sunt; ergo.

Prob: Non enim alia apparet ratio, quare solum Ecclesiam, non in Ecclesiam credimus; nisi quia fallibilis est ratione Pastorum, qui homines sunt; & aliunde omnis homo mendax, ergo.

Resp. ad Prob. Nego Ant. Non enim hæc est ratio, sed antiquior, verior, & firmior, in autoritate fundata hujus est causa; S. Aug. quippé ait: *Petro credimus, credimus Paulo; in Petrum autem, aut in Paulum non credimus, credendo enim in eum, est credendo amare, credendo in*

eum

eum ire. Non dicitur, inquit, in Sanctam Ecclesiam, sed sanctam Ecclesiam credendam esse, non ut DEUM, sed ut Ecclesiam DEO congregatam; hac itaq; propositionis syllabâ *In.* Creator a creaturis secernitur. Hæc ille. Ob id ergo in Ecclesiam non credimus, quia non est fidei nostræ finis.

Objic 2. Ecclesia in Nicæno I. Conc. can. 12. Militiam damnavit; ergo erravit, cum licitam esse militiam constet ex Evangelio. Luc: cap. 3. ergo.

Resp. Dist. Ant. Concilium Nicænum militiam damnavit in his circumstantiis, in quibus militia erat signum idolatriæ. *conc:* absolute, *nego.* Quod ut pateat, notandum: quod olim militiæ cingulus magni honoris & commodi res erat, propter magna militibus concessa privilegia; & ideo Imperatores Ethnici persecutionis tempore cingulum militiæ iis, qui Christiani erant, fidemq; ejurare recusabant, auferre solebant, eosq; exauctorare, ut legere est apud Euseb: lib: 8. cap. 4. Quam ob causam cum plures milites Christiani ardore fidei cingulum abjicerent, &

sine honore potius quam sine fide vivere mallent, ac demum postea mundi & honoris tentationibus victi, eundem cingulum, parati fidem negare, vicissim ambirent; Concilium Nicænum hoc canone eis hanc pœnitentiam injungit, ut scilicet decem annis permaneant inter pœnitentes; postquam trienniô fuerint inter audientes, id est; Catechumenos; ex quo non sequitur, quod militiam absolutè damnet, ut perperam calumniari solent hæretici.

Instabis. In eodem Concil: can: 19. Hæreticos rebaptizandos decrevit Ecclesia, qui tamen rebaptizari non debent; ergo.

Resp. dist: Ant. Hæreticos Paulianistas, & alios hujusmodi, quorum baptisma nullum erat, quia non eadem formâ collatum, qua conferri debet, & confertur ab Ecclesia, per expressam scilicet SS. TRINITATIS invocationem, *conc.* omnes absolutè Hæreticos, *nego.* Responsum confirmat S. Hier. dum ad hunc canonem alludens, ait in Dialogo contra Luciferianos: *Synodus Nicœna omnes Hæreticos suscipit, exceptis Pauli*
li

li Samosateni discipulis; qui Christum purum hominem esse tenebant; haud dubiè in fide & nomine trium Personarum SS. TRINITATIS non baptizabant; nec consequentur verè & validè baptizabant.



ARTICULUS VI.

Quis est supremus Judex controversiarum fidei?

Magnum est ac celebre dissidium, quò Catholici & Hæretici disputant inter se, & acriter litigant, de competenti ac legitimo controversiarum circa fidem & religionem emergentium Judice. Conveniunt quidem omnes admittendum esse harum controversiarum Judicem aliquem, sed in designando, quis ille esse debeat, non conveniunt. *Lutherus* enim & *Calvinistæ* solam scripturam, normam ac Judicem esse volunt; & ex ea sola omnes fidei controversias decidi posse contendunt. *Gaspar Svencfeldius*. *Anti-Lutheranus* supponit quemlibet privatum

hominem a Spiritu S. immediate doceri per revelationem privatam, & privatam illam revelationem, seu privatum illum Spiritum revelantem, & immediate docentem, & non scripturam, ut Doctorem & Judicem controversiarum, audiendum esse contendit. Catholici distinguunt inter Judicem & normam; judicem vocant eum, qui sententiam inter litigantes profert; normam verò sive regulam, juxta quam a judice fertur sententia, eaq; distinctione posita, tenent communiter omnes, nec scripturam, nec Spiritum privatum, *Suencfeldianum*, sed solam Ecclesiam esse Judicem, normam verò juxta quam judicat Ecclesia, esse non solum scripturam, sed scripturam & traditionem.

Etsi de hac quæstione jam sint multa dicta, ac plura infra dicentur, quia tamen est summi momenti; nam positò semel, quod Ecclesia sit supremus, & infallibilis judex controversiarum fidei, cui omnes teneantur obedire, convelluntur omnes hæreses & sectæ. Id cum probe noscant Novatores, nihil non tentant, ut hanc veritatem cardi-

nalem concutiant. Quare præsuppositis alibi dictis & dicendis.

Dico: Supremus & infallibilis controversiarum fidei Judex non est scriptura sacra, neq; Spiritus privatus, -neq; Princeps sæcularis, sed Ecclesia.

Prob: 1. P. Sacra Scriptura est obscura & intellectû difficilis, atq; in varios sensus à variis trahitur; ergo opus est interprete, qui ejus obscuritatem, ambiguitatem & difficultatem tollat; atqui hic alius non est præter Ecclesiam, ut patebit ex dicendis. *Prob: conseq:* In Scriptura duo sunt litera & sensus; circa literam plurimæ sunt controversiæ; an ea, quam, habemus, sit verum Verbum DEI? An sit conformis suo Autographo? An hi vel isti libri sint Canonici vel non? Lutherus rejicit Epistolam ad Hebræos, Epistolam Jacobi, & Apocalypsim, has Calvinus admittit; quis dirimet controversiam? non scriptura, illa enim nullibi dicit hos libros esse, vel non esse Canonicos; & quamvis diceret, non teneremur credere, nisi prius aliundé constaret esse Canonicam. Circa sensum: scriptura

varios imo contrarios sensus subit; de iisq: sunt præcipuè Controversiæ, v.g. celebris & notissima est quæstio de sensu horum Verborum Christi: *Hoc est corpus meum.* Calvinistæ illis affingunt sensum figuratum; Lutherani & Catholici, intelligunt in sensu literari. Quis inter illos erit iudex? non ipsa scriptura, quæ est materia & objectum controversiæ; ergo quærendus est alius iudex; nisi velim9 sine fine disputare. Dicat Calvinista Lutheranismi laudata verba non intelligere; idem regeret Lutheranus Calvinistæ.

Roboratur. Multa sunt fide credenda, quæ non continentur in scriptura v.g. ipsa canonicitas, ut ita dicam, scripturarum, Baptismus infantium, validitas baptismi Hæreticorum, perpetua Virginitas B. V. & plura alia, quæ nobiscum admittunt sectarii. Unde præclare ait S. Aug. lib: 5. de Baptismo contra Donat: cap. 23. *Sunt multa, quæ tenet universa Ecclesia, & ob hoc ab Apostolis præcepta bene creduntur, quanquam scripta non reperiantur.* In his autem clarum est Scripturam esse non posse, iudicem; ergo.

Prob:

Prob. 2. P. Judex in aliqua causa debet esse publicus partibus litigantibus notus; eas audire, vicissim ab ipsis audiri, & habere auctoritatem illas compellendi, ut stent judicio, debet esse unus, non varius; non incertus, nec sibi contrarius; atqui Spiritus privatus non est judex publicus, nec partibus litigantibus notus, est varius in variis, incertus, & sibi contrarius, dictans unum uni, alteri contrarium, ut mox dictum de Verbis Christi: *Hoc est corpus meum; ergo.*

Confirm: Insolentissimæ præsumptionis est, quod plebejus, ignarus, sartor, sutor, rusticus, muliercula prætendant se melius intelligere Scripturam, quam doctissima totius orbis ingenia, sive dispersa sive in Synodis congregata; atqui ita se res habet, si privatus cujusq; Spiritus sit supremus judex controversiarum fidei; ergo.

Dices. Quando Concilium Synagogæ negavit & condemnavit Christum, non fuisset insolentissimæ præsumptionis reus sed plurimum laudandus privatus Judæus, qui a judicio Synagogæ dissen-

sis-

sisset, & Christum pro Messia agnovisset; ergo.

Resp: Nego consequi: ob multas rationes. 1. Quia non erant factæ Synagogæ promissiones infallibilitatis, sicut Christi Ecclesiæ. 2. Quia Synagoga, quæ ad Christum tantum erat duratura, tunc deficiebat. 3. Quia tunc alter erat supremus controversiarum fidei Judex Christus ipse, inter homines visibiliter conversatus, cui omnes obedire & adhærere tenebantur, qui palam & omnibus fidem prædicabat, & missionem suam probabat voce e cælo delapsa coram Populo, Joannis testimonio, Prophetarum explicatione, ac innumeris & patentissimis miraculis. Non ergo ejusmodi Judæus secutus fuisset Spiritum privatum, posthabito judicio infallibili, supremi & visibilis Judicis; sed laudandus fuisset cum Apostolis & aliis, qui adhærebant Christo; sicq; illud exemplum non abstergit maculam insolentissimæ præsumptionis in Hæreticis, qui concedunt cuilibet particulari, ut definitiones totius Ecclesiæ possit ac debeat
ad

ad examen revocare, easq; reformare secundum privatum suum spiritum.

Prob. 3. p. Nullibi in Scriptura legitur Christum constituisse Principes sæculares Judices controversiarum fidei; non enim illis sed Apostolis, & eorum Successoribus dictum: *Euntes docete*, aut quid simile. Et quidem Princeps dicitur Rom: 12. DEI minister, non ut judicet Ecclesiam, sed ut eam defendat. Id agnoverunt religiosi Imperatores *Constantinus M.* in Concilio Nicæno apud *Euseb: lib: 3. de vita Constantini cap: 10.* *Theodosius junior* in Epist: ad Synodum Ephes. *Marcianus* in Concil: Chalced: *Basilus* in VIII. Synodo & alij. Unde scribebat celebris *Osius Cordub: Constantio Imper: Nec te rebus misceas Ecclesiasticis, nec nobis his de rebus præcepta mandes, sed a nobis potius hæc discas. Tibi Deus imperium tradidit, nobis Ecclesiastica concedidit.*

Pars 4. sequitur ex dictis. Necesse est agnoscere regulam vivam, & Judicem supremum controversiarum fidei, ut diximus; atqui is non est Scriptura sacra, nec spiritus privatus, neq; Princeps sæcula-

cularis; ergo Ecclesia; nihil enim aliud assignari potest.

Confirm: Tempore Apostolorum cum exorta esset controversia de circumcissione, non fuit terminata per solam Scripturam, aut Spiritum privatum, neque per Principem sæcularem, imo ne quidem per Paulum & Barnabam, sed ad Ecclesiam sive Concilium Apostolorum delata fuit, & ab eodem Præsidente S. Petro Apostolorum Principe decisa & definita. Act: 15. Similiter Math: 18. in casu injuriæ illatæ præcipitur: *Dic Ecclesiæ, si Ecclesiam non audierit, sit tibi sicut ethnicus & publicanus.* Quidni magis in casu injuriæ illatæ toti Ecclesiæ, qualis est hæresis & error in fide? Tandem de hoc nos certos reddit continua Ecclesiæ praxis; nam lex de die celebrandi Paschatis a Christianis ad Victorem Pontificem delata, ab eo decisa fuit, tandem in Concilio Nicæno firmata; quæstio an post baptismum lapsi a peccatis absolvendi; & an baptizati ab Hæreticis rebaptizandi essent, a Cornelio Papa in Concilio Romano resoluta fuit; & sic per omnia sæcula in gravioribus causis

sis exempla adducit V. Bellarminus, quas causas semper judicaverunt, & definierunt Concilia, a Summo Pontifice approbata.

Objic: 1. Contra 1. P. Omnia dogmata ad unius Scripturæ normam debent expendi; ergo. Prob: Ant: Act: 17. de Beroensibus dicitur: Susceperunt verbum (a Paulo) cum omni aviditate, quotidie scrutantes Scripturas, si hæc ita se haberent. Et Joan: 5. Christus dicit Judæis: Scrutamini Scripturas... Illæ sunt, quæ testimonium perhibent de me; ergo.

Resp. ad 1. Autor. Beroenses non ad Scripturam recurrebant, ut ad Judicem controversiarum fidei, sed ut ad motivum aliquod suscipiendæ fidei sibi a Paulo prædicatæ. Cum enim audirent Apostolum prædicantem Christi fidem & Evangelium, illudq; ex Veteris testamenti; Scripturis probantem, ipsi ne leviter crederent, prudenter scrutabantur Scripturas; ut viderent, num omnia testimonia veteris testamenti de Christo a Paulo prolata, ita se haberent, ut prædicabantur a Paulo, quibus plane cognitis moti sunt ad credendum in Christum

stum, ut sequentia innuunt: & *multi quidem crediderunt ex eis*. Nec inde sequitur nobis Christianis licitum esse dubitare de iis, quæ sunt per Apostolos vel Ecclesiam definita, & ea ad Scripturæ trutinam examinare, sicut licitum erat illis necdum ad Christi fidem conversis; non enim tenebantur adhuc illi credere, infallibilitatem Ecclesiæ promissam esse, bene autem nos in fide satis & dudum instructi. Nec

Dicas: Illi videntur statim credidisse in Christum; dicuntur enim ibi, cum omni aviditate suscepisse Verbum Dei; ergo non ad Scripturam tanquam motivum credendi, sed tanquam ad Judicem recurrebant.

Resp: nego ant. Quia ut bene notat *Isambertus*, verba hæc: *cum omni aviditate*, non significant illos in Christum avide credidisse; sed solum eos Paulum audiisse, ejusq; concionibus de Christo habitis interfuisse cum aviditate.

Ad 2. Auth; Ibidem Christus Judæos ad Scripturam provocat, non ut ad talis controversiæ Judicem, sed ut ad fidelem, Judæisq; non suspectum suæ Doctrinæ

etrinæ ac Divinitatis testem; id patet ex ipsis Christi verbis; non enim dicit; *Scrutamini Scripturas*, illæ de me iudicant, sed; *Scrutamini Scripturas, illæ testimonium perhibent de me.* Ibi enim Christus, ut contra Judæos, se Filium DEI & Messiam esse probet, triplici utitur testimonio, nempe testimonio Joannis, testimonio suorum miraculorum, & testimonio Patris æterni; & cum nullum horum vellent increduli admittere, contra eos argumentando, quasi ex concessis & admissis, quartum addidit testimonium, scilicet, testimonium Scripturarum, quas illi admittebant.

Testimonio Joannis utitur dum ver. 33. ait: *Vos misistis ad Joannem, & testimonium perhibuit veritati*, scilicet: dum dixit: *Ecce Agnus Dei, ecce qui tollit peccata mundi*, quasi dicens: vos legatos misistis ad Joannem quasi ad Virum vestra etiam opinione Sanctum, & fide dignum, ut sciretis ab eo, an ipse Messias esset? Joannes non se, sed me Messiam esse respondit, hocq; testimonium non dedit amicitiae, non gratiae, sed veritati, & testimonium ejus refellere & recu-

recusare non potestis, quem pro Messia recipere voluistis, ut explicat *Euthymius*.

Utitur testimonio suorum miraculorum ibidem v. 36. *Ego autem habeo testimonium majus Joanne. Opera enim quæ dedit mihi Pater, ut perficiam ea: ipsa opera quæ ego facio, testimonium perhibent de me, quia Pater misit me.*

Testimonio Patris æterni utitur dum ibidem v. 37. pergit dicens: *Et qui misit me Pater, ipse testimonium perhibuit de me, nam reipsa testimonium perhibuit, cum in baptismo cælitus intonuit; Hic est Filius meus dilectus, in quo mihi complacui.*

Scripturarum deniq; utitur testimonio, dum v. 39. ait: *Scrutamini Scripturas, quia vos putatis in ipsis vitam æternam habere, & illæ sunt, quæ testimonium perhibent de me: quasi diceret; alia testimonia licet efficacissimas rejicitis, saltem scripturarum testimonium non rejicietis, quas vos admittitis, & tantopere laudatis, has scrutamini, & in his omnibus Christum invenietis, vel in veritate apertum, vel in umbris & signis operum. Adde: vox Græca *Ereunate* est anceps,*

ceps, potestq; esse indicativi modi *scrutamini* vel imperativi, *scrutemini*. Si primum Christus exprobrat Judæis, quod frustra legerent Scripturas, cum illæ de ipso haberent testimonium, & tamen nollent credere. Si secundum, postquam laudatis testimoniis probasset se esse Messiam promissum; culpat eos, quod nollent credere, & ideo ut confundantur remittit ad Scripturas, quæ apertum de ipso habent testimonium. Ex quo sequitur, quod Hæretici, qui nolunt credere Ecclesiæ, sint culpandi, sicut Judæi, & ut confundantur, remittendi sunt ad Scripturas in factis apertis. Hæc sanè illis nihil profunt, quin potius nocent.

Objic: 2. contra 2. P. Christus indicat apertè se docere per Spiritum privatum, seu per privatam suam revelationem singulas oves suas dum ait: Joan: 10. *Oves meæ vocem meam audiunt, & cognosco eas, & sequuntur me*, idq; prædictum videtur ab Isaia cap: 54. nomine DEI dicente, *Ponam.... universos filios tuos doctos a Domino*; ergo privatus spiritus solus agnoscendus est, ut fidei controversiarum Judex.

N

Resp:

Resp: nego ant: Quia non de Spiritu privato intelligentiam Scripturæ cuilibet fidei revelante, sed de gratia præveniente, & ad credendum alliciente & vocante intelligendi sunt hi textus; nam ad hoc, ut quis credat, duo sunt illi necessaria, internum unum, & externum alterum; internum est gratia præveniens, alliciens, vocans, & suaviter trahens ad credendum, externum est propositio seu manifestatio credendorum. Primum seu gratiam illam internam & prævenientem indicat Christus Joan: 6. *Nemo potest venire ad me, nisi Pater, qui misit me, traxerit eum.* Secundum verò seu propositionem credendorum indicat Paulus Rom: 10. *Quomodo credent sine prædicante?* De priori ergo si-ve de gratia præveniente & vocante loquitur Christus. *Oves meæ vocem meam audient*, quasi diceret, vocem meam audiunt, & me sequuntur, dum gratiam illam prævenientem & vocantem percipiunt, & perceptæ assensum præbent, & de facto in me vocantem fide viva credunt; quod non faciebant Judæi increduli, de quibus dicebat ibidem

Joan:

Joan: 10. *Vos non creditis, quia non estis ex ovibus meis.* Eodem modo intellige textum Isaiae. *Ponam... universos Filios tuos doctos a Domino;* doctos nempe per fidem, quæ est donum supernaturale proveniens a Domino, quodq; non obtinetur nisi per gratiam. Sed neq; Christus, neq; Isaias loquitur de secundo & externo omnino necessario ad credendum, nimirum de credendorum propositione seu manifestatione forinsecus sonante, & exterius adveniente ab Ecclesiæ ministris & Doctoribus, de quibus Paulus ad Ephes. cap: 4. ait: *Alios dedit Evangelistas, alios Pastores & Doctores ad consummationem Sanctorum in opus ministerij in ædificationem corporis Christi.* Potest etiam dici cum Gamachæo Christianos omnes esse doctos a Domino mediate, vel immediatè; quia Dominus JESUS ipse venit tandem in propria persona, & Evangelium vivæ vocis oraculo prædicavit, varijsq; miraculis confirmavit, juxta illud Hebr: 1. *Olim Deus loquens Patribus in Prophetis, novissimè diebus istis locutus est nobis in filio.* Deinde fideles qui Christum in propria persona

docentem audierant, cæteros homines eandem a Christo receptam doctrinam docuere; sic omnes a Domino saltem mediate docti dici possunt, quod non excludit externum Doctorem, sed potius illum supponit.

Instabis 1. Joan 2. dicitur: Non necesse habetis, ut aliquis doceat vos, sed sicut unctio docet vos de omnibus - - - & sicut docuit vos, manete in eo; ergo ex ipso met Joanne non alio indigemus Doctore extrinsecus sonante & proponente.

Resp: dist: Ant. Hisce excludit Joannes instructionem Pastorum & Doctorum Ecclesiæ, nego. Alioquin frustra dedisset Ecclesiæ suæ Christus, alios Evangelistas, alios Pastores, & Doctores, imo frustra hac prolixa Epistolâ sua suos fideles doceret & instrueret ipse Joannes. Hisce excludit solum instructionem illam, quæ est a Pseudo-Doctoribus, Apostatis, aliisq; falsis, Christi fideles seducuntibus Apostolis; ut satis aperte ibidem notat ipse dicens: Hæc scripsi vobis de his, qui seducunt vos: concedo. Unde intendit ibi duntaxat dice-

re Joannes fideles ipsos, quos jam docuerat per ea sola, quæ didicerant, fidem tueri & servare posse Spiritus Sancti auxiliante gratiâ, contra quamcunque aliam perversam doctrinam.

Urgebis. Deus Jerem: 31. promittit fidelibus novæ legis: *Dabo legem meam in visceribus eorum, & in corde eorum scribam eam - - - Et non docebit ultra vir proximum suum, & vir fratrem suum dicens: cognosce Dominum. Omnes enim cognoscent me, a minimo eorum usq; ad maximum;* ergo per to non docebit ultra excluditur a Deo nedum Pseudo-Doctor, sed etiam quilibet alius Ecclesiæ Doctor.

Resp. s. dist. Ant: Non docebit ultra proximum suum in patria, *conc:* hic in via de qua est quæstio, *nego.* Hic textus intelligitur de statu futuro Christi fidelium beatifico, secundum S. Greg: M. lib: 4. Moral. cap. 33. *Quid enim, ait, est, quod nesciant, qui scientem omnia sciunt.* Consentit S. Aug. de Spiritu & litera cap: 24. verum quia Propheeta loquitur de gratia novi testamenti, quæ fidelibus in hac vita datur. Ideo.

*Resp. 2. S. Chrysostomus, Theophilactus, Oecumenius, imo & S. Aug. de gratia Xti cap. 10. explicant laudata verba, quod tanta erit facilitas & gratia legis Evangelicæ, ut non sit opus magno labore, ad discenda ad salutem necessaria; ita ut etiam ipsi pueri ea statim percipiant, quæ erunt præcepta, & tanta erit Spiritus S. illustratio, tamq; obvi-
us ejus gratiæ impulsus ad credendum, sperandum & amandum, ut externa fidei prædicatio comparata ad illam internam Spiritus S. vocationem, parum aut quasi nihil esse videatur, quamvis semper requiratur, & ad eam dederit Ecclesiæ DEUS alios Evangelistas, alios Pastores, Doctores alios, qui scilicet Christi fideles exterius instruerent & docerent, dum Spiritus S. interius vocaret & illuminaret. Non ergo Propheta inducit spiritum privatum, ut internum Doctorem.*

Dices: Atqui sine Doctore externo fidelis docetur a DEO, & cognoscit credenda; ergo. Prob: Eo ipso, quô quis vult DEI voluntatem facere, docetur a DEO, juxta illud Joan: 7. Mea doctrina

na

na non est mea, sed ejus qui misit me: si quis voluerit voluntatem ejus facere, cognoscet de doctrina utrum ex Deo sit; ergo.

Resp. Ad Prob: Christi sensus non est, quod quis per hoc præcisè, quod vult DEI voluntatem facere, possit judicare de doctrina Christi; sed tantum, quod ille sit magis dispositus ad judicandum de ea, quam alius quicunq; qui non vult illam facere, sed odio est affectus erga Christum, quales erant Judæi quærentes JESUM interficere. Odium enim sive invidia est impedimentum ad rectè, & ex æquo judicandum, cum taliter quisq; judicet, qualiter est affectus; sed per hoc licet magis sit dispositus, saltem negative ad judicandum de doctrina Christi, non sequitur quod per solum præcise desiderium, seu affectum DEI voluntatem implendi, possit judicare de ea seclusis requisitis aliis. His ergo & similibus testimoniis non aliud significatur, quam quod, dum Pastores exteriori gratia mentem illustret, & cor moveat, ut credamus, sine qua inutilis foret exterior prædicatio; idq; longè

gè uberius præstat, ut in respon: immediate præc. dixi, in nova lege, quam in antiqua. At verò inde excludi ministerium exterius Ecclesiæ in prædicando, instruendo, & docendo, commentum est ridiculum. Ut quid enim Apostoli tanto zelò prædicabant? tot literas pro fidelium instructione scripserunt? Quò fine Christus Pastores & Doctores in sua Ecclesia instituit? ut quid ipsi Sectarij docent & prædicant? unde ad rem prorsus præclare ait S. Aug. Tract. 3. in Epist: Joan. *Videte Fratres magnum Sacramentum; sonus verborum nostrorum aures percutit; Magister intus est. Nolite putare quemquam aliquid discere ab homine, admonere possumus per strepitum vocis nostræ; si non sit intus, qui doceat, inanis fit strepitus noster - - - Cathedram in cælo habet, qui corda docet; propterea ait, & ipse in Evangelio: nolite vobis dicere Magistrum in terra, unus est Magister vester Christus, qui scilicet intus doceat.*

Objicies 3. Christus Joan: 5. dicit: Ego autem non ab homine testimonium accipio; atqui acciperet testimonium ab
ho-

homine, si Ecclesia esset iudex Scripturæ, & controversiarum fidei; ergo.

Resp: Christum non accipere testimonium ab homine, quasi illo indigeat, ut probet suam Divinitatem & missionem; habebat enim testimonium Patris & miraculorum, ut jam dictum; & ipse ibidem dicit; non respuit testimonium Joannis Baptistæ propter Judæos; ut jam dixi; Non ergo Christus hic rejicit omne testimonium humanum in controversiis fidei, ut fingunt Hæretici, sed solum declarat se sui causa non indigere; nostri vero causâ esse adhibendum, quoties necessarium vel utile fuerit. Adde judicium Ecclesiæ non debere censi purè humanum, cum sit ex ductu & inspiratione Spiritûs S.

Inferes .x. Ergo saltem inde sequitur Ecclesiam esse supra Scripturam; si judicat de Scriptura.

Resp. dist. Si Ecclesia judicat de scriptura quoad veritatem eorum quæ continet Ecclesia erit supra scripturam, *conc.* Si judicat de Scriptura tantum quoad sensum ejus legitimum nego illationem. Non ergo Ecclesia judicat an ea,

ea, quæ continentur in Scriptura sint vera, vel falsa; sed judicat, qui sit sensus ejus legitimus, ex quo non magis est supra scripturam, quam judex interpretans legem, sit supra legem aut legislatorem.

Inferes 2. Ergo saltem Ecclesia dominabitur fidei nostræ; atqui hoc est contra Apost: 2. Corint. 1. ubi dicit: *Parcens vobis non veni ultra Corinthum, non quia dominamur fidei vestræ, sed adjutores sumus gaudij vestri, nam fide statis; ergo.*

Resp. 1. Nego Sequ: Neq: enim Apostolus, neq; Ecclesia ex hoc quod sit supremus judex controversiarum fidei, dominantur fidei nostræ, sed sunt duntaxat instrumenta, quibus DEUS utitur, ut ipse dominetur fidei nostræ.

Resp. 2. Nego subsum. Non enim sensus Apostoli est, quod non debeat, aut non velit dominari supra fidem Corinthiorum, sed quod ob fidem, quam illis instillaverat, non vult in eos usurpare dominationem in propria sua commoda, ut domini temporales. Sic ergo accipienda verba Apostoli: *Parcens vobis*

vobis non veni ultra Corinthum, ne cogerer autoritate Apostolica corrigere crimina, quibus quidam ex vobis sunt obstricti; Non quia dominamur fidei vestrae, id est: non quia ob fidem, quam vobis praedicavimus, & ministerio nostro accepistis, velimus nos gerere, ut Dominos vestros, & potestate nostra abuti in privata commoda, sed quod adjutores esse velimus gaudii vestri procurando vobis consolationem per correctionem eorum, qui sua malitia vos offendunt. Ita S. Anselmus apud Tirinum; quod causam sectariorum non juvat.

Dices: Non constat inter Catholicos, cui hæc suprema autoritas definiendi res fidei competat; an soli Romano Pontifici, an Episcopis sine Pontifice; an soli Ecclesiae congregatae in Concilio, an etiam dispersae; an sufficiat consensus tacitus Episcoporum; an requiratur expressus &c. Ergo statui non potest Ecclesia tanquam Judex supremus controversiarum fidei.

Resp. Dato Ant. nego consequ: Quia duo constant apud Catholicos, quæ sufficiunt ad substantiam quæstionis.

Pri-

Primum Judicem controversiarum fidei non esse Scripturam, Spiritum privatum, aut Principem sæcularem, sed Ecclesiam. *Secundum*: Ipsam Ecclesiam repræsentari per Summum Pontificem cum majori parte Episcoporum. Cætera non ad substantiam, sed ad modum quæstionis pertinent, de quibus infra.



A R T I C U L U S VII.

An & in quibus quæstionibus definiendis infallibilis sit Ecclesia?

Quæstiones, de quibus disputari solet, an in illis definiendis infallibilis sit Ecclesia, alias esse *juris* alias *facti*. Quæstiones *juris* genericè loquendo & apud Juristas sunt eæ, quæ ex jure possunt resolvi, ac decidi; quæstiones vero *facti* in materia contingenti sunt eæ, quæ ex nullo jure, possunt resolvi. Apud Theologos quæstiones *juris* dicuntur illæ, quæ ex solo jure Divino solvi possunt, hoc est; quæ ex Scriptura & traditione, in quibus est jûs fidei nostræ, de-

decidi possunt. Unde apud Theologos quæstio *juris* quæstio fidei, dicitur, & vice versa; quæstiones vero facti apud Theologos sunt hæ, quæ nec ex Scriptura, nec ex traditione solvi possunt. Sic vg. si quæeratur. *An Christus sit creatura?* est quæstio juris, quia ex jure Divino resolvi potest; si quæeratur *An Arius dixerit Christum esse creaturam?* est quæstio facti; quia nec ex Scriptura, nec ex traditione resolvi potest. Præter simplices quæstiones *juris* & simplices quæstiones *facti*, aliæ sunt quæstiones, quæ vocantur *mixtæ* ex jure & facto; quæstio enim mixta dicitur ea, quæ duas includit quæstiones, unam *juris*, alteram *facti*, ut vg. Si quis quærat; *an tria Capitula sint Hæretica in sensu suorum authorum Theodori, Theodoret, & Iba:* hæc quæstio dicitur mixta, quia duas includit quæstiones, unam *juris*, scilicet istam: *An tria capitula sint hæretica;* alteram *facti* nempe hanc, *an in sensu Authorum sint hæretica;* seu an dicere cum Nestorio duas in Christo personas esse, sit hæreticum; & an Authores præfati suis in Capitulis dixerint cum Nestorio

du-

duas in Christo personas esse, & hoc factum dogmaticum dici solet.

§ I.

An iudicium Ecclesiæ sit infallibile de sensu librorum, seu ut vocant, de factis dogmaticis?

Nota: Facta alia esse dogmatica, sive doctrinalia, alia non dogmatica; Factum dogmaticum seu doctrinale, dicitur quodcunq; privati Authoris vel privatorum Authorum dogma sive doctrina in materia fidei; factum vero non dogmaticum dicitur id, quod dogma non est, sive doctrina. Sic si quis quærat; *an trium Capitulorum doctrina, sit doctrina Nestorii*, seu contineat Nestorii hæreticam doctrinam, est quæstio facti dogmatici. Si vero quis quærat, *an trium capitulorum doctrina fuerit a Concilio Chalcedonensi approbata*, est quæstio facti non dogmatici, sed puri, in qua resolvenda per annos prope 100. Orientalis cum Occidentali disceptavit Ecclesia. Hic quæstio est de factis dogmaticis, quæ moveri solet occasione libri *Jansenii* Episc: Iprensis. Cum *Innocentius X.* Const:

Const. quæ incipit: *Cum occasione* data 3. Maij. 1653. quinq; famosas propositiones extractas ex libro Jansenii damnasset, fautores Jansenii hanc damnationem admiserunt, dixerunq; has propositiones quinq; ut jacent esse hæreticas, verum eas non reperiri in libro Jansenii, aut in ejus sensu fuisse damnatas.

Ut hoc effugium præcluderet Alexander VII. Const. *ad Sacram.* 1656. 16. Octobris, Innocentianam Constit: confirmans & innovans, declaravit has quinq; propositiones ex libro Jansenii esse excerptas, ac in sensu obvio ab Authore intento damnatas

Hanc Constitutionem ut eluderent Jansenistæ, confugerunt ad distinctionem facti & juris, dixeruntq; Ecclesiam equidem infallibilem esse in quæstionibus juris decidendis, at non in quæstionibus facti; sicq; persistunt in sua priori cavillatione, scilicet doctrinam quinq; propositionum damnatarum esse hæreticam, quod est quæstio juris; sed mordicus defendunt eam falso attribui libro Jansenii, & hoc vocant, factum.

Dico.

Dico. Judicium Ecclesiæ de sensu librorum seu de factis dogmaticis est infallibile.

Prob. 1. Ecclesia est infallibilis in vera Christi doctrina de fide & moribus cognoscenda, & discernenda ab aliquaquacunq; ob assistentiâ Spiritus S. ei a Christo promissam. Joan. 14. *Ego rogabo Patrem, & alium Paraclitum dabit vobis, ut maneat vobiscum in æternum Spiritum veritatis, qui ut habetur cap. 13. docebit vos omnem veritatem.* Ergo & infallibilis esse debet in cognoscenda, approbanda, vel reprobanda Authoris cujuscunq; doctrina; ergo & in illius verò & naturali ac obvio sensu cognoscendo, approbando vel reprobando; cum Ecclesia dum approbat vel reprobat doctrinam aliquam, illam quo ad naturalem & obvium verborum sensum approbet vel reprobet; ergo & infallibile est ejus &c.

Prob. 2. Si judicium Ecclesiæ non esset infallibile in decidendis factis dogmaticis, seu in decidendo atq; approbando vel reprobando naturali & obvio librorum quorumcunq; ad Religionem spe-

ſpectantium ſenſu; nullus eſſet Nova-
tor, nullus Hæreticus, qui poſſet de hæ-
reſi certo convinci, & ut hæreticus
definitivè damnari, quiq; non poſſet,
quantumvis ab Eccleſia damnatus re-
clamare, & dicere ſe hæreticum non
eſſe, ſe hæretice non ſenſiſſe, ſeq; in-
juſtè ab Eccleſia errante eſſe damna-
tum; atqui hoc dici aut admitti non
poſteſt; cum ad fidei Chriſtianæ noſtræ
& totius religionis everſionem tendat;
ergo neq; dici poſteſt infallibilem non eſ-
ſe Eccleſiam in decidendis hujusce fa-
cti dogmatici quæſtionibus.

*Prob: 3. Ex conſtanti praxi Eccle-
ſiæ 1. Concilium Nicænum I. in Epift:
Synodica ad Eccleſiam Alexand. apud
Socratem lib. 1. cap. 9. dicit: Placuit
communibus ſuffragiis anathema denuntiare,
& ipſi (Ario) & nefariæ ejus propoſitioni,
& verbis, ſententiisq; execrabilibus, quibus
uſus eſt ad Filium DEI blaſphemiis one-
randum. 2. Senſum obſcurum & invo-
lutum Pelagii deprehendit, & damna-
vit Eccleſia, ut teſtatur Innocentius I.
Epiftola inter Auguſtinianas 183. Li-
brum, ait, qui ejus eſſe diceretur, evoluimus,*

*in quo multa contra Dei gratiam legimus esse conscripta - - & nihil penitus, quod non displiceret, a quovis damnandum - - anathematizet ergo ista, quæ sentit. Porro Innocentii judicio aquieverunt 214. Episcopi in Concilio Affricano anno 417. & alij per orbem dispersi. 3. Concilium Calcedonense Act. 4. declarat Hæreticum, qui non dicit anathema Eutyche-
ti. Act. 8. dixerunt Patres Theodore-
tum esse hæreticum & foras ejiciendum,
eo quod post plures instantias nollet sim-
pliciter & sine explicatione Anathema-
dicere Nestorio, jam pariter per judici-
um comparativum conferendo ejus scri-
pta cum scriptis Sanctorum Patrum da-
mnato. In Concilio Ephesino. 4. Con-
cilium V. generale Constantinop. II.
damnavit scripta Theodori Mopsueste-
ni, Theodoreti Cyrensis mox memo-
rati, & Ibæ Edesseni, vulgo tria Capi-
tula; imo ad hoc unum, & ad damnan-
da scripta Origenis coadunatum fuit.
Neq; solum damnavit hæc tria Capitula,
ut Nestoriana, sed etiam anathematiza-
vit eum, quicumq; ea defenderet, excu-
saret, aut non condemnaret. 5. Eodem
mo-*

modo se gessit Concilium Later: IV. declarando Hæreticum qui defenderet doctrinam Abbatis Joachim in libro de TRINITATE Concilium Constant: sess: ult. præscripsit formulam, quâ interrogari debeant, qui suspecti sunt errorum Viclefi, Joannis Hus, & Hiæronymi Pragensis: *Utrum credant - - - - - fuisse hæreticos & pro hæreticis nominandos, ac deputandos, & libros & doctrinas eorum fuisse & esse perversas, propter quos & quas, & eorum pertinacias per Sacrum Concilium Constantiense pro hæreticis sunt condemnati.* Tandem Trid. sess. 22. Can. 6. definit: *Si quis dixerit Canonem missæ continere errores, adeoque abrogandum esse, anathema sit.* Ad hæc nihil habent, quod respondeant Jansenistæ; nisi quod ista facta dogmatica erant clara & aperta, de quibus nulla erat controversia, factum autem Jansenii est obscurum, involutum, & valde controversum.

At non vident, aut videre nolunt Jansenistæ, controversias, strages, & dissidia, quæ occasione horum factorum Ecclesiam turbaverint; quot Episcopi aliunde Orthodoxi, vel ex ob-

scuritate factorum, vel ex præjudiciis, aut nimia propensione in Authores, ab eorum parte steterint, & ideo sint ab Ecclesia male habiti, ut patet ex factionibus Arianorum, Nestorianorum, Eutychianorum &c. Tandem si hæc suppositio Jansenistarum vera foret, nihil fixum & ratum haberetur in Ecclesia, nam quod uni videtur clarum, alteri est obscurum. Imo si infallibilitas in decidendis factis dogmaticis, sit necessaria Ecclesiæ, ut hucusq; dictum, longe magis urget hæc necessitas in obscuris, quam in claris; ista enim se produnt, non illa.

Confirm: 1. Dogma proponendum fidelibus est inseparabile a facto, & ita cum eo connexum, ut dogma non possit proponi infallibiliter, quin factum eadem infallibilitate proponatur; atqui Ecclesia est infallibilis in proponendo dogmate, ut concedunt Jansenistæ; ergo & in facto dogmatico proponendo.

Maj: prob: Quamvis dogma possit mente perpendi & examinari sine facto, non potest tamen proponi fidelibus si-
ve tenendum, siue vitandum absq; facto,

cto, idest absq; textu propositionis, aut libri; quod si sit fallibilis proponendo textum, nemo tenetur illi credere, & sic resurgent omnes hæreses antiquæ, novæ suscitabuntur absq; eo, quod Ecclesia possit illis occurrere efficaciter. Hinc.

Confir: 2. Christus nunquam deest suæ Ecclesiæ in his, quæ sunt necessaria ad depositum fidei constituendum, & ad communem fidelium salutem; atqui ad depositum fidei constituendum, & ad communem fidelium salutem necesse est, ut veram vel falsam doctrinam in libris expressam infallibiliter discernere possit, atq; controversias quotidie emergentes de sensu librorum supremo iudicio componere, ut patet; ergo.

Prob: 4. Argumento ad hominem. Admittunt Jansenistæ quinq; famosas propositiones, esse recte damnatas ut Hæreticas, atq; Ecclesiam in his damnandis esse infallibilem; atqui hoc est factum dogmaticum: non secus ac quod textus libri Jansenii sit hæreticus, estq; hoc factum primum diffici-

lius resolvendum, & non minus periculosum, quam secundum; ergo. *Prob: min: 1.* Quod sit factum patet: sicut enim est quæstio facti, utrum textus libri Jansenii contineat dogma hæreticum; ita quæstio facti est, utrum textus unius propositionis contineat idem vel simile dogma. *2do.* Quod sit difficillius resolvendum, quia in textu longiori totius libri potest dignosci sensus ex antecedentibus & consequentibus, ex titulo, ex forma procedendi & toto discursu & aliis; hæc autem non inveniuntur in brevi textu unius propositionis; ergo.

Confirm: Secundum Jansenistas Ecclesia infallibili judiciô approbavit textum S. Augustini, quidni infallibili judicio damnavit textum Jansenii? Cum textus Augustini sit fusior & obscurior textû Jansenii, quippe qui ut prætendunt, est explicatio S. Augustini.

§ II.

Solvuntur Objectiones.

Obj: 1. **C**hristus non promisit infallibilitatem Ecclesiæ nisi in rebus

bus fidei; atqui factum dogmaticum v.g. quod liber Jansenii contineat errores, non est fidei; ergo. *Prob: min:* Nihil est fidei, quod non est revelatum; atqui non est revelatum, quod liber Jansenii contineat errores; ergo.

Resp: 1. Nego maj. Promissa est enim Ecclesiæ infallibilitas, ne portæ inferi prævaleant adversus eam, quæ est columna & firmamentum veritatis, ut custodiat depositum fidei, ut bene pascat oves, & salutem fidelium provideat. Hæc ergo infallibilitas juxta hanc responsionem non ex revelatione, sed ex speciali assistentia Spiritus S. qui Ecclesiam docet omnem veritatem, habetur.

Resp: alii 2. Dist: min: Factum Jansenii non est revelatum immediate, concedo; mediatè, nego. Veritas namq; a Deo revelatur 2plicitè 1^{mo}. Immediate in se, in particulari, ut hæc: *Christus est homo.* 2. Mediatè in alio ut pars in toto, ut hæc: *David peccavit in Adam* revelata est in hac universali, *Omnes in Adam peccaverunt.* Hoc enim ipso quod revelatur propositio universalis

falís, revelantur etiam formaliter propositiones particulares, quia veritas propositionis universalis ex veritate particularium petitur. Porro revelatum est universaliter omnem textum, omnem propositionem, omnem librum ab Ecclesia damnatum esse, vere damnabilem, id namq; comprehenditur sub infallibilitate Ecclesiæ revelata, proinde & hunc textum hujus propositionis, puta Jansenii.

Resp: alii 3. Omis: maj: negant min: Ad prob: negant min: Quia cum sensus scripturæ & traditionis sit revelatus, sensus cujusq; libri aut propositionis ipsi conformis, vel oppositus est etiam revelatus, quia est eadem relativorum cognitio; Ecclesia enim procedit judicio comparativo, comparando textum vel propositionem cum S. Scriptura & traditione.

Dices contra 2. & 3. resp: Datô quod sit de fide omnem textum ab Ecclesia damnatum esse damnabilem, non tamen est de fide hunc textum Jansenii damnatum esse damnabilem; ergo. *Prob: Ant:* Veritas hujus propositionis
par-

particularis: *Hic textus Jansenii est damnabilis*, non cognoscitur nisi mediante hoc discursu humano: *Omnis textus ab Ecclesia damnatus est vere damnabilis*; atqui *hic textus ab Ecclesia est vere damnatus*; ergo *textus Jansenii verè est damnabilis*; sed cognitio seu assensus veritatis, quæ innititur discursui humano non est fidei; ergo nec conclusio quæ sequitur debiliorem partem.

Resp: ad Prob: dist: min; Assensus veritatis quæ innititur discursui humano ut causæ moventi ad assentiendum non est fidei, conc: ut causæ applicanti motivum, seu ipsam revelationem, nego. Non repugnat ergò assensui fidei, quod supponat aliquem discursum, non tanquam motivum, propter quod præbeatur assensus, sed per quem revelatio universalis applicetur, huic particulari subjecto, ut patet in hac propositione: *David peccavit in Adam*, quæ licet sit fidei, indiget tamen, ut credatur hoc discursu: *Omnes posterii Adami in ipso peccaverunt; sed David est ex posteris Adami; ergo David in Adam peccavit.* Iste discursus non est causa, seu motivum
pro-

propter quod credo Davidem in Adamo peccasse, sed tantum applicatio hujus revelationis universalis, *Omnes in Adam peccaverunt*, huic particulari subiecto nempe Davidi, & ista revelatio est motivum, ut credam Davidem peccasse in Adam, similiter in casu controverso. Hinc patet ad id: quod conclusio sequatur debiliorem partem; hæc enim regula non habet locum in discursu merè applicativo, quia propositio universalis quæ ponitur in Majore, non est causa propositionis, quæ ponitur in Conclusionem; cum propositio universalis nihil sit aliud, quam omnes propositiones particulares; Minor autem naturalis hæc: *atqui textus Jansenii est damnatus ab Ecclesia*, est tantum explicatio majoris universalis, & ejus applicatio ad hoc determinatum subiectum, unde si propositio universalis est de fide, non obstante minori naturali, conclusio particularis in Majori contenta erit etiam de fide.

Urgebis Fides est ex auditu, auditus per Verbum DEI; atqui factum Jansenii non continetur Verbo DEI; ergo.

go. Item Ecclesia non habet novas revelationes, nec articuli fidei temporum successione crescunt; atqui hæc duo videntur admittenda, si factum Jansenii sit revelatum & fidei Divinæ; ergo.

Resp: ad 1. dist: min: Factum Jansenii Verbo Dei non continetur explicite & immediatè, *conc:* implicite & mediatè, *nego.* Continetur enim in hac generali propositione revelata: *Omnis textus damnatus ab Ecclesia est damnabilis.* *Ad 2.* Hæc revelatio universalis non est nova, sed fuit ab initio, consequenter damnatio textus Jansenii non est novus articulus fidei, sed explicatio & applicatio revelationis universalis ad determinatum subjectum.

Instabis. Innocentius XIII. Brevi dato ad Episcopos Belgii 1694. dicit: sufficere, si damnentur quinque propositiones in sensu obvio, quem verba præseferunt, nulla facta mentione sensûs Jansenii, ergo.

Resp: Dist: ant: Nulla facta mentione explicità sensûs Jansenii, *Trans:* implicita, *nego.* Dicit enim *se firmissime inherere Constitutionibus suorum Prædecessorum*

rum Innocentii X. & Alexandri VII. easq; in suo robore semper permansisse - - - eos qui ad juramentum adigendi sunt, illud præstare debere sincere, absq; ulla distinctione, restrictione, seu expositione, damnando eas propositiones in sensu obvio. Summi autem Pontifices Innocentius X. & Alexander VII. eas damnarunt in sensu a Jansenio intento.

Persistes. Clemens IX. admisit ad pacem Ecclesiæ quatuor Episcopos, Andegavensem, Bellovacensem, Apamiensem, & Aletensem, qui in suis mandatis docuerant, sufficere pro facto Jansenii obsequiosum silentium; tantum ab iis exegit, ut subscriberent formulæ Alexandri VII. quod ipsi præstiterunt, sed inserta in secretis actibus verbalibus distinctione juris, & facti, declarantes assensum mentis dogmati debere, facto verò solam reverentiam silentii; ergo.

Resp. Clementem IX. hos Episcopos non admisisse ad pacem, nisi quia cum fundamento existimavit eos formulæ Alexandri VII. subscripsisse simpliciter, sine ulla limitatione, ut ipsi
si-

significatum fuit. Quod autem eorum Acta verbalia non innotuerint summo Pontifici, non mirum, erant enim secreta.

Oppones. Episcopus Catalaunensis in declaratione sua aperit Clementi IX. quis fuerit sensus horum quatuor Episcoporum in suis actibus verbalibus, nempe, quod formulæ sine ulla exceptione duxerint subscribendum, quod ad Pontificiam de *facto* sententiam pertineret, eam cum reverentia quidem suscipiendam, sed intra fines, ne quid ipsi contrarium doceatur; ergo.

Resp. Pontificem verisimiliter intellexisse de facto personali Jansenii, utrum sensus propositionum esset sensus internus Jansenii, quia cum declaratio dicat, eos formulari subscripsisse, in quolibet sensu, in quo ab Ecclesia damnatæ fuissent propositiones; Ecclesia autem eos damnaverit in sensu a Jansenio intento, non potuit Pontifex credere eos ad obsequiosum silentium restringere, reverentiam debitam facto dogmatico Jansenii, nisi supponendo eos pugnantia loqui.

Dices contra 1. resp. princip. Argum.

Si

Si factum Jansenii non est revelatum, non est credendum fide Divina, sed humana tantum, proinde est incertum.

Resp. Factum Jansenii juxta datam resp. neq; fide Divina, neq; mere humana, sed fide Ecclesiastica, quæ est quasi mediæ inter Divinam & humanam, sed certissima & firmissima, utpote innixa speciali assistentiæ Spiritus S. & inde infallibilitati Ecclesiæ in his rebus est credendum.

Nec dicas. Hanc assistentiam esse ipsam revelationem. Nam aliud est alicui revelare veritates, aliud auxiliari & adesse, ne a veritatibus revelatis deviet; patet in definitionibus Conciliorum, quibus non fiunt novæ revelationes, alioquin Patres forent scriptores sacri, & definitiones eorum essent S. Scriptura.

Instabis. Quidquid definitur in Conciliis, excepta fide, retractari potest; ergo si factum Jansenii non sit fidei, judicium Ecclesiæ circa illud non erit infallibile. *Ant. est S. Leonis Pont. in Concil: Calced: Præter id, quod ad causam fidei gestum esse perhibetur, nullius erit pernitentis firmitatis.*

Resp:

Resp. dist: Ant. In Conciliis solutis & a summo Pontifice non confirmatis, *conc:* subsistentibus & confirmatis, *negc.* Concilium autem Calcedonense, de quo loquitur S. Leo fuit absolutum Actione 6. antequam ageretur de tribus capitulis, & non nisi quoad damnationem hæreticorum fuit a S. Leone confirmatum.

Objic: 2. In quæstionibus facti errare posse Ecclesiam senserunt, qui de hac re scripserunt, ad censuram usq; famosarum quinq; propositionum Jansenij. ergo. *Prob. Ant.* S. Thomas Quodlibeto 9. q. 8. Art: ult: ait; *in sententiis quæ ad particularia facta pertinent - - - possibile est Ecclesiæ judicium errare propter falsos testes.* Canus lib. 5. cap. 5. *Concl. 3.* In moribus non toti Ecclesiæ communibus, sed qui ad privatos homines vel Ecclesias referuntur, errare per ignorantiam Ecclesia potest. Gerson de potestate Ecclesiæ, Bellarminus, &c. ergo.

Resp. Hi & alii, quos congerit vitasse, loquuntur de factis particularibus de quibus Ecclesia fert judicium ex relatione hominum. 1. S. Thomas cla-

re designat facta particularia, cum dicit: *in sententiis quæ ad facta particularia pertinent, ut cum agitur de possessionibus, criminibus.* 2. Canum loqui de factis personalibus, constat ex exemplo, quod adducit: *Cum quis occulte uxore habita, alteram ducit publice, jubet illi ut priore relicta, posteriorem accipiat.* 3. Idem refert Gerson & addit: *Et istud est unum factum, non jus.* 4. Similiter intelligitur Bellarminus, tum ex causa fallibilitatis Ecclesiæ in factis, quæ adducit: *quia ex testimoniis hominum præcipuè pendent,* Tum ex exemplis quæ profert: *Ut an talis sit promovendus ad Episcopatum? an jure fuerit promotus? unde Ant: dist: potest.* In quæstionibus facti particularis sive personalis, *conc. dogmatici nego.* Cum enim factum personale spectet statum v.g. Innocentiam, internum animi sensum, quorum cognitio ex testimoniis hominum pendet, consequens &c. At judicium de facto doctrinali, sive doctrina in libris expressa, non pendet ex testimoniis hominum, sed ex collatione doctrinæ in libris contentæ cum S. Scriptura & Traditio-

tionibus, fidei nostræ Regulis, unde fit; ut Ecclesia speciali Spiritûs S. assistentia adjuta in eo decidendo sit infallibilis.

Instabis. V. Bellarminus lib: 4. de S. Pontif. expendens causam *Honorij* dicit: *Tuto dicere possumus hos Patres (VI. Synodi) deceptos ex falsis rumoribus, & non intellectis Honorii Epistolis; ergo sentit Ecclesiam errare posse in factis dogmaticis.*

Resp. nego conseq. Nam hic V. Bellarminus loquitur de facto mere personali Honorii, & interno, cujus decisio pendet principaliter ex informatione & testimoniis hominum. Nota V. Bellarminum per Patres Synodi intellexisse *Græcos*, cum certum sit Cardin. Turcremata, quem citat, errorem facti in causa Honorii rejicere in solos Græcos; sicut & ipse V. Bellarminus in solutione Obj. dicit: *a Joanne IV. Martino I. Agathone & Nicolao I. Pontificibus, & a toto Concilio Romano, sub Martino congregato, eas Epistolas Honorii melius esse intellectas, quam a Græcis in Concilio VI.*

P

Dices:

Dices: V. Bellarminus loquitur de Epistolis Honorii a Patribus Concilii *non intellectis*; ergo agit de sensu ejus literali, non personali.

Resp. dist. Ant. Loquitur de Epistolis ejus malé intellectis secundum ejus sensum personalem & internum, *conc.* secundum literalem, *nego.* Nam judicium de sensu literali textus, qui ob oculos versatur, non fit ex informatione, & rumoribus; sed ex consideratione significationis vocum & propositionum, cum Spiritus S. gratia facta, earumq; collatione cum S. Scriptura & Traditionibus.

Objic. 3. Illud judicium non est infallibile quod aliquando revocat Ecclesia; atqui suum de textibus & libris dogmaticis judicium aliquando revocavit Ecclesia, ergo. *Prob. min.* 1. Concilium Antiochenum *Omousios* vocem proscripsit, quam tamen postea Concilium Nicænum I. approbavit. 2. Hæc vox *Christotocos* habebatur ut Catholica; atqui tamen Concilium Ephesinum illam improbavit. 3. Concilium Calced. famosa tria Capitula approbavit; eadem
Sy-

Synodus V. ut hæretica repudiavit; ergo.

Resp. ad 1. Proscripsit secundum sensum, quem Paulus Samosatenus ei attribuit, non verò secundum sensum Orthodoxum. Paulus per hanc vocem *Omonsfios* intelligebat, Filium in Divinis habere quidem eandem naturam specie cum Patre, sed numero distinctam, quod non affirmant Patres Nicæni. *Ad 2.* Similiter vox *Christotocos* in sensu Nestoriano solum reprobata est, qui negando unionem hypostaticam; per vocem *Christotocos* excludebat vocem *Theototocos*, sive DEI Genitrix. *Ad 3. Nego Ant* Nam in Concilio Calced. de tribus capitulis nihil fuit agitatum, sed solum de admittendis ad communionem Theodoreto & Iba, qui postquam dixissent anathema Nestorio, & Eutycheti, ac Epistolæ S. Leonis ad S. Flavianum subscripsissent, ad eam admissi fuerunt. Hinc Vigilius Papa, qui confirmavit V. Synodum, ait: *Absit, ut tam horrendas blasphemias Patres Calcedonenses approbaverint.*

Instabis. Legati S. Pontificis in Concilio Calced. sententiam pronuntiant: *relectis chartis agnovimus ex sententia RR. Episcoporum Ibam innoxium approbari.* Ergo concilium approbavit Epistolam Ibæ.

Resp: nego consequi: Non enim Ibas innoxius visus est, quia ejus epistola innoxia; sed quia interrogatus deprehensus est Orthodoxus. Teste enim Eumenio Nicomediæ Episcopo dicta in Cyrillum revocavit, & Nestorium ac Eutychetem damnavit, quare dignus Episcopatu judicatus est.

CONSECTARIUM

Supposita infallibilitate non S. Pontificis, a qua nunc abstrahimus, quia eam non agnoscunt ii, contra quos agimus, sed Ecclesiæ in controversiis fidei, & factis dogmaticis definiendis, sequitur non esse licitum appellare a Constitutione *Unigenitus* Clementis XI. damnante 101. Propositiones Paschassii Quesnel, ad futurum Concilium generale, quod hic brevi argumento ostenditur.

Non

Non licet appellare a iudicio infallibili & irreformabili; atqui Constitutio *Unigenitus* est tale iudicium; ergo. *Prob: min.* Constitutio *Unigenitus* est iudicium Ecclesiæ; atqui iudicium Ecclesiæ est infallibile & irreformabile in dogmatibus, & factis dogmaticis definiendis: ut hucusq; dictum; ergo. *Prob. Maj.* Ecclesia universalis Constitutionem *Unigenitus* acceptavit, & acceptando fecit suam; ergo. *Ant. constat.* Ex testimoniis Ecclesiarum Europæ, Italiæ, Siciliae, Venetiarum, Sabaudiae, Germaniæ, Belgij, Bohemiæ, Hungariæ, Poloniæ, Hispaniarum, & Portugalliæ. Extant autem hujus rei testimonia in institutione Pastoralis Emn. Card. de Bissii Tomo 3. Instit. 2. Quantum ad Galliam, ubi quæstio hæc mota est, 100. & 10. Episcopi hanc Constitutionem acceptarunt, 10. recusarunt, & quatuor tantum ad futurum Concilium appellarunt. Ex Academiis 24. in eodem Regno, tres tantum Parisiensis, Remensis, & Nanetensis acceptationem prius factam revocarunt. Ut vim hujus argumenti eludant Constitutionis præfatae hostes. *Di-*

Dicunt. 1. Equidem Ecclesiam in Concilio congregatam esse infallibilem, at non dispersam.

Resp. Hoc assumptum stare non potest, cum apertè contradicat Christi promissionibus, quibus pollicitus est se futurum cum Ecclesia omnibus diebus usq; ad consummationem sæculi; nunquid omnibus diebus congregantur Concilia? Nunquid Ecclesia dispersa, non est vera Ecclesia, quæ deficere non potest? Imo Ecclesia in Concilio congregata non est infallibilis, nisi quia repræsentat universam Ecclesiam dispersam; ergo a fortiori hæc est infallibilis.

Dicunt. 2. Ex silentio Episcoporum non potest colligi acceptatio Constitutionis dictæ, cum humanæ rationes silendi possint adesse.

Resp. 1. Habetur consensus expressus omnium fere Ecclesiarum. 2. DEUS non permittit, quod Episcopi circa falsum dogma publice propositum sileant; cum id vergeret in defectionem Ecclesiæ; *Ecclesia Dei ea, quæ sunt contra fidem, vel bonam vitam, non approbat, nec tacet, nec facit.* ait S. Aug. Epist. 55.
ali-

alias 119. Silentes ergo Episcopi hac in re censentur assensum præbere. Plura de hoc vide apud P. Bulluart Diss: 3. Art. 7. de infallibilitate Ecclesiæ.



ARTICULUS VIII.

Utrum Ecclesia sit infallibilis in Canonizatione Sanctorum?

Canonizatio Sanctorum est sententia canonica, & definitiva Sanctitatis ac gloriæ alicujus defuncti a S. Pontifice lata, universali Ecclesiæ proposita ac intimata, qua canonizatus exponitur publico cultû venerandus.

Dico: 1. Ecclesia est infallibilis in canonizatione Sanctorum.

Prob: Nisi Ecclesia esset infallibilis in canonizatione Sanctorum, posset errare præcipiendo omnibus fidelibus, ut canonizato cultum exhibeant, Festum celebrent; atqui hoc falsum est; nam Ecclesia errare non potest in legibus generalibus ferendis, quæ concernunt mores fidelium; maximè autem refert
ad

ad mores fidelium, ne Ecclesia erret in Sanctis canonizandis, ut ait Canus lib: 5. cap. 5. Concl. 3. Hinc S. Aug. Epist: 118. ait: *Insolentissimæ insanix est disputare, an sit faciendum, quod tota facit Ecclesia.* Et S. Thomas Quodlib. 9. art. 16. *Quia --- honor &c. quem Sanctis exhibemus, pie credendum est. quod nec etiam in his iudicium Ecclesix errare possit.* Ad primum. *Summus Pontifex cujus est canonizare Sanctos, potest certificari de statu alicujus --- præcipue per instinctum Spiritus S.*

Dices. 1. Nullus ita potest esse certus de statu alicujus, sicut ipsemet de se; quia quæ sunt hominis, nemo novit nisi spiritus hominis qui in ipso est. 1. Corint: 2. atqui nullus potest esse certus de seipso; nemo enim scit, utrum sit dignus modio vel amore Eccl: 9. ergo. 2. Canonizatio Sanctorum nititur medio fallibili, scilicet humano testimonio. 3. In Martyrologio Usvardi recensetur inter Sanctos Eusebius Cæsariensis, quem tamen appellat S. Hieron. Signiferum Arianorum. 4. Juxta S. Aug. Multa corpora honorantur in terra, quorum animæ torquentur in gehenna. 5. Ecclesia potest errare in pro-

ponendis reliquiis absq; gravi inconve-
nienti; ergo & in proponendis Sanctis.

Resp: ad 1. Nullus potest ita esse cer-
tus seclusa assistentiâ Spiritûs S. de sta-
tu alicujus, benè tamen ea supposita.

Ad 2. nego ant: Quamvis enim Ecclesia
in hoc negotio requirat humana testi-
monia, tanquam manuductionem ad
prudenter agendum, ejus tamen testi-
monium nititur testimoniis Divinis, quæ
sunt v.g. vita Sancta, miracula eorum
meritis facta, peculiariter lumen & as-
sistentia Spiritûs S. ut ait S. Thomas
jam laudatus. *Ad 3.* Quod Eusebius
ponitur in Usvardi Martyrologio, hoc
solum probat a particulari Ecclesia illum
forte ut talem coli. Martyrologia qui-
dem proponuntur toti Ecclesiæ, ut no-
scantur, qui in certis locis colantur; non
ut omnes quos referunt, colantur ut San-
cti a tota Ecclesia. Unde Ecclesia ali-
quando emendat Martyrologia. *Ad 4.*
Juxta Sylvium & Bellarminum hic tex-
tus nullibi legitur in S. Augustino. Po-
test aliter intelligi de cultu civili, ut de
magnificis sepulchris & similibus. *Ad 5.*
Disp. est ex eo, quod Sanctus sit obje-
ctum

ctum directum cultus, cultus autem reliquiarum directe fertur in Sanctum, qui sit revera Sanctus.

Dico 2. Non videtur esse de fide, quod Ecclesia sit infallibilis in Canonizatione Sanctorum, consequenter nec est de fide, quod ab Ecclesia canonizatus sit Sanctus.

Prob. 1. P. ex S. Thoma supra citato, qui iudicium Ecclesiae in canonizatione Sanctorum ponit medium inter iudicium Ecclesiae de rebus fidei, & iudicium de factis particularibus, & dicit: quod non sit de fide, sed sit *pie credendum*, quod in his iudicium Ecclesiae errare non possit. Et quamvis sit fide certum Ecclesiam esse infallibilem in communi doctrina morum; non est tamen eadem fide certum canonizationem Sanctorum ad communem doctrinam morum pertinere; neque enim id omnes concedunt. Hinc sequitur 2. P.

Petes 1. Quid censendum de beatificatione Sanctorum?

Nota: Beatificatio est *indulgentia* sive *licentia* facta a S. Pontifice, ut aliquis in sanctitatis fama defunctus, Beatus possit appellari.

lari, eiq; cultus in aliqua Provincia vel civitate cum Divini Officii recitatione exhiberi. Sic enim loquuntur beatificationis Decreta.

Resp. Piè credibile est Ecclesiam non posse errare in beatificatione Sanctorum. *Ratio* Quia in hoc negotio etiam procedit mature & alto judicio, multis institutis probationibus, per multas congregationes perpensis, cum profunda indagatione probitatis vitæ, felicissimi exitûs, ac miraculorum, quæ Divina sunt testimonia, beatificandi meritis patratorum.

Dices: Ecclesia beatificando quemquam non definit ultimate; ergo ipsius judicium pòtest quandoq; errori esse obnoxium.

Resp: nego consequ. Et si non definiat ultimate, indulgendo tamen concedit, & approbat cultum hujus vel illius, in qua concessione & approbatione si erraret, suæ infallibilitati in doctrina morum, suæ sanctitati & suo honori derogaret.

Petes 2. Qua ergo certitudine tenendum est Ecclesiam non posse errare in

ca-

canonizatione & beatificatione Sanctorum?

Resp: Ut jam dictum, etsi non sit certum certitudine fidei Divinæ, est tamen certum certitudine fidei Ecclesiasticæ, omni certitudine humana majori, quæ cum Spiritûs S. assistentiæ innixa, sit in errorem nequaquam inducere potest, patet ex dictis.

Petes 3. Qua censurâ notanda propositio asserens Ecclesiam in tali iudicio posse errare?

Resp: Effet 1. *Erronea*, quia opponitur communi sensui fidelium. 2. *Temerraria*, quia adversatur communi Theologorum sententiæ. 3. *Scandalosa*, quia inde communiter in fidelibus nascitur scandalum. 4. *Impia*, quia est contra religionem & cultum Sanctis debitum.

Petes 4. Quando habuit initium Sanctorum canonizatio?

Resp: Quamvis Sanctorum canonizatio, quo ad modum, qui nunc fervatur in Ecclesia, non semper fuerit in usu, fuit tamen semper quò ad substantiam; ita quod nullus ut Sanctus coleretur, sine prævia discussione & approbatione

il-

illius sanctitatis ; ut constat ex *Optato Milevitano* lib. I. contra *Parmen.* ubi significat illicitum fuisse venerari Reliquias alicujus hominis *etsi Martyris, sed nondum vindicati*, id est, nondum approbati & recepti. Hæc vero discussio, approbatio seu canonizatio fiebat ab Episcopo vel Primate pro suis Ecclesiis tantum, sed cultus in eis institutus ex populorum devotione, accedente consensu tacito vel expresse S. Pontificis sæpe extendebatur ad alias Ecclesias. Ob pericula quæ in his casibus contingere possunt vitanda, abususq; tollendos, Alexander III. cap. *Audivimus* de Reliquiis & veneratione Sanctorum jus canonizandi Sanctos, soli Sedi Apostolicæ reservavit, & ipse S. Bernardum & S. Thomam Cantuariensem canonizavit.

Petes. 5. An Ecclesia sit infallibilis in doctrina disciplinæ?

Nota. Inter res faciendas, aliæ omnino sunt necessariae & immutabiles vg. quod talis contractus sit usurarius, & vocantur *res morum*; aliæ sunt liberæ & mutationi obnoxiae vg. communio sub una,

una, vel duplici specie, & vocantur *res disciplinæ*; quæ res disciplinæ rursus vel est *universalis* pro tota Ecclesia inventa & probata; vel solum *particularis* pro aliqua particulari Ecclesia.

Resp. 1. Ecclesia non potest errare in disciplina generali, quæ ad omnes pertinet præcipienda. *Ratio.* Ex Concilio Apostolorum Act. 15. in quo præcipientes disciplinam generalem, & quidem non diu duraturam, nempe abstinentiam a sanguine & suffocato, asserunt se habere Præsidem & assistentem Spiritum S. *Visum est*, ajunt, *Spiritui S. & nobis*; atqui certum est de fide Ecclesiam non posse errare in his, in quibus definiendis Præsidem habet Spiritum S. ergo.

Resp. 2. In præceptis morum & disciplinæ, quæ non toti Ecclesiæ communia sunt; sed quæ ad privatos homines, vel particularem Ecclesiam referuntur, Ecclesia non est infallibilis. *Ratio.* Quia circa hos mores & disciplinam particularem Ecclesia nititur testimonio hominum, qui & falli & fallere possunt. Unde Innocentius III. cap.

a nobis de sententia Excommunicationis ait: iudicium DEI veritati, quæ nec fallit, nec fallitur, semper innititur, iudicium autem Ecclesiæ nonnunquam opinionem sequitur, quam & fallere sæpè contingit & falli.



DISSERTATIO .III.

DE SUMMO PONTIFICE.

Hoc, missis aliis inter Sacerdotium Leviticum, & Christi discrimen est, quod Aaron supremus in Synagoga Sacerdos constitutus a DEO, in suo munere habuit Successores; at Christus totius Ecclesiæ caput. & Sacerdos secundum ordinem Melchisedech factus, minime, *hic autem (Christus) quod maneat in æternum, semipiternum habet Sacerdotium.* Hebr: 7. At tamen antequam de hoc mundo exiret ad Patrem interpellaturus pro nobis, Petrum in terris suum constituit Vicarium, summum, Visibilem in iis, quæ

quæ sunt ad DEUM, Pontificem; ipse autem habuit, & usq; ad consummationem sæculi habebit in sua dignitate Successores. Quinam igitur sit ille Summus Pontifex, Vicarius Christi, Petri Successor, ejusq; dotes? examinemus.



ARTICULUS I.

De Sancto Petro.

Novatores ex odio in Ecclesiam Romanam ajunt Christum non unum Petrum. sed omnes omnino Apostolos constituisse Ecclesiæ capita, cum potestate æquali illam regendi. Hoc eo fine asserunt, ut evincant Romanum Pontificem nullo modò superiorem esse aliis Episcopis, inter quos ad summum est primus inter pares. Alii verò, ut Authoritatem summi Pontificis eludant, contra omnem traditionem & historiam audacter pugnant dicentes cum Centuriatoribus Magdeburgensibus S. Petrum nunquam Romæ fuisse, multominus Sedem ibidem fixisse; hinc concludunt Romanum Pontificem Petri in
Sede

Sede successorem, & Christi in terris
Vicarium esse non posse.

§ I.

*Utrum S. Petrus constitutus sit a Christo
totius Ecclesiæ Caput & Primas?*

Apostolatus, qui significat *missum*, tres
exigit conditiones 1. Potestatem
ordinis ad ligandum & solvendum. 2.
Consecrationem Episcopalem, nam &
ipsi Episcopos alios creare & conse-
crare, imo & Ecclesias particulares
erigere possunt. 3. Jurisdictionem u-
niversalem, quippe, qui mittantur in
omnem terram, eo sanè fine, ut do-
ceant omnes gentes. Indubium est A-
postolos omnes fuisse Sacerdotes & E-
piscopos constitutos a Christo. Ab eo
etiam de via extraordinaria accepe-
runt jurisdictionem in mundum univer-
sum, quod indigitat Scriptura Joan: 20.
Sicut misit me Pater, & ego mitto vos;
quem locum de jurisdictione univer-
sa concessa explicat S. Cyril: Alex: Chry-
sostomus & alii. Quæstio ergo est de
jurisdictione ordinaria, an ea a Christo
sit collata Petro tum in Apostolos a-
lios,

lios, tum in Ecclesiam totam, tanquam Capiti & Ecclesiae Primati.

Dico: S. Petrus constitutus fuit a Christo totius Ecclesiae Caput, Primas & Apostolorum Princeps.

Prob.: 1. Christus soli Petro promissit conferre primatum & supremum regimen suae Ecclesiae Math: 16. etsi praesentes fuerint caeteri Apostoli, ad solum Petrum ejus Divinitatem profitentem sermonem direxit: *Tu es Petrus, & super hanc petram aedificabo Ecclesiam meam, & portae inferi non praevallebunt adversus eam. Et tibi dabo claves Regni caelorum, & quodcunq; ligaveris super terram, erit ligatum & in caelis; & quodcunq; solveris super terram, erit solutum & in caelis.* Ex quo sic. His Verbis Christus promittit se Petro aliquid collaturum, quod caeteris Apostolis praesentibus, & promissionem factam Petro, audientibus conferendum non erat; atqui id aliud esse non potest, quam Ecclesiae primatus regimen & principatus supra caeteros, ut patet; ergo. Promissionem mox factam adimplet Christus & actum regimen generale Eccle-

cle-

clesiæ Petro confert, dum Joan: 21. in præsentia aliorum Apostolorum soli Petro dixit: *Pasce agnos meos - - - Pasce oves meas*; atqui *pascere oves*, id est subditos, idem est, ac illos regere; cum officium Pastoris sit non solum pascua præbere, sed etiam oves ducere, tueri, præesse, dirigere, castigare, cogere, ut pareant. Sic enim David Psal: 77. dicitur *pavisse Israel*, id est, rexisse; ergo. Sed forte.

Dices: Quod Christus tantum partem quarundam ovium Petro commiserit. Nam hoc stare non potest: Cum enim *Ly meas* absq; omni restrictione addatur ad nomen *Oves*, clarè denotatur, eas omnes Petro commendari, ad quas extenditur vocula *meas*; atqui certum est hanc voculam *meas* extendi ad omnes omnino fideles, cujuscunq; dignitatis & conditionis sint; cum omnes sint oves Christi; ergo Christus Petro commisit regimen super omnes fideles, consequenter super totam Ecclesiam, & ovile Christi, in quo cum sint oves magnæ & parvæ, agni & matres; ideo Christus volens omnes complecti dixit

Petro 1mo. *Pasce agnos meos*, id est: inferiores fideles; dixit 2dò. *Pasce oves meas*, universaliter complectendo omnes, quotquot pertinent ad suum ovile; etiam majores, Pastores Episcopos (quos confirmare jubetur Lucae 22.) Parochos &c. qui velut Matres illos agnos pepererunt.

Prob: 2. Ex Prærogativis S. Petri: ex quibus saltem simul sumptis, primatus ejusdem & eminentia supra cæteros Apostolos colligitur. Sunt autem præcipuè sequentes, 1mò. Quod soli Petro Christus mutaverit nomen: *Simon Jona, seu Joannis Filius. Tu es Petrus.* 2dò. Quod non tantum primo loco soleat poni ab Evangelistis, quando recensent Apostolos, verum etiam quod expresse vocetur *primus*, uti Math: 10. *Duodecim autem Apostolorum nomina sunt hæc: Primus Simon qui dicitur Petrus.* 3tiò Quod inter Apostolos soli Petro facta est revelatio Divinitatis Christi Math: 16. 4tò. Quod Christus pro solo Petro solverit tributum, Math: 17. 5tò. Quod Christus solius Petri naviculam ingressus sit, & ex ea docuerit, Lucae 5. 6tò.

6tò. Quòd pro solo Petro rogaverit, ut non deficeret fides ejus, illiq; soli dixerit: *Confirma fratres tuos* Lucæ 22. 7mò. Quòd S. Petrus electioni S. Mathiæ præsiderit Act: 1. 8vò. Quòd primus Evangelium promulgaverit & ad fidem tria millia converterit Act: 2. 9nò. Quòd primus miraculò fidem confirmaverit Act: 3. 10mò. Quòd primus Ecclesiæ januam gentibus aperuerit Act: 10. 11mò. Quòd primus in Concilio Apostolorum sententiam tulerit, Act: 15. 12mò. Quòd Christus post resurrectionem Petro ex Apostolis primò apparuerit. Ex quibus Prærogativis, aliquæ præcesserunt primatum Petri, aliquæ secutæ sunt. Priores vel erant signa futuri primatûs, vel dispositiones præviæ, vel promissiones ad eundem obtinendum; reliquæ effectus, & quasi exercitia primatûs obtenti.

Prob: 3. Ex Patribus, qui Primatum Petri omni modò docuerunt: S. Cypr: lib: de unit: Eccl: Primatus Petro datur, ut una Ecclesia & una Cathedra monstratur. Optatus Milev. lib: 2. contra Parmen. Negare non potes (Parmeniane)

scire te in Urbe Roma Petro primò Cathedram Episcopalem esse collocatam, in qua sederit omnium Apostolorum Caput Petrus - - - in qua una Cathedra, ut unitas ab omnibus servaretur; ne cæteri Apostoli singulas sibi defenderent, ut jam Schismaticus & peccator esset qui contra singularem Cathedram alteram collocaret. Egregium est, quod ait Ambrosius in cap ult: Lucæ. Quia solus profitetur Christi Divinitatem omnibus antefertur. Et in cap: 12. Epist: 2. ad Corint: Primatum non accepit Andræas sed Petrus. Hieron: in tota sua Epist: ad Damasum de nomine hypostaseon mira scribit de principatu S. Petri & ejus sedis: Super, ait petram ædificatam Ecclesiam scio. Adde Augustinum, quem nobis solent objicere ut contrarium, qui lib: contra partem Donati ait: Numerate Sacerdotes, vel ab ipsa Petri sede, ipsa est petra, quam non vincunt superbæ inferorum portæ. Et lib: 2. de baptismo cap: 1. In quo Petro primatus Apostolorum tam excellenti gratiâ præeminet. Sic Patres Latini. Consentunt cum iis Græci. S. Iren: lib: 3. hæc: cap: 3.

Ad

Ad hanc enim Ecclesiam tanquam potiore, alii legunt potentiorē principalitatem necesse est omnem convenire Ecclesiam, hoc est eos, qui sunt undiq; fideles. S. Cyril: Alex: lib: 12. in Joan: Præ aliis emicat ille cæterorum Caput & Princeps, & alii. Hinc Concil: Chalced: Act: 3. dicit de S. Petro. Qui est petra & crepido Catholicæ Ecclesiæ, & rectæ fidei fundamentum.

Prob: Ratione Theologica 1. Christus in Ecclesia instituit regimen Monarchicum, in quo unus extat supremus Princeps, qui plena potestate rerum summam administrat; ergo non instituit ex æquo, omnes Apostolos totius Ecclesiæ Principes, & Rectores, sed unum duntaxat ex illis, quis autem ille est; non Andræas, sed Petrus respondet S. Ambrosius. Prob: Ant: Ecclesia Danielis 2. comparatur regno. Cant: 6. exercitui ordinato. 1. Petri 3. Navi. Joan: 10. Ovili; atqui hæc omnia ab uno supremo moderatore gubernantur. Aliundè optimum regimen multitudinis est, ut regatur per unum propter pacem, & unitatem subditorum; unus enim

enim est congruentior causa unitatis & concordiae, quam multi. Sic Synagogae praefuit unus Supremus Princeps subditorum; sic in Ecclesia triumphante, ex qua militans derivatur per similitudinem, unus praesidet scilicet DEUS.

§. II.

Solvuntur Objectiones.

Objic: 1. Ex laudato cap: 16. Math: nihil erui potest pro primatu S. Petri; ergo. *Prob: Ant: 1.* Quia per has particulas: *Et super hanc petram* non intelligitur S. Petrus, sed Christus ipse, juxta illud 1. Corint: 10. *Petra autem erat Christus*, & illud ibidem 3. cap: *Fundamentum aliud nemo potest ponere prater id, quod positum est, quod est Christus JESUS* Et juxta S. Aug: qui Tract: Ult: in Joan: dicit: *Super hanc petram, quam confessus es, aedificabo Ecclesiam meam. Et sermone 13. de Verbis Domini: Tu es &c. super me aedificabo te, non me super te; ergo. 2do.* Dato praefata verba aliquo modo ad Petrum referri, non tamen ad ejus personam, sed ad ejus fidem
seu

seu confessionem, ita ut sit sensus; super hanc confessionem Petri ædificabo Ecclesiam meam. Ita S. *Hilarius* lib: 6. de Trinit: *Super hanc igitur confessionis petram Ecclesiæ ædificatio est.* Similiter *Cyrl: Alex: Chrysost: 3tio.* Laudata verba: *Tibi dabo claves regni, &c.* non referuntur ad Personam Petri singulariter, sed ad Ecclesiam, ita ut claves sint collatæ Petro nomine Ecclesiæ, ut ait: S. *Aug: Tract: 50. in Joan: Petrus quando claves accepit, Ecclesiam significavit; ergo.*

Resp: nego ant: ad 1. Prob: nego ant: Nam Sectarij vim manifestè inferunt textui, 1. quia pronomen hanc, relativum super hanc petram denotat petram, de qua prius facta est mentio; de Christo nulla facta est mentio sub nomine petræ, sed sub nomine Filii DEI vivi; bene de Petro sub nomine petræ, tu es Cephas seu petra. 2do. Si intelligatur de Christo sit sensus involutus, & intricatus, scilicet: Tu es Petrus & super hanc petram id est: super me: ædificabo Ecclesiam meam, & tibi Petro dabo claves; quô nihil est intricatius,
&

& a sensu naturali magis alienum. 3tio. Post confessionem Petri & hæc Verba: *Beatus es Simon Barjona*, Christus adjecit: *Et ego dico tibi, quia tu es Petrus & super hanc petram &c.* tanquam clausulam præcedentium, & ut præmium confessionis Petri; ergo ad ipsum referuntur, & non ad Christum. 4to. Si ad Christum referrentur, non dixisset ædificabo, sed ædifico, quia tunc jam in se ædificaverat Apostolos & Discipulos multos. Ex quibus patet interpretationem Sectariorum contortam stare non posse, imo esse contrariam communi Patrum sensui.

Ad 1. Ant. Ex eo, quod loco citato Pauli per *Petram* intelligatur Christus, non sequitur, quod ubicunq; petra ponitur, intelligatur Christus. Est enim id proprium dictionibus translatis, ut secundum diversas circumstantias diverso sensu accipiantur; sic in Scripturis Judas filius Jacob dicitur leo, dicitur & Christus, imo Diabolus, etsi sensu diverso.

Ad 2dum. Apostolus ibi loquitur de primario & principali fundamento, non de secundario & ministeriali, alias sibi

con-

contradiceret; cū ad Ephes: 2. dicat: *Superædificati super fundamentum Apostolorum & Prophetarum. Nec Inferas.* Ergo saltem cæteri Apostoli cum Petro sunt fundamenta secundaria Ecclesiæ, & sic nihil habemus speciale pro Petro ex cap: 16. Math:

Resp: Equidem sunt sed diverso, non eodem jure. Cæteri Apostoli sunt & dicuntur fundamenta Ecclesiæ secundaria quatenus doctrinam Evangelicam sibi revelatam ubiq; disseminarunt, miracula ediderunt, Spiritum S. contulerunt, Ecclesias fundarunt, eas rexerunt, Episcopos constituerunt; sed hæc præstiterunt ut Apostoli & Delegati jure extraordinario. Petrus autem jure ordinario, ut Pastor ordinarius & supremum caput, cui cæteri Apostoli subordinabantur, & ipse illis non subordinabatur; & hoc est, quod illi soli Math: 26. promittitur. Hinc S. Hier: lib: 1. contra Jovinianum cap: 14. *Licet, inquit, super omnes Apostolos ex æquo Ecclesiæ fortitudo solidetur, tamen propterea inter duodecim unus eligitur, ut capite constituto, Schismatis tolleretur occasio. Simile habetur in Prob: ex Optato Milevit.* Ad

Ad S. Aug: Equidem S. Doctor utramq; expositionem tradidit idq; ipse agnoscit lib: 1. *Retract:* cap: 21. dicens: *Harum duarum sententiarum, quæ sit probabilior eligat Lector,* additq; nostram cantari ore multorum in versibus S. *Ambrosij,* & cum sit longe conformior textui, eamq; communiter tradant Patres omnino præferenda est.

Ad 2. Prob: dist: ant: Verba *super hanc petram &c.* referuntur ad confessionem Petri, ut ad causam meritoriam promissionis, *conc:* ut ad subjectum, cui fit promissio, *nego:* SS. ergo Patres sic loquentes non sumunt confessionem in abstracto & seorsim a Petro, sed pro Petro confitente, ita ut confessio sit ratio, propter quam promittatur hæc prærogativa, Petrus verò persona cui promittitur. Sic dum S. *Hieron:* Epist: 61. de eodem Petro loquens dicit: *super aquas Petri corpus non ambulasse, sed fidem, non negat corpus Petri verè ambulasse super aquas, sed vult hoc miraculum non agilitati corporis Petri, sed ejus fidei esse tribuendum, ita hic.* Unde ipse *Hilarius* dicit: *Dignum plane*

*confessio Petri præmium consecuta est - - -
O in nuncupatione novi nominis felix Ec-
clesiæ fundamentum!*

*Ad 3. Prob: August: dicit claves Pe-
tro esse collatas nomine Ecclesiæ, quia
illas accepit non ut privata persona,
sed ut caput Ecclesiæ, & propter ejus
utilitatem; quod autem conceditur ca-
piti propter corpus, censetur corpori
concessum. Unde ipse S. Aug: Tract:
124. in Joan: dicit: Petrus Apostolus
propter Apostolatûs sui primatum Ecclesiæ
gerebat figurata quadam generalitate per-
sonam. Figurata autem expositio non
impedit veritatem historiæ. Sic juxta
eundem in Psal: 108. Judas erat fi-
gura malorum, sicut Petrus ratione
primatus erat figura Ecclesiæ; sicut er-
go Judas vere personaliter prodidit
Christum, ita Petrus vere personaliter
accepit claves.*

*Instabis. Saltem verba Christi dicta
Petro, ad omnes Apostolos referri de-
bent; ergo. Prob: Ant: Christus interro-
gabat omnes: Vos autem quem me esse
dicitis? Et Petrus nomine omnium re-
spondit: Tu es Christus Filius DEI vivi;
ergo*

ergo Christus respondens Petro in ipso respondet omnibus (quos interrogaverat) *Beatus es &c.*

Resp: nego ant: ad prob: nego consequ: 1. Christus respondens confessioni Petri, manifesté significat se Petrum specialiter alloqui, appellat ipsum omnibus proprijs nominibus, quibus ab alijs distinguitur, nomine nativitatis *Simon*, nomine Patriæ *Barjona*, nomine, quod ipsi imposuit, *Cephas*; dicit illi specialiter præ alijs: *Tibi dabo*, assignat causam promissionis, scilicet eminentem confessionem a Deo inspiratam, quam ipse solus fecit. Potuissetne magis specialiter, ipsum ab alijs distinguere, designare, indicare? Possetne clarius & specialius Notarius designare hominem quem vult intelligi in testamento, vel alio actu publico. 2. Quamvis Petrus nomine omnium responderit. ipsi tamen ab alijs non fuit commissum sic respondendi, nec aliquo modo alii ad ejus responsum concurrerant, cum non caro & sanguis, sed Pater cælestis ipsi revelasset; ex proprio ergo fundo, ex proprio merito, ex proprio privilegio ref-

respondit supplens aliorum defectum. Exempli causâ, si Rex belli Duces congregatos interrogaret de rebellica, & uni aliorum nomine aptè respondenti Rex dicat, creo te in supremum Ducem exercitûs; num forte omnes erunt creati & assumpti ad tale manus? An ipse solus respondens?

Repones: Christus Math: 18. cæteris Apostolis ac Petro parem contulit potestatem, cum illis dixit: *Quaecunq; alligaveritis super terram, erunt ligata & in cælo; ergo.*

Resp: 1. nego ant: Potestas enim clavium Math: 16. Petro tradita, est quid majus & superius ad solam potestatem ligandi & solvendi; quippe quæ est tantum actus inadæquatus clavium ut probat latè *Cajetanus* de primatu S. Pontif: cap: 5. & 7. Igitur collatio clavium Regni cælorum tribuit potestatem faciendi omnia, quæ ad regimen cælorum pertinent, & tollendi obstacula omnia quæ ingressum impediunt; ad hoc est necessarium aliquando veritates fidei determinare, hæreses damnare, concilia convocare, hunc monere, illi jube-

Jubere, aut prohibere &c. Hæc autem non continentur sub præcisa ratione ligandi & solvendi, quæ sunt tantum actus judiciales, vel in foro conscientiae. 2. Esto per laudata verba Math: 18. Apostolis parem ac Petro potestatem esse promissam (non enim tunc fuit collata sed Joan: 20.) alio tamen modo Petro, alio Apostolis collata est, Apostolis ut delegatis, Petro ut Pastori ordinario, illis dependenter & cum subordinatione ad Petrum, Petro independenter & supremè. Hac enim de causa, ut dictum, Math: 16. soli Petro coram alijs dicitur: *Tibi dabo claves &* Joan: 21. *Pasce oves meas*, idq; ob singularem ejus fidem & dilectionem.

Obijci: 2. Neq; ex his verbis Joan: 21. Pasce agnos meos, pasce oves meas aliquid evinci potest pro primatu Petri; ergo. *Prob: ant: Quod Christus dixit Petro: Pasce oves meas, omnibus dixit ergo. Prob: ant: 1. Quia ipse Petrus Epist: 1. cap: 5. dicit Episcopis: Pascite, qui in vobis est, gregem DEI. 2do. Quia S. Aug: lib: 6. de agone Christiano cap: 30. Cum ei, (inquit Petro)*
dici-

dicitur, ad omnes dicitur, amas me? pasce oves meas; ergo.

Resp. nego ant: ad prob: dist: ant: Omnibus dixit quantum ad gregem determinatum, *Trans:* quantum ad omnes generaliter, sicut dictum est Petro, *nego.* Unde ipse Petrus in Epist: non dicit simpliciter: *Pascite gregem*, sed *pascite gregem qui in vobis est*, id est gregem particularem vobis commissum. Et hoc sensu intellige S. August: nisi cum aliis sic intelligas: *dicitur ad omnes* id est, ad omnes Petri Successores, non ad omnes Apostolos. Cæterum constat de mente S. August: qui lib: de Past: cap: 13. dicit: *Multi erant Apostoli, & uni dicitur pasce oves meas.*

Objic: 3. plura ex Scripturis 1. Xrus Math: 28. & Joan: 20. æqualiter mittit omnes Apostolos, & omnibus æqualiter dicit: *Sicut misit me vivens Pater, & ego mitto vos &c.* 2. Lucæ 22. Apostolos de primatu contententes redarguit; si autem Petro fuisset collatus primatus, de illo non fuisset contentio, sed Petrum indicasset. 3. Act: 3. Petrus missus est ab Apostolis; non est

R

autem

autem superioris mitti ab inferiori. 4. Non legitur Petrum ullum jurisdictionis actum exercuisse in Apostolos. 5. Petrus non semper ponitur primo locô dum nominantur Apostoli: *Jacobus, Cephas, & Joannes*, ad Gal: 2. ergo.

Resp: ad 1. Ex missione Apostolorum sequitur eos pares esse Petro in ratione Apostolatûs, non in ratione officii pastoralis. *Ad 2.* Xtus redarguit Apostolos contendentes de primatu temporalis dominationis & quæsito ex ambitione, ut patet ex contextu: *Reges Gentium dominantur eorum.* Nota. Primatus Spiritualis Petri, protunc promissus ipsi, nondum collatus erat. *Ad 3.* Apostoli miserunt Petrum non imperiô, sed consiliô, non jubendo, sed suadendo & consulendo. *Ad 4. 1.* nego ant: Nam S. Petrus convocavit Apostolos in electione S. Mathiæ. 2. Non omnia, quæ fecit Petrus, scripta sunt. 3. *Dato ant: nego consequ:* Tum quia Apostoli a Spiritu S. ducti optime se gererent, non erat opus, ut Petrus in eos suam exerceret jurisdictionem; tum quia ab actu ad potentiam non valet

valet argumentum negativè. *Ad 5^{um}* nego consequi: Sæpius enim ponitur, ut in Prob: dictum. Quod autem in præfato loco non ponatur primo locò, causa est, quia ibi narrantur ea, quæ peracta sunt Jerosolymis, ubi Jacobus erat Episcopus. Secus in alijs, sic idem Paulus in eadem Epist: ad Gal: 1. narrat se post annos tres ascendisse Jerosolymam videre Petrum, non dicit Jacobum, & si fuerat tunc loci Antistes. Et ideo Ambrosius in hæc verba ait: *Dignum erat, ut videret Petrum, quia primus erat inter Apostolos, cui delegaverat Salvator curam Ecclesiarum: & Hieron: Venit Paulus videre Petrum non discendi studio, sed honoris priori Apostolo deferendi.*

Objic: 4. Ex Patribus: S. Cyprianus lib: 2. de unitate Eccl: dicit: Hoc erant utiq; cæteri Apostoli, quod fuit & Petrus, pari consortio præditi honoris & potestatis. S. Clemens apud Eusebium lib: 2. Historiæ cap: 1. dicit: Petrus, Jacobus, & Joannes post Ascensionem Salvatoris, quamvis fuerint ab ipso omnibus pene prælati; tamen non sibi vindicabant primatus gloriam,

sed Jacobum qui vocabatur justus, Apostolorum Episcopum statuerunt; ergo.

Resp: Ad S. Cyprianum; hic dicit cæteros Apostolos fuisse pares Petro consortio honoris & potestatis in ratione Apostolatûs, non autem in ratione Episcopatûs, & Officij pastoralis. Vel quò ad amplitudinem rerum gerendarum, non quò ad modum agendi. Apostoli omnia potuerunt, quæ potuit Petrus, sed subordinati Petro: Petrus omnia poterat, ut Pastor ordinarius, & jure suo, alteri non subordinatus. *Ad S. Clementem.* Ejus textum interpolatum esse apud Eusebium communiter docent Critici; nam in Codicibus, quos vidit & contulit *Valesius*, non legitur *primatus* nec *Apostolorum* sed *jerusalimorum Episcopum*. Similiter legitur apud *Nicephorum* lib: 2. cap: 3.

Petes 1. An sustineri potest propositio: *Inter Petrum & Paulum fuit omnimoda æqualitas primatûs?*

Resp; Negative. Præter enim probationes, quæ militant sicut de cæteris Apostolis ita & de Paulo, Innocentius X. hanc propositionem: *S. Petrus & S. Pau-*

Paulus sunt duo Ecclesiae Principes, qui unum efficiunt, vel sunt duo Ecclesiae Catholicae Coriphæi, summa inter se unitate conjuncti; vel sunt geminus Ecclesiae vertex, qui in unum divinissime coaluerunt, vel sunt duo summi Ecclesiae Pastores, ac Præsides qui unicum Caput constituunt, ita explicatam, ut ponat omnem æqualitatem inter S. Petrum & S. Paulum, sine subordinatione & subjectione S. Pauli ad S. Petrum in potestate suprema & regimine universalis Ecclesiae, hæreticam censuit & declaravit.

Petes 2. Cur S. Aug: in 1. argumento citatus locum Math: 16. super hanc petram plurib9 in locis ad Christum retulerit?

Respondent Quidam, id contigisse ex ignorantia linguæ Hebraicæ seu Syriacæ. Ratio enim, quam loco citato Retract: adfert S. Doctor cur hæc verba *super hanc petram*, ad Christum non ad Petrum retulerit, est; quia, ait, *non est dictum illi (Petro) tu es petra, sed tu es Petrus, petra autem erat Christus, existimans Cephas, non significare petram, sed aliquid derivatum a petra, quasi petri-*

num, aut faxeum a saxo, hacq; de causa latinum Interpretem vertisse, *Tu es Petrus*, & non, *tu es petra*, & quia Ecclesia supra petram, & non super aliquid petrinum erat ædificanda, existimavit S. August: per illam petram non intelligi Petrum, sed Christum, de quo dictum; *Petra erat Christus*. Si ergo S. Doctor advertisset (ajunt) *Cephas* nihil aliud significare quam petram, aut faxum, & Christum dixisse, *Tu es petra*, & *super hanc* &c. procul dubio nostram expositionem ubiq; secutus fuisset.

Respondet Natalis Alex: Dissert: 4. Sæculi I. §. 3. Objic. 1. Augustinum hæc verba: Super hanc petram &c. retulisse ad Xtum, quia contra Donatistas agebat, qui Sacramentorum vim in Ministrorum sanctitate collocabant; Unde timens ne si Ecclesia in Petro fundata diceretur, homines de sanctitate Ministrorum præfumerent, ac super eos spirituale fundarent ædificium, ideo totam fundamenti rationem ad Xtum revocavit. Hoc scrupulo adductum August. eam amplexum fuisse interpretationem constat ex loco laudato Serm:

13. de Verbis Domini, ubi post verba recensita subjungit: *Nam volentes homines ædificari super homines, dicebant: Ego quidem sum Pauli, ego autem Apollo, ego vero Cepha, ipse est Petrus, & alii quidem volebant ædificari super Petrum, sed super petram, ego autem sum Christi.* Quamobrem addit paulò post, laudatus *Alexan:* Illa S. Augustini expositio eò tantum spectat, nè existimemus, Petrum propria virtute, & seorsim a Xto Ecclesiam ædificasse; Christum itaq; causam, principem & præcipuum in ædificatione Ecclesiæ fundamentum Augustinus agnoscit, sed S. Petrum fundamentum esse a Xto secundum præcipui ministerii ratione, minimè diffitetur. Unde hoc ipso S. D. Petrum *primum & præcipuum Apostolorum* vocat, & ejus *Apostolatûs principatum* verbis magnificis commendat. Hæc ille.

Petes 3. Cur non sufficit Ecclesiæ ut suum principale veneretur caput Christum?

Resp: Id non sufficere, quia licet Xtus semper Sacramenta perficiat & ministret juxta illud Joan. 1. *Hic est qui bapti-*

baptizat. Cum tamen suam præsentiam corporaliter visibilem substracturus esset, constituit Ministros, qui Sacramenta visibiliter ministrarent; hinc similiter oportuit, ut aliquem constitueret, qui loco sui universalis Ecclesiæ curam gereret.



ARTICULUS II.

Num S. Petrus suam Romæ fixerit sedem?

Quoniam jus successionis Pontificum Rom: in eo fundatur, quod Petrus sedem suam Romæ fixerit, atq; ibidem usq; ad mortem sederit, quæstionem examinandam suscipimus: *Num S. Petrus &c.* Hæretici, qui omnia tentant, ut Romani Pontificis dignitatem depri- mant, in dubium revocant id, quod jam ab annis 1500. usq; ad prætensæ re- formationis tempora, constantissime a toto orbe creditum est, S. Petrum Epi- scopum & Romæ fuisse, & ibidem per crucis martyrium Spiritum Domino reddidisse. *Udalricus Velenus* Luthera- nus secutus *Gulelmum* quendam *Viclefi* Præ-

Præceptorem, librum integrum hac de re edidit, in quo 18. persuasionibus (sic eas vocat) demonstrasse se putat, Petrum nunquam fuisse Romæ, & tam Petrum quam Paulum Jerosolymis esse occisos; *Velenum* sequitur *Illyricus* item Lutheranus. *Calvinus* lib: 4. Instit: cap: 6. §. 15. postquam rem totam esse dubiam ostendere est conatus, concludit ita: *Tamen propter Scriptorum consensum non pugno, quin illic mortuus fuerit, sed Episcopum fuisse præsertim longo tempore, persuaderi nequeo.* Similia habent *Magdeburgenses Centur.* 1. lib. 2. c. 10.

Ut Calvinii astutiam cognoscas, observandum quatuor esse, quæ a Sectariis in dubium revocantur. 1. An Petrus fuerit Romæ. 2. An sit mortuus Romæ. 3. An fuerit Episcopus Romæ. 4. An Romanum Pontificatum semel susceptum nunquam mutaverit? Quia ex his quatuor, ultimum sufficit ad Romani Pontificis primatum constituendum, Calvinus de prioribus tribus non adeo sollicitus, quartum audacter negat. Nam *primum* neq; sufficere, neq; requiri planum est, cum multi veniant Romam,

mam, qui tamen Romani Pontifices non evadunt, & multi Romani Pontifices nunquam fuerunt Romæ, ut Clemens V. Joannes XXII. &c. qui in Galliis morati sunt. *Alterum* neq; requiri, neq; sufficere in confesso est, patet in iis, qui extra urbem mortui sunt, ut S. Clemens in Ponto & alij alibi. *Tertium* autem requiri, sed non sufficere ex eo colligitur, quod ipse Petrus Episcopus Antiochiæ fuit, tamen quoniam sedem aliò transtulit, nunquam deinceps locum primum Episcopi Antiocheni habuerunt. Igitur *quartum* & requiritur & sufficit. Quia tamen omnia vera sunt, singula breviter probabimus.

Dico 1. Sanctus Petrus fuit Romæ.

Prob: Ipse Petrus in sua Epist: 1. circa finem non obscure innuit se Romæ fuisse, dum ait: *Salutant vos Ecclesie in Babylone collectæ, & Marcus filius meus.* Hanc namq; Epistolam Româ, quam vocat Babylon, scriptam esse a Petro testis est Papias Apostolorum Discipulus apud Eusebium lib: 2. Hist: cap: 15. *Papias*, ait Eusebius, & hoc dicit, quod Petrus in 1. Epistola sua, quam de Urbe
Roma

Roma scripsit, meminerit Marci, in qua tropice Romam Babylona nominavit. Testis est etiam S. Hieronymus lib: de Viris illust: in Marco. Petrus in Epistola 1. sub nomine Babylonis figuraliter Romam significans. Eodem modô exponunt ii, qui Commentaria in hanc Epistolam ediderunt, ut Oecumenius, Beda, & alii. Præterea S. Joannes in Apocal: passim Romam vocat Babylonem, maxime cap: 17. ubi dicitur Babylon magna sedere supra septem montes. Tandem Sectarii cum Luthero passim vocant Romam Babylonem in Apocalipsi descriptam.

Prob: 2. Idem probatur ex Actibus cap: ult: & ex Epist: ad Rom: ex quibus locis apertè colligitur, ante adventum Pauli Romam, multos fuisse Christianos, imo Ecclesiam amplam; atqui hæc Ecclesia non ab alio, quam a Petro fundata est. Hoc namq; testes omni exceptione majores testantur; Irenæus lib: 3. cap: 3. dicit: Romanam Ecclesiam a Petro, & Paulo fundatam, id est, primum a Petro, deinde amborum prædicatione. Eusebius lib: 2. Hist: cap: 14. Salutaris prædicationis verbo PRIMUS in urbe

urbe Roma Evangelii sui clavibus januam Regni cœlestis aperuit. Paulus Orosius. lib: 7. Hist: cap: 6. Exordio Regni Claudii Petrus . . . Romam venit . . . atq; exinde (nota) Christiani Romæ esse cœperunt. Epiphanius hæc: 27. Primi in Roma fuerunt Petrus & Paulus. Theodoretus, in cap: 1. ad Rom: Primus eis (Romanis, quorum fidem annuntiari in universo mundo ad ipsos scribit Paulus, qui ad illud tempus nondum Romæ fuerat) magnus Petrus doctrinam Evangelicam præbuit; ergo.

Dico 2. Sanctum Petrum Romæ mortuum esse.

Prob: Petrum & Paulum Romæ mortem oppetiisse testantur eorum sepulchra. Nam si Romæ mortui non sunt, quis eorum corpora Romam detulit? Unde, quando, & quibus testibus detulit? Si dicant Sectarii eorum corpora Romæ non esse, ubi ergo sunt? Certe nusquam alibi esse dicuntur. Aliorum Sanctorum corpora diligentissimè sunt servata, Summorum Apostolorum corpora neglecta esse, quis credet? Hinc Eusebius lib: 2. Hist: cap: 25. ait: Horum testimonium (mortis SS. Petri & Pau-

Pauli Romæ) *quærere extrinsecus superfluum puto, cum rem gestam insignia usq; in hodiernum, & splendidissima eorum monumenta testentur.* Deinde testatur hoc idem unanimis consensus orbis terrarum; tandem hoc convincunt testimonia Patrum Græcorum & Latinorum: Dionisius Corinthius, qui 100. annis ab obitu Apostolorum vixit, cum Romæ esset, ut Eusebius mox cit: *Ambo in hac urbe simul docentes, etiam Martyrio pariter uno eodemq; tempore coronati sunt.* Similia habent alij.

Dico. 3. Petrum Romæ usq; ad mortem Episcopum fuisse.

Prob. Petrus fuit Episcopus usq; ad mortem; atqui non Antiochiæ; nam Petrum continuo non mansisse Antiochiæ Antiocheni ipsi testantur, & consuetudo evincit, quæ nunquam tribuit primum locum Episcopo Antiocheno; ergo fuit Romæ Episcopus & quidem ad mortem. *Primam partem consequi: juadet ipsa dignitas Rom. Ecclesiæ;* semper enim consensû omnium habita est prima vel ipso Calvinô teste; non potest autem ulla ratio reddi
hujus

hujus excellentiæ, nisi quia Princeps Apostolorum, illius Ecclesiæ proprius Pastor & Episcopus fuit. Secunda pars sequitur ex conclusione. 2. Num ergo dicemus Petrum non fuisse ullius loci Episcopum?

Sed Adversarii hoc dicere non possunt, quippe qui volunt Petrum non fuisse Episcopum universalis Ecclesiæ, sed alicujus tantum particularis, sicut Joannes Ephesinæ, Jacobus Jerosolimitanæ. Dicant igitur, ubi fuerit Episcopus Petrus; vel si fuit Episcopus Romæ, & postea mutavit sedem, dicant, si possunt, quò eam transtulerit? Accedit testimonium & consensus omnium veterum, quibus Calvinus tenetur credere, si constans esse velit, ipse enim dicit: se propter consensum scriptorum nolle pugnare, quin Petrus Romæ sit mortuus; cum ergo iidem Scriptores summo consensu dicant, Petrum Romæ fuisse Episcopum; & nemo veterum id unquam negaverit, cur nequit persuaderi Petrum Romæ Episcopatum gessisse. Audiat S. Epiphan: Hær. 27. *Episcoporum, inquit, in Roma successio hanc*

consequentiam habuit, Petrus, & Paulus, Linus, Cletus, Clemens, Evaristus, Alaxander. Sulpitium lib: 2. S. Hist. Invaluerat apud urbem Divina religio, Petró Episcopatum gerente. Augustinum lib: 2. cap. 51. contra literas Petiliani. Cathedra tibi quid fecit Ecclesiæ Romanæ, in qua Petrus sedit, & in qua nunc Anastasius sedet. Concil: Ephes. 1. tomo 2. c. 16. ubi vocatur Cælestinus. Ordinarius successor, & Vicarius B. Petri Apostolorum Principis. Idem habent quatuor priora Concilia, omnesq; SS. Patres.

Objic. 1. contra 1. Concl. 1. Authores propugnantes Petrum venisse Romam inter se dissident; ergo non sunt fide digni. *Prob. Ant:* Orosius scribit venisse in exordio Regni Claudii. Hieronymo tenet hoc contigisse Anno secundo Claudii. 2. Si venit Romam, id factum est elapsis 18. annis a passione Domini; tunc autem Petrus erat in Judæa, ut constat Act: 15. Sic refert S. Hier. in cap. 2. ad Gal. Nam Paulus post annos tres a conversione sua venit in Jerusalem videre Petrum ad Gal.

Gal. 1. Deinde post annos 14. rediit in Jerusalem ad Concilium ad Gal. 2. quibus si addas unum annum, qui fluxit a passione Domini, ad conversionem Pauli, conficient annos 18. Tum quia dicitur Petrus quinq; annis fuisse in Judæa, deinde septem annis Antiochiæ, multis vero annis in Ponto, Galatia, Capadocia, Asia, Bythinia, hinc saltem anni 18. fluxerunt, antequam veniret Romam; ergo Apostolus Petrus Romam non appulit, nisi post annum nonum Imperii Claudii, qui erat a Passione Domini 18. Tum Petrus sedit annis 25. Romæ, ut ex Damaso, Eusebio, & Hieronymo tradunt Catholici; ergo supervixit ad annum 43. a passione Domini; illo autem anno post Neronem, Galbam, Othonem, & Vitellium clavum Imperii tenebat Vespasianus, qui mitissimus a Christianorum sanguine abstinuit, ut colligitur ex Tertul. Apol. c. 5. ergo. 3. Petrus non potuit venire Romam usq; ad Annum Claudij nonum, sed neq; postea potuit; siquidem Claudius, qui Judæos pelli ex Urbe jussit, prohibuit proculdubio in Ur-

Urbem recipi. 4. Paulus Roma scripsit Epistolam ad Galatas, ad Ephesios, ad Colossenses, & tamen ubiq; altum silentium est de Petro, quod non leve argumentum est Petrum tunc non fuisse Romæ. 5. Scriptura videtur innuere SS. Apostolos non a Romanis, sed a scribis & Pharisæis esse trucidatos, sic enim ait Xtus Math: 23. *Ecce ego mitto ad vos Prophetas, & Sapientes, & Scribas & ex illis occidetis, & crucifigetis, & ex illis flagelabitis in Synagogis vestris.* In quem locum S. Chrysostomus intelligit Apostolos, & qui cum Apostolis fuerunt; ergo.

Resp. dist. Ant. Dissident quoad substantiam, nego. quoad circumstantias, conc. Patebit ex dicendis. Ad instantias dico: Hujusmodi argumenta ex Chronologia petita parum urgere, cum sæpius Authores in hoc non conveniant, necesse exquirendam in determinanda temporum Epocha proportionem arithmeticam, sed sufficere geometricam. Neq; enim modus eventûs, sed potius factum attendendum est, inquit V. Bellarminus lib. 2. de Rom:

Pontif. cap. 5. Cum igitur experientia probetur Romanorum Pontificum B. Petri, sine interruptione successio, & hoc adstruant nedum priorum sæculorum Patres, sed & Apostolorum Discipuli, supputatio ætatum citra dubium huic traditioni debet cedere, quippe quæ ab ipsa superetur. Nec mirum, certum est de fide, vg. Christum esse pro nobis mortuum, tamen non sunt convenientia Authorum testimonia, qua ætate hoc contingerit; quidam enim ætatis ejus 30. alii 33. contigisse putant. Ergo.

Ad 1. Quod Petrus venerit Romam indubitatum est; an annô primo vel secundo Claudij? vix discrimen intercedit, cum sub finem prioris anni, inchoato posteriori potuerit illuc venire. Cæterum Authores magna fide digni ut S. Hieron. *Ado* propugnant Petrum Romam venisse anno 2. Claudii ab his non diffidet *Orosius* lib. 7.

Ad 2. Vel sola historiæ relatio componit & concordat omnia ait V. Bellar. Quod sic ostenditur: Mansit ergo Petrus 1. quinq; circiter annis in Judæa,

dæa, quò tempore Paulus tribus a sua conversione elapsis annis, potuit Petrum Jerosolymis convenire; annò vero quinto a Passione Domini Petrus Antiochiam venit, ut scribit *Eusebius*.

2. Septem annis Ecclesiam rexit Antiochenam; neq; existimandum, ibi sine interruptione habitasse, sed his temporibus peragrasse Pontum, Asiam, &c. ubi novas erexit Ecclesias. Absoluto septenniò Evodius in sede Antiochena collocavit, tum annò Xti a passione undecimo rediit Jerosolymam, ubi ab Herode conjectus in vincula Act. 12. sed solutus ab Angelo petiit Romam, & ibi suam fixit sedem, quam, & annis 25. tenuit. 3. Neq; etiam toto tempore Romæ commoratus est; sed elapsis circiter septem annis, expulsis Urbe Judæis. Act. 18. Anno nono Claudii Petrus iterum reversus est Jerosolymam quod incidit in Annum 18. post passionem Domini. Tunc Antiocheni certiores facti, Petrum Jerosolymis adesse, miserunt ad eum Paulum & Barnabam, & tunc celebratum est Concilium Jerosolymitanum, mortuo autem

Claudio Petrus rediit Romam; ubi & Martyrio ultimum clausit diem.

Ad 3 Petrus non venit Romam anno nono Claudii, sed tunc ab urbe ea discessit; at mortuo Claudio illuc rediit regnante Nerone, qui Judæos ibidem tolerabat, quod colligitur ex cap. 28. Act. ubi legitur Paulum Romæ Judæis Xtum annuntiasse.

Ad 4. Res non postulabat Paulum in præfatis Epistolis loqui de Petro, cum Paulus esset Gentium Doctor, Petrus Judæorum, & unusquisq; perfectè suam adimplebat Provinciam. Ergo cum Paulus ad Coloss. cap. ult. ait *Hi soli sunt adjutores mei in regno Dei.* Tum & 2. ad Timot. 4. *Lucas est mecum solus,* loquitur solum de domesticis suis, qui ei ministrare solebant. Neq; verò felicius est Calvinus opponendo ista 2. Timot. 4. *Nemo mihi adstitit. sed omnes me dereliquerunt,* & tamen cum eo erat Lucas. De quibus ergo conqueritur? Certe de quibusdam nobilibus Romanis, qui illum apud Cæsarem adjuvare poterant, sed timentes Principem id non fecerunt. Igitur de Petro sermonem

nem non instituit, qui cum in eadem causa damnationis propter religionem esset apud Tyrannum, non poterat eum in hoc adjuvare. Aliunde ex argumento negativo nihil concluditur.

Ad 5. Evangelium non dicit omnes Apostolos; sufficit ergo ad veritatem textus Jacobum & Stephanum occisos, Petrum vero & Paulum in vinculis Hierosolymis fuisse.

Dicit Velenus. Petrus Epistolam suam (de qua in prob:) scripsit ex Babylone; ergo ex Assyria, vel Ægypto, non ex Italia. *Consequ. patet:* Babylon enim duplex fuit, una apud Assyrios, altera in Ægypto, quæ nunc Cayrum vocatur.

Resp. Petrus non de Babylone propriè dicta, sed de ea, quæ figurate Babylon dicitur in Apocalypsi, loquitur, scilicet quæ ibidem habere dicitur imperium super Reges terræ; at id neq; Babyloni Ægypti, neq; Assyriæ protunc potuit convenire, sed figuratæ scilicet Urbi Romanæ.

Oppones contra 3. Concl. Esto Petrus Romam venerit, eam tamen Ecclesiam

non fundavit; ergo. *Prob. Ant.* Sub Tiberio qui fuit Prædeceſſor Claudii, ſub quo dicimus Petrum veniſſe Romam, erant jam ibi Chriſtiani; ergo. *Prob. Ant.* Ex Oroſio qui lib. 7. cap. 4. refert; Senatum regnante Tiberiô edictô conſtituiſſe *exterminandos urbe Chriſtianos*; ergo.

Reſp: Laudatum ab Oroſio edictum, ſpectabat duntaxat Chriſtianos, quos negotiorum cauſa Romam adventare contingebat, nullos enim tunc Romæ moratos fuiſſe, teſtatur ipſe Oroſius cap: 4.

Inſtabis: Lib: 1. Recognitionum S. Clementis legitur S. Barnabam tempore Tiberii Romæ Evangelium prædicafſe; ergo.

Reſp: Libros præfatos eſſe Apocryphos & nullius ponderis. Aliunde conſtat, quod antequam Petrus cæleſti viſione admonitus fuiſſet Act: 10. de fide gentibus prædicanda, nullus Apoſtolorum id muneris obire auſus fuerit; ex eo autem tempore Barnabas Paulo; individuus comes adhæſit ſaltem uſq
ad

ad Concilium Jerosolymitanum, quod annô nono Claudii contigit.



ARTICULUS III.

An Pontifices Romani fuerint & adhuc sint verè Successores S. Petri in primatu, & supremo totius Ecclesiæ regimine, & sint Vicarii Christi?

CUM Christus Ecclesiam suam non instituerit pro illo temporis intervallo quô vixit S. Petrus, sed duraturam usq; ad finem mundi, consequenter debuit ipsi providere de aliquo capite pro omni tempore; hinc fit, quod S. Petrus debeat habere Successores in suo primatu, seu universali munere pastorali; siquidem Ecclesia non minùs indiget, & indigebit supremo ac universali Rectore, cum semper possint oriri hæreses compescendæ, Schismata tollenda, controversiæ definiendæ, quæ sine supremo Judice decidi nequeunt. Aliunde Ecclesia debet regi post tempora Christi & Petri; quomodo regebatur ab initio; alias non esset nunc

ea-

eadem, ac olim. Cum ergò in Ecclesia temporibus Christi & Petri fuerit regimen Monarchicum; fit consequens, ut Petrus in suo munere cum eadem potestate habeat Successores. Hi autem Successores qui esse possunt, nisi Romani Pontifices?

Dico: Romani Pontifices fuerunt, & adhuc sunt Successores S. Petri in Primatu, & supremo Pontificatu totius Ecclesiæ Christi.

Prob: 1. Debuit semper & adhuc debet aliquis succedere Petro in supremo totius Ecclesiæ regimine; sed hactenus non successit, nec hodie succedit alius, quàm Romani Pontifices; ergo. *Major. negat Calvinus lib: 4 Instit: cap: 6. §. 8. Verum. inquit, ut de Petro illis concedam, quod petunt; non est tamen causa, cur ex singulari exemplo universalem faciant regulam, & quod semel factum fuit, ad perpetuitatem trahant. Et §. 11. Nunquàm - - - obtinebunt, sic constitutum in Petro primatum, ut perpetua successione semper maneret; unde tamen evincent, sedem Romæ ita collocatam, ut quicumq; sit urbis illius Episcopus, orbi universo præsideat?*

Er-

Ergo *prob: maj: 1.* Quam diu durat ædificium Ecclesiæ, tamdiu durare debet ejus fundamentum, super quod Christus Ecclesiam ædificavit, nullis inferni machinis subruendum; atqui fundamentum supra quod Christus Ecclesiam ædificavit, est Petrus; ergò cum Ecclesia sit immobiliter duratura usq; ad finem mundi; etiam ejus fundamentum, quod est Petrus, tamdiu durabit; atqui S. Petrus non durat tamdiu ratione personæ suæ; ergo ratione Successorum suorum, in quibus Petri Officium & Pontificatus residet. 2. Ex unitate Ecclesiæ. Nam Ecclesia est una & eadem omni tempore; ergò eadem forma regiminis in ea debet permanere; atqui tempore Apostolorum annuente Calvinô unus erat supremus Rector Caput & Primas Ecclesiæ, nempe Petrus; ergo. Et modò, 3. Ex Verbis Domini *Joan: ult: Pasce oves meas:* ex quo sic: Officium Pastoris est ordinarium & perpetuum, siquidem ex natura rei, tam diu durare debet Officium Pastoris, quamdiu durat ovile; atqui ovile manet & manebit usq; ad consumma-

tio-

tionem sæculi ; ergo & Successores Petri in summo illo pastoralis Officio manere necesse est. 4. Ecclesia est unum Corpus ; ergo suum debet habere caput in terris, atqui nullum aliud caput assignari potest præter Petrum, nec debet moriente Petro corpus Ecclesiæ manere acephalum, hoc est sine capite, ergo necesse est aliquem illi succedere. Nec.

Dicas: Illud caput esse Christum. Nam
 1. Ecclesia est Corpus visibile, ergo requirit etiam tale caput, Christus autem est caput invisibile. 2. Ecclesia exposcit tale caput, quale describitur 1. Corint: 12. Ubi postquam Paulus dixisset Ecclesiam esse unum corpus, subiecit: *Non potest caput dicere pedibus, non estis mihi necessarii*, quod certò non convenit Christo, Ipse enim potest dicere nobis omnibus, non estis mihi necessarii. 5. *Major: Ppalis prob:* In veteri testamento successio erat Summorum Pontificum, nam Aaroni successit Eleazarus. Num: 20. Eleazaro Phinees Jud: 20. sic de cæteris, at Sacerdotium

tium testamenti Veteris erat figura Sacerdotii novi testamenti, ergo.

Minor vero principalis prob: 1. negativè. Quia nullus alius unquam agnitus pro Successore S. Petri in regimine totius Ecclesiæ, quam Romani Pontifices. Quavis enim Episcopi Antiocheni successerint S. Petro in Episcopatu Antiocheno, non tamen in supremo Pontificatu totius Ecclesiæ, quia etsi fuerit S. Petrus particularis Episcopus Antiochenus, tamen Pontificatum ibi non fixit, sed postquam Evodium in Sede Antiochena constituit, & sedem fixit Romæ, secum transtulit Pontificatum supremum, eumq; reliquit in Sede Romana, quam evexit ad Pontificiam, & supremam universalis Ecclesiæ dignitatem. 2. *eadem min: prob: positivè.* Ille Petro succedit in Pontificatu seu supremo regimine, qui ei succedit in illa Cathedra, quam Petrus ad supremum Pontificatum evexit, & quam Petrus moriens tenuit; sed in hac Cathedra succedunt, semperq; successerunt Romani Pontifices, quia S. Petrus in fine vitæ fuit Episcopus particularis Romæ,

mæ, non Antiochiæ aut alibi, ut jam dictum, & simul universalis Pontifex totius Ecclesiæ; nam ante mortem nunquam deposuit Pontificatum, seu supremum universalis Ecclesiæ regimen. Et causa hæc fuit, hoc motivum, quod Episcopo Rom: semper primas dederit antiquitas, non Antiocheno, non Alexandrino, quæ duæ Ecclesiæ, utpote a S. Petro fundatæ semper habitæ sunt *Patriarchales* in honorem S. Petri, ad quam dignitatem successû temporis nempe in Concilio Nicæno I. evecta est Jerosolimitana, tandem Constantinopolitana ex quodam privilegio, ut infra dicetur.

Prob: 2. Ex variis titulis, qui solis Romanis Pontificibus a veneranda antiquitate attributi sunt. Nam Concilium gen: II. CP. I. in Epistola ad Damasum apud Theodoret: lib: 5. Hist: cap: 9. dicit se convenisse ex mandato summi Pontificis, ibiq; Patres fatentur, Ecclesiam Romanam Caput esse, se autem membra. III. Concilium Ephesinum I. dicit se deponere Nestorium ex mandato Cælestini Papæ Romani. Idem
Con-

Concilium dicit se reservasse dubiam causam Joannis Antiocheni judicio Cælestini. IV. Concil: gen: Calcedon: Act: 1. 2. 3. vocat Leonem *Universalis Ecclesiæ Pontificem*. Et in Epist: ad Leonem: *Et post hæc omnia insuper (inquiunt Patres) & contra ipsum, cui Vineæ custodia a Salvatore commissa est extendit insaniam, id est contra tuam quoq; Apostolicam Sanctitatem*. Tandem rogantes Synodi confirmationem: *Tuis, ajunt, decretis nostrum honora judicium, & sicut nos Capiti in bonis adjecimus consonantiam, sic & Summitas tua filiis, quod decet, adimpleat*. Dicitur *Pater Patrum* a Stephano Episcopo Carthag: in Epist: ad Damasum, nomine trium Conciliorum Africæ. Appellatur *Pontifex Christianorum* apud Euseb: in chronico ad Annum 44. Nominatur *Princeps Sacerdotum* in Epist: Valentiniani ad Theodosium. Dicitur *Pastor Ovis Dominici* a S. Ambr: Epist: 81. ad Siricium Papam. Hinc I. Gener: Concili: Nicænum Arabico Can: 39. juxta Pisani editionem loquitur: *Veneramur secundum Scripturas, & Canonum definitionem, sanctissimum Romanæ anti-*

*antiquaq; Ecclesiæ Episcopum, primum esse
& maximum omnium Episcoporum.*

*Prob: 3. Ex specialibus privilegiis
Romani Pontificis. 1. Quod omnes E-
piscopi ad Romanum Pontificem possint
appellare, ab illius autem sententia nul-
la amplius concedatur appellatio. Hæc
constant ex Concilio Sardicensi can: 4.
& ante hoc Concilium semper erat mos
& consuetudo ita appellandi, ut pluri-
bus exemplis demonstrat V. Bellarminus
promanavitq; ex Traditione Apostolica,
ut insinuat Theodoretus Epist: ad Rena-
num Presbyterum; qui Theodoretus
ipse a Latrocinio Ephesino appellavit
ad Summum Pontificem, a quo suæ Se-
di restitutus fuit. 2. Quod Romanus
Pontifex a nemine possit judicari, jux-
ta illud tritum: *Prima sedes a nemine
judicatur*, quæ semper Romæ existere a-
gnita est. Unde Concil: Rom: sub A-
driano II. dicit: *Romanum Pontificem de
omnium Ecclesiarum Præsulibus judicasse
legimus, de eo vero quemquam judicasse non
legimus.* 3. Quod omnes Christiani in
dissensionibus fidei teneantur recurrere
ad Romanum Pontificem, ejusq; adhæ-
rere*

rere sententiæ, ut S. Patres passim affirmant, & praxis ipsa docet. Unde etiam Romani Pontifices damnarunt exortas jam in primitiva Ecclesia hæreses *Marcionistarum*, *Pelagianorum*, *Semipelagianorum* &c. Et præsiderunt per se vel suos Legatos Conciliis generalibus nullo reclamante, eaq; approbaverunt; è contra Concilia illegitima reprobaverunt; hæc verò adeo manifesta sunt, ut ne Sectarii ipsi ea valeant negare. 4. Quod Romani Pontifices statim à morte S. Petri pro aliis nationibus ordinarint Episcopos; alios ordinatos confirmaverint, alios justis ex causis deposuerint; prout Nicolaus Papa I. in Epist: ad Michaellem enarrat, octo Patriarchas Constantinopolitanos Authoritate Romani Pontificis depositos esse 5. Potestas legislativa in universam Ecclesiam semper in Romano Pontifice fuit ut patet ex toto Corpore juris Canonici, innumeris Canonibus, ac legibus pro tota & universali Ecclesia latis, quæ omnia clarè probant Romanum Pontificem esse Supremum Pastorem, Rectorem & Caput totius Ecclesiæ.

Obj: 1.

Objic: 1. Ex facto Petri, quod Petrus Romæ sederit, & Pontificatum gesserit, inferri non potest, quod Romanus Pontifex sit ejus Successor in Primatu & Pontificatu; ergo. *Ant. patet.* A fortiori enim sedes Apostolica Christianorum Jerosolymis esse deberet, quia ibi Christus Summus Pontifex obiit.

Resp: dist: Ant: Ex facto hoc præcise &c. *Conc: ant:* Sed quia Romanus Pontifex fuit, nec Sedem Roma unquam aliò transtulit, imo ex intentione & proposito ibi fixit; *nego ant.* Porro hoc constat ex eo, quia S. *Marcellus* Papa in Epist: ad Antiochenos scribit; *subente Domino Petrum Antiochiâ Sedem Papalem transtulisse Romam.* Et Concil: Later: sub Innocentio III. can: 5. Ecclesiam Rom. appellat: *disponente Domino fidelium omnium Matrem & Magistram.* Ex quibus sequitur: Supremum Pontificatum jure Divino, & ex voluntate Christi annexum esse Episcopatui Romano; & vel maxime, quia jure Divino seu ex ordinatione Xti S. Petrus in Papatu debuit habere Successores; certum est autem, nullum hæcenus alium Petro
suc-

successisse, in supremo illo & universali munere, quam Episcopos Romanos. Christus autem non fixit sedem Jerosolymis, nec in ullo particulari loco.

Dices Successio Roman: Pontificum non est adeo certa, ut reddatur indubia; ergo ex eo quod S. Petrus Rom. Pontifex fuit &c. *Prob: Ant: 1.* Nescitur, quis fuit immediatus Successor S. Petri, quia alii ponunt Linum, alij Clementem. *2.* Quia multi Rom: Pontifices fuerunt simoniace, & invalidè electi, aut intrusi. *3.* Quia per 74. annos, quibus Romanus Pontifex residebat Avenione in Gallis, videlicet a Clemente V. ad Gregorium XI. Romæ nullus fuit Episcopus. *4.* Quia subinde duo aut tres simul fuerunt Summi Pontifices, ut contigit in Schismate magno, quod contigit circa annum 1380. & duravit usq; ad Concilium Constantiense fere per 40. annos, in quo electo Martinô V. sublatum est; ergo.

Resp; nego ant: Ad prob: 1. Indubium est apud omnes Catholicos Scriptores, quod S. Petrus in Primatu habuerit Successores, & quidem Romanos

T

Pon-

Pontifices, in hoc enim omnes conveniunt; sed tantum de tempore controversatur, utrum prior Clemente fuerit Linus? Quæ lis tanta non est, ut veritatem successionis tollat.

Ad 2. Legitima Ecclesiæ acceptatione sæpius tales facti sunt veri Pontifices, ut contigit in Vigilio & aliis hujusmodi. Acceptatio si deerat, Sedes Pontificia fuit vacua usq; ad novam electionem. Sed quoniam Ecclesia judicaverat melius sibi esse, habere Caput, etsi non canonicè institutum, quam nullum, communiter talem, sive intrusum, sive male electum Pontificem, ut legitimum colere solebat, supplendo defectus in electione commissos quoad ea, quæ sunt juris Ecclesiastici. *Ad 3.* Pontifices Avenione residentes fuisse veros Episcopos & Pontifices Rom: cum de essentia jurisdictionis Episcopalis; non sit residentia personalis; nec alter interea electus est, & habitus ut Episcopus Rom: quam Pontifex Rom: in Galliis existens. *Ad 4.* In ejusmodi Schismatum casibus, semper fuit unus verus Pontifex, licet non omnibus satis

tis cognitus; Si autem reipsa nullus fuisset verus, sedes Papalis censeretur vacasse. Cæterum non est obligatio obediendi Pontificibus dubiis, nec eorum Acta valent, nisi confirmentur a Successore Pontifice certo.

Instabis 1. Pontifices Romani splendent divitiis, & ingenti incedunt pompâ; ergo non sunt Successores Petri pauperis. 2. Quidam fuerunt valde scelera- ti; ergo iterum non fuerunt Successores S. Petri. 3. Aliqui etiam lapsi sunt in hæ- reses, homo autem hæreticus non potest esse Pastor, & Doctor fidelium; Ergo.

R. Ad 1. Quod splendor divitiarum & epulentia Rom: Pontificum, cum ni- hil sit mali, neq; successionem impedit, neq; officium pastorale variat; imo po- tentia tanti Principis plurimum utilis est ad retundendos Ecclesiæ hostes. Et si- cut Christus ab initio pauperem Eccle- siam defendit mediis supernaturalibus, miraculis, Martyriis &c. ac propagavit, ita postea placuit ipsi, eam defendere & propagare per media naturalia faciendo illam gloriosam, opulentam & poten- tem. *Ad 2.* Sectarii debent ostendere,

ubi Xtus alligarit Officium Pastorale sanctitati personæ; sicut & valorem Sacramentorum probitati Ministri. Hoc quidem docuerunt Donatistæ, tandem Viclefistæ, sed hi semper ea de causa pro hæreticis habiti sunt. Imo Christus Math: 23. hortatur suos, ut quæcunq; mali Superiores super Cathedram Moysis sedentes dixerint, facerent, dummodo eorum opera non imitarentur. Hinc scelerati Pontifices non quidem sunt Successores Petri quoad sanctitatem vitæ, sunt tamen quoad potestatem Papalem. Deinde quid est, quod nobis objiciant Pontificum defectus; cum in tanto numero pauci admodum numerari possint, quibus ipsis plurima affinguntur, ab Oforibus Pontificiæ dignitatis. Insuper de Sectariis, variis delictis inquinatos fuisse aliquos Pont: at contendo hos ipsos meliores fuisse prætenſæ reformationis Authoribus; quia nullus ex his paucis Pontificibus tam infamis fuit ob scelera, sicut Lutherus, Calvinus nec non eorum Sectatores, ut consideranti patet. Cur tot Sanctissimorum Pontificum vitam ad imitandum non pro-

proponunt? At homines miseri delectantur sordib9. Etiam si super Cathedram Petri sedens malus sit, tamen Officium est sanctum, & ipse verus est Petri successor; proinde ratione Officii, quod gerit, recte vocatur *Sanctissimus*. *Ad 3.* Hoc quidem dicunt, sed non probant. Nullum Pontificem hucusq; in hæresim fuisse prolapsum infra dicetur. Data hypothese, quod incidat in notoriam hæresim, sit consequens talem desinere esse Pontificem, & vacare sedem Pontificiam.

Oppones 1. Leo IV. Pontifex petiit ab Imperatore Ludovico Judices, quibus se obtemperaturum promisit. *2.* Adrianus I. Carolo M. Leo VIII. Othoni I. Imperatori concessit jus eligendi Pontificem, & ordinandi sedem Apostolicam. *3.* Varii Pontifices fuerunt depositi, aliiq; substituti ab Imperatoribus, sic Henricus IV. deiecit Benedictum X. & substituit Nicolaum II. Ergo Imperatores habent supremam in Ecclesia potestatem, non autem Rom. Pontific: &c.

Confir: 1. Paulus loquens de potesta-

te Principum sæcularium ait: *Omnis anima potestatibus sublimioribus subdita sit.* Idem Paulus Act. 5 appellavit ad Cæsarem; ergo.

Resp: ad 1. Leo IV. se tantum subjecit iudicio Imperatoris *discretivo*, quod exercetur sine jurisdictione; *non coactivo*: Vel Iudicio Imperatoris tanquam arbitri, non Iudicis. Hoc modò jam olim Symmachus Pontif. suam causam subjecit arbitrio Theodorici Regis, quamvis Arianis, tandem iudicio Synodi *Palmaris*. *Ad 2.* Adrianus & Leo Imperatori solum concesserunt facultatem confirmandi electionem Pontificis per defensionis assistentiam, non per jurisdictionis potestatem; quia tunc sedes Apostolica indigebat præsidio & auxilio Imperatorum; tum contra Longobardos latè per Italiam grassantes; tum contra Græcos & alios Ecclesiæ hostes. *Ad id*, quod additur dicendum, nonnisi in temporalibus permillum fuisse Imperatoribus ordinare Ecclesiæ Romanæ statum. *Ad 3.* Factum malæ fidei non præscribit; hinc mirandum non est, illos Principes, qui attentarunt deponere Pontifices, impiè & iniquè egisse. *Ad*

Ad Conf. 1. Apostolus eo loci non loquitur de potestate sæculari determinate, sed generaliter de omnibus Superioribus, quos inter est Summus Pontifex. *Ad 2.* Apostolum appellasse ad Cæsarem, tanquam ad defensorem contra vexationes Judæorum, non tanquam ad Judicem competentem, hinc appellavit ad Cæsaris Tribunal, tanquam ad asylum, non tanquam ad forum judiciale.

Objic: 2. Ille non habet supra cæteros orbis terrarum Episcopos primatum, cujus autoritas extra suum Patriarchatum non extenditur: atqui autoritas Rom. Pont: extra &c. ergo. *Min. prob.* Concil: Nicænum Can. 6. sic loquitur: *Mos antiquus perduret in Ægypto, ... ita ut Alexandrinus Episcopus horum omnium habeat potestatem, quoniam quidem & Episcopo Romano parilis mos est;* ergo ut valeat comparatio, Episcopus Rom. habet solum in suo Patriarchatu autoritatem, sin minus Patriarcha Alexandrinus, qui cum illo comparatur, universalem sicut Papa haberet.

Resp: 1. ad prob: Concilii Nicæni canonem ne quidem minimum detrahere a pri-

primatu Summi Pontif. ommiffa funt quippe verba præcedentia: *Ecclefia Romana femper habuit primatum &c. Mos antiquus perduret &c.* Sic legitur in prima Collectione Romana, quam ut genuinam, agnovit *Alanus Copus* in Dialogo. Sic habet idem Canon Græcus, qualis lectus & approbatus fuit in Concil: Chalced.

Resp: 2. ad prob: dist: Epifcopus Alexand. parem habet cum Romano potestatem dependenter a Papa. *cont.* independenter ab eo *nego.* Tria distinguenda funt in Summo Pontifice, nimirum dignitas Epifcopalis, dignitas Patriarchalis, dignitas Papalis. Patriarcha Alex. ex privilegio habet quantum ad aliquid fimilem in Patriarchatu fuo potestatem, ficut habet Romanus Pontifex in fuo; nempe quod poffit creare Epifcopos, erigere Diœceſes, Concilia in fuo Patriarchatu adunare. Sequitur ergo ſolummodò Patriarcham Alexandrinum ex vi ſuæ institutionis, & conſentiente S. Petro, qui in totius Régni Ægyptiaci metropoli Alexandria Sedem majorem conſtituendam duxit, af-
fimi-

similari Summo Pontifici, quantum ad Patriarchatum, nusquam quantum ad supremam dignitatem capitis, & primatus universalis Ecclesiæ.

Instabis. Rufinus sic reddit canonem Nicænum: *Et apud Alexandriam, & in Urbe Roma vetusta consuetudo servetur, ut vel illic Ægypti, vel illic suburbicariarum Ecclesiarum sollicitudinem gerat.* Ergo summus Pontifex non nisi in quasdam Urbes suæ Diæcesis habet potestatem, adeoque ad summum est tantum æqualis inter pares.

Resp. 1. Rufinum apud multos malè audire ex eo, quod in Canonem vocem *suburbicariarum* intruserit, quæ non invenitur in vulgari textu Græco & aliis exemplaribus ut Gelasii & Carthagenensibus.

Resp. alii 2. Quod nomine Ecclesiarum suburbicariarum, intelligit Rufinus non solum quamlibet diæcesim, sed & urbes Metropolitanas, atque Provincias Ecclesiasticas Patriarchatui Romano subditas. Addit Christianus Lupus ad hunc Can. *Non vocat de suburbicariis Romani Imperii Provinciis disputare, atque ex*
il-

illis quæreretur naturam suburbicariarum Ecclesiarum, eam jam audivimus non esse aliud, quam eos qui Romæ subditi, id est, qui subditi sunt juri Patriarchico. Ecclesiæ Romanæ, nempe totum Occidentem; Septentrionem Affricam, & Illyricum.

CONSECTARIUM.

Primatus in Ecclesiam universalem jure Divinò competit Romano Pontifici. Quippe Concilia & SS. Patres, dum de primatu Summi Pontificis loquuntur, illam Christi sententiam Math: 16. *Tu es Petrus, & super hanc petram &c.* in prob. afferunt. Et bene, quoniam Petrus vivit in successoribus, juxta jam laudata Concilia & Patres, quorum unus nempe S. Petrus Chrysol. Epist. ad Eutychetem relata 1. P. Concil. Calced. num. 15. hortatur, præfatum Hæresiarcham, ut Romano Pontif: pareat: *Quia, inquit, Petrus in ejus sede vivit, & præsidet, & præstat quærentibus fidei veritatem.* Porro illa præsidentia non habetur ab hominibus, sed a Christo per Petrum incepit, ut docent *Tertulianus, Optatus & Augustinus.* Cæterum juxta regulam S.

Aug.

Aug. quod initium non habet, suam per Apostolos a Christo ducit originem. Teste autem *Optato* lib. 3. contra *Parmenum*. 3. Romani Pontificis non invenitur inter statuta humana initium: *Cathedra unica est - - - sedit prior Petrus, cui successit Linus, Lino Clemens &c.* Si

Dicas 1. Prima dignitas non semel a Canonibus & Conciliis, imo & ab Imperatoribus Catholicis tributa summo Pontifici legitur. Nam in Concilio *Calced.* can. 28. habetur: *Antiquæ Romæ Throno, quod Urbs illa imperet, jure Patres privilegia tribuerunt.* Justinianus *Novella* 10. ait; *Decernimus secundum sacrarum Synodorum decreta, sanctissimum veteris Romæ Episcopum primum esse omnium Sacerdotum.* 2. Vel ipse S. Paulus qui ad *Ephes.* 4. & *1. Corint.* 12. Omnes Hierarchiæ ordines ad Doctores usq; nominat; silet tamen summi Pontif. primatum, quod non est levius argumentum primatum Papæ non esse de jure Divino. 3. Primatus Pontificis Rom. est ex institutione S. Petri, quatenus Romæ potius, quam alibi sedere voluit Apostolus; ergo est de jure humano. Nam.

Resp.

Resp. ad 1. Prima dignitas a Canonibus, Conciliis & Imperatoribus tribuitur Summo Pontif. hoc est; cognoscitur & colitur, non autem datur & confertur. Hinc patet ad edictum Phocæ Imperatoris quô titulum universalis Episcopi, soli Romano Pontifici proprium esse decrevit; hunc enim titulum Phocas primus non attribuit, quasi antè illi non convenisset, sed hoc facto compressit fastum Episcoporum Constantinopolitanorum, qui hoc titulô insigniri ambiebant. Qua de causa S. Greg. M. ex humilitate titulum universalis Episcopi respuebat, scribendo se *Servum Servorum Dei*. *Ad 2.* Apostolus inter Hierarchiæ gradus silet Primatum S. Pontificis, quia supposebat sufficienter omnibus Discipulis Math: 16. & Joan. 21. annuntiatum: nam & ipse cum agnoverat, dum suum cum Petro contulit Evangelium, ne ait ad Gal. 2. *in vanum currerem aut cucurrissem*. Cæterum eo loci omnes Hierarchiæ gradus enumerare non intendit S. Paulus; non enim prophetia, gratia sanitarum, genera linguarum, ut aliquid permanens Ecclesiæ, sicut Diacono-

no-

norum, Presbyterorum, & Episcoporum Ordines, dicenda sunt. *Ad 3.* Hoc solum probat Primatum localem S. Pontificis non esse de jure Divino, bene verò personalem, ita ut ubi adest Papa, ibi citro dubium sit caput Ecclesiæ, primas totius orbis Christiani: Bene notanda hic sunt V. Bellarmini Verba: *Successio*, ait, *Romani Pontificis in Pontificatum Petri ex instituto Christi est; ratio autem successionis, quâ Romanus Pontifex potius, quam Antiochenus, vel aliquis alius succedat, ex facto Petri initium habuit. Successio ergo ipsa ex Christi instituto, & jure Divino est; quia Xtus ipse instituit in Petro Pontificatum duraturum usq; ad finem mundi, & proinde quicumq; Petro succedit, a Xto accipit Pontificatum. At vero, quod Episcopus Rom. quia Episcopus Rom. est, ut sit Xti Successor, ex facto Petri ortum habuit, non ex prima Xti institutione. Nam potuisset Petrus nullam sedem particularem sibi unquam eligere, sicut fecit primis quinque annis; & tunc moriente Petro, non Episcopus Rom. neq; Antiochenus successisset; sed is, quem Ecclesia sibi elegisset. Potuisset quoq; semper manere Antiochiæ, & tunc Antiochenus sine dubio suc-*
ces-

cessisset. Quia vero Romæ sedem fixit, & tenuit usq; ad mortem, inde factum est, ut Rom. Pontifex succedat. Lib. 2. cap. 12.

Petes. Quid censendum de electione S. Pontificis?

Resp. Jure Divino nihil esse determinatum circa modum eligendi, sed relictum esse arbitrio Ecclesiæ; unde fit, quod olim Pontifices diverso modo fuerint electi ac modo. Nunc eliguntur a Cardinalibus, ita ut post Alexandrum III. in unum conspirare debeant duæ tertiæ suffragiorum v.g. ex 60. Cardinalibus 40. consentire debent, ut Pontifex habeatur. Cæterum taliter factæ electioni succedere debet altera scilicet acceptatio totius vel ferme totius Ecclesiæ, quod fit quando vel nemo contradicit electioni, vel tantum pauci, iiq; tam levis Authoritatis, ut prudenter dubitari non possit, quin a reliquis fidelibus approbanda sit. Quæ acceptatio est quasi confirmatio electionis primæ, aut potius altera & absoluta electio, quæ supplet omnem defectum.

Petes. Quo sensû S. Pontifex Universalis dici possit Episcopus?

Resp.

Resp. Romanum Pontificem dico non posse Universalem Episcopum in eo sensu, ut ipse solus sit Episcopus, & nullus alius; bene autem in eo sensu, ut ipse universalem gerat Ecclesiarum curam, nec excludat particulares particularium Episcoporum curas. Vide *Anat.* lib. 6. a. 9. fol. 262.



ARTICULUS IV.

*De Infallibilitate seu inerrantia S. Pontificis
in decidendis questionibus fidei & morum*

Cùm S. Pontifex possit considerari vel ut persona privata, vel ut est publica, & Xti Vicarius; primo modò inerrantiæ privilegium non habere in confesso est. Agimus ergo de illo ut est Doctor publicus, cùm delatâ ipsi ut supremo Controversiarum Judici aliqua causâ in rebus fidei, aut morum, expostulatur sententia juridica servatis servandis ferenda, & hoc est Papam ex Cathedra loqui. Porro ut Papa censeatur ex Cathedra loqui, requiruntur quædam conditiones; nempe quod definiat libere.

rè, & non ex metu aut violentiâ coactus, fuis ad DEUM precibus, præmisso rei definiendæ maturo examine, præhabita consultatione Ecclesiæ suæ Romanæ, nunc Eminent. Cardinalium, qui ad sollicitudinem pro Ecclesiæ regimine adsciti, cum S. Pontifice se habent simul omnes, ut quoddam Concilium, quod pro more antiquo adunare solebant S. Pontifices, antequam causæ ad Concilium generale deferrentur: quia hæc censentur media ad id munus requisita. Neq; enim Xtus Papam infallibilem constituit, nisi humano modo agentem, & mediis ordinariis utentem; secundum quæ decet homines gubernari; nec solent Pontifices ex Cathedra definire nisi his mediis adhibitis. Aliis visum est, hæc, excepta libertate, non requiri; quia inquit, Spiritus S. cujus assistentia Petro & Successoribus promissa est, non dependet ab adjutorio humano. nec legitur assistentiam suam tali auxilio alligasse; frustra enim ait Cardinalis *Sfondratus* lib. 3. de Regali. Sacerd. § 1. foret in Papa talis autoritas; nam cujus error damnatus esset, prætereundum semper-

per posset, illegitime damnatum, ut olim fecerunt Donatistæ, in Concilio Carthag. proscripti, & dixerunt Lutherani de Concilio Triden. Quo circa Rom. Pontificis prudentiæ & discretioni committitur in Concil. Trid. sess. 25. de Reform. cap. ult. industriæ modus, quem in rebus ambiguis definiendis adhibere poterit.

§. I.

Utrum S. Pontifex gaudeat inerrantiæ privilegio in definiendis quæstionibus fidei & morum, dum ex Cathedra loquitur?

Triplex circa hanc quæstionem sententia. 1. Hæreticorum negantium absolute, hoc privilegio gaudere S. Pontificem. 2. Gallorum, qui ut plurimum tenent, S. Pontificem non esse infallibilem, nisi accedente consensu Ecclesiæ, sive in Concilio congregatæ, sive saltem per orbem diffusæ. 3. Affirmativa cæterorum Theologorum. Cum quibus.

Dico Judicium Romani Pontificis loquentis ex Cathedra in rebus fidei & morum est infallibile independenter a consensu Ecclesiæ.

U

Prob:

Prob. 1. Ex triplici loco S. Scripturæ. Primus Math: 16. ubi Christus Petro confitenti ejus Divinitatem dicit: *Beatus es - - - Et ego dico tibi, quia tu es Petrus, & super hanc petram ædificabo Ecclesiam meam, & portæ inferi non prævalent adversus eam; & tibi dabo claves Regni cælorum &c.* Hæc verba pertinere ad Successores Petri manifestum est; cum enim Xtus fundaverit Ecclesiam duraturam usq; ad sæculi consummationem, fundamentum illius debebat in ævum permanere in Petri Successoribus, ut dictum art: præc: & consentiunt nobiscum Theologi Galliæ; *subsumo:* atqui his verbis continetur privilegium infallibilitatis promissum Petro, & ejus successoribus, ergo. *Prob: sub:* Privilegium infallibilitatis promissum Petro, & ejus Successoribus continetur in verbis allatis, si ista, *& portæ inferi non prævalent adversus eam* referantur, non solum ad Ecclesiam, sed ad Petrum seu ad petram supra quam fundata est Ecclesia; atqui ita se res habet; ergo. *Prob: min: 1.* ex Patribus. Origines in [cap: 16. Math: *Neq; adversus petram, ait, super*

*per quam Christus ædificavit Ecclesiam, neq; adversus Ecclesiam portæ inferi præva-
lebunt. S. Aug: in Psal: contra partem
Donati: Numerate, inquit, Sacerdotes,
vel ab ipsa Petri sede, & in ordine illo
Patrum, quis cui successit, videte, ipsa est
petra, quam non vincunt superbæ inferorum
portæ. Prob: 2. eadem minor; Certum est
hæc Verba: Et portæ inferi &c. referri
ad Ecclesiam, & per hæc illi promitti
indefectibilitatem; atqui Ecclesia seu
ædificium non potest esse indefectibile,
si fundamentum, cui innititur, sit de-
fectibile; ergo. Unde S. Thomas in
Catena super laudata Verba dicit ex
Origine: Non exprimit, utrum petra præ-
valebunt, in qua ædificat Christus Ecclesiam
aut Ecclesiæ, quam ædificat supra petram;
tamen manifestum est, quia nec adversus
petram nec adversus Ecclesiam portæ præ-
valebunt inferorum; ergo. Secundus lo-
cus est Lucæ 22. Ubi Xtus dicit ad Pe-
trum: Simon, Simon ecce Sathanas expe-
tivit vos, ut cribraret sicut triticum; ego au-
tem rogavi pro te ut non deficiat fides
tua, & tu aliquando conversus; confirma
fratres tuos. Ubi specialiter notandum,*

Xtū cæpiſſe loqui in plurali dicendo: *expetivit vos* poſtea mutata loquendi forma, uſum eſſe ſingulari, *rogavi pro te ut non deficiat fides tua - - - converſus confirma fratres tuos*; ut ſcilicet indicaret infallibilitatem capiti, non membris petiſſe & impetraſſe, ita ut Petrus ſine membris eſſet infallibilis, & indeficiens in fide. Non dixit: *rogavi pro vobis*, ſed *pro te*, non dixit: *vos confirmate*, ſed *tu converſus confirma*. Subſumo: atqui quod Chriſtus impetravit Petro, hoc ipſum etiam impetravit Succeſſoribus, quia propter utilitatem & neceſſitatem Eccleſiæ hoc impetravit Petrus; Eccleſia autem ſemper indiget aliquo, qui eam infallibiliter confirmet in fide. Præterea, quod Xtus ibi pro Petro rogaverit, & non pro tota Eccleſia, non ſolum patet ex ipſo nomine Petrum designante, *Simon, Simon*, ſed etiam, quia dixit, & *tu converſus* &c. quod utiq; Eccleſiæ convenire non poteſt, utpote quæ nunquam tota perverti, adeoq; nec converti poteſt.

Tertius locus eſt Joan: 21. Ubi Xtus ſoli Petro præ cæteris Apoſtolis totius
Ec-

Ecclesiæ curam committit: *Pasce oves meas, pasce agnos meos*; ergo Petrus debet, & quivis ejus Successor pascere Verbo doctrinæ Universam Ecclesiam; illum debet audire Ecclesia, ut ovis Pastorem, illiusq; doctrinam sequi; atqui Ecclesia non potest falsam doctrinam sequi, quia est indefectibilis; ergo nec Petrus, nec quivis ejus Successor potest Ecclesiæ falsam doctrinam proponere. Et sanè absolum foret, quod gregi infallibili præficeretur Pastor fallibilis; tunc enim potius grex Pastorem, quam Pastor gregem deberet pascere.

Prob: 2. ex Patribus. S. Hyppolitus III. Sæculi Episcopus & Martyr: Orat: de Consum: mundi ait: Princeps Petrus, fidei petra, quem beatum judicavit Christus Dominus noster; ille doctor Ecclesiæ, ille primus Discipulorum, ille qui regni Claves habet. S. Cypri: Epist: 51. de Felicissimo & aliis Schismaticis, qui Romam confugerant: Navigare, ait, audent ad Petri Cathedram, atq; ad Ecclesiam principalem, unde dignitas Sacerdotalis exorta est, a Schismaticis & profanis literas ferre, nec cogitare eos esse Romanos, quorum fides

Apostolo prædicante laudata est, ad quos perfidia non possit habere accessum. S. Ambr: III. Sæculi Doctor in Psal: 40. Ipse est Petrus cui dixit; Tu es Petrus & super &c. Ubi ergo Petrus, ibi Ecclesia ubi Ecclesia ibi nulla mors, sed vita æterna & portæ inferi non prævalebunt ei. Manifeste S. Doctor loquitur de Petri Successoribus. Ubi Petrus, ibi Ecclesia, tunc enim non erat persona Petri. S. Hier: totus est in hac veritate demonstranda Epist: 57. ad Damasum: Ego, inquit, nullum primum nisi Xtum sequens, Beatitudini tuæ, id est; Cathedrae Petri communione consocior, super illam petram aedificatam Ecclesiam scio, quicumq; extra hanc domum agnum comederit, profanus est, si quis in Arca Noe non fuerit, peribit - - - Non novi Vitalem, Meletium respuo, ignoro Paulinum, quicumq; tecum non colligit, spargit, hoc est, quod Xti non est, Anti:-Christi est. In Exposit: Symboli ad eundem. Si minus peritè, aut parum cautè forte aliquid positum est, emendari cupimus a te, qui Petri & fidem & sedem tenes, sin autem hæc nostra confessio Apostolatûs tui judiciò comprobatur, quicumq; me culpære voluerit, se im-
peri-

peritum vel malevolum, vel etiam non Catholicum, non me hæreticum comprobabit.
S. Petrus Chrysol: Epist: ad Eutychetem. *His, quae a B. Papa Romanae Civitatis scripta sunt, obedienter attendas, quoniam B. Petrus qui in propria sede & vivit, & praesidet, praestat quaerentibus fidei veritatem. Nos enim pro studio pacis & fidei extra consensum Romanae Civitatis Episcopi causas fidei audire non possumus.*
Postquam Innocentius I. hæresim Pelagii sententiâ lata damnaasset, August: Serm: 2. nunc 131. de Verbis Apost: cap: 10. dicit: *Iam de hac causa duo Concilia (Carthaginense, & Milevitanum) missa sunt ad sedem Apostolicam. Inde etiam rescripta venerunt; causa finita, utinam aliquando error finiatur.* Et lib: 2. Operis imperfecti contra Pelagium ait: *Quid adhuc quaeris examen, quod jam factum est, apud Apostolicam Sedem - - - Ergo haeresis ab Episcopis non adhuc examinanda, sed coercenda est potestatibus Christianis.*

Prob. 3. Ex traditione, praxi & communi sensu Ecclesiae, de quo constat ex eo, quod pleræq; hæreses ab initio

tio Ecclesiæ usq; modo sint a Rom. Pontificibus sine interventu Concilii generalis condemnatæ. Nam 300. primis annis nulla Concilia generalia fuerunt celebrata; at nihilominus damnatæ hæreses *Appollianorum, Marcionistarum, Valentinianorum, Novatianorum, Sabellianorum, Paulinistarum.* &c. postmodum, *Pelagianorum, Semipelagianorum, Berengarii, Joviniani, Vigilantii* &c. Hinc etiam nullus dubitavit, quod Concilia Milevitanum, & Carthaginense contra Pelagium, Arausicanum contra Semipelagianos, & similia particularia per S. Pontificem approbata sint eo ipso infallibilis fidei regula. Et quod rem totam conficere videtur, est id, quod Patres ad Concilium generale congregati, non nisi secundum formam a S. Pontifice præscriptam, & per legatos transmissam prava dogmata proscripserint; atqui hic Patrum procedendi modus incongruus fuisset; nisi S. Pontificis judicium infallibile existimassent; ergo. *Min. patet, major prob.*

I. In Concil. Ephesino anno 431. Act. I. Patres in Nestorium sic pronuntiant: *Coacti per sacros Canones & per Epistolam*
San-

Sanctissimi Patris Nostri Comministri Cælestini Romanæ Ecclesiæ Episcopi --- ad lugubrem hanc contra eum sententiam necessario venimus. Idem Cælestinus in instructione data legatis præcipit, Ut sedis Apostolicæ tuerentur dignitatem, nec se Episcoporum dissidiis immiscerent, quorum quippe iudices esse deberent. Idem in Epist. ad Patres Synodi Act. 2. Direximus Legatos, qui eis, quæ aguntur intersint, & quæ a nobis antea statuta sunt (Romæ contra Nestorium) exequantur. Hac Epistola lecta acclamaverunt Patres, hoc iudicium justum est. Tum Firmus Episcopus Cæsareæ nomine Concilii respondit: Apostolica & sancta sedes --- de præsenti negotio sententiam dixit, regulamq; præscripsit, quam nos quoq; secuti --- formam illam executioni mandavimus, Catholicum & Apostolicum iudicium in illum proferentes. S. Leo in Epist. ad Patres Concilii Calced. præscripsit Patribus legem & doctrinam, quam sequi debeant: Nunc, ait, in Vicariis meis adsum, qui dudum in fidei prædicatione non desum, ut qui non potestis ignorare, quid ex antiqua traditione credamus, non possitis dubitare quid

cupiamus --- Cum secundum Evangelicas veritates --- lucidissime per literas, quas ad Beatæ memoriae Flavianum Episcopum misimus, fuerit declaratum, quæ sit de Sacramento Incarnationis D. N. J. C. pia & sincera confessio. Non sic profecto scripsisset S. Leo si suum judicium a Concilio reformabile existimasset. Act. 2. Cum Magistratus petiissent, ut de fide ageretur secundum Concilia Nicænum & Constantinopolitanum, Cæropius Episcopus Sebastenop. dixit: Emerferunt, quæ ad Eutychetem pertinebant, super his forma data est a S. Archi-Episcopo Romanæ urbis, & sequimur eum, & Epistolæ omnes subscripsimus --- Clamaverunt: ita omnes dicimus; ergo tenebant judicium S. Leonis irretractabile. Agatho Papa occasione VI. Concilii gener. Anno 680. in Epist. ad Constantinum Pogonatum securè pronuntiat se suis legatis ad Concilium mandasse, ut quæ ipse Romæ cum suo Concilio definierat non examinarentur tanquam dubia & incerta, sed ut certa & immutabilia publicarentur: Per nos, ait, praevidimus dirigere, non tamen tanquam de incertis contendere

tendere, sed ut certa & immutabilia compendiosa definitione proferre. Postea in contradicentes sententiam condemnationis profert; ergo certus fuit de sua infallibilitate, alioquin si falsa protulisset more hominum, fuisset a Concilio Oecumenico redarguendus. Hæc in 2da Epistola dicit Agatho. In prima dicit Ecclesiam Rom. Romanosq; Pontifices nunquam in fide defecisse, aut deficere, sed eorum partes esse Fratres in fide confirmare. Has Epistolas cum veneratione Patres susceperunt dicentes, per Agathonem Petrus loquebatur - - - Quas ut a summo Apostolorum Vertice, divinè perscriptas agnoscimus. Eodem modo receptæ literæ Adriani Papæ in Synodo VII. Nicæna II. In Synodo VIII. Constant. IV. Anno 869. contra Photium nullus admixsus fuit, quin prius formulæ fidei ab Adriano II. Missæ subscripsisset. In hac fidei formula hæc habentur: Quia non potest Domini N. f. C. prætermitti sententia dicentis. Tu es Petrus & super hanc petram ædificabo Ecclesiam meam; Hæc quæ dicta sunt, rerum probantur eventibûs, quia in sede A-
po-

postolica immaculata est semper servata religio, & sancta celebrata doctrina. Ab hujus ergo fide atq: doctrina separari minime cupientes, & Patrum & praecipue sanctorum Apostolicae sedis Praesulum, sequentes in omnibus constituta. &c. En in Concil. VIII, admisa Romani Pontificis infallibilitas fundata in Verbis Xti: Tu es Petrus & super hanc petram aedificabo Ecclesiam meam.

Prob: 4. ratione. Illud judicium in materia fidei est irreformabile, quod est supremum & ultimum, post quod non datur aliud superius, ad quod appellari possit; atqui tale est judicium Rom. Pontificis ex Cathedra loquentis; ergo Maj. patet, Min. prob. 1. Nicolaus I. in Epist. 8. ad Michaelem Imp. ait: patet profecto sedis Apostolicae, cujus autoritate major non est, judicium a nemine fore retractandum, neq: cuiquam de ejus liceat judicio judicare. Juxta quod Bonifacius Papa Rufo & caeteris Episcopis per Thessaliam constitutis scribens ait: Nemo unquam Apostolico culmini, de cujus judicio non licet retractare, manus obvias audacter intulit, nemo in hoc rebellis, nisi quia de se

voluit judicari. Gelasius Papa, *Ipsi*, ait, *sunt Canones, qui appellationes totius Ecclesiae ad ejus sedis examen voluerunt deferri; ab ipso vero nusquam prorsus appellari debere sanxerunt; & per hoc illam de tota Ecclesia judicare, ipsam ad nullius commere judicium; ergo.*

Prob. 2. min. Ex laudato jam S. August: qui, ut dictum, Innocentii I. judicium contra Pelagianos pro finali & irrefragabili habuit, dum dixit: *Rescripta Roma venerunt, causa finita est.* Id etiam constat ex aliis Patribus. *Prob. 3. eadem min.* Appellans in casu appellationis eximitur a jurisdictione illius, a quo appellat, & ab ejus obedientia recedit; atqui nullus fidelis potest eximi a jurisdictione S. Pontificis; alioquin non esset amplius ejus ovis; consequenter nec fidelis; neq; ab ejus obedientia recedere; cum sit supremus omnium Rector, Pastor & Superior; ergo. Tandem judex a quo appellatur non debet dare aut designare appellanti judicem ad quem, alias ageret contra seipsum; atqui in casu Rom: Pontifex daret appellanti judicem, nempe

pe Concilium gener: quod indicere, congregare, confirmare ad Rom. Pontificem pertinet; ergo iudicium Rom: Pontificis est ultimum in Ecclesia.

Prob: 5. ex absurdis adversæ sententiæ. Si S. Pontificis iudicium non est infallibile in quæstionibus fidei & morum, nisi ex consensu Ecclesiæ. *Sequitur 1.*

Quod Pontifex infallibilitatem mutuât ab Ecclesia; hinc inferitur, quod Ecclesia non est fundata in Petro, sed Petrus in Ecclesia, quod Petrus non pascat oves, sed oves Petrum; quod non Petrus confirmet Fratres in fide, sed Fratres Petrum; quæ omnia aperte sunt contra Evangelium. *Sequitur 2.* Quod S. Pontifex non magis gaudeat privilegio infallibilitatis, quam Episcopus minimæ Diæceseos, imo ut simplex Pastor & Doctor, horum enim iudicium pariter potest acceptare Ecclesia; ergo. *Sequitur 3.* Fideles fore fluctuantes in fide, nec habere aliquid fixum & firmum, cui assensû fidei adhæreant.

Quæro enim qualis Ecclesiæ consensus requiratur? An totius Ecclesiæ, an maioris partis, an minoris vg.

unius

unius nationis? non ultimum, quô enim jure hæc unius nationis Ecclesia conferret Pontifici infallibilitatem, quam non habet? neq; primum, alioquin sufficeret dissensus unius vel alterius Episcopi, aut fidelis ad infirmandum judicium S. Pontificis. Non secundum *1^m*o: ut dictum tertio. *2^d*o: Quis dinumerabit partes dissentientes, ut dignoscatur, an major pars adhæreat? Quis hunc consensum fidelibus annuntiabit? interim nullus fidelis tenebitur assensum præbere diplomatibus Pontificiis; quod quam sit a veritate dissonum, quis non videt? *3^{ti}*o. Si sufficit assensus majoris partis, non est, quod tanto zelô disputent Galli; cum iis exceptis omnes Ecclesiæ, ad minus tres partes, agnoscant S. Pontificem infallibilem, nullumq; emanat ab eo decretum ex Cathedra, quod non recipiatur a majori parte Ecclesiæ.

§ II.

Solvuntur objectiones.

Dicunt: 1. **C**ontra 1. prob. Per petram
intelligi fidem Petri. Ergo

Resp.

Resp. Ut jam supra dictum intelligi fidem Petri non in abstracto, sed in concreto, nempe Petrum Divinitatis fidem profitentem.

Instant. Ex hoc sequi Petrum non solum debuisse esse infallibilem, sed etiam immortalem; cum Ecclesia in eo fundata sit semper duratura.

Resp. Alterum non sequitur, habet enim legitimos in suo munere Successores; ideo quod fuit illi dictum, censetur ipsis dictum, in quibus sicut in ipso Ecclesia fundata permanet.

Reponunt. Moriente Petro aut Papa, destruitur Ecclesiæ fundamentum, juxta nostram sententiam; ergo vel Petrus debuit esse immortalis &c.

Resp. nego consequi: Quia remanet fundamentum primarium Christus, a quo in casu sustentatur Ecclesia servans infallibilitatem fidei passivam.

Inferunt. Ergo idem dici potest, si contingat docendo Ecclesiam, aliquem Pontificem a fide deficere.

Resp. nego illat. Non ideo quod Xtus absolutè non posset sustentare Ecclesiæ ædificium, non obstante errore Petri
aut

aut S. Pontificis ; sed quia non sic disposuit de statu Ecclesiæ, cujus fundamentum voluit esse Petrum non vivendo, sed docendo.

Opponunt: Sensum horum verborum esse, quod quoties Petrus & Pontifices annuntiabunt communem Ecclesiarum fidem ex traditione, eorum prædicatio & fides erit fundamentum Ecclesiæ.

Resp. 1. & infero ; ergo nihil speciale Petro promissum est; cùm illa hypothetica infallibilitas &c. etiam singulis Episcopis, Doctoribus, imo fidelibus communia sint. 2. Si moveatur nova quæstio spectans fidem, quis judicabit, an Pontifex annunciet communem fidem Ecclesiarum ? 3. Ut dictum, non solum fides Petri, sed ipse Petrus est Ecclesiæ fundamentum.

Dicunt. 2. contra 2. Textum allatum: Indefectibilitatem eo loci promissam Petro transmitti ad Successores, non hoc sensû quod quilibet sit in fide indefectibilis, sed quod nunquam futurum sit, ut Successores atq; Ecclesia, cui præsumt, deficiant a fide Unde huic fidei nihil obest, si aliquot Pontifices Officio

defuerint, ac a fide aberrarint; stat enim Romana fides, ab eorum Antecessoribus stabilita, ab eorum Successoribus vindicanda.

Resp. 1. Ex dictis verbis non solum probari indefectibilitatem Romanæ Sedis, aut Ecclesiæ; sed etiam Rom. Pontificis. 2. Juxta hanc interpretationem promissio indefectibilitatis non soli Petro sed Ecclesiæ facta est, cujus contrarium habetur in prob. 3. Christus rogavit, ut fides non sit defectura in Petro; ergo nec in quolibet Successore 4. Si unus ex Petri Successoribus deficiat a fide docendo, non poterit, confirmare Fratres, quod ne unquam contingeret, rogavit Christus. 5. Si unus errare potest, quomodo sedes inviolata permanebit? Si

Dicas: Petrum non obstante Christi oratione a fide defecisse, negando ipsum.

Resp: Petrum negasse Xtum ore tantum non corde, neq; tunc fuisse constitutum caput Ecclesiæ.

Instant. Ipsa voce *confirma* non indicari supremum & indeclinabile judicium; nam

nam *confirma* hoc est; quantum in te est, enitere, ut firmi sint.

Resp. Non ex hac sola voce *confirma*, sed ex tota periodo, *Ego rogavi &c. confirma &c* nos probare iudicium Rom. Pontificis supremum & infallibile; quia his verbis Xtus promittit Petro ejusq; Successoribus indeficientiam in fide, ut confirmet fideles.

Dicunt contra 3. P. His Verbis *Pasce oves meas* solum indicari Officium Petri, non autem præstari, ut præceptum Officium impleatur; alioquin sequeretur, quod Petrus, & ejus successor in nulla parte Officij Pastoralis peccare posset.

Resp. nego art. Absurdum enim foret gregi infallibili præficere Pastorem fallibilem.

Ab Prob. nego Sequ. Defectibilitas enim in moribus non ita nocet membris, sicut noceret defectibilitas in fide & doctrina. Quia quamdiu permanet fides, subsistit compago Ecclesiæ, estq; radix, qua permanente aliæ virtutes reviviscere possent; at eâ sublatâ non subsistit corpus Ecclesiæ, & omnis fere spes salutis aufertur. Unde id maximè

& super omnia curandum Pastori, ut fides fervetur incorrupta in grege.

Objic: 1. S. Cypr. cum pluribus Episcopis restitit Stephano Pontif. definienti non esse rebaptizandos ab hæreticis baptizatos; ergo ipse non agnovit S. Pontificem infallibilem.

Resp. 1. ad illat. Non est mirum Cyprianum, qui errabat circa baptismum hæreticorum, errasse circa infallibilitatem S. Pontificis. Hæc enim est conditio fragilitatis humanæ, ut qui semel errorem induerunt, quem autoritate fultum existimant, non agnoscere auctoritatem, a qua proscribitur.

Resp: 2. nego illat: Quia quæstionem de baptismo hæreticorum iterando Cyprianus nunquam existimavit pertinere ad fidem, sed ad disciplinam tantum, nec illam ut fidei dogma definivit ex Cathedra Stephanus. Duplex hic itaq; quæstio est distinguenda. Prima an invalidum sit baptismus Hæreticorum? Secunda an rebaptizandi sunt ab Hæreticis baptizati? Prima est speculativa, & ad fidem pertinet; secunda est disciplinæ, & praxim spectat. Stephanus in-

ta-

tacta prima quæstione, secundam prohibuit, jussitq; nihil innovari, sed servari antiquam consuetudinem, nihil amplius; idq; non per decretum solemne, ad totam Ecclesiam directum, sed per rescriptum in literis privatis ad Cyprianum & Collegas. *Nondum erat diligenter tempore Cypriani, illa baptismi quæstio pertractata, sed tamen saluberrimam consuetudinem tenebat Ecclesia* ait S. Aug. lib. 2. contra Donat. c. 7. Quod autem non erat sufficienter pertractatum & discussum, non potuit proponi, tanquam decretum sedis Apostolicæ, & articulus fidei. Unde objectio non militat contra conclusionem.

Instabis 1. Stephanus præcipiens non esse rebaptizandos, ab Hæreticis baptizatos, supposebat eorum baptismum esse validum idq; saltem ex definitione inferri poterat; ergo.

Resp. Hic non agi de suppositione aut illatione, sed de definitione ex Cathedra. Quidquid in mente habuerit Stephanus; constat nihil aliud definivisse, quam ut *nihil innovaretur*; sive teneret de fide illud baptismum esse validum, sive tan-

tum ut quid certius haberet. Neq; ut dictum, id definivit ex Cathedra.

Instabis 2. Etsi Stephanus definivisset ex Cathedra tanquam fidei dogma validum esse baptisma Hæreticorum, & ab illis baptizatos non esse rebaptizandos, non debuisset illi acquiescere Cyprianus; ergo. *Prob. Ant.* ex S. August. lib. 2. contra Donat. cap. 4. *Nec nos ipsi tale quid auderemus asserere, nisi universæ Ecclesiæ concordissima auctoritate firmati, cui & ipse sine dubio cederet, si jam illo tempore quæstionis hujus veritas eliquata & declarata per plenarium Concilium solidaratur; ergo ex mente S. August. solius Concilij plenarii, & non Romani Pontificis judicio acquiescere tenemur, consequenter &c.*

Resp. Nihil ex his inferri contra infallibilitatem Romani Pontif: si attendatur scopus S. Doctoris, agebat contra Donatistas, qui exemplò Cypriani nitebantur, & abutebantur, contra quos sic arguit ad hominem: Si hæc quæstio fuisset in plenario Concilio, eliquata & definita, S. Cyprianus, ad quem provocatis, illi contra propriam senten-

tentiam acquievisset, quare ergo cum jam per plenarium Concilium definita sit, vos non acquiescitis. Quò argumentò non negatur infallibilitas Rom. Pontificis. Intendit non infallibilitatem S. Pontificis excludere, sed infallibile judicium Concilii asserere. Sicut si de propositione à Concilio Trid. definita dicerem: Hanc propositionem non auderem asserere, si a Concilio Triden. non esset definita, malè quis inferret me denegare infallibilitatem Rom Pontificis, & soli Concilio tribuere; nulla enim hic comparatio inter Concilium & Pontificem, ut illud dicatur infallibile, ille fallibilis. Cæterum mens S. Augustini circa infallibilitatem S. Pontificis patet ex probationibus in causa Pelagianorum, quam ex solius Innocentii decreto dicit esse finitam, nec Pelagianis superesse appellationem ad Concilium generale.

Dices: A judicio infallibili non datur appellatio; sed non semel data est appellatio a diplomate Pontificio, ut liquet ex appellationibus Donatistarum, a judicio S. Melchiadis & Cælestii, à
De-

Decreto Innocentii I. ad Zosimum Pontificem Innocentii Successorem; ergo.

Resp: Dist: maj: non datur justa appellatio, quæ suspendit legis effectum, *conc:* & jure ac merito provocatur á judicio infallibili, *nego.* Porro injustæ erant ejusmodi appellationes, nec aliqujus roboris. Cælestius Zosimum decipit, simulando se esse Catholicum. Postquam monitus ab Episcopis Affricæ hominis vasritiem agnovit, statim & illum & omnes Pelagianos damnavit innovando decretum Innocentii in sua *Tractatoria* ad omnes Episcopos directa.

Objic: 2. Plures Episcopi Rom: errarunt in rebus fidei & morum; ergo.

Prob: Ant: Nam 1. erravit Marcellinus idolis sacrificans. 2. Liberius Arianæ hæresi subscribens. 3. Zephyrinus insinulatus de Montanismo. 4. Zosimus, qui Cælestium Hæreticum pro Catholico agnovit. 5. Stephanus I. probando promiscuè omne baptisma Hæreticorum. 6. Hormisdas, qui damnavit hanc propositionem: *Unus de Trinitate passus est carne, quam Joannes ejus success-*

cessor, & V. Synodus ut Catholicam probavit. 7. Vigilius Papa modò probavit, modò improbavit tria Capitula. 8. Honorius fuit damnatus cum Hæreticis Monothelitis in VI. Synodo. 9. Gregorius III. docuit Uxorem imbecilem posse dimitti, & rebaptizandos esse baptizatos a Paganis vel Judæis. 10. Stephanus II. dicitur approbasse baptismum vinò collatum. 11. Nicolaus I. docet baptismum in nomine Christi collatum esse validum. 12. Stephanus VII. acta Formosi Prædecessoris irritavit, & ab eo ordinatos iterum ordinari iussit. 13. Theodorus II. & Joannes IX. Acta Stephani in Formosum irritârunt. 14. Sergius III. acta Formosi iterum irritavit, & acta Stephani probavit. 15. Cælestinus III. definivit per hæresim dissolvi Matrimonium. 16. Alexander III. cap: *Licet* de Sponsa: quod ratum Matrimonium contractò alterò & consummatò, dirimatur. 17. Bonifacius VIII. definivit omnia regna mundi in temporalibus subesse S. Pontifici, idq; in famosa decretali *Unam Sanctam* inseruit. 18. Jo-

an-

annes XXII. erravit circa visionem Dei, quam definivit differri post ultimam corporum resurrectionem. Ergo.

Resp: 1. Multis casus Marcellini videtur confictus à Donatistis, ut ipsis exprobat S. August:

Resp: 2. Marcellinus hoc facto nihil docuit ex Cathedra, & licet externè fidem negaverit, ob metum tormentorum, corde tamen retinuit. *Ad 2.* Formula, cui Liberius subscripsit, revera non fuit Ariana, ut dictum in Tract: de SS. TRINITATE; hinc communionē, non sententiā fuit Arianus. *Ad 3.* Hoc quidem dicit Tertullianus jam Montani hæresi infectus, sed non probat. Esto enim Zephyrinus errore facti deceptus literas communionis Montanistis dederit, eas tamen fraude cognita revocavit. *Ad 4.* Jam dictum. Zosimum a Cælestio fuisse deceptum. Interrogatus enim Cælestius a Zosimo de Innocentii literis, quæ Pelagium damnarunt, respondit se eis consentire; & se omnia, quæ Sedes Apostolica damnaret, damnaturum promisit. His auditis Zosimus libellum approbavit. absq;

absq; eo, quod unquam falsum dogma probaverit, & peccatum originale negaverit. Hæc ex S. August: lib: 2. ad Bonifacium cap: 3. *Et propterea libellus ejus dictus est, quia & hoc Catholicae mentis est, si quæ forte aliter sapit, quam veritas exigit, non ea certissimè definire, sed detecta ac demonstrata respuere.* Proinde habita ratione mentis, affectûs, & modo loquendi authoris, qui hunc suum errorem non absolute assererebat, sed admodum dubitantis tantum proponebat, petens instrui, libellum Catholicum dixit, non habita ratione propositionum, & dogmatum, quæ continebat

Dices: Facundus Hermianensis huic ævo proximus lib: 3. c. 7. memorat: B. Zosimum contra Innocentii sententiam, fidem Pelagii & Cælestii tanquam Catholicam laudantem, & culpantem Afffricanos Episcopos; quòd ab illis hæretici crederentur.

Resp. Viro Schismati trium Capitulorum pertinaci Defensori nullam fidem esse adhibendam, potius Augustino credendum. Datis insuper his objectis nihil concluditur contra nos. Constat enim

nim Zosimum approbantem privatim libellum Cælestii, & scribentem privatas literas ad Episcopos Affricæ, universam Ecclesiam non docuisse, sicq; non fuisse locutum ex Cathedra, sicut locutus est, quando fraude detectâ Pelagium & Cælestium solemni decreto condemnavit, missâ ad totius Orbis Episcopos condemnationis Epistolâ, *Tractatoria* dicta.

Ad 5. Nego ant: Nec dicas: Quod S. Cyprianus hunc errorem Stephano attribuit: Nam dato gratis *ant: nego consequ:* Quia æstû disputationis abreptus aliquid humani erga Stephanum passus est Cyprianus, ut fatetur Augustinus.

Ad 6. Damnavit Hormisdas laudatam propositionem, non ut hæreticam, sed quod per intempestivam illius defensionem pax Ecclesiæ turbaretur. Hinc Joannes Hormisdæ non est contrarius. Vid: Tract: de Incarn: Pater Serry ait concessio, quod Hormisdas damnaverit præfatam propositionem, ut hæreticam sumptam in sensu reduplicativo, quo sensû est Eutychiana, & ab Eutychianis

nis defensa; Christus enim secundum fidem Catholicam, non est passus re-duplicativè ut DEUS, & una de Tri-nitate Persona; Joannes autem eam probando, sumpsit specificativè, & per communicationem idiomatum, hinc ni-hil contra nos.

Ad 7. Vigilius nunquam probavit tria capitula, quantum ad sensum ob-vium textuum, sed tantum vetasse ne damnarentur nominibus appellatis Au-thorum. Vid: Tract: de Incarn.

Dices: Vigilius in suo constituto de Ibæ Epistola ait: *Ipsam rectissimo & piissimo sensu intellectam*, irreprehensam manere; ergo probavit &c.

Resp: Vigilius non dixit Epistolam Ibæ, sed *fidem irreprehensam manere*, quia scilicet in Concilio Calced: mentem su-am aperuerat, & quæ contra S. Cyril-lum errore facti deceptus scripserat, re-tractavit.

Ad 8. Honorius nunquam hæresim docuit, sed ut fautorem Monothelismi fuisse damnatum in Synodo VI. dixi-mus in Tract: de Incarn:

Ad 9. Loquitur Gregorius non de
qua-

quacunq; imbecillitate, sed de impotentia perpetua & naturali. Ad alterum rebaptizandos ait, quia incertum erat, an serio & observata formâ baptizâssent. Dici etiam potest ea rescripta non esse ex Cathedra; quia non sunt ordinata ad totam Ecclesiam.

Ad 10. Fabula & commentum. Vide Billuart dissert: 1. de Baptismo a. 3. Obj: 2.

Ad 11. Hoc non definivit Nicolaus, quia de hoc interrogatus non fuit: sed tantum, utrum Baptisma collatum a Pagano aut Judæo sit validum. Dici etiam potest Baptisma in Nomine Christi collatum, esse baptismum collatum in forma debita, siquidem Christus baptismatis Author est, ad distinctionem a baptismo Joannis. Insuper non est de fide baptismum in nomine Christi collatum esse invalidum; sunt enim Theologi, qui validum esse propugnant, nullo tamen casû sic conferendum.

Ad 12. Stephanus & Sergius non errore prædicationis, sed conversationis, seu ut ait Spondanus ad an: 897. non errore in fide, sed violenta tyrannide

de in facto; non definiendo, sed suo livori indulgendo hoc fecit. *Addo.* Ordinationes non fuisse iteratas simpliciter, sed adhibitis tantum cæremoniis, quibus ordinati a Formoso, & ideo suspensi, ut prætendebat Stephanus liberam ordinum executionem reciperent; sicut factum antiquitus in Concil: Tolet IV. & cum iis qui ordinati fuerunt a Photio. Hinc.

Ad 13. Merito Theodorus II. & Joannes IX. Acta Stephani in Formosum irritârunt. *Ad 14.* patet ex *Resp:* ad 12.

Ad 15. Cælestinus hoc ex Cathedra non pronuntiavit, ut colligitur ex cap: *Quanto* ubi Innocentius III. referens hanc Cælestini sententiam dicit: Prædecessorem suum aliter *sensisse*, se tamen non credere, quod in tali casu Matrimonium dissolvatur. Hinc patet quod uterq; suam opinionem exposuit, non tamen definiendo quidquam. Hinc notanda est Cani sententia lib: 5. de locis Theol: cap: penult: *Decretales nonnullas constat a posterioribus meliori consilio refutatas, quoniam non ex firmo decreto, sed ex Pontificum opinione prodierunt.* Non omnia ergo

ergo Pontificum rescripta ad privatorum consultationes, pro decidendis privatis casibus conscientiae, censerī debent, ex Cathedra pronuntiata.

Ad 16. Ut ad 15. immediatē.

Ad 17. nego, Epistolam enim, in qua id continebatur, suppositam nomini suo fuisse a Petro Flotta conquestus est ipse Bonifacius, ut testatur Spondanus ad an. 1301. In Decretali *Unam Sanctam* definit tantum *subesse Romano Pontifici omnino esse de necessitate salutis*, quod intelligitur de Spiritualibus.

Ad 18. Ad summum hoc docuit ut Doctor privatus inquirendo, non definiendo. Sed de hoc alibi. Non solum in hos Pontifices quos enumeravi, verum in plures alios invehī solent Acatolici Ducibus Centuriatoribus Magdeburgensibus, verum sicut illos, ita istos egregiē vindicant ab odio eorum Theologi Catholici. Vide V. Bellarminum lib: 4. cap: 13. de Summo Pontifice.

Objic: 3. Plures Pontifices ingenue sunt fassi, se esse fallibiles, ut Leo IV. Can: *Si incompetenter* causa 2. q. 4. Innocentius III. Serm: 2. de Consecr: Pontific:

tif: Clemens VI. in diplom: 7. Idus Decemb: 1351. Gregorius XI. & alii, ergo.

Resp: Hos Pontifices se agnovisse fallibiles in dispensationibus seu privilegiis concedendis, in factis particularibus, vel etiam in rebus fidei, sed ut Doctores privatos, non autem ut Pastores universalis Ecclesiæ, loquentes ex Cathedra. Nec obstat quod Gregorius XI. dicat se potuisse errare in Consistorio; non enim ea, quæ in Consistorio aguntur, semper ex Cathedra definiuntur, sed in eis sæpe causarum merita expendantur, consilia proponuntur absq; eo, quo ad sententiam solemnem deveniatur. Unde ipsi laudati Pontifices, ubi agebatur de judicio Rom: Pontificis ex Cathedra, ejus infallibilitatem strenue propugnârunt, sic Innocent. III. Epist: 109. ad Patriarcham Constantin: *Petri Successores a fide Catholica nullo unquam tempore deviâsse* profitetur. Et Clemens VI. inter articulos, quorum subscriptionem requisivit, ab Armenis, decimus tertius erat de infallibilitate S. Pontificis.

Instabis Adrianus VI. in Comment.

super 4. lib. Sentent: dist: 7. claris verbis asserit: *Plures enim Rom: Pontifices fuisse hæretici; ergo.*

Resp: Hæc Adrianus scripsit, antequam Pontifex esset, non ex professo hanc materiam tractando, sed incidenter.

Obje: 4. Si solus Pontifex potest infallibiliter definire dogmata fidei frustrantur Concilia, aut non sunt necessaria; ergo.

Resp: Id non sequi. Nam etsi in Pontifice sit infallibilitas, & gaudeat inerrantiæ privilegio, tamen non debet ipse contemnere media humana, & ordinaria, quibus deveniri potest ad veram rei cognitionem, de qua agitur; medium autem ordinarium est Concilium majus aut minus, pro magnitudine vel parvitate rei, de qua agitur; id patet ex exemplo Apostolorum. Nam certe Petrus vel alius, poterant etiam soli quamlibet controversiam definire infallibiliter, tamen Concilium convocaverunt Act: 15. Deinde Definitiones de fide pendent præcipuè ex traditione Apostolica & consensu Ecclesiarum, ut autem
cogno-

cognoscatur de orta aliqua quæstione, quæ sit totius Ecclesiæ sententia, & quam traditionem servant Ecclesiæ Xti, non est alia melior ratio, quam si in unum conveniant Episcopi ex omnibus Provinciis, & quisq; referat Ecclesiæ suæ consuetudinem. Præterea utilissima & sæpe necessaria Concilia, ut finis revera imponatur controversiis, & Decreta de fide non solum fiant, sed etiam servantur; quando enim adunatur Concilium generale omnes Episcopi subscribunt, & profitentur se amplecti illud Decretum, & sic deinceps in suis Ecclesiis prædicaturos; quando autem non sit generale Concilium, non est tam facile reducere ad praxim decretum de fide factum; siquidem nonnulli ignorantiam decreti prætexunt, alii conqueruntur se non fuisse vocatos; alii etiam aperte dicunt Pontificem posse errare. Hæc omnia ad oculum patent in convocatione primorum Conciliorum, quæ fuerunt coadunata jam post damnatas hæreses. Sic Cælestinus Nestorii hæresim damnaverat, sed non extinxerat propter potentissimos Nestorii amicos, Patronos

& Protectores, & ideo fuit necessaria convocatio Synodi Ephesinæ, ut opportunis mediis hæreticorum insania reprimeretur, hæresis progressus sisteretur, & Catholica fides muniretur. Sic S. Leo in Epist: celebri ad S. Flavianum Euty-chianam hæresim damnaverat; sed quia Dioscorus & alii in latrocinio Ephesino eam ne legi quidem passi fuerant, Flavianum verberibus ad mortem affecerant, adversus Leonem sententiam dixerant, necesse fuit congregari Concilium Calced. ut hos tumultus sedaret, & tot malis occurreret. Itaq; frustra laborant, qui ad infirmendam Rom: Pontificis infallibilitatem Concilia congerunt, quæ hæreses jam a Pontificibus damnatas, novo judicio damnârunt; hujus enim causa fuit non insufficiens & fallibilis in Rom. Pontifice judicandi authoritas, sed Hæreticorum protervia, audacia, & contumacia, & facilior definitionum executio.

§. III.

Aliquæ quæstiones resolvuntur.

*P*etes 1. Utrum qui propositionem à Summo Pontifice damnatam defenderet, esset Hæreticus? *Resp:*

Resp. Cum infallibilitas S. Pontificis non sit de fide obligante; talis non esset quidem Hæreticus, sed temerarius, nisi forte condemnationi Pontificis accederet consensus Ecclesiæ; quia est de fide obligante tenere, quod Ecclesia sit infallibilis in revelatis.

Petes 2. An Christus jurisdictionem Ecclesiasticam soli Pontifici S. immediatè dederit?

Nota. Triplicem esse in Pontifice, aliisque Episcopis potestatem, unam *Ordinis*, alteram *jurisdictionis* interioris, tertiam exterioris. Prima refertur ad Sacramenta conficienda & ministranda; altera ad fideles regendos in foro interiori conscientiæ; tertia ad eundem populum regendum in foro exteriori. De prima & secunda, non est hic quæstio, sed solum de tertia. Nam de prima certum est apud omnes, illam æquè immediatè habere a Deo S. Pontificem, ac alios Episcopos; confertur enim per consecrationem, quæ æquè operatur in uno, ac altero. De secunda est aliqua dissensio inter Theologos; sed tamen conveniunt, sicut primam ita se-

cundam pertinere ad claves Ecclesiæ, de quibus alibi. Solum igitur de tertia agendum. Et quidem omnes conveniunt jurisdictionem Episcopalem saltem in genere, esse de jure Divino; nam Christus ita ordinavit Ecclesiam, ut in ea sint Pastores, Doctores, ad Ephes: 4. Et nisi ita esset, posset Pontifex mutare hunc ordinem, & constituere, ne ullus alius sit Episcopus in Ecclesia, quod citra dubium non potest facere. At quæstio est: an Episcopi canonicè electi accipiant a Deo suam jurisdictionem, sicut eam accipit S. Pontifex, an verò à Pontifice?

Resp. 1. Apostolos à Christo jurisdictionem omnem accepisse. Patet ex illo Joan: 20. *Sicut misit me Pater, & ego mitto vos.* Quem locum sic exponunt Patres Chrysostomus, & Theophilactus, ut apertè dicant factos esse his verbis Apostolos vicarios Christi, imò ipsum Christi Officium & authoritatem accepisse.

Resp. 2. Episcopos a Papa jurisdictionem accipere.

Ratio. Nam Num: 11. Moyses in

70. Seniores derivavit suum Spiritum jussu DEI. Quô factô voluit DEUS ostendere in Moyse residere totam auctoritatem; alios autem, si quam habent a Moyse habere. Constat autem Pontificem eum locum in Ecclesia habere, quem habet Moyse in Populo Judæorum. Aliunde regimen Ecclesiæ est Monarchicum; ergo in uno residet potestas. Episcopi non habent æqualem jurisdictionem; nam unus habet unam civitatem, alter quinque: tertius totam, vel totas provincias sub sua jurisdictione, quæ sæpius a S. Pontifice mutatur, dum novæ Diæceses eriguntur.

Petes. 3. Quid censendum de potestate S. Pontificis in temporalia?

Resp. 1. Papa non est Dominus totius mundi. *Ratio:* quia non est Dominus earum provinciarum, quas possident infideles, qui non pertinent ad ovile Christi.

Resp. 2. Papa non est Dominus totius orbis Christiani. *Ratio:* Quia claves Regni Cœlorum leguntur Pontifici concessæ, de clavibus verò regni terrarum nulla mentio in scriptura &

Tra-

Traditione. Hinc præclarum dictum
Oſii Cordub. notandum. *Tibi, Impe-*
ratori, DEUS imperium, nobis autem ea,
quæ sunt Ecclesiæ, Christus commisit.

Resp. 3. Papam nullam habere ju-
risdictionem directè iure Divino in tem-
poralia. *Ratio;* Christus ut homo, in-
ter homines degens non accepit, nec
voluit aliquod temporale dominium;
Papa autem ejus Vicarius est, & Chri-
stum repræsentat, qualis erat, dum in-
ter homines versaretur: ergo. Hic duo
errores sibi ad invicem oppositi sunt.
Nam ex falso hoc principio, quod Chri-
stus homo fuerit Rex temporalis, qui-
dam deducunt tanquam ex præcipuo
fundamento, Papam, qui Christi Vica-
rius est, esse Regem & Pontificem si-
mul; è contrariò autem Viclefistæ apud
Thomam Valdensen lib: 2. Doctr. art.
3. c. 76. ex hoc eodem fonte dedu-
xerunt Reges Pontificibus esse majores,
& digniores, quia Reges, ajunt, sunt
Vicarii Christi Regis; Pontifices Vica-
rii Christi Pontificis; Christus autem
secundum illos magis Rex fuit, quam
Pontifex; nam descendit ex tribu Re-
gia

gia Judæ & familia David, non ex tribu Levi & familia Aaronis.

At indubium est Christum DEI Filium semper fuisse Regem & Dominum omnium, eô modô, quô Pater, sed hoc regnum æternum est & Divinum, nec tollit dominia hominum, nec potest Pontifici convenire. Fuit etiam Christus homo, Rex omnium hominum, sed spiritualis, & habuit amplissimam potestatem in omnes tam fideles, quam infideles in ordine ad salutem æternam, ita ut possit eos obligare ad fidem &c. Futurum etiam est hoc spirituale Christi Regnum post diem judicii sensibile & manifestum, & ita inchoata est gloria hujus Regni in ipso Capite Christo JESU, postquam à mortuis resurrexit. At hoc regnum non potest Pontifici Communicari 1. quia non est temporale. 2. Supponit resurrectionem.

Citra omne dubium potuit quidem in maiestate regia regni temporalis in mundum venire, tamen secundum providentiæ leges id noluisse edocemur ex S. Scriptura.

Dicitur

Dicimus ergò, quod Papa habeat illud Officium, quod habuit Christus, cum in terris humano modo inter homines viveret. Quia enim Ecclesia ex hominibus constat, indiget capite visibili, & more humano vivente; ideo Christus, quando desit more humano vivere, id est, post resurrectionem reliquit Petrum loco sui, qui nobis exhiberet illam Christi gubernationem visibilem & humanam, quam Ecclesia habuerat ante passionem Christi, ut patet ex illo Joan: 20. *Sicut misit me Pater & ego mitto vos.* Tamen magna est differentia inter potestatem Christi, & S. Pontificis; hæc enim fuit in Christo per excellentiam extensa super fideles, ac infideles; potestati autem Pontificis soli fideles sunt subiecti, ut alia taceam. Hinc fit consequens ex eo, quod quoniam Christus, ut homo mortalis nullum habuit temporale regnum, nec Pontificem ut Christi Vicarium tale aliquod regnum habere, vel ex jure Divino prætereendere posse.

Resp. 4. Papam habere temporalem potestatem indirectè. *Ratio.* Nam po-

te-

testas civilis subjecta est potestati spirituali, quando utraq; pars est ejusdem Reipubl. Christianæ; ergo potest Princeps spiritualis, imperare Principibus temporalibus in ordine ad bonum spirituale. Nam v.g. si temporalis administratio impedit spirituale bonum, omnium judiciô tenetur Princeps temporalis mutare illum modum administrandi, etiam cum detrimento temporalis boni; ergo signum est subjectam esse temporalem potestatem spirituali.

Resp. 5. Non pugnat cum Verbo DEI, ut unus homo sit Princeps Ecclesiasticus & Politicus simul. Est contra Pontificiæ dignitatis Osores, ex quibus unus nempe *Calvinus* dicit 1. Temporalem S. Pontificis Principatum esse possessionem latrocinio mero occupatam. 2. Etiam si justo titulo eum haberet, non posse eum jure retinere, eo quod pugnet cum Principatu spirituali. Ita ille lib. 4. Instit. cap. 11. At hoc equidem dicit, sed non probat.

Non pugnare cum Verbo DEI manifesté patet ex Scriptura. Nam præterquam, quod in lege naturæ Melchise-

sedech fuit Rex & Pontifex, Gen. 14. & Hebr. 7. semper primogenitus familiæ Rex & Pontifex fuit ut S. Hier. docet in quæst: Hebraicis in illud Gen 49. *Ruben primogenitus meus*, & constat quoq; Nòé, Abraham, Isaac, Jacob, præfuisse suis, tam in iis, quæ ad religionem, quam in iis, quæ ad politicam vitam pertinebant. *Præterquam* dixi. Nam Moyse etiam summus Princeps temporalis, & summus Pontifex fuit, ut habetur Exodi 18. cap. item 32. & 40. Levit. 8. lib. 2. Paral: cap. 26. Hinc ait Philo Judæus in fine lib: 3. *Hæc est vita hic exitus Moyse, Regis, Legislatoris. Pontificis, Prophetæ.* Præterea Heli & Sacerdos & Judex politicus fuit, ut legitur cap. 1. & 4. lib: 1. Reg. Machabæi Judas, Jonathas, Simon &c. Pontifices fuerunt & Duces politici ad tempora Herodis, ut nos docent libri Machab. & testatur Joseph. lib. 12. antiq, & sequentibus.

Jam verò quod jure habeat S. Pontifex eum principatum, quem habet, exant Romæ authentica documenta donationum, ut testantur non suspectæ fidei Historiographi, ut *Ado* in Chroni-

co an. 727. *Leo Ostiensis lib. 1. Chron: Cassin. cap. 9. & alii plures.* Sed dato non permisso, etsi nihil horum extaret, abunde sufficeret præscriptio mille annorum. Hæc gratiâ Calvinî dicta, quia regna & imperia per latrocinium acquisita, tandem longô tempore fiunt legitima. Alioquin quo jure Julius Cæsar occupavit Romanum Imperium? Et tamen tempore Tiberii ait Christus Math. 22. *Reddite ergo quæ sunt Cæsaris Cæsari;* Quô jure *Franci* Galliam, *Gothi* Hispaniam, *Saxones* Britanniam, *Hunni* Panoniam, & alii alia regna invaserunt? Et tamen quis Regna ab illis constituta illegitima esse dicet?

Dicunt. Nicolaus 1. Epist. ad Michael: Imp. dicit: Fuisse equidem ante Christi adventum eosdem Reges & Pontifices; at Christum verum Regem & Pontificem ista disjunxisse.

Resp: Non hic est sensus Nicolai, quasi nullum temporale dominium competat Rom: Pontifici; ipse enim Nicolaus protunc Pontificatum gessit, quando Rom: Pontifex erat Princeps politicus Romæ, Ravennæ, aliarumq; civitatum,

tum, quas dudum acceperant Majores ejus à piis Imperatoribus, sed solum voluit dicere, non convenire, ut idem sit Pontifex totius orbis, & simul Imperator totius orbis; non quod repugnet Evangelio, & nullo modo possit fieri, sed quia Christus ad conservandam humilitatem voluit Pontificem indigere Imperatoris defensione in temporalibus, & simul Imperatorem indigere Pontificis directione in Spiritualibus. Quod autem id voluerit, patet ex eo, quod reliquerit Imperium Tiberio, & Petro Pontificatum.

Dicunt 2. Math: 20. Christus instruxit Discipulos de politico dominio vitando: Reges gentium dominantur eorum, vos autem non sic &c. Significat enim Dominus (ait: Calvinus) non modo Pastoris Officium distinctum esse ab Officio Principis; sed res esse magis separatas, quam ut in unum hominem coire queant.

Resp: 1. Dominum eo loci instituere Principes merè Ecclesiasticos, ac docere, debere eos, ut tales sunt, præesse subditis non more Regum & Dominorum, sed more Patrum & Pastorum;

non

non autem sequitur hinc, non posse unum & eundem esse Episcopum & Principem, ut constat in Moyse. At: *Dicit Calvinus* rarò miraculò id factum esse, quod Moyses fuerit simul & Pontifex & Princeps politicus, idq; ad tempus, nempe quousq; non fuisset consecratus Aaron: Sed.

Resp: Rarò miraculò id factum dicit Calvinus, non probat; Illudnè rarum miraculum dicendum, cujus exemplum luce clarius videmus in Melchisedech, Heli & Machabæis, ac aliis. Quod autem addit: id esse factum ad tempus, falsum esse ostendit S. Aug: q. 23 in Levit: ubi dicit: Eodem tempore ambos fuisse Pontifices Moysen & Aaronem, & patet ex eo, quod deposuit Aaronem, quem consecraverat, tanquam Pontifex Levit: 8. consecraveritq; Eleazarum filium ejus in locum Patris. Num: 20.

Resp: 2. ad 2. argum. Dominum non prohibere Episcopis dominatum, qualis esse potest Regum & Principum piorum sed qualis est Regum ignorantium DEUM, qui tyranni potius sunt, quam Reges.

AR-

ARTICULUS V.

De præeminentia S. Pontificis supra Concilium generale.

Agimus hic non solum contra Hæreticos verum etiam contra quosdam Catholicos, qui negant Pontificis præminentiam supra Concilium generale. Porro hic non est quæstio de Concilio generali, ut complectitur Episcopos & simul S. Pontificem; sic namq; citra omne dubium Concilio superior non est, alioquin se ipso foret Superior, imo Concilium capiti junctum eo modo est quid magis saltem extensive; cum & caput & membra Ecclesiæ sic complectatur; sed procedit quæstio, de Concilio, prout solos Episcopos coadunatos dicit, Pontifice sive adsit, sive non, non computatò.

Dico: Summus Pontifex est auctoritate & jurisdictione omni Concilio superior. Ita communiter Theologi contra Gallos quia tempore Concilii Constantiensis oppositum tenent, & est secunda propositio famosæ declarationis Gallicani Cleri 1682.

Prob: i. Nequit esse minor auctoritas

tas S. Pontificis, in lege Evangelica, quam fuerit S. Sacerdotis in lege Moy-
saica; atqui summa potestas erat penes
Summum Sacerdotem, qui in Ponti-
ficali Officio erat constitutus, quantum-
vis ferret sententiam in magno Conci-
lio Judæorum *Sanhedrim* dicto, nec a
Summo Sacerdote dabatur appellatio
ad Concilium, ut constat Deut: 17.
*Qui autem superbierit nolens obedire Sa-
cerdotis Imperio, qui eò tempore ministrat
Domino Deo tuo, & decreto judicis, mo-
rietur homo ille.* Notanda verba illa: non
dicitur, qui noluerit obedire Concilio
Sacerdotum, sed *Sacerdotis imperio*, &
nequis existimaret, quemcunq; Sacer-
dotem hic designari, additum; *qui eo
tempore ministrat Domino*; hic profectò
erat summus Sacerdos, qui solus ge-
stabat in sua veste Rationale judicii, ex
quo captabat Divina oracula, & dice-
batur gestare *Urim & Tummim* hoc est
doctrinam & veritatem; ergo.

Prob: 2. Quando Math: 16. Christus
Petro & Successoribus dixit: *Tu es Pe-
trus & super hanc petram &c.* Vel Chri-
stus intellexit Petrum solum, & ut caput

distinctum à reliquo Ecclesiæ membro, vel ut unitum & conjunctum cum reliquo Ecclesiæ corpore? Si primum, ergo Petrus & ejus Successores independenter à Concilio generali, & reliquo Ecclesiæ corpore sunt caput & fundamentum Concilii generalis, & reliqui corporis Ecclesiæ; adeoque eò superiores. Si verò secundum, tunc sequitur sensus nugatorius, Christi; verborum everfivus, nempe talis: *supra hanc Ecclesiam ædificabo Ecclesiam meam*. Deinde ovile & oves non sunt supra Pastorem, imo è contra; atqui Pontifex a Christo est institutus Pastor Ecclesiæ, per illud Joan: 21. *Pasce oves meas*; quia Episcopi quantumvis pro Concilio congregati, imo omnes fideles collectivè sumpti sunt oves Christi; ergo. Deniq; soli Petro dictum est à Christo: *Confirma fratres tuos* Lucæ 22. soli dico, non Concilio generali, seu reliquo Ecclesiæ corpori; ergo si Petrus solus, ut distinctus à reliquo Ecclesiæ corpore debet confirmare Fratres, & quidem omnes collectivè sumptos, nimirum Episcopos & omnes fideles, cum omnes etiam in
Con-

Concilio generali possint errare, si Papa illud non confirmet; siquidem multa Concilia errasse compertum est & exploratum; ut alibi dictum, & infra dicetur; erit Conciliô superior, & ex consequenti ejus Successores.

Prob: 3. Summi Pontifices palam, & nemine reclamante supremam potestatem exercuerunt supra Concilia generalia, nam ut art: preced: dictum quibusdam, iis plerisq; definiendi regulam præscripserunt, ut Ephesino I. Constantinopolitano III. & IV. Calcedonensi, Nicæno II. quorundam Acta resciderunt, ut Calcedonensis post 6tam Actionem, maximè quæ spectant privilegia Sedi Constantinopolitanæ concessa; quædam irritaverunt tota, ut Ephesinum vulgo latrocinii nomine dictum; Constantinopolitanum Jeonoclastarum, & aliud Photianum; alia suo calculô firmarunt, & probarunt; atqui hæc sunt manifesta superioris authoritatis indicia; ergo. Hinc Concilium Constant: Oecumenicum IV. Can: 3. apertè asserit: *Ne quidem a Concilio generali posse in Romanum Episcopum sententiam dici.* Concil:

Lateran: sub Leone X. sess: 11. clarissimè docet: *pencs solum Pontificem tanquam super omnia Concilia auctoritatem habentem esse, Conciliorum, indicendorum, transferendorum aut dissolvendorum plenum ius & potestatem, idq; nedum ex S. Scripturæ testimonio, & dictis Sanctorum Patrum, sed propria etiam eorundem Conciliorum confessione constare; ergo.*

Confirm: 1. Non minùs S. Pontifex est auctoritate superior toti Ecclesiæ, quam Episcopus toti Diæcesi; atqui Episcopus est Diæcesanis superior; ergo.

Confirm: 2. Summus Pontifex est Christi Vicarius, ut fatentur omnes Catholici, quod dici non potest de Concilio; cùm enim repræsentet Ecclesiam, debet potius dici Vicarius Ecclesiæ; atqui Christus habet auctoritatem in universam Ecclesiam, ejusq; membra tam divisim, quam coniunctim; ergo & ejus Vicarius. Patet conseq; tum quia quæ Christo potestate sunt propria, sunt Petro, ejus Vicario cum ipso participatione communia, ait S. Leo Serm: 5. de Anniv: Assump: Tum quia, si Concilium, quod est Vicarius Ecclesiæ, esset supra Chri-

Christi Vicarium; Ecclesia foret supra Christum, principale enim secundum jura non est deterioris conditionis, quam accessorium; atqui hoc dicere est impium; ergo.

Confirm: 5. Ex communi antiquorum conciliorum, ut Romani sub Sylvestro, sub Symmacho, Leone III. ut mittam Sinuessanum, si revera extitit in causa Marcellini, voce: *Papam secus primam Sedem à nemine judicari, nullius judicio esse subiectum extra causam hæresis, à solo Deo posse judicari, ne quidem à toto Clero;* ergo concilium non est supra Papam, alias posset Papam judicare.

Confirm: 4. Papa non accipit suam potestatem ab Ecclesia vel Concilio, sed immediatè a Christo Domino; ergo non dependet a Concilio, neq; subjacet Decretis Concilii generalis. Nec valet, si dicatur: Hæc & similia intelligenda esse de omnibus fidelibus in particulari, seu seorsim sumptis, non in Concilio adunatis, quibus S. Pontifex subjicitur, eo fere modò quò Generalis est caput ordinis sic, ut omnes Religiosi seorsim & distributivè teneantur illi obedire, ipse

tamen Capitulo congregato subjicitur, & ad ejus leges adstringitur.

Contra namq; est: Caput aliis membris non solum seorsim sumptis, sed etiam simul sumptis superi9 est, si rationem capitis non à membris, sed ab alio superiori habeat; idem dic de Pastore, Patre, & Duce; atqui S. Pontifex, quod sit Caput, Pastor, Pater, Doctor, & Dux, non habet à membris &c. hoc est fidelibus, sed immediatè a Christo; ergo. Unde paritas non est cum Generali alicuius Ordinis, quia hic habet suam potestatem a Capitulo, & quidem restrictam, non verò immediatè a Christo.

Huc etiam spectat propositio ab Alexandro VIII. anno 1690. 24. Augusti damnata num. 29. *Futilis & toties convulsa est assertio de Pontif: Romani supra Concilium Oecumenicum authoritate, atq; in fidei quæstionibus decernendis infallibilitate.* Quâ propositione supposita sic arguo: Judicium S. Pontificis de aliquo dogmate est infallibile secundum Gallos, si a majori saltem parte Ecclesiæ recipiatur; atqui judicium Alexandrinum de lauda-

ta propositione a majori parte Ecclesiæ recipitur, nempe ab omnibus iis, qui docent Pontificem esse supra Concilium generale ejusq; infallibile judicium extra Concilium defendunt; hi enim sunt, ferè omnes præter Gallos, & ex his non pauci cum primis sentiunt; ergo.

Objic. 1. Appellatio a Judice uno ad alterum est indicium, quod alter sit superior; atqui sæpius facta est appellatio ad Concilium futurum; sic Philippus pulcher Rex Franciæ appellavit a Bonifacio VIII. Anno 1303. Universitas Parisiensis ab Innocentio VIII. anno 1491. & a Leone X. an. 1517. Quidam Galliæ Episcopi Anno 1717. a Clemente XI. occasione Constitutionis famosæ *Unigenitus*; ergo.

Resp. dist. maj. Appellatio iniusta, invalida & de facto a Judice &c. *nego.* de jure *conc. dist. min. nego conseq.* Hujusmodi appellationes fuerunt frivolæ, contra Canones, & prohibitæ sub pæna Excommunicationis a Calixto III. Pio III. Sixto IV. &c. & declaratæ nullæ, & invalidæ, prout etiam illa quorundam Galliæ Episcoporum facta Anno 1717. fu-

fuit anno sequenti 1718. efficaciter repulsa a Clemente XI. per Breve *Pastoralis Officii*, quò declaravit, omnes cujuscunq; status sint, qui præfatæ Bullæ *Unigenitus* omnimodam obedientiam non præstant, esse à Romana Ecclesia segregatos. Quorsum hæ appellationes tendunt? Vel enim fierent à Papa ad Concilium cum Papa conjunctum, ut iam art. præc. dictum; vel a Papa disiunctum. Si alterum, tunc appellatio fieret ad Concilium acephalum & illegitimum, consequenter ad Judicem nullius auctoritatis. Si primum, tum fieret a Papa ad Papam, & ad talem Judicem, qui nunc non est, & probabilissimè nunquam erit, quamdiu partes litigantes vivunt. Cum enim Concilium generale rarissimè & nonnisi maximis difficultatibus fractis congregari possit, quid aliud habet pro fine ejusmodi appellatio (dato gratis quòd justa foret, qualis revera non est) quam perditæ causæ moram & asylum quærere, eludere sententias, & lites reddere immortales. Aliunde taliter appellantibus facile foret contra Concilium excipere dicendo, illud non esse legitimum,

mum, liberum, a Spiritu S. directum. Hoc namq; à Luthero practicum sci-
mus. Hic enim Hæresiarcha primo ap-
pellavit à Cardinali Cajetano Legato S.
Pontificis ad Pontificem ipsum, deinde a
Pontifice malè informato, ad eundem
melius informandum, tum à Papa ad
Concilium generale, quod nunquam
coadunandum credidit; & ut vidit con-
tra spem suam Concilium Tridenti: con-
gregatum, mille exceptiones excogi-
tavit, cum hæ ipsi benè non cederent,
à Concilio ad scripturam appellavit, ab
hac ad instinctum internum, & sensum
proprium, adeoq; ad seipsum, sic deniq;
taliter appellantes, tam ineptè, quam
iniquè seipsos Constituunt Judices.

Instabis Concilium Constantiense ses.
4. & 5. statuit: Quod Synodus in Spiri-
tu S. congregata, legitimè Concilium
generale faciens. Ecclesiam *universalem*
repræsentans, potestatem immediatè à Chri-
sto habeat, cui quilibet cujuscunq; status, vel
dignitatis etiam Papalis existat, obedire tene-
atur in his, quæ pertinent ad fidem, & ex-
tirpationem dicti Schismatis (de tribus Pon-
tificibus Gregorio XII. Joanne XXIII.

&

& Benedicto XIII. pro Papatu contententibus) & *ad reformationem Ecclesiæ in Capite & membris*; ergo Concilium est supra Papam.

Resp. Hæc conclusionem nullo modo infringere. Neq; enim negamus a Concilio posse ferri sententiam in Papas solum probabiles, dubios, vel schismaticis aut hæreseos labe aspersos. Dubii certo erant eo tempore præfati tres Pontifices de Papatu contententes, hinc providè Patres Constantienses sua Decreta de præeminentia Concilii supra Pontificem restringunt ad casum præsentis Schismatis. At verum & certum Pontificem, hoc est; qui talis ab Ecclesia communiter agnoscitur, subjectum esse Concilio, pernegamus. *Adde* laudatas sessiones 4. & 5. ubi tam ampla potestas attribuitur Concilio non esse approbatas a Martino V. ibidem electo, qui solum ad instantiam Oratoris Regis Poloniæ probavit ea, quæ conciliariter decreta erant, idq; in materia fidei contra Viclefistas & Hussitas. Imo Martinus V. in Bulla confirmationis Concilii Sess. ult. hoc est 45. apertè pronuntiat.

Pa-

Papam canonicè electum, in Ecclesia supremam habere potestatem. Eadem responsio valet ad Pisanum (si tamen est verum) Concilium, quod deposuit Gregorium XII. & Benedictum XIII. Hinc distingui sive explicari potest arg. Concilium universale habet potestatem supra Pontificem dubium, & in casu Schismatis, *conc.* certum & ut talem ab Ecclesia agnitum, *nego.*

Subsumes. Bulla confirmatoria Concilij Constant. Sess. ult. promulgata, vel est fictitia, vel nunquam habuit vim in Ecclesia; ergo ex illa nihil potest concludi pro præeminentia S. Pontificis supra Concilium. *Prob. Ant.* 1. Gerson hanc Bullam non vidit, sed tantum de ea loquitur ex auditu. 2. Nullus Bullarum collector de ea facit mentionem. 3. Quia in ultima sess. Concilii Poloni occasione libri Falkenbergii, cujus damnationem in publica sessione petebant appellârunt ad futurum Concilium, nec Papa eos redarguit de transgressione Bullæ; ergo.

Resp. ad 1. Gerson non dicit in terminis se hanc Bullam non vidisse, dicit enim:

enim: *Ubi refertur hæc assertio sicut dicitur, & videtur in Canonum litera manifestè fundari.* Et dato, non viderit, saltem illi constabat certò eam extare, siquidem promulgata fuerat in publico & generali Consistorio, ut ipse refert: *Constantiæ 6. Idus Martii Pontificatus sui anno 1.* hoc est 10. Martii 1418. *Ad 2.* Plures sunt aliæ Pontificum Constitutiones, quæ non reperiuntur in Collectionibus Bullarum, quid mirum? Si hæc non inveniatur. *Ad 3.* Poloni non tam a Papa, quam ab ipso Concilio appellabant, petebant enim libellum seditiosum Falkenbergii in Sessione publica, per Sacrum Concilium, seu publicè damnatum pronuntiari, antequam Concilium dissolveretur. Item non appellabant à iudicio Pontificis aut Concilii, sed à denegatione iudicii. Tandem appellabant ad Concilium legitimum, cui Papa præsideret, sicq; a Papa ad Papam appellabant, quod est extra quæstionem nostram, de qua hic.

Cæterum quidquid sit de ista Bulla, in qua una non fundatur nostra assertio, saltem ex his, quæ in Tractatu *Quomodo*

do & an liceat &c. tradit Gerson, colligimus, quod ne ipse quidem decreta sess. 4. & 5. Concilii Constant: pro firmis & inconcussis, quibus omnibus parendum esset, putaverit, cum Tractatum his concludat: *Hæc autem dicta vel argumentata sunt magis ad veritatis inquisitionem, quam ad alicujus (præsertim Sanctissimi Domini Martini Papæ) reprehensionem.* Si Decreta sess: 4. & 5. Concilii Constant: pro fidei decretis ab omnibus in omni casu certo tenendis habuisset, sic ne locutus fuisset? Inquiriturne veritas, quando certò habetur?

Dices: Atqui Concilium generale habet potestatem super Pontificem certum; ergo. *Prob: subs.* Concilium Basiliense sess: 2. Definit Pontificem subjacere Concilio, postea Eugenium IV. citavit, suspendit, tandem deposuit; ergo.

Resp: Concilium Basiliense convocatione & inchoatione legitimum, mox acephalum sine Capite, Schismaticum non communicando capiti, seditiosum nullius Authoritatis fuit Conciliabulum, ut declaratur in Concilio Lateran: sub

Leo-

Leone X. sess: 11. ab Ecclesia reprobatum. Tempore citatæ sessionis Pontifici injuriosæ jam fuit solutum & translatum *Ferrariam*, deinde *Florentiam* ab Eugenio IV. ubi ipse præsidebat. Verbo: pacis Ecclesiasticæ procurandæ gratia Nicolaus V. quasdam solum approbavit Constitutiones, ibidem circa beneficia Ecclesiastica editas.

Objic; 2. Innocentius III. rogatus à Philippo Augusto Galliæ Rege, ut dissolveret Matrimonium contractum cum Sorore Regis Daniæ, respondit: *absq; deliberatione* Concilii se in hac re nihil posse; ergo agnovit Innocentius Synodum plus posse, quam ipse posset.

Resp. Hoc dixit Innocentius ob meram excusationem & honestum effugium. Cum enim Regina jurasset Matrimonium fuisse consummatum; nihil plus poterat, in hoc negotio Concilium quam S. Pontifex; neq; tunc erat congregatum, aut congregandum Concilium.

Objic. 3. SS. Pontifices sæpè requisierunt approbationem & confirmationem Conciliorum ut necessariam suis decretis,

tis, & in Conciliis non solent definire, nisi approbante sacro Concilio; ergo.

Resp: 1. Retorq; argum: Concilia, ut Nicænum I. a Sylvestro, Constantinop: I. a Damaso, Ephesinum a Cælestino, Chalcedonense a Leone, & sic de aliis Orientalibus, novissime Tridentinum à Pio IV. petierunt approbationem & confirmationem; ergo sunt minoris potestatis. *2. dist: ant:* Requisierunt approbationem, quæ sit authoritatis dantis robur, & firmitatem decretis Pontificis, *nego.* Simplicis assensûs & adhæSIONis qualem dare possunt æquales æqualibus, imo inferiores superioribus, *conc.* Dum ergo dicunt ejusmodi approbationem necessariam, non intelligunt necessitatem ad certitudinem definitionis, sed ad majorem solemnitatem; ut efficacius frangatur hæreticorum protervia, & motus compescantur.

Instabis. Passim profitentur Pontifices se adstringi canonibus Conciliorum; atqui Superiores non adstringuntur legibus inferiorum, ergo.

Resp: dist. mai. Canonibus, quæ pertinent ad jus Divinum & naturale, *conc.*

ad

ad jus Ecclesiasticum tantum, *subdist.* adstringuntur vi coactivâ, *nego.* vi directivâ, inquantum eorum statui conveniunt, *conc.*

Dices. Pontifices in sua conservatione jurant, aut saltem olim jurabant se observaturos canones Conciliorum, ergo.

Resp: nego consequi: Obligatio enim juramenti est ad DEUM tantum, nec arguit subjectionem ad homines. Tandem Pontifices ex juramento tenentur absolute servare Canones ad jus Divinum & naturale spectantes; quantum ad eos, qui jus Ecclesiasticum concernunt, patet, quod non intendunt ita strictè se obligare, cum quotidie in eis dispensent.

Objic. 4. Papa est pars Ecclesiæ; imo Filius per Sacramentum Baptismi ab ea genitus; atqui pars est minor toto, cujus est pars, & Filius minor Matre; ergo.

Confirm: Ex illo vulgato S. Hieron: *Si auctoritas quæritur, orbis major est urbe.* Cap: *Legimus* d. 93.

Resp: dist: maj: Papa est pars Ecclesiæ quo ad partialitatem jurisdictionis, quasi haberet jurisdictionem tantum partialem in aliquam partem Ecclesiæ, *ne.*
go.

go. Est pars Ecclesiæ principalissima & Caput ejusdem, in quo residet plenitudo potestatis & jurisdictionis, *conc.* Dist: min: atqui pars est minor extensive, hoc est, in Ecclesia sunt præter caput, etiam membra, nempe reliqui fideles, *concedo.* Pars principalissima seu caput, quod est Papa, est minor intensive, hoc est, minor potestate, auctoritate, & jurisdictione, ac infallibilitate respectu Ecclesiæ, sive Concilii sine Papa sumpti, *nego min. & consequ:* Ad 2. dist: Papa, ut est persona privata est filius Ecclesiæ, *conc:* Qua talis, *nego.* Sic enim est Ecclesiæ Pater, Princeps, & Pastor universalis.

. *Ad confirm:* Id dixit S. Hieronymus non comparando auctoritatem Pontificis cum auctoritate Concilii, sed comparando consuetudinem Urbis Romæ, cum consuetudine aliorum Regnorum; vultq; alia Regna non teneri usibus suis abdicatis, sequi usum Urbis Romæ, secundum quem Diaconi præferebant se Presbyteris.

CONSECTARIUM.

Cūm verus & certus Pontifex, hoc est legitime electus ab Ecclesia, aut saltem acceptatus, & ut talis agnitus superemineat Concilio, illius judicio non subjicitur; quia superior nequit subjici judicio inferioris. Possunt aliunde dari casus, in quibus concilium legitime congregatum habeat potestatem non tam deponendi & judicandi, quam nullum esse declarandi. Porro hujusmodi casus 1. est hæresis, si Papa incidat in hæresim exterius manifestatam in cap: *si Papa* dist: 40. 2. Perpetua amentia, quia talis Pontifex nullo modo potest prodesse Ecclesiæ, utpote civiliter mortuus. 3. Schisma, cū pluribus electis, Ecclesia est dubia, quinam sit legitimus, ut contigit tempore Concilii Constan. 4. Si Papa est invalidè electus, aut violenter intrusus, tunc enim nisi Ecclesia acceptando liberè suppleat defectum nullus est Pontifex. 5. Si sit noxius (excepta hæresi) Ecclesiæ, censent alii ipsi esse resistendum, at S. Thomas respondet: *recurrendum esse ad DEUM. qui eum emendet, aut de medio subtrahat.*

6. Quando Pontifex spontè renuntiat Papatui, cujus habemus exemplum in S. Petro *Cælestino V.* Nec obstat quod potestas Papalis tribuatur immediatè DEO, nam tribuitur dependenter a Personæ electæ consensu, adeoq; contraria voluntate potest dissolvi, seu tolli; sicut gratia a DEO infusa tollitur voluntate humana peccante. Nec Papatus est Ordo, qui imprimat Characterem, sed est potestas jurisdictionis in totam Ecclesiam.



ARTICULUS VI.

Utrum sit de fide Pium VI. esse S. Pontificem Petri Successorem, & Christi Vicarium?

Nullus Catholicorum est, qui non certò teneat Pium VI. nunc Ecclesiæ præsidentem, vel quemcunq; alium actû sedentem esse S. Pontificem, sed diverso gradû certitudinis. Quibusdam visum est, id esse certum certitudine morali, quibusdam certitudine Theologica, aliis communius certitudine fidei Divinæ.

Porro ut jam superius dictum, id omne esse de fide, quod est revela-

tum ; dupliciter autem aliqua veritas a Deo revelatur. 1. *immediatè in se* v.g. DEUS est unus in natura, trinus in Personis 2. *mediatè in alio* & hoc duplici modò, vel ut effectus in causa, seu proprietas in essentia, ut v.g. hæc: *Christus est risibilis* est revelata in illa *Christus est homo*, ut proprietas in essentia, seu effectus in causa; aliò modò ut pars in toto, ut hæc, *Petrus in Adam peccavit*, in illa, *omnes in Adam peccaverunt*. Vel *Christus est mortuus pro me*, in illa *Christus pro omnibus mortuus est*. Quæ revelantur mediate, ut effectus in causa, seu proprietas in essentia non sunt objectum fidei, sed assensus Theologici tantum, ut communior saltem docet. Quia effectus in causa, virtute duntaxat continetur. Quæ autem revelantur ut partes in toto, sunt objectum fidei, quia partes sunt reipsa in toto, & veritas propositionis universalis per se petitur ex veritate propositionum particularium: in tantum enim propositio universalis vera est, in quantum particulares, quas continet, sunt veræ.

Dico:

Dico: Divina Fide credi debet Pium VI. esse verum & legitimum Summum Pontificem, Vicarium Christi, Petri Successorem, & universalis Ecclesiæ Caput.

Prob: 1. De fide est omnem Romanum Pontificem in Cathedram Petri legitimè assumptum, & ab Ecclesia acceptatum esse verum illius Successorem & Christi Vicarium; ergo etiam est de fide Pium VI. canonicè electum, & ab Ecclesia acceptatum talem esse, adeoq; verum S. Pontificem. *Ant: patet* ex dictis art: 4. & 5. ejus oppositum error est Lutheri proscriptus a Leone X. Constit: *Exurge*, ubi damnatur hæc propositio: *Rom: Pontifex Petri Successor non est Vicarius Christi super omnes totius mundi Ecclesias ab ipso Christo in B. Petro constitutus. Consequ: prob:* Quandocunq; propositio universalis est de fide, & revelata propter particularem, tunc hæc non minus quam illa est credenda fide Divina; atqui illa propositio universalis: *Omnis Rom: Pontifex acceptatus, ab universa Ecclesia in Cathedram Petri, est illius Successor & Chri-*

Isti Vicarius est de fide, & propter hanc particularem: Pius VI. est acceptatus ab Universa Ecclesia in Cathedram Petri ut Successor. &c. est revelata; ergo si propositio laudata universalis est de fide, etiam illa particularis erit sic credenda, Mai. à nullo Catholico negatur. Minor est etiam certa. Cum enim sit revelatum, & de fide, Christum instituisse Ecclesiam usq; ad consummationem sæculi duraturam, pariter est revelatum, & de fide, quod Successor Petri, quem fundamentum posuit Pastorem & caput, gaudeat eodem privilegiô. Aliundè partes hujus propositionis universalis: Omnis Romanus &c. sunt, & hic, & ille acceptatus, &c. Consequ: patet ex prænotatis.

Confirm: Hæc propositio: Concilium Triæntinum acceptatum ab Ecclesia pro Oecumenico est regula fidei, est de fide: quia continetur ut pars in toto, in hac universali de fide: Omne Concilium acceptatum ab Ecclesia pro Oecumenico est regula fidei; ergo a pari de Pontifice. Nec.

Dicas: Ista propositio particularis:
Pius

Pius VI. acceptatus in Successorem Petri est S. Pontifex: non continetur in hac universali; Omnis homo acceptatus ab Ecclesia universali in Successorem Petri est S. Pontifex, nisi supponendo quod Pius VI. fuerit rite electus &c. atqui non est revelatum, nec de fide, quod fuerit rite electus &c. sed hoc solum scitur ex hominum testimonio; ergo.

Confirm: Est de fide, quod omnis hostia rite consecrata sit adoranda; non est tamen de fide quod hæc hostia sit adoranda, quia non est de fide, quod sit rite consecrata.

Resp: nego maj. Hæc enim suppositio non habet locum in casu nostro, neq; pro propositione universali, neq; pro particulari. Quia cum Ecclesia sit infallibilis, in acceptanda fidei regula, fueritne rite facta electio vel non, hoc ipso, quod Ecclesia Pontificem electum acceptat, est verus Pontifex & fidei regula, suppletq; Ecclesiæ acceptatio defectum, qui potuit irrepere in electione. Et si quidem Canones videntur dicere oppositum, intelligendi sunt de electione ante acceptationem Ecclesiæ. Unde.

Ad

Ad Confirm: Disp: est. Ecclesia enim non declarat hanc hostiam esse consecratam, atq; contineri sub universali, sicut ipso facto declarat Pium VI. esse acceptatum ab Ecclesia in Petri Successorem, sicq; contineri sub universali. Insuper cum consecratio hujus hostiæ sit quid particulare non pertinens ad regimen universale Ecclesiæ, non esset infallibilis Ecclesia, in hoc declarando, neq; ejus declaratio posset supplere defectum consecrationis, ut autem propositio particularis contenta in universali de fide sit quò ad nos, debet nobis certò constare, eam contineri in universali de fide.

Repones. Hunc hominem Pium VI. esse Petri Successorem & Pontificem constat ex hoc discursu humano: *Omnis homo acceptatus ab Ecclesia in Petri Successorem est S. Pontifex; atqui Pius VI. est acceptatus ab Ecclesia in Petri Successorem; ergo est S. Pontifex;* atqui assensus seu cognitio veritatis, quæ innititur discursui humano, non est fidei; Minor enim non est de fide, proindè nec Conclusio, ergo.

Resp:

Resp: dist: min: Assensus veritatis quæ innititur discursui humano ut causæ moventi ad assentiendum veritati, non est fidei, *conc:* ut causæ applicanti motivum assentiendi seu ipsam revelationem, non est fidei, *nego.* Non repugnat ergo cognitioni seu assensui fidei, quod supponat aliquem discursum, non tanquam motivum, propter quod debeatur assensus, sed per quem revelatio universalis, huic particulari subjecto applicatur; ut jam supra dictum est.

Prob: 2. De fide est, Definitiones Ecclesiæ & Conciliorum Oecumenicorum à Pontifice approbatorum, imo (ut supra dictum) cujuslibet Pontificis canonicè electi, & ab Ecclesia acceptati, esse infallibilis veritatis; cum Papa sit infallibilis in definiendo ex Cathedra; atqui infallibilis veritatis non forent, nisi de fide esset hunc numero hominem canonicè electum & ab Ecclesia acceptatum esse verum Pontificem; cum nec Ecclesia nec Concilium habeant infallibilem authoritatem definiendi in rebus fidei & morum, nisi ratione Capitis; imo nec ispe Pontifex
ali-

aliquid ex Cathedra definire potest, nisi sit legitimum Caput, Successor Petri & Christi Vicarius, eo quod sub hoc solum respectu verificetur illud: *Pasce oves meas, & Tu es Petrus* &c. ergò ut infallibilis veritatis sint definitiones Ecclesiæ, Conciliorum & Pontificum, fide Divina credi debet, hunc numerò hominem, à quo ipsæ procedunt & confirmantur esse verum Christi Vicarium, Petri Successorem & totius Ecclesiæ Caput.

Confir: Si fide non esset credendum hunc numerò hominem Pium VI. esse verum Papam & Christi Vicarium, nequæ taliter credendum foret, illius Prædecessorem fuisse verum Papam & Christi Vicarium; & sic de tota retro serie Pontificum fide Divina credi non deberet, eos fuisse legitimos Papas, ex consequenti fide Divina credi non deberet, ullum ex Conciliis Oecumenicis etiam ab hominibus acceptatis esse legitimum, & infallibilem fidei regulam; cum nullum Concilium sit legitimum, nisi à vero Papa, & Christi Vicario approbatum; nullum autem ex omnibus

Pa-

Papis, qui Concilia Oecumenica approbarunt, fide Divina credi deberet, fuisse legitimum; imo nec fide Divina credi deberet dari veram Ecclesiam Catholicam Romanam in individuo, cum hæc esse non possit sine legitimo Capite visibili in individuo & determinato; atqui hæc contrariantur fidei Catholicæ. Ex his.

CONSECTARIUM.

Pium VI. esse legitimum S. Pontificem, Successorem Petri, Christi Vicarium est revelatum mediata in toto, non est tamen revelatum, quod sit baptizatus &c. Ex hoc enim quod aliquid sit revelatum, non sequitur quod debeant esse revelata, quæcunq; sunt necessario cum illo connexa; quinimò in hoc consistit discursus Theologicus, quod versetur circa ea, quæ necessario connectuntur cum revelatis; sic vg. quod Christus sit homo est revelatum, & quia risibilitas est necessario connexa cum homine, inde inferitur, quod Christus sit risibilis certitudine Theologica, sed non fidei. At in casu controverso re-

velatio spectat tantum personam acceptatam in Pontificem, non autem condiciones, ad id requisitas, sed ex revelatione circa personam facta, consecutione & certitudine Theologica inferuntur. Unde cum ante acceptationem Pii VI. in Pontificem, esset moraliter tantum certum, quod fuerit baptizatus, jam nunc post acceptationem est certum certitudine Theologica. Sit paritas: Definitio lata a Concilio, quod Ecclesia acceptat pro Oecumenico, est revelata & pertinet ad fidem ad eam necessariò requiritur, quod res definita fuerit prius maturo examine discussa, & quod Judices definientes fuerint veri Episcopi. Neutrum tamen est revelatum, & de fide, sed quia est de fide, quod Ecclesia errare non possit in acceptando Concilio Oecumenico, & definitio ejus non possit esse falsa; inde infertur ut certum certitudine Theologica, omnia necessaria adfuisse, & discussionem sufficientem fuisse adhibitam, & Judices definientes in numero competenti saltem fuisse veros Episcopos.

§. I.

Synopsis Historica

De origine S. R. E. Cardinalium & Congregationum.

Cardinales ex mente S. Antonini sic à *Cardine* dicti, quod sicut in cardine fundatur, quiescit, & vertitur ostium, ita in Cardinalibus, eorumq; consiliis firmatur, volvitur & regitur universalis Ecclesiæ status; vel ut placet aliis, cum Ecclesia Christi sit domus DEI, & unaquæq; domus ostium habeat, & cardines: ita Ecclesia Christi habet suum ostium & cardines. Est autem Ecclesiæ Christi ostium summus Pontifex, Consiliarii vero illi collaterales, quorum consiliis ipse juvatur, cardinum ejus vices gerunt, unde *Cardinales* meritò nuncupantur. Variis opinamentis disputant Doctores super origine & institutione Cardinalium. Sunt qui contendunt cum Cardinali *Turrecremata* lib. 1. de Ecclesia cap. 80. & aliis, institutionem Cardinalium juris Divini esse; at illicò ii Authores a cæteris convelluntur; certò quippe certius est Romanum Cardinalatum nisi a Rom. Pontificibus

ortum duxisse. Sunt deinde, qui ejus originem a *S. Petro* repetunt, qui, ajunt, *S. Linum, Cletum, & Clementem* adlegit, quasi Socios & Administros, pro gubernio universæ Ecclesiæ, quemadmodum Successores Pontifices, in eum finem Cardinales adlegerunt; Alii eam revocant ad *Cletum*, quod Romæ Presbyteros ad viginti quinque numerum auxerit. Alii ad *Evaristum* quod titulos in urbe diviserit Presbyteris, quibus præficerentur Cardinales, ait Baronius, & septem Diaconos constituerit, qui custodirent Pontificem prædicantem propter stylum veritatis, addiscendum in ministerio prædicationis, ait Blanchinus in Notis ad *Anastasium* Biblioth. Alii ad *Hyginum*, quod Clerum distribuerit in gradus. Tum alii ad *Fabianum* quod ad normam Apostolorum regiones Urbis septem diviserit Diaconis, dictis propterea *Regionariis*. Alii ad *Dyonisium*, quod Presbyteris itidem diviserit Ecclesias, atque cæmeteria; Parochias & Diæceses in Urbe instituerit. Alii ad *Marcellum*, quod in Urbe titulos XXV. instituerit quasi diæceses propter baptismum

smum & pænitentiam multorum. Et hæc omnia ex *Anastasio* Biblioth.

Sed & alii hujus dignitatis originem, aut saltem perspicuam innovationem referunt ad tempora sanctorum *Silvestri* & *Gregorii M.* quia nempè in Concilio Romano, sub *Silvestro* in Constituto ejusdem *Silvestri* hæc habentur cap. 6. *Et Diaconi Cardinales Urbis Romæ septem.* Et cap. 7. *Ita autem Silvester voce dicebat ad Coepiscòpos, ut a Diacono ad Lectorem omnes subditi essent Diacono Cardinali Urbis Romæ viro Reverendissimo in Ecclesia, repræsentantes ei honorem.* Ac deinde *Gregorius M.* Romanæ E. Cardinalium sæpè meminit in Epist: vg. lib. 5. Epist. 11. lib. 11. Epist. 34. Hinc vero simile est à *Silvestro* & *Gregorio M.* eos vocari Cardinales, qui jam inde a primo vel secundo sæculo *Titulis* seu Ecclesiis præerant Romæ tanquam *Primicerii*; nec alios, crediderim, *Silvestrum* hoc novo honore condecorasse.

Verum quæ est origo jurisdictionis Cardinalitiæ, tam amplæ, ut in suis titulis etiam leges ferendi potestatem habeant, & alia multa agendi? Hanc cer-

tè non habuerunt Cardinales, quando hæc dignitas creata est. Ita res se habet, ait Cardinalis *Albitius* insignis hujusce juris Patronus, sed *ea crescente, quia functionibus Papæ assistebant Cardinales, crevit & in titulis authoritas; ideo non ut simplices Parochi, seu Plebani, sed pinguiori jure administrarunt.*

Jam verò si ex incremento dignitatis præfati juris accessio dimetienda sit, insigniter illud eluxit jam VIII. sæculo circa an. 769. sub Stephano III. ut placet Baronio in Annal. ad præfatum annum, cum *Stephanus* ab aliis Romanæ Metropoleos Episcopis Suffraganeis, septem pinguiores discrevit, quos Cardinales creavit injungens, ut in Dominicis diebus Mysteria successivo ordine celebrarent, in Lateranensi Ecclesia. Alii hanc septem Episcoporum in Collegium Cardinalium assumptionem ad tempora Honorii II. circa Annum 1125. Alii ad tempora S. *Petri Damiani* Card. & Episcopi Ostiensis circa Annum 1157. referunt.

Hoc ipso tempore circa Annum 1159. In Concilio Rom. sub Nicolao II. consti-

stitutum est, ut penes Card. Episcopos esset summa authoritas dirigendi electionem S. Pontificis: *In primis Cardinales Episcopi diligentissimè de electione tractantes, mox ipsi Clericos Cardinales adhibeant.* &c. Ex decreto apud Baronium ad Annum dictum. Quod benè notandum, in subscriptionibus ejusdem Concilii eminent jam Cardinales Episcopi supra cæteros Archi-Episcopos, & Episcopos. Ac sicut jam fermè Præsules cæteri in sueverant, ut cederent Episcopis Cardinalibus, ita fluxû brevi temporis effectum est, ut & cæteris locum darent. Vide *Natalem Alex. Hist: sæculi XI. cap. VII. Art. II. Thomassinum de veteri & nova Ecclesiastica Disciplina Tom. 1. p. 1. l. 2. c. 115: Sandinum in Vitis S. Pontificum, sive Notis ad vitas eorum.*

§. 2.

De Prærogativis Cardinalium.

Porro prærogativæ Cardinalium sunt multæ. 1. A tempore III. Lateran. Concilii sub *Alexandro III. Anno 1179.* excluso omnino Clerô, Imperatore, &

Populô ab electione S. Pontificum, totum jus illos eligendi, ad Collegium Cardinalium translatum est, ibiq; pariter statutum, ut duæ tertiæ partes Cardinalium in unum eligendum conspirarent, alias non valeret electio v.g. Casu quod sint 60. Cardinales in Conclavi, ut modo post tempora Concilii Lugdun. II. vocatur, ut electio Pontificis valida sit, 40. saltem Cardinales debent in unum consentire. Id ita decretum occasione *Octaviani* Pseudo-Pontificis, & de Papatu contendentis cum ipso *Alexandro III.* vero ac legitimo Pontifice, utpote a 17. Cardinalibus electo, dum *Octavianus* duorum tantum niteretur Cardinalium suffragiô, & Imperatoris *Friderici* potentiâ & auxiliô. Imperatore victô, in laudato Concilio decretum est Can: 1. Ne ullus deinceps verus haberetur & legitimus Pontifex, nisi esset à duabus tertiis Cardinalium partibus electus. 2. ut ex eorum Collegio eligatur S. Pontifex, ut statutum Rom: in Concilio sub *Stephano III.* Anno 769. coactô contra ausum temerarium *Constantini* Pseudo-Pontificis, qui

qui ex Laico per vim ope *Desiderii* Longobardorum Regis Summum Pontificatum invasit, nullâ Canonica formâ servatâ, a Prænestino Episcopo consecratus ut Pontifex apparuit contra Paulum I. legitimè electum. Hinc decretum ne in Papam eligeretur, nisi gradatim Diaconus vel Presbyter esset inauguratus, seu in *Apostolatûs culmine*, unus è *Cardinalib9 Presbyteris aut Diaconis censeretur*; hoc tamen semper observatum non est, ut patet legenti historiam Ecclesiasticam in *Silvestro II.* Anno 999. *Leone IX.* Anno 1049. *Urbano II.* 1088. *Urbano IV.* 1261. *Clemente V.* 1305. *Urbano V.* 1362. *Gregorio X.* *Cælestino V.* 3. Sicut solis Cardinalibus competit eligere S. Pontificem, ita & Cardinales creare competit soli Pontifici. 4. Post Pontificem primum locum teneant, ante Patriarchas etiam, quod jus competere Cardinalibus definitum est ab *Eugenio IV.* cùm in Conciliis *I.* & *II.* Lugdun: omnes jam factô antecederent. 5. Soli Cardinales hodiè dicuntur *Eminentissimi* ex speciali Urbani *VIII.* decreto Anno 1630. Per hoc tamen Decre-

tum non excluduntur à possessione tituli tres Spirituales Imperii Electores Trevirensis, Moguntinus, Coloniensis, Magnusq; ordinis S. Joannis Jerosolymitani Magister. Decretum statim executi Italiæ Principes, sola Respubl. Veneta contendit se non teneri, sicut nec Reges, hos novos tribuere titulos Cardinalibus ob regna suæ ditioni subdita. 6. Insuper corporis ornatu ab aliis Ecclesiæ Prælatiis secernuntur; habent enim pileum rubrum in signum constantiæ, & fundendi sanguinis pro fide, sibi concessum ab Innocentio *IV.* in *I.* Lugdun. Concilio, pervigiliò Nativitatis anno 1245. Eisq; ab eodem Pontifice datum, ut equis veherentur in Urbe, cum antea pedites incederent. Paulus *II.* Anno 1464. eis insuper concessit coccinei coloris pannum, quò equos vel mulos ornarent, dum equitarent &c. Quod numerum Cardinalium attinet, hic variis temporibus varius fuit, sub Bonifacio *VIII.* qui an. 1294. sedere cæpit, erant 20. Tempore quò Pontifices Avenione sedebant, numerabantur 30. ne plures, quam

34. in posterum extarent, statuit Concilium Constantiense sess. 20. Tempore tamen Leonis X. qui una creatione 31. creavit, fuerint 65 sub *Paulo IV.* 70. recensentur, sub *Pio IV.* 76. Tandem *Sixtus V.* speciali constitutione decrevit, ne plures aut pauciores in posterum forent, quam 70. qui numerus ad hoc tempus, sæpè est minor, nunquam major fuit. Porro ex Diaconorum ordine numerantur 14. ex Presbyterorum 50. & ex Episcoporum 6. videlicet de quibus supra, viciniore Urbis Romæ Episcopi nempe: Ostiensis, qui simul Veliternus, à tempore *Eugenii IV.* Portuensis, Tusculanus, Sabinensis, Prænestinensis & Albanensis. *Sixtus V.* sancivit, ut insignes Viri in S Th ologia Magistri ex Regularibus, & Mendicantium Ordinibus saltem quatuor non pauciores in Collegium Cardinalium assumerentur Constit. 50. *Gregorius* vero XIV. concessit usum rubri bireti Cardinalibus ex ordinibus Regularium Const: 9.

§ III.

De Congregationibus Cardinalium.

Observat autem jam laudatus *Thomas-
sinus* Cardinalium Collegium accu-
ratam esse effigiem antiquissimorum Ec-
clesiæ capitulorum. Sicut verò moris
erat Romanorum Presbyteros Diaco-
nosq; Ecclesiæ Rom: ejusdem Capitu-
lum constantes non solum consulere de
rebus ad Diæcesim vel Metropolim spe-
ctantibus, sed & de eis etiam, quæ ad
universam Ecclesiam pertinebant, ita
certum est ad eundem finem a Ponti-
fice Cardinales acciri. Inde postea na-
tæ sunt variæ Card: congregationes.

Sixtus V. circa an: 1589. confirma-
tâ Congregatione *S. Officii* sive *Inqui-
sitionis*, a *Paulo III.* erecta, & *Paulo IV.*
confirmata; & Congregatione *Signatu-
ræ gratiæ* a *Pio IV.* erectâ, alias insti-
tuit. 1. Nempe Congregationem pro
erectione Ecclesiarum & *provisionibus con-
sistorialibus*. 2. Pro ubertate *Annonæ*
Statûs Ecclesiastici. 3. Pro *S. Ritibus*
& *Cæremoniis*. 4. Pro classe paranda
ad status Ecclesiastici defensionem. 5. Pro
indice librorum prohibitorum. 6. Pro exe-
cutione

cutione & interpretatione Concilii Trid: 7. Pro statûs Ecclesiastici gravaminibus sublevandis. 8. Pro universitate Studii Romani. 9. Pro consultationibus Regularium. 10. Pro consultationibus. Episcoporum, & aliorum Prælatorum. 11. Pro viis, pontibus, & aquis curandis. 12. Pro Typographia Vaticana. 13. Pro Consultationibus negotiorum statûs Ecclesiastici. Hæ Congregationes a Sixto V. originem habent.

His demum per Gregorium XV. accessit Congregatio de *Propaganda Fide* instituta an: 1622. Congregatio pro *Examine Episcoporum* a Clemente VIII. Congregatio de *Immunitatibus Ecclesiasticis* ab Urbano VIII. Congregatio de *Indulgentiis*. Tandem Congregatio *Seminariorum*, quam Episcopi consulerent, de rebus pertinentibus ad ea, instituta a *Benedicto XIII.*

§ IV.

De Conclavi.

Est insuper præter has omnes, & alias minores, Congregatio alia omnium præcipua post obitum S. Pontificis, convo-

convocari solita, quæ vulgo dici solet *Conclave*.

Licet Cardinalium *Conclave* dici soleat celebris illa Vaticani aula sive locus, in quo 10. die post S. Pontificis obitum recluduntur Cardinales ad novam novi Pontificis electionem celebrandam; nihilominus *conclave* dicitur, etiam ipse Cardinalium *cætus*, hoc in loco vel alio reclusus, nec inde exiturus ex *Gregorii X.* decreto; nisi post novum Pontificem electum. Cum enim Clemente IV. vitâ functô Sedes Apostolica vacasset tres ferè per annos, hoc est, per biennium & Menses novem, eo quod non consentirent de Successore Cardinales; cumq; tandem Theobaldus Archidiaconus Leodiensis fuisset electus, dictus Gregorius X. cujus Festum 18. Febr: colimus, de quo a Joanne Cardinali Episcopo Portuensi compositi versus sunt intelligendi.

Papatûs munus tulit Archidiaconus unus,
Quem Patrem Patrum fecit discordia Fratrum.

Celeri Pontificis electioni consulturus Gregorius, rata jubet esse ea, quæ in id constituta sunt ab *Alexandro III.*

sta-

statuitq; ut in quacunq; Urbe contingerit mori S. Pontificem, in ea erigatur *conclave*, & decimo ab ejus obitu die, præsentēs Cardinales ingrediantur, singuli singulis contenti famulis, incipiantq; novi Pontificis electioni, operam dare, nemine expectatō. Qui superveniunt re nondum perfectā, admittantur. Nullus ad eos pateat aditus, nullum eis liceat nuntium audire, nullam accipere vel dare epistolam, neminem alloqui sub pæna anathematis. Si post tres dies ab ingressu, Pontificem non elegerint, unum duntaxat ferculum tam in prandio quam in cæna per sequentes dies quinque illis ministretur: quibus elapsis panis tantum vinum & aqua usq; ad Pontificis electionem. Hadrianus V. *statim post suam creationem* Constit: Gregorii X. *de restrictione Cardinalium in electione Papæ suspendit*. Cū verò Hadrianus post 37. dies, postquam fuisset electus, satis cessit nondū consecratus, erat enim Diaconus; Joannes XX. sive XXI. Hadriani Successor statim Constit: Gregorianam de reclusionē Cardinalium suspendit.

spensam per Hadrianum, revocavit, abrogavitq; Atq; sine clavis reclusionne, qui deinceps ei successerunt Rom: Pontifices *Nicolaus III. Martinus IV. Honorius IV. Cælestinus V.* creati sunt.

A Cælestino verò, eadem qua *Gregorius X.* causâ moto, ipsius *Gregorii X.* Constitutionem de Conclavis reclusionne renovatam & approbatam, qui ei successus est *Bonifacius VIII.* ratam habens & confirmans, lib: Decret: VI. registravit. Hæc *Pavinus* in Notis ad Platinam. Traditur etiam ab *Raynaldo* ad annum 1276. & 1289. Constit: Gregorianam de Conclavi abrogatam a *Nicolao IV.* Addubitat *Pagius* in vita hujus Pontificis. At quidquid sit ejus Successor eandem renovavit, ut dictum. *Clemens IV.* tandem reclusionne Cardinalium manente in rigore, edidit Constitutionem de Conclavi multo leniorem Gregoriana Const: nimirum Cardinalibus pro electione congregatis, duos famulos concessit Clericos, seu Laicos; in prandio & cæna, præter panem, vinum, aquam, indulgit missum carniū, piscium, seu ovorum, confectumq; ex carnibus & pisci-

piscibus embamma; insuper carnes sale conditas, herbas crudas, caseum, fructus; adiecta conditione, ne quis vesceretur ferculo alieno; eisdemq; cum in *lectis quiescendi causa, vel dormiendi esse voluerint*, permisit, *intermedia seu velamina simplicium cortinarum*. Cum secundum rigorem Constitutionis Gregorianæ inclusi, *nullô intermediô pariete seu aliô velamine omnes habitare deberent in communi*. Hæc ex Clem: VI. Constit: 5.

Hujus *Conclavis* de jure Præses est Cardinalium Decanus; Decanus autem is est, qui ex ordine Episcoporum Cardinalis antiquior est, quisq; ille sit, sive Ostiensis, sive Portuensis, Albanus, vel alius ex sex, in Urbe existens.

Tandem in Constit. 13. & 19. Gregorii XV. quas Urbanus VIII. ejus successor confirmavit Constit. 47. tres præscribuntur rationes & formæ eligendi Pontif. Romanum, quæ servantur ad hodiernam diem. Prima per *Scrutinium*, seu *Scrutinum* & *accessum*. Secunda per *compromissum*. Tertia per *quasi inspirationem*. *Amo*. Modô fit electio, si ex
par-

partibus tribus suffragiorum duæ concordent in unum vg. Sex ex novem; hoc modò suffragia daturi conveniunt Cardinales bis in singulos dies; mané post Missæ Sacrum, & vespere post Hymnum *Veni Creator*, 2dò modò fit, cum Cardinales de eligendo Pontifice discrepantes unum vel plures eligunt ex ordine suo, quorum ad arbitrium, iudiciumq; electio redeat. 3tiò modò cum Cardinales quasi Spiritus S. Numine afflati, aliquem unanimiter & una voce, nullò penitus dissentiente pronuntiant S. Pontificem.

§. V.

De Cardinalibus recenter creatis.

Hic deniq; advertas, quod etsi his omnibus titulis, honoribus & prærogativis enumeratis gaudeant Cardinales recenter electi, illis tamen in Consistorio, vel in Consiliis cum aliis loqui, & sententiam dicere non est permillum, donec ipsis S. Pontifex os aperuerit. Forma autem claudendi & aperiendi Cardinalibus os, hujusmodi est. In primo Consistorio S. Pontifex novis Car-

di-

dinalibus inhibet, ne quid tum in Consistorio, tum Consiliis loqui præsumant, quousq; de aliorum Cardinalium sententia os illis non aperuerit. In sequenti Consistorio vel tertio omnibus Cardinalibus congregatis & sedentibus simul antiquis & novis S. Pontifex ad novos conversus eos exire jubet, egres- siq; expectant, donec antiqui de aperiendo illis ore fuerint opinati; si consenserint advocantur novi, jubenturq; suo sedere in loco, quos deindè stantes instruit Pontifex de modo, quo se gerere debeant in Consistorio, domi, publice, & in omnibus servandam esse modestiam atq; prudentiam addens: *Aperimus vobis os tam in Collationibus, quam in Consiliis, atq; electione S. Pontificis, & in omnibus actibus, tam in Consistorio, quam extra, qui ad Cardinales spectant, & quos soliti sunt exercere, In nomine Patris &c.* Plura si desideras, vide *Thomassium* p. 1. lib. 2. c. 113. & alibi. *Azor* Instit. Mor. p. 2. lib. 4. *Bellarmin.* de Clericis lib. 1. c. 16. *Ciaconium* de Pont. & Card. in Hygino. *Lucium Ferraris* in Biblioth. tit. Cardinalis, & alios.

Non

Non pigeat hic observandum observare ex *Ponvinio* de præcipuis Urbis Romæ Basilicis cap. 3. quas septem Urbis Ecclesias vocare solent: *Apud veteres consuetudo per mille & ducentos continuos annos in Romana Ecclesia usurpata fuit, ut neq; Diaconi Diaconias semel acceptas, neq; Presbyteri Titulos (id est Ecclesias Cardinalitias) neq; Episcopi Cardinales Episcopatus suos unquam mutarent - - - Qua ratione fiebat ut Diaconi, Presbyteri, & Episcopi Cardinales Diaconias Titulos & Episcopatus suos magis colerent, & exornarent, restituerent, & augerent, quos dum viverent essent retenturi.*

Nunc Cardinales optionis lege multos titulos & Diaconias obtinere possunt. Cujus rei initium ortum est tempore *Alexandri V.* in Concilio Pisano an. 1409. in quo cum ob Schisma contigisset Sacerdotia Cardinalitia duos ad minus habere Cardinales, unum unius obedientiæ Avenionensis, alterum alterius obedientiæ Romæ; sublato schismate unitisq; Collegii Cardinalibus, & novô Pontifice creatô, has mutationes tunc fieri necesse fuit, ut unus ex duobus,
qui

qui in Schismate Episcopatum obtinebat, eò alteri dimissò, Sabinum tunc vacantem optaret, ita & in Titulis & Diaconiis factum est. Quæ res quam necessaria tunc fuit, in exemplum tamen tracta, postea frequentari cæpta est. Atq; hac ratione factum est, ut aliquando Cardinalis Diaconus initiò creatus, tres aut quatuor Diaconias, post Presbyter factus, totidem Titulos, demùm Episcopus omnes cooptaverit.

Synopsis Historica

De Schismate Orientalis Ecclesiæ.

Oriens ab ipso Ecclesiæ Christi principio tam copiosum hæreseon seminarium fuit, ut instabilem hominum fidem, spiritû, quò pollebat, prophetico prævidens Petrus Apostolorum Princeps non immerito Antiochiâ Romam suam transtulerit sedem. Quod facile, nescio, quis crederet, nisi sub omnium oculis verarentur ea damna, quæ ab incunabulis Christianæ fidei, illa in parte exortæ hæreses Ecclesiæ Christi intulerunt. Quis enim ignorat Gnosticorum pestes

stes I. & II. sæculô, sub ipsisq; quam plurima Sectariorum deliria, Sabellianorum, Paulinistarum blasphemias; Manichæorum vesanias, sæculô III. Ariatorum, Macedonianorum, Apollinistarum furias Sæculô IV. Nestorianorum, Eutychianorum strages V. Sæculô. Machometarum ex Eutychianorum semine exortorum, spurcitias VI. sæculô; eiusdem Eutychianismi infamem surculum Monothelismum sæculô VII. Iconoclastarum rabiem VIII. sæculô.

Hæc & alia etiamsi huiusmodi essent, ut Divina & humana pessumdarent, ac penitus conarentur evertere, tamen hæc mala tam generalia non erant, ut omnes planè inficerent. Habuit enim Oriens suos *Irenæos, Dionisios, Athanasios, Basilios, Gregorios, Cyrillos, Flavianos, Sophronios, Damascenos, Germanos* aliosq; quam plurimos in fide satis stabiles, qui in falsis dogmatibus evertendis, præcipuè in profliganda Iconomachorum hæresi intantum enituerint, ut Divinæ veritatis nedum verbô & scriptis egregii, verum etiam sanguinei essent testes.

Unum porro est, quod post tot hæresum monstra, devicta & prostrata IX. Sæculô accidit, non tantum adeo potens, ut homines ducat in admirationem, verum in sanguineas queat movere lachrymas; unum accidit, quô tam fædè orientalis Ecclesiæ facies infecta est, ut nec doctissimorum Virorum Scriptis, nec summorum Pontificum paternis curis, nec Oecumenicorum Conciliorum decretis unquam potuerit mundari. Res ita se habet.

§ I.

*Photii conspiratio contra S. Ignatium
Patriarcham CP.*

Cum Michæel Theophili Imp. filius Matrem Theodoram religiosissimam matronam ab administratione Imperii amovisset, ut liberius vitiis indulgeret, Bardæ avunculi arbitrio rerum moderationem permisit. Præerat Ecclesiæ Constantinopolitanæ Ignatius Michæelis Rangabis Imperatoris filius. Is Bardæ Imperatoris incurrit odium, quod eum ob incestuosam cum nuru consuetudinem,

communione privasset. Hinc Bardâ agente Ignatius ab Imperatore in Insulam *Terebinthum* relegatus est. Missi deindè Episcopi Aulici & Patricii, qui cessionem Patriarchatûs vehementer suaderent pacis gratiâ, sed invictissimus Præsul nec precibûs, nec minis adduci potuit, ut se Episcopatû abdicaret, idq; non ex amore dignitatis, sed Ecclesiasticæ libertatis & æquitatis studiô, quam cessione sua videbat oppressum iri.

Photium nobilitate insignem, ingeniô & sæculari literaturâ nulli secundum, cæterum ambitione impotentem, ad quodvis audendum nefas paratissimum, *Bardas* amicissimum suisq; consiliis devotissimum habuit, nempe quo usus est ministrô ad persequendum S. Ignatium. Suggestit ergò *Photius* Imp. *Michaëli* Ignatium in exilio res novas moliri, proindè in remotius exilium, esse deportandum, ac sub custodia habendum; hinc postquàm in Copronymi sepulchro inclusus, nec fætore, nec fame extinctus esset, mutatis carceribus, exilii locis, verberibus, ac dentium con-

contusione perpeſſis à barbaro milite ,
cúm Episcopatûs ceſſioni invictâ con-
ſtantiâ ſubſcribere recuſaret, in *Mytile-*
nem inſulam catenis onuſtus , deporta-
tus eſt.

Erat eo tempore Conſtantinopoli
Gregorius Syracuſanus Episcopus, quem
Ignatius Patriarcha (Sicilia enim tunc
abſtracta à Patriarchatu Rom. cum Diæ-
ceſi Illyricana à Leone Iſaurico:) olim
depoſuerat Synodaliter ob varia crimi-
na. Hoc judiciô poſthabito dignitatis in-
ſignia ſemper ſervavit nequiſſimus *Gre-*
gorius, Bardâ patrocicante, cui ut vicem
referret , non paucos Episcopos, quos
Aulæ peſtilens aura afflaverat , cúm
traxiſſet in ſuas partes, irregulari coa-
cto Conciliabulô, depositum dixit *Ignatium* ,
& *Photium* Patriarcham renuntia-
vit, ſex dierum ſpatiô neophitum ad
omnes Ordinum gradus promovit ; pri-
mâ ſcilicet die Monachum , alterâ Le-
ctorem , tertiâ Subdiaconum , quartâ
Diaconum , quintâ Presbyterum, ſextâ
Episcopum ordinando, ut teſtatur *Nice-*
ta In vita S. Ignatii.

cúm verò multos Episcopos, plebiſq;

partem maximam ab Ignatio stare videret Photius, ita ut in æde S. *Irenes* Episcopi ipsum anathemate confixissent, & a Patre, Filio, & Spiritu S. depositum renuntiassent, eò quod primum contestatus se Ignatium pro inculpato & violenter ejecto habiturum, seq; tanquam ejus Coadjutorem gesturum, chyrographum rescidisset, ac fidem fesellisset; *Nicolaus I.* Pontifici obrepere conatus est, ab eoq; ordinationis suæ confirmationem impetrare. Literas per legatos misit Romanam, quibus fidei professionem inseruit, Ignatium senio & morbo confectum, se Patriarchatû abdicasse mentitus, suoq; in Cænobio commorari, & ab omnibus omni honore & Officiis coli. Se verò cedente Ignatiô electum omnium consensû; vimq; sibi ab Imperatore factam, ut Thronum Patriarchalem conscenderet. Hæc habentur apud *Nicetam* citatum, apud *Baronium* in Epist. Photii ad Nicolaum I. ad an. Christi 859. &c.

§ II.

Quid in causa Ignatii & Photii gesserit

Nicolaus I.

Cum audivisset Nicolaus Pontifex legat-

gatos Constantinopoli missos, prudenter legationem decrevit in Orientem, cujus munus gerendæ imposuit *Rodoaldo*. Por-
tuensi & *Zachariæ Anagninæ* Episcopis, quibus dedit in mandatis inter alia, ut causam *Ignatii* diligenter investigarent, & Sedi Apostolicæ plenius ac veracibus referrent indiciis. Hic nota; causæ examen commisit Legatis, iudicium sibi reservavit Pontifex, quod è majoribus Ecclesiæ causis hæc esset. Præcepit insuper Legatis, nè cum *Photio* aliter, quam Laico communicarent, & alia præsertim ut sistatur coram Legatis Apostolicis *Ignatius*, & inquiratur, quam ob causam Episcopatû cesserit. Tandem ordinationem contra canones factam, ratam se habere non posse dicit, donec ex Legatis certior factus sit, de ejus fide & gestis.

Constantinopolim cum pervenissent Sedis Apostolicæ Legati centum dierum spatiô detenti sunt ab Imperatore, *Barda* & *Photio* suggerentibus, eisq; negata quemquam alloquendi licentiâ, præter eos, quos ad ipsos mittebant, ut illis famis, pædoris, & exilii minas inten-

tarent, nisi ratam haberent Ignatii exauthorationem, ac Photii ordinationem, ut ipsi Photio exprobrat *Nicolaus* Epist. 6. Minis itaq; concussi & muneribus illecti, legationem suam fæda prodicione dehonestarunt, & Photio favorem omnem & Patrocinium sunt polliciti.

§ III.

Synodus latrocinialis a Photio coacta Constantinopoli contra Ignatium.

Photius mirum in modum erectus & in securitatem elatus ob timiditatem & ignaviam Legatorum *Nicolai* Pont. Synodum Constantinopoli congregari curavit ab Imperatore anno 861. Adfuit imò præfuit ipse Imperator, cujus ad nutum gerebantur omnia ex suggestione Photii; quamvis præfatis Legatis Apostolicis inane nomen, & umbra quædam relicta esset, ut Oecumenicæ Synodi speciem haberet aliquam hic conventus. Ingens erat Episcoporum Photio devotorum numerus, adeo ut *Michaël* Imp. gloriatus sit, Nicænæ Synodo non plures interfuisse, ut refert *Nicolaus* I. Epist.

Epist. 5. jactantiam illam comprimens hac ratione: Quòd nihil prosit Nicænorum Patrum numerus, ubi ab eorum sententiis, & æquitate deviatur, & quod major sit peccatorum cumulus, ubi multiplex est agmen prævaricatorum. Traditæ sunt literæ Nicolai I. S. Pont. in iis, antequam legerentur, multa immutavit, suppressit, mutilavit *Photius* maximè quæ ejus intrusionem, & *Ignatii* depositionem spectabant. *Nicolaus* Epist. 9.

Mox S. Ignatius Patriarchali depositò ex jussione Imperatoris in habitu Monachali sistitur Synodo, ubi Palatini Proceres urgent *Ignatium* ut spontè se Patriarchatu abdicet. Renuentem ad Synodum citant. Judices recusat S. Præsul, Romanumq; Pontificem appellat. Sed appellatione non acceptata, duo & septuaginta testes muneribus corrupti auditi perjuriò confirmant, ipsum canonicè non fuisse ordinatum, sed à potestatibus sæcularibus intrusum, Ecclesiamq; tyrannicè rexisse; sic nemine Episcoporum intercedente præter *Theodolum* Ancyranum propterea interfectum à quodam parricida, damnatus est,

est, & vestibus Patriarchalibus exutus, à quodam *Procopio* Subdiacono olim ob scelera deposito, & clamante: *Indignus*: Cui *Zacharias* & *Roaldus* ministerii prævaricatores cum aliis perditis simili vociferatione suffragabantur. Tandem post varios cruciatus, *Theodorus* Photii fatelles, manû *Ignatii* apprehensa crucem in charta exaravit, paginamq; tradidit Photio, qui signo Crucis hæc suapte manû subjicere ausus est: *Ignatius indignus Constantinopolitanus, confiteor me non lege & suffragiis creatum, Ecclesie Thronum invasisse, neq; his annis ritè & sanctè Ecclesiam rexisse, sed tyrannidem exercuisse.* Mox consilium initur de eruendis ipsi oculis, manibusq; præcidendis, quod periculum postquam fugâ evasisset, & aliud, quò in fuga ad mortem quærebat, urbe per quadraginta dies terræ motu concussa, conquisitus in Monasterium suum ire permittitur.

§ IV.

*Nicolaus I. Photianam Synodum irritat,
restituit Ignatium, damnat Lega-
tos prævaticatores.*

Postquam S. Ignatius per Theogno-
stum Archimandritam libellum scri-
pisset de suis calamitatibus & appella-
tione ad Sedem Apostolicam, hanc
Romam clam portavit præfatus Theo-
gnostus, & Nicolao I. S. Pontifici ob-
tulit. Interea Legati Rodoaldus & Za-
charias muneribus onusti Romam vene-
runt, nuntiantes depositum Ignatium
& Photium in Sede firmatum.

Mox Pontifex coacta Synodo Ro-
mæ, tulit in Photium damnationis sen-
tentiam, qua omni Sacerdotali hono-
re & nomine exutus est, eiq; sub ana-
themate interdictum, ne Sacris ultra
se Mysteriis ingereret, aut Ignatium
legitimum Patriarcham perturbaret. Ra-
tiones depositionis fuerunt sequentes.
1. Quod ex Schismaticis & Laicis or-
dinatus esset. 2. Quod in viventis &
innoxii Ignatii sedem velut adulter ir-
rupisset. 3. Quod ordinatus esset a
Gre-

Gregorio Syracusano Episcopo damnato & exauthorato. 4. Quod depositorum & excommunicatorum communione se fœdâset. 5. Quod contra fidem datam coacto Conciliabulo sententiam damnationis dixisset in Ignatium. 6. Quod Apostolicæ Sedis Legatos à mandatis avertisset, eosq; pertraxisset ad communionem Schismaticorum in hoc *Acacium* imitatus. 7. Quod Ignatium ejusq; fautores acerbè vexâset, nec vexare desineret. In hac Synodo etiam damnatus est *Gregorius Syracusanus Schismaticus*, & dudum depositus a *Benedicto III.* Tandem omni Clericali Officio privati sunt, qui a Photio erant ordinati. In gradum pristinum restitutus *Ignatius*, utpotè injustè depositus. Ultimò *Rodoaldi* prævaricatoris & contumacis Legati, qui Synodi examen fugerat, conclamata est damnatio.

Photius de his certior factus, actusq; in rabiem, quod plebs fidelis ab ejus communione turmatim discederet, in eos qui cum Romano Pontifice communicabant, persecutionem movit. Nec

non

non coacto Conciliabulô, & subordina-
tis Impostoribus, qui se Vicarios &
Legatos Orientalium Patriarcharum
mentiti sunt, accusatoribus, testibusq;
pecunia emptis, ob gravia crimina
falsò imposita *Nicolao* Pontifici, eum
anathemati subjecit. Multi vix audito
ausui subscripsêre, conclamârunt cæteri:
Non esse iustum in primum & S. Ponti-
ficem præcipuè ab inferiori, quomodolibet
sententiam proferri. Quam ob rem nequif-
simus *Photius* Conciliabulo suo majoris
Authoritatis speciem addere volens,
quo incautis imposeret, conscripto
Codici, calumniis adversus Rom: Pon-
tificem scatenti, mille circiter Episco-
porum eumentitas subscriptiones inter-
feruit. Cæterum, quem ut novum *Dio-*
scorum omnes Catholici execrabantur,
non pauci secuti sunt, malis ejus arti-
bus in partes tracti.

Sic inchoatum Schisma roboravit
impius Imperator *Michaël* omni modô
Photio patrocinando, & Rom: Ponti-
ficem contumeliis lacerando. Interim
Photius Encyclicas literas ad Patriar-
chas & Episcopos Orientis dedit, ple-
nas

nas calumniis in Romanam Ecclesiam, quibus eos ad Synodum vocabat, in qua errores varii, quos Rom: Ecclesiæ improperat, & quibus imbutam a Prædicatoribus & Legatis Apostolicæ Sedis Bulgarorum gentem nuper ad fidem conversam asserit, damnentur, ac deliberetur de remedio, quo tam grave malum cohiberi possit.

Hæc vero Photianæ contra Latinos accusationis capita erant. 1. *Quod contra Ecclesiæ Canones illicitè Sabbatis jejunent.* 2. *Quod primam jejunii quadragesimalis septimanam, a reliquo jejunio discerpentes, in lactis potionem, casei esum & similium ingurgitationem traxerint.* 3. *Quod Sacerdotes legitimo junctos matrimonio ab uxoribus abstraxerint, eisq; continentia jugum imposuerint.* 4. *Quod Chrismate inunctos per Sacerdotes denuo inungere non dubitauerint, cum seipsos Episcopos prædicarent & Presbyterorum Chrisma inutile quoddam, ac frustra factum comminiscerentur.* 5. *Quod sanctum & sacrum Symbolum, quod ab omnibus Oecumenicis Conciliis confirmatur, & vim obtinet irresistibilem, sensibus spuris, verbis adscitiis con-*

conati sint adulterare; Spiritum S. novo more commentum non de solo Patre, sed etiam Filio procedere.

Interim perempto *Bardâ* suo intimo amico & protectore, in gratiam *Michaëlis* Imp: quantum poterat se insinuabat, à quo iterum impetravit congregari Pseudo-Synodum, subordinatis nebulonibus, qui se reliquorum Sedium Patriarcharicarum Legatos mentirentur, in qua intuitu calumniarum iam dictarum depositionis & anathematis sententiam tulit in Rom: Pontificem anno 867.

§. V.

Photius sede deicitur iterumq; intruditur.

Mortuo *Michaële* Anno 867. successit in Imperio *Basilus* 24. Septembris, qui postridie, quam elevatus est, *Photium* ex malis artibus bene notum sede deiecit, *Ignatiumq;* reductum ab exilio restituit Ecclesiæ. Statim Legatos Imperator Romam misit, scripsitq; de hac re *Ignatius*, & cum *Nicolaus* Pontifex ad immortalem vitam transiisset, legati cum gaudio excepti sunt ab *Hadriano II.*

De hac *Photii* ejectione & *Ignatii* restitutione legendi *Nicetas* in vita S. *Ignatii*, & *Anastasius* Bibliot: in Præf. VIII. Synodi; item in vita *Hadriani* II. ubi refert librum *Photii* a Legato exhibitum fuisse S. Pontifici, & in terram projectum cum hoc anathemate: *Tu maledictus Constantinopoli, sis Romæ iterum maledictus. Te minister Diaboli Photius novus Simon mendacii compilator aptavit. Te minister Christi Nicolaus novus Petrus veritatis amator attrivit.* Refert etiam, cum eo tempore, quô nefarius codex urebatur, imber vehemens decideret ad pluviam, quasi ad olei guttas flammam convaluisset, quô miraculo etiam Græci stupefacti Deo laudem dixêre, & memoriæ *Nicolai* bene precati sunt, & *Hadrianum* præconiis extulêre. Tandem agente *Basilio* Imp: & *Hadriano* S. Pontifice coadunata est VIII. Synodus, in qua Schisma ad tempus sopitum fuit.

Photii damnatio nihilo ipsum modestiorem effecit, solido enim exilii decenniô innumera meditatus, & tentavit mala adversus S. *Ignatium*. Verum
inna-

inanis labor fuit hic quidem, tamen nova imposturâ sibi reditum CPolim aperuit. Commentus est scilicet *Basilii* Imp: genealogiam, ejusq; perobscurum genus à magno *Tyridate* Armenorum Rege deduxit; cum ad Patrem Basilii venisset novo fabricato nomine filios ejus ad Imperium evehendos auguratus est, nomen illud *BECLAS* excogitavit, cujus literæ nominum Basilii ejus uxoris, ac filiorum, initiales erant. Hoc facto ambitiosus Imperator incitatus *Photium* ab exilio revocat, qui nefario ausu vivente *S. Ignatio* Patriarcham se gessit, ordinationes faciebat, & alia Episcopalia munera obiit.

Brevi *S. Ignatius* fatis cessit, & *Photius* facilitate Imperatoris abusus novâ tyrannide in Sedem Patriarchalem irrepfit, tandem à *Joanne VIII.* ad petitionem *Basilii* ad communionem susceptus & in Sede confirmatus est. Sic restitutus *Photius* pseudo-Synodum adversus Oecumenicam *VIII.* celebrat, quam pariter nuncupat *VIII.* in qua 380. Episcopi cum Legatis Sedium Patriarchalium & Legatis *S. Pontificis* adfuerunt.

Ibi

Ibi postquam Epistolas S. Pontificis ab Apostolicis Legatis sibi imprudenter concreditas, sub specie in Græcum vertendi truncâset, mutilâset, veram VIII. Synodum abrogavit, & hanc pro VIII. substituit, sic eo paulatim Schisma instauravit.

Joannes Pontifex certior factus, quod actum CPoli, Photianam Synodum, ipsumq; Photium damnavit, idem præstitit *Marinus* ejus Successor. Eundem diris devovit *Hadrianus III.* Marini Successor, & *Stephanus VI.* quò agente Photius, a *Leone* Basilii Filio & Successore in Imperio, a Sede dejectus est, inaugurato in ejus locum Stephanô Leonis Fratrem.

§. VI.

Cum Photio extinctum Schisma ante Michdêlem Cerularium non revixit.

Stephanum Patriarcham cum Rom: Pontifice servâsse communionem, ex Synodi VIII. appendice certum est, similiter ejus Successorem *Antonium Cauleam*, sub ejus Patriarchatu *Stylianus* Neocæsareæ Metropolitæ cum aliis partium Pho-

Photianarum *Symmistis* pro absolutione lapsorum scripsere Romam, cognoscentes se ab Apostolica Sede regi & gubernari debere. Sub Nicolao Mystico, paululum turbata fuit utriusq; Ecclesiæ pax, ob quartas Leonis Imp: nuptias, sed non interrupta, imo magis firmata; & sic sub Euthymio, iterum Nicolao Mystico, Stephano, Theophilacto, Polyucto, Basilio, Antonio, ad Nicolaum Chrysobergem, sub ipso habita Synodus est, in qua jacta sunt quædam Schismatis renovandi semina, cum à factiosis, Photii memoria æque ac Ignatii & aliorum Patriarcharum Orthodoxorum, solemnibus acclamationibus impune celebrata est.

Huic Nicolao an. circiter 995. substitutus est *Sysinnius*. Is Encyclicam Photii suo nomine ad reliquos Episcopos misit, at Schisma, quod meditabatur, renovare non potuit. Habuit Successorem de genere Photii *Sergium*, qui calumnias in Romanam Eccl: facta Synodò innovavit; cum tamen reliqui Patriarchæ dissentirent, negotium scindendi Ecclesias perficere non potuit; Unde Græci Schismatici rei sunt mendacii

dum dicunt à *Sergio* nomen Rom: Pontificis fuisse expunctum¹ é S. Diptychis, quos egregiè refellit *Petrus Antiochenus* in Epist: ad *Michàèlem* Cerular. Huic *Sergio* annò circiter 1024. Successit *Eustachius* qui per Legatos *Basilii* Imp: impetrare tentavit a *Joanne XIX.* ut Ecclesia CPolitana in suo Orbe universalis dici posset, sicut Romana in universo; at etsi hoc non obtinuit, Schisma tamen non renovavit. Postea Patriarchatum gessit *Alexius* ab anno 1025. ad an: 1043. quo *Michàel Cerularius* nominatus est a *Constantino Monomacho*. Ad hunc unitatem inter Græcam & Latinam Ecclesiam perdurasse post *Photium* sub decem & septem Patriarchis scribit *Manuel Calecas* Author Græcus Ord: Præd: lib: 4. contra Græcos. Sed *Michàel* ille Schismatis post *Photium* author alter, nomen S. Pontificis è sacris Diptychis erasit, ut idem refert *Manuel*. Qua de causa, ut Græcos ad unionem reduceret *Urbanus II.* Concilium Barensè in Apulia convocavit anno 1097. in quo Græcos disputantes prorsus revicit ac attrivit. S. *Anselmus* Arch: Cantuar: in Anglia. Sæ-

Sæculo XIII. anno 1215. in Concilio Later: IV. sub Innocentio III. pax inter utramq; Ecclesiam stabilita est, hæc ut eo firmior perseveraret, titulum Episcopi *Oecumenici* sive Universalis, quem toties efflagitârunt, concessit Patriarchis CPolitanis *Innocentius III.* primumq; locum post Rom: Pontificem, quæ cum non diu stetitset, iterum in Concilio Lugdunen: II. anno 1274. sub *Gregorio X.* reintegrata est. Verum nec illa pax fuit diuturna, Græcis pro sua levitate ad vomitum reversis; donec tandem in Concilio Florent: an: 1439. sub *Eugenio IV.* unitati subscripserunt, excepto *Marco* Ephesino, qui redux in patriam multos in suas partes traxit, nulla tamen hucusq; fuit edita fidei professio Florentinæ contraria; unde erroreorum, qui inter Græcos à nobis dissident, potius censerì debet personalis, quam totius Ecclesiæ Græcæ; sicq; Græci in hodiernum diem ab illo tempore perseverant, post duodecimam, juxta alios decimam quartam cum Romana Ecclesia reconciliationem, in schismate.

DISSERTATIO IV.

D E

CONCILIIS GENERALIBUS.



Iximus supra Ecclesiæ nomine
 sæpius intelligi Pastorum sive
 Episcoporum in unum cogre-
 gatorum pro aliquo dogmate definien-
 do, aliisq; Fidelium pacem & unitatem
 concernentibus, statuendis Conventum,
 qui Conventus Concilium vocari solet.
 Ita se rem habere, quidquid dicant hæ-
 retici, edocemur ex cap: 15. Act: ubi
 primo cæperunt Concilia celebrari, ac
 deinceps continuari, quam originem
 Bellarminus proinde non humanam sed
 Divinam dicit. Nam Concil: Chalced:
 in Epist: ad Leonem S. Pontif: innuit:
 Concilia esse intellecta & demonstrata
 a Christo his Verbis Math: 18. *Ubi
 sunt duo vel tres congregati in nomine meo,
 ibi sum in medio eorum.* Hinc & Apo-
 stoli pro Concilio coadunati dicunt:
Visum est Spiritui S. & nobis &c. Hinc.
 Concilium nihil aliud est, quàm con-

voca-

vocatio seu Episcoporum cœtus ad dirimendas controversias, quæ circa fidem & bonos mores exoriuntur, vel ad sarciendam disciplinam Ecclesiæ, vi canonum, quæ con-
duntur in Conciliis. Quadruplicis autem generis est Concilium, videlicet: *Oecumenicum* seu *Generale*, *Nationale*, *Provinciale*, *Diæcesanum*. Oecumenicum est convocatio totius orbis Christiani Episcoporum, quæ fit per Epistolam Encyclicam ad omnes directam à Rom. Pontifice, cui soli ex jure & Officio incumbit indicere Concilia Generalia, eisq; per se, vel per suos Legatos præesse. Concilium *Nationale* est illud, quod à Patriarcha, vel Primate cogitur, cuiq; omnes Primates, seu alicujus nationis vel regni Episcopi interfunt. Concilium *Provinciale* illud est, quod unius Provinciæ finibus cœercetur, & convocatur ab Archiepiscopo invitante omnes suæ Provinciæ Suffraganeos Præsules. Concilium *Diæcesanum* est, quod ab Episcopo una cum suæ Diæceseos Parochiis in rem peculiaris Ecclesiæ sibi a Deo concreditæ celebratur. De Conciliis Generalibus hic potissimum agendum.

ARTICULUS I.

Cujus est convocare Concilium generale, & eidem præsidere convocato?

Quoniam Imperatoris esse & non Papæ generalia convocare Concilia, & eidem præsidere convocatis contendunt, Luthe us, Calvinus, Magdeburgenses, & eorum sequaces, ideo generale sive universale Concilium dici volunt, quia ab Imperatore universali omnium Domino convocatum, eaq; de causa ad Concilium Tridentinum venire renuerunt Protestantes Hæretici, illudq; ideo non recipiendum clamat Carolus Molinæus, quia non ab Imperatore, sed a Romano Pontifice convocatum, proindè ut veritas elucescat, & communis Catholicorum doctrina pateat.

§ I.

Resolvitur quæstio.

Dico: Solius Rom: Pontificis est de jure & officio generalia Concilia convocare, & in iisdem vel per se, vel per Legatos præsidere convocatis.

Prob:

Prob: 1. P. Ut legitimum sit Concilium, debet in nomine Christi, hoc est, autoritate Christi convocari, juxta illud Christi Math: 18. *Ubi fuerint duo vel tres in nomine meo congregati, ibi sum in medio eorum;* & ut sit in nomine seu autoritate Christi convocatum, debet ab eo solo convocari, cui Christus hanc auctoritatem concessit; atqui Christus soli Petro & in persona Petri Rom: Pontifici hanc concessit auctoritatem, & non Imperatori, dum ad Cœlos ascensurus Petro in littore piscanti, non Tiberio Romæ imperanti, suam regendam commisit Ecclesiam, dicens: *Pasce oves meas;* ergo ut sit in nomine Christi convocatum debet a Rom. Pontifice, vel de ejus consensu, vel saltem illô minimè inconsultô convocari.

Prob: 2. Tùm ex antiquo illo Canone, quem Julius 1. Papa ad Episcopos Antiochenæ Provinciæ scribens Apostolicum esset dicit, quemq; Alexandrina Synodus Epist: ad *Felicem* renovatum esse a Nicæna I. Synodo testatur his verbis: *Scimus in Synodo magna 318. Episcoporum ab omnibus con-*
cor-

*corditer esse roboratum, non debere absq;
Rom: Pontificis sententia Concilia celebrari.
Præfatus Canon hic est: Præter senten-
tiam Rom: Pontificis non posse Concilia ce-
lebrari. Sic legitur apud Cassiodorum in
Hist: Tripartita. Tum ex facto Concilii
Calced: non permittentis Dioscorum Epi-
scopum Alexandrinum inter Episcopos
sedere, eo quòd aliam Synodum co-
gere fuerat ausus inconsultâ Romanâ Se-
de, & alta voce clamantis: Id nunquam
factum, nunquam licitum fuisse. Tum ex
facto Concilii Rom: IV. in causa Sym-
machi Papæ a Theodorico Rege convo-
cati, & conquerentis, se non à Rege,
sed à Papa debuisse convocari, nolentisq;
Regi: acquiescere dicenti, se Concilium
de consensu Pontificis convocasse, do-
nec ita esse fateretur præsens S. Pon-
tifex. Tum Pelagius II. hoc apertissi-
mis verbis tradit an: 590. (habetur cap:
Multis dist: 7.) in Epistola ad Epi-
scopos, qui convenerant ad illicitam
convocationem Joannis Constantinopo-
litani: Multis demum Apostolicis, Canoni-
cis, & Ecclesiasticis instruimur regulis,
non debere absq;, sententia Rom: Pontificis
Con-*

Concilia celebrari, quapropter vestrum non Concilium, sed conciliabulum cassatur, & quidquid in ea actum est, irritum habetur & vacuum.

Nota. Annô 587. sub *Mauritio* Imperatore *Joannes* Patriarcha Constantinopolitanus, jejunator dictus Synodum còegit Constantinopoli in qua judicatus, & innocens inventus est *Gregorius* Antioch: , occasione hujus Synodi, Episcopis facilè in suam sententiam adductis arrogavit sibi titulum Patriarchæ Oecumenici. Quæ res cum ad aures *Pelagii S.* Pontificis delata esset, omnia, præter acta circa *Gregorium*, irritavit, præcepitq; Legato suo Constantinopoli degenti, nè cum *Joanne* communicaret, nisi prius arrogatum temerè, titulum deponeret. Occasione hac, ut ambitionem dicti Patriarchæ deprimeret *S. Gregorius M.* *Pelagii* Successor titulô *Servus Servorum DEI*, primus usus est.

Dices: Ex his sequi nec Provincialia, nè quidem Diæcesana Concilia nisi à Romano Pontifice posse convocari; præsertim cum cap: *Nec licuit eadem dist:*

17. Pelagius II. dicat nec Synodum particularem sine Authoritate Sedis Apostolicæ licere celebrari; sequela forte non admittetur.

Resp. Quod jura & Pontifices concedant, imo jubeant Archi-Episcopis & Episcopis, ut particularia Concilia celebrent, sicq; non sine authoritate eorum celebrantur. Porro caput: *Non licuit* loquitur de Synodis particularibus congregatis contra universalem Synodum, ut patet ex Rubrica, quæ sic habet: *Absq; sedis Apostolicæ authoritate Synodum particularem contra universalem, aliquibus congregare non licet.* Et apud Ivo-
nem, Anselmum, Policarpum, verbis Gratiani compilatoris additur: *Ad judicandum universalem Synodum.* Idq; satis innuit textus ipse Gratiani verbis sequentibus: *Quoties aliqua de universali Synodo aliquibus dubitatio nascitur.*

Confirm. Hoc ex perpetua Ecclesiæ praxi, ab ipsis Apostolis initium habente; nam primum Apostolorum Concilium adunatum est à S. Petro ut in locum Judæ proditoris alter eligeretur Act. 1. secundum ab Apostolis adu-

na-

natum est Act. 6. cui præerat *Petrus* pro electione septem Diaconorum. Tertium Act. 5. ad dirimendam controversiam de circumcissione Gentilium, ubi surgente & loquente *Petro* tacuerunt omnes. 2. Historici referunt Concilium adunatum fuisse in Palestina jussu *Victoris I.* in quo *Theophilus* Cæsareæ Episcopus præfuit contra Quatuordecimanos, hocq; Sæculo II. Jnitio IV. sæculi *Melchiades* convocavit Synodum Romæ contra Donatistas. Tandem Nicænum I. sine dubio ex consensu *Sylvestri* adunatum teste *Rufino* lib. 1. cap. 1. Constantinopolitanum I. ex consensu *Damascii* teste *Theodoreto* lib. 5. c. 9. De aliis vix dubium esse potest etiam Adversariis.

Suaderi etiam potest hoc ipsum inde; Ad illum spectat adunare Concilia, cujus est gubernare Ecclesiam; alterum autem S. Pontificis esse dictum est tota diss. præc. ergo etiam primum. *Mai. patet.* Quia convocare Concilium est actus jurisdictionis, ad omnem se extendens Ecclesiam; atqui nullus Princeps laicus aliquid jurisdictionis in Eccle-

clesia habet; nullus verò Episcopus, etiam Patriarcha habet universalem, sed hoc solum competit Rom. Pontifici ratione Primatûs; ergo. Aliundè peregrinus est in Historia Ecclesiastica, qui non novit quam luctuosos fines habuerint Concilia ab Imperatoribus adunata præter voluntatem S. Pontificis, ut patet in Synodis Arianorum, Iconoclastarum &c.

Prob: 2. pars. Quia solius Pastoris est suo præsidere gregi, sed Rom. Pontifex est universalis Ecclesiæ seu Christi gregis Pastor constitutus a Christo dicente: *pasce oves meas, pasce agnos meos.* Joan. 21. Ergo solius Romani Pontificis est toti seu universali præsidere Ecclesiæ, sive per orbem diffusæ, sive in Concilio congregatæ, ac proindè Concilio generali Ecclesiam repræsentanti. 2. Ex perenni & antiqua Ecclesiæ praxi, quâ constat nedùm Petrum præfuisse primo Apostolorum Concilio Jerosolymis habito pro electione Mathiæ, & alteri eorum præcipuo, cæterorumq; normæ, ibidem pro determinanda legalium cessatione, celebrato, de

de quo Act. 15. sed etiam post Apostolos Rom. Pontificem cæteris Oecumenicis, tam Orientalibus, quam Occidentalibus per se, vel per suos Legatos præfuisse Conciliis; Imperatorem verò neque per se, neq; per alium. *Prob. Ant. 1.* Per se Præses fuit Occidentalibus omnibus, excepto Tridentino, ut notum omnibus. Orientalibus verò per legatos, quod sic ostenditur. Nam præfuit Nicæno primo. S. *Sylvester* per *Osum, Vitum & Vincentium* Legatos a se missos, Constantinopolitano I. præfuit *Damasus* per *Nectarium* Constantinopolitanum, non missum quidem, sed loco sui præsidere permissum; vel ut opinantur alii per *Timotheum* Alexandrinum; alii dicunt, illud cum Romano tunc Præside *Damaso* coadunato idem censerì debere; Alii verò illud Concilium convocatione & præsentia non esse Oecumenicum, sed Nationale factum autem tale ex approbatione *Damasi*. Vide *Tract: de SS. TRINITATE. Diss. 1. Digres. IV. Ephesinò I. & Oecumenico III.* præfuit *Cælestinus* in 1. Act. per S. *Cyrillum* Apostolicæ

Se-

Sedis Vicarium in causa Nestorii, in reliquis Actionibus per *Arcadium* & *Proiectum* Episcopos & *Philippum* Presbyterum. Calcedonenſi Oecumenico *IV.* præfuit *S. Leo* per *Paschasium* & *Lucentium* Episcopos, *Bonifacium* & *Basilium* Presbyteros. Constantinopolitano *II.* Oecumenico *V.* præfuiſſe dici poteſt *Vigilius* per *Eutychium* Constantinopolitanum, præſidentiam *Vigilio* ultro offerentem, & nihil in Concilio definiri patientem, niſi prius lectis *Vigilii* epistolis, & ejus præhabito conſenſu. Constantinopolitano *III.* Oecumenico *VI.* præfuit *Agatho* per *Theodorum* & *Gregorium* Presbyteros, *Joannem* Diaconum & *Constantinum* Subdiaconum. *VII.* Oecumenico Nicæno *II.* præfuit *Adrianus I.* per *Petrum S. Sabæ* Abbatem, & *Petrum* Archi-Presbyterum. *VIII.* Oecumenico, ſeu Constantinopolitano *IV.* præfuit *Adrianus II.* per *Donatum* & *Stephanum* Episcopos, & *Marianum* Diaconum. Tandem Tridentino Occidentali Oecumenico omnium ultimo, præfuere *amò:* nomine *Pauli III.* tres Romanæ Eccleſiæ Cardinales nempe:

Jo-

Joannes Moronus Episcopus Prænестinus, *Marcellus* Presbyter, & *Reginaldus Paulus* Diaconus natione Anglus. Nomine verò *Julii III.* præsuerunt Cardinalis de *Crescentio*, *Sebastianus Pighion* Archiepiscopus Sipontinus, & *Aloysius Lipomanus* Veronensis Episcopus. Et tandem post obitum *Julii III.* nomine *Pii IV.* præsuerunt quatuor Cardinales alii, *Hercules* de Mantua, *Hieronymus* Seripandus, *Stanislaus* Hosius Episcopus Varmiensis, & *Ludovicus* Simoneta. Ergo ex hac antiqua & constanti Ecclesiae praxi constat Rom: Pontificis esse, non Imperatoris generalibus præsidere Conciliis.

§. II.

Solvuntur Objectiones.

Objic: 1. Solemne est apud Historiographos, multos Imperatores maximè Orientis convocasse Concilia; ergo.

Resp: 1. dist: ant: Et hoc fecerunt ex consensu S. Pontificis, *cont.* sine ejus consensu, *subdist:* ejus modi aliquid roboris habuerunt, antequam accessisset calcu-

calculus S. Pontificis, *nego.* Secus conc.
 Responſio patet ex Concilio Oecume-
 nico a Justiniano Principe anno 553. ,
 invito Papâ Vigiliô (ob non ſervatas
 leges, quia Pontifex tot voluit adesse
 Occidentales Episcopos, quot aderant
 Orientales) convocato pro trium Capi-
 tulum discussionem, at nullius fuerit ro-
 boris, quousq; ei non accessit Pontificis
 approbatio, quod argumentô est, ad
 solum Rom: Pontificem pertinere ex jure
 adunare Concilia. Hinc quando apud
 Rufinum lib: 10. c. 1. legitur de Con-
 stantino M. *Ille apud Urbem Nicænam*
Episcopale Concilium convocat: Apud So-
 cratem lib: 5. c. 8. de Theodosio M.
 quod CPolitanum I. congregaverit.
 Apud Evagrium lib: 3. c. 6. de Theodo-
 sio Juniore, convocatore Ephesini. In
 ipsa Synodo Chalced: Act: 1. *Facta est*
Synodus ex Decreto piissimorum Imperato-
rum Valentiniani & Marciani: hi Impe-
 ratores Concilia Oecumenica non indi-
 xerunt absq; consensu Rom: Pontificum.
 At enim duplex in convocatione Conci-
 liorum occurrere potest autoritas vide-
 licet Ecclesiastica & Civilis. Per Eccle-
 siasti-

haeticam damnantur hærefes, extinguuntur Schismata, Canones ad sanciendam Ecclesiæ disciplinam conduntur. Autoritas vero Civilis facit, ut Canones à Concilio statuti per omnes Provincias executioni tradantur, hæreticorum audacia comprimatur. Summi ergo Pontifices, in quibus residet autoritas regiminis & potestatis Ecclesiæ plenitudo, Concilia Oecumenica indixere, vel per Epistolam Encyclicam, convocando omnes totius Orbis Episcopos, vel eorundem convocationi assensum præbendo. Imperatores vero, qui suprema pollebant potestate civili, indixerunt Concilia Oecumenica non autoritate regiminis, sed præsidii, ut Ecclesiæ laboranti suppetias ferrent, ut Canonum executores se demonstrarent. Et sic debent intelligi Historiographi, dum dicunt Imperatores Concilia convocasse, hoc enim dicendi modò non excludunt Pontifices, qui sine auxilio Imperatoris haud potuissent Episcopos congregare. *Amò.* Quia legibus Imperii cautum erat metù seditionum, ne citra Imperatoris volun-

tatem ullus haberetur hominum Con-
ventus. 2dò. Quia Patres indigebant
auxiliò Imperatoris, tam pro securitate
itineris, quàm pro sumptibus, quos Im-
peratores Episcopis pauperibus debent
suppeditare. Tandem Patres Concilii
Nicæni I. apertis verbis testantur se a
Sylvestro convocatos apud *Rufinum* ci-
tatum: *Temporibus Sylvestri ... factum est*
Concilium in Nicæa Bythinia & congregati
sunt regulariter ejusdem Sylvestri vocatione . .
. . Episcopi Catholici 318. Quam verita-
tem ut everterent hæretici, mutilârunt
textum *Rufini* qui sic est: *Ille ex senten-*
tia Sacerdotum & Sylvestri apud urbem &c.
Constantinop: I. non a Theodosio Seniore,
sed a Damaso opera *Theodosii* convoca-
tum satis indicant ipsi Concilii Patres,
in Epist: ad *Damasum*: *Mandato litera-*
rum à superiori anno a Vestra Reverentia ad
sanctissimum Imperatorem Theodosium missa-
rum, ad iter duntaxat Constantinopolim usq;
faciendum nos præparavimus. *Ephesinum*
I. non à Theodosio Juniore & Valentiniano,
sed eorum operâ à Cælestino I. indictum
colligitur ex Cælestini ad Cyrillum Alex:
lite-

literis, imò ex ipsa Concilii relatione ad Theodosium: *Hæc antequam Sanctissima Synodus conveniret, Cælestinus I. magnæ Romæ Episcopus per literas suas indicaverat, Cyrilloq; ... suas vices subire commiserat.* Chalcedonense non à Marciano, sed a S. Leone M. indictum constat ex Epistola Marciani ad Leonem, quâ rogat, ut veniat, & ipse Concilium faciat, vel si venire nolit, per literas significet, quid agi velit. Et ex ejusdem S. Leonis ad Marcianum Epistola, ubi ait: *Literas dedimus ad Fratres Cc-Episcopos nostros, iisq; Concilium generale indiximus.* Imò ex ipsius Concilii factò circa Dioscorum in prob: 2. allato. Quis ergo dicet ab Imperatore solo, non à Rom: Pontifice illud Concilium convocatum, vel aliud ante illud? Cùm clarè & manifestè pronuntiet: *Id nusquam licitum, nusquam factum.* Aut Patres Chalced: quorum multi Ephesino Concilio interfuerant, ignorârunt id, quod moderni tam longè dissiti, ut certum pronuntiant? absit.

Resp: 2. Convocâsse autoritate propriâ, & hæc sunt facta, non jura conc. & sunt jura, nego. Ergo sunt secernendo

da facta & jura, & ubi sexcenties legis, etiam in ipsa Conciliorum fronte convocatas ab Imperatoribus Synodos, hæc facta quidem, non statim jura interpretis; aut si jura, non stricta & primæva, sed indulgentiæ, & Oeconomix plurimum accomodata.

Instabis: Atqui ex jure competit Principibus adunare Concilia; ergo. *Prob.* In VIII. Concilio Oecumenico Vicarii Orientalium Sedium sic loquuntur: *Scitis quia in præteritis temporibus Imperatores erant, qui congregabant Synodos... quorum more... Imperator noster universalem hanc Synodum &c.* Ergo.

Resp: ut supra. Hoc fecerunt ex consensu Ecclesiæ & indulgentia, non ex jure. Habemus vel ipsos Principes hanc confirmantes veritatem, nam *Valentinianus* postulantis Episcopis potestatem Synodi, respondit apud *Sosomenum* lib: 6. c. 7. *Sibi, qui unus è numero laicorum erat, non licere se ejusmodi negotiis interponere, & ideo Sacerdotes & Episcopi, quibus hæc curæ sunt, seorsim ubicunq; eis libitum fuerit, conveniant* Concinit factum Regis Theodoricæ & Synodi Romanæ

III. in causa Symmachi, quem ipse judicare noluit, sed permisit Pontifici Synodum convocare. Quod autem Concilium VIII. ex voluntate S. Pontificis *Hadriani II* congregatum sit, constat ex illius ad *Basilium* Imperat: Epistola, quæ inserta est Act: 1. *Volumus autem, ait Pontifex, per vestræ pietatis industriam Constantinopoli numerosum celebrari Concilium &c.*

Dices: Illis competit ex jure adunare Concilia, non Pontificibus, si isti ab illis potestatem adunandi postulant; atqui se ita res habet, ergo. *Prob: min:* Ex Epistola *Liberii* Pontificis ad *Constantium* Imperat: *Concilium fieri mansuetudinem tuam fueram deprecatus; ergo.*

Resp: dist: Prob: Hoc dixit *Liberius* ad redimendam vexam, *conc:* Agnoscens in Principe hanc potestatem independentem à Rom: Pontifice illud adunandi, nego. Ut jam dictum. Adunare Concilia ad solam ex jure spectat Ecclesiam, executio verò sæpe dependet à Principibus, qui violentiâ possunt præpedire Episcopos, ne ad locum accedant. Ergo *Liberius* convocabat Concilium, quia vero

à *Constantio* Arianorum fautore oppressus erat, necessitate compulsus exoravit executionem. Nec diffitemur *Constantium* motû propriô in gratiam Arianorum, & assignâsse, & convocâsse Concilia & quidem multa, sed quantas inde clades Ecclesia est perpessa, Historia Eccl: IV. Sæculi docet.

Oppones. Concilia particularia Germaniæ, Galliæ &c. non ab alio quam à Regibus fuerunt convocata, & tamen eorum Canones veneratur Ecclesia; ergo supponuntur ritè convocata, quamvis à Principe coadunata sint.

Resp: Hujusmodi Concilia non fuisse convocata à Regibus propria authoritate regiminis, sed de consensu vel Rom: Pontificis, vel Primatum, aut Metropolitanarum, quibus Concilia ejusmodi convocare jura concedunt Pontifices, imò sæpe præcipiunt. Ea, nisi ita foret, cur non posset quispiam dicere novissimum Concilium Trid: indictum fuisse à *Francisco* Rege Galliæ, à *Sigismundo* Augusto Rege Poloniæ &c. potissimum a *Carolo* utriusq; Siciliæ, Hispaniarum, Indiarum Rege simul Imperatore, ipsis namq;

namq; agentibus, imò urgentibus Concilium coadunatum est, præsertim Carolò ejusdemq; Fratre Bohemiæ, & Hungariæ Rege *Ferdinandò*, postea Successore *Caroli* in Imperio, sed piissimi Imper: *Caroli* vox fuit: *Meum est Concilium petere, Pontificis autem indicere, & credenda proponere.* Apud P. Joan: Sto: 2. Relat: de Concil Trid:

Objic: 2. Act: 6. de duodecim Apost: dicitur: Congregaverunt multitudinem Discipulorum ad Concilium, pro diaconis eligendis; quibus verbis significatur non ad solum Petrum, sed ad omnes Apostolos pertinuisse convocare Concilium, proinde id modo pertinet non ad solum Pontificem, sed etiam ad omnes Episcopos.

Resp: Nego assum. Ex eo enim, quod Petrus cum undecim convocaverit Concilium, non sit sequela convocationem non fuisse factam autoritate Petri principaliter, qui erat illorum Caput, sicut si nunc Papa convocaret Concilium cum Cardinalibus, quis hanc sequelam inferret, convocationem non fieri principaliter autoritate Papæ.

CON-

CONSECTARIUM

Quamvis non sit idem autoritas & consensus, attamen in eo, qui habet auctoritatem aliquid faciendi in illud consentire, est ejus auctoritate fieri. Unde cum sit penes solum Pontificem potestas convocandi Concilia generalia, ut probatum, idem est respectu illius præbere consensum convocationi Concilii, ac illud per seipsum convocare. Hæc intelligenda de certo & indubitato Pontifice, quia in casu Schismatis, in quo forent dubii Pontifices, ut tempore Concilii Constantiensis erant *Gregorius XII. Joannes XXII. & Benedictus XIII.* dictus *Petrus de Luna*, Potest Ecclesia per Cardinales, & ipsis renuentibus, per reliquos Prælatos, nempe Regnorum Primates, convocare Concilium, ad succurrendum præsentī necessitati, nimirum ad providendum sibi de certo Pontifice. Quodsi ulterius aliquid definiat in materia fidei & morum, aut in his, quæ spectant universam Ecclesiam, non erit ratum & firmum, nisi à sequente Pontifice confirmetur;
quid

quidquid dicant primarum sessionum Concilii Constantiensis defensores.

Objic 3. contra 2. partem. In primis Conciliis Orientalibus semper præfuere Imperatores, vel eorum Legati, & nusquam S. Pontifices; ergo.

Resp. nego Ant. Id enim juris non habent Imperatores, seq; non habere testatus est Constantinus M. in I. Concilio Nicæno, cum in eo nedum minimè præesset, sed nec in eodem, quo Episcopi loco, sedere voluerit, & publicè professus fuerit, se non Episcopos judicare, sed judicari debere. Quod si primum materialem locum interdum tenuerint Imperatores, dicuntur præsedisse ad protegendum Concilium, & servandum ordinem, non ad definiendum, & statuendum in rebus fidei & morum. Lubeat hic aliquid audire ex actis Synodi VIII. in qua Legati *Hadriani II. Donatus & Stephanus* semper primi loquuntur & subscribunt; hinc Pontifex Epist ad Basilium Imp. ait: *volumus . . . celebrari Concilium, cui nostri quoq; missi præsidentes &c.* Et act. 10. Legati sic subscribunt: *Ego N. locum obtinens Domini*

mini mei *Adriani S. Pontificis & univ-*
ersalis Papæ, omnia, quæ superius leguntur,
 huic sanctæ & universali Synodo præsidens,
 usq; ad voluntatem ejusdem eximii Præsui-
 lis promulgavi, & manu propria subscripsi.
 Imperatores autem sic subscribunt: *Ba-*
silius, Constantinus, & Leo perpetuo Au-
gusti in Christo Dei fideles Principes Roma-
norum & magni Imperatores, sanctam hanc
 Synodum suscipientes, & omnibus, quæ ab
 ipsa definita & scripta sunt, concordantes
 subscripsimus. Hinc *Nicolaus I.* retun-
 dendo arrogantiam *Michælis Imp. Ba-*
fili Prædecessoris in Epist. dicit: *Qua-*
si non & ipsi in Nicæa collectæ Synodo
(secundæ generali VII.) nostra fides
præfederit. Et de facto præfederunt
Petrus Abbas, & Petrus Archi-Presby-
ter S. Petri nomine Adriani I. qui fue-
 rat à *Constantino*, ejusq; *Matre Irene* ro-
 gatus, ut in orientem veniret ad præ-
 fidendum Concilio. Præsidebant ergo
 Imperatores Conciliis, ut suô exemplô
 fidei dogmata teneri latagerent, inquit
S. Thomas lib: 3. de Regimine Prin-
cipum. Nos, ait *Marcianus, Imp. Act:*
4. ad Patres Calced. ad fidem confirman-
dam

dam, tanquam fidei Defensores, non ad potentiam ostendendam exemplo religiosissimi Constantini interesse (non præesse) Synodo volumus. Atq; verò ipsi Patres Calcedo. inter Pontificem Leonem & Imperatorem hanc assignant discrepantiam in suo ad Leonem Rescripto: Tu vocis B. Petri omnibus institutus interpret - - - Tu sicut membris Caput præeras in his, quæ tuum locum tenebant - - - Imperatores verò fideles ad ornatum præerant, sicut Zorobabel & Jesus. Concludamus oraculò S. Gregorii M. Epist. 1. Scis Imperator Sanctæ Ecclesiæ dogmata non Imperatorum esse, sed Pontificum - - - Idcirco Ecclesiæ præpositi Pontifices; sicut Pontifices à Reipublicæ negotiis abstinentes, ut Imperatores similiter ab Ecclesiasticis abstineant.

Dices. Nicæno I. Concilio Sylvester non præfuit; ergo. Prob: Ant: 1. Episcopus, qui dextro ordine sedit primus, quiq; allocutus legitur Cæsarem, est Eustathius Antiochenus Patriarcha, ut refert Theodoretus lib. 1. c. 7. cui etiam Proclus Constantinopolitanus apud Facundum l. 8. c. 1. primatum in Synodo tribuit. 2. In Epistola Synodica Concilii

cilii ad Ecclesiam Alexandrinam, legitur huic Synodo *Alexander* Patriarcha Alexandrinus præsuisse. 3. *Sosomenus* nullam facit mentionem de *Oſio* Rom. Pont: Legato, nec *Theodoretus*. 4. Idem *Sosomenus* primarios Orbis Episcopos referens ibi præsentes loco ultimo ponit Rom: Pontificem. Adde 5. *Launoyus* Doctor Sorbonicus, non negat *Oſium* è Nicænæ Synodi Præsidentibus unum fuisse, sed contendit ipsum præsuisse non propter Rom: Pontificis vices sibi demandatas, sed propter celebritatem nominis, & meritorum præstantiam; ergo.

Resp. nego ant. Præsuit enim per Legatos *Oſium* Cordubensem, *Vincetium* & *Vitum*. Ad prob. 1. *S. Eustathius* dicitur ab Historicis primus doctrinâ, & eloquentia nusquam authoritate. Ex loco dextro nihil probatur, imo contrarium sequitur; nam sinister locus erat dignior. Ad 2. *Alexander*, quoad aliquid in rebus facti præesse dicitur, utpotè qui causam *Arrii* præ cæteris habuit exploratam, non authoritate. Audiatur *Cedrenus* in compendio Hist: *Præerant ei*

(Sy-

(Synodo) *Sylvestri Papæ Romani locum tenentes Vitus & Vincentius Presbyteri. Metrophanes Bizantii, Alexander Alexandria, Macarius Ierosolymorum Episcopi.* Ad 3. Hi quidem non nominant, benè tamen alii, ut *Gelasius Cyzicenus* lib. 2. Hist: Synodi Nicænæ cap. 5. disertis verbis, *Osium, Vitum, & Vincetium Sylvestri Legatos nominat.* At cum præfati Historici *Vitum & Vincetium* nominent, non sunt nobis contrarii. Ad 4. *Sosomenus* Episcopus inverfò ordine numeravit, quod Historiæ veritatem non evertit, cum hoc familiare sit non solum Ecclesiasticis, sed etiam sacris Scriptoribus. Sic in Processionibus Episcopus claudit Cætum, & ultimò locò progreditur. Ad 5. *Launus* in hoc fallitur: Quis enim credet *Osium* mediocris Ecclesiæ in Hispania Episcopum Cordubensem ante Legatos Sedis Apostolicæ, ante Alexandrinum & Antiochenum Patriarchas, ante totius Ecclesiæ Affricanæ Primatem *Cæcilianum* in Oriente, in aliena provincia, ob solius nominis celebritatem, primas partes habuisse in Concilio Oecumenico-

cumenico, in quo, quod nec ipse *Lau-*
nojus negare potest, non nominis cele-
britas, sed *Hierarchicus* ordo promicare
debet. Aderant in Concilio Nicæno
multi Episcopi, *Osius* aut æquales, aut
etiam superiores meritis. Erat namq;
Paphnutius dextrô oculô effossô, & si-
nistrô poplite succisô, olim à Maxi-
miano ad metalla damnatus; erat *Pata-*
mon Sacris Stigmatibus in persecutione
decoratus; erat *Paulus* qui multa in per-
secutione *Licinii* passus; erat *Spiridion* Cy-
prensis, Prophetiæ & miraculorum donis
conspicuis; *Jacobus* Nisibis Episcopus
mortuorum suscitator; *Nicolaus* Myren-
sis & alii jam numerati sanctimoniâ & do-
ctrinâ clari, ac de Christiana Religio-
ne optime meriti. Cum igitur isti E-
piscopi *Osum* vel æquarent, vel supe-
rarent meritis, non potuit *Osius* ob so-
lam nominis celebritatem. & merito-
rum præstantiam præesse Concilio Ni-
cæno, sed potius eo solo nomine ei
præfuit, quia legatione S. *Sylvestri* Rom.
Pontificis fungebatur.

Ratum ergo maneat Pontificis Rom.
Petri Successoris, & Christi Vicarii pro-
prium

prium esse, Conciliis generalibus præsidere, ut ad rem dicit S. *Cyrillus* Alexan. olim in causa Nestorii Apostolicæ Sedis constitutus Vicarius, apud S. *Thomam* in Opusculo contra errores Græcorum cap. 68: *Apostolo Petro tanquam DEI locum tenenti, darent locum in omni Capitulo, & Synagoga, in omni electione & affirmatione.*



ARTICULUS II.

Qui sunt de jure convocandi ad Concilium?

Quadruplex est hominum genus, qui Conciliis interesse possunt & solent. 1. Alii sunt ut Judices, habentes suffragium decisivum, ut Episcopi. 2. Alii ut Jurisconsulti, habentes suffragium consultivum, ut Viri docti. 3. Alii ut Ministri, seu ut ministerium impendant aliquod Concilio, vg. Notarii, Janitores, aliq; Officiales. 4. Alii inter sunt, ut Concilii Defensores, caventes, ut in eo pacatè fiant omnia, ejusq; decreta executioni mandentur, ut Principes. Nunc ergo quæritur *quinam con-*

vocandi ad Concilium ut habentes suffragium decisivum? Protestantes communiter Duce Lutherô volunt omnes peritos etiam Laicos jus habere suffragii decisivi; alii, ut Brentius & Calvinistæ solos Electos utpotè solos ad Ecclesiam pertinentes, opinantur, alii omnes curam animarum habentes etiam Parochos de jure vocandos esse. Contra quos.

§ I.

Resolvitur quæstio.

Populus nullam habet in iis, quæ fidei & morum sunt, definiendis auctoritatem, neq; Presbyteri simplices, sed soli Episcopi, proindè hi soli ut Judices ad Concilium generale de jure vocandi sunt.

Probantur 1. omnes simul partes: Ex communi Ecclesiæ praxi, quâ constat in antiquis omnibus Ecclesiæ Conciliis, neq; populum, neq; Presbyteros admissos esse ad suffragium, sed solos Episcopos tanquam Judices definientes subscripsisse hæc vel simili formâ: *Ego N. Episcopus definiens subscripsi.* 2. Ex illo celebri Patrum Concilii Calced. dicto:

mit-

mitte foras superfluos, Concilium Episcoporum est. 3. Ut quis sit ad Concilium de jure vocandus ut Judex, jurisdictionem Spiritualem in foro externo habeat, necesse est; cum in Conciliis vel damnari soleant hæreses, vel condi Canones pro reformatione morum & disciplinæ, vel privatorum Episcoporum aut aliorum causæ judicari, qui omnes actus sunt, externæ jurisdictionis actus; atqui soli Episcopi & nulli alii, sive Parochi, sive Docti, sive Imperatores, sive Reges, & cujuscunq; alterius dignitatis Laici, habent hujusmodi jurisdictionem. Nam hi tantum talem habent jurisdictionem, quos enumerat Apostolus ad Ephes: 4. Ipse dedit quosdam Apostolos, quosdam autem Prophetas, alios verò Evangelistas, alios autem Pastores & Doctores, ad consummationem Sanctorum in opus ministerii, in ædificationem corporis Christi. Parochi autem, multominus Laici de numero eorum non sunt. Hinc Theodosius Junior in Epist. ad Synodum Ephes. hæc habet: Illicitum est eum, qui non est in ordine Sanctissimorum Episcoporum Ecclesiasticis immisceri tractatibus. Cum Comitem

loco sui Ephesum misisset, ea solùm conditione misisse scribit, ut pro rebus religionis, quid commune habere se non jactitaret. Sic enim habetur tom. 3. Conc Labb. *igitur Candidianum --- ad sacram vestram Synodum abire jussimus, sed ea lege & conditione, ut cum quæstionibus & controversiis, quæ circa fidei dogmata incidunt, nihil quidquam commune habeat.* Eodem modò loquitur Basilius in Concil: VIII. generali apud eundem Tomo 8. *Laicorum, ait, cuiq; nulla ratione de Ecclesiasticis causis disputandi --- fas esse dico. Nam Laicus etsi omni pietatis & sapientiæ laude præstet, tamen Laicus est, ovis, non Pastor.* Hinc testatur S. August. Epist. 43. novæ edit. Donatistas ad se contra Episcopos Synodi Rom. in qua, ut Calumniatores damnati fuerant, provocantes repulisse, Constantinum. *Neq; enim ausus est Christianus Imperator sic eorum --- quærelas suscipere, ut de judicio Episcoporum, qui Romæ sederant, ipse judicaret, sed alios, ut dixi Episcopos dedit.* De eodem momento scribens Optatus Milev. lib. 1. contra Parm. Constantinum Donatistas sic alloquentem inducit:

cit: *O! rapida furoris audacia! Sicut in causis Gentilium - - - appellationem interposuerunt. Paganismum ergo sapit, Constantinô teste, laicis causas fidei committere. Audiant hæc prætenlæ reformationis authores, sibiq; iudicium piissimi Imperatoris applicent. Huc pertinent ea, quæ § 2. præc. de Valentiniano, Marciano, Imperatoribus dicta sunt; ergo. Confirmatur & Prob: specialiter 1. pars. imo. Ecclesia est corpus ex Capite & membris constans, ita ut soli Capiti membra regere conveniat, ipsa verò Capiti subijci, ut habetur Rom. 12. Rursus membra non eundem actum habent, quædam assumuntur in regiminis sollicitudinem, quædam verò in famulando & obediendo solum incumbunt; sed sine dubio non populus, sed soli supra populum eminentes ad hoc à Christo assumpti, qui Math: 16. solum Petrum Ecclesiæ Caput instituit, tum 12. Apostolos quibus succedunt Episcopi: *Elegit duodecim ex ipsis, quos & Apostolos nominavit, Lucæ 6. qui etiam Ephes. 2. dicuntur Ecclesiæ fundamenta, ubiq; altum silentium de populo, propterea**

dicit Paulus 1. Corint: 12. *Nunquid omnes Apostoli? Nunquid omnes Prophetæ? Petro, non populo dicitur: Joan 21. Pasce agnos meos, Pasce Oves meas. Apostolis non populo Math. 28. Euntes docete omnes, Episcopis non populo, 1. Petri 5. Pascite, qui in vobis est gregem DEI 1. Timoth 6. Timothee depositum custodi; ergo. 2. Cum ratione sana pugnat, ut oves regant Pastorem; inversus ordo, si subditi imperant Principi; subvertit ordinem Hierarchicum in Ecclesia dominum plebis in Episcopos; sed hæc omnia evenire necesse est, si semel populus habeat auctoritatem definiendi res fidei; ut taceam omnibus hæresibus, schismatibus ad libitum sentiendi libertatis januam aperiri: Neq; enim, ait S. Cyprianus Epist: 55. ad Cornelium, hæreses obortæ sunt, & nata schismata, quam inde quod Sacerdoti DEI non obtemperatur, nec unus in Ecclesia ad tempus Sacerdos vice Christi cogitatur.*

§ II.

Solvuntur objectiones.

Obj: 1. In Concilio Apostolico Act: 15. Convenerunt Apostoli & Seniores
vi-

videre de verbo hoc; atqui per Apostolos intelliguntur Episcopi, per Seniores ætate proVectiores, qui erant Laici, ergò Laici æquè ac Episcopi &c.

Resp: 1. nego 2. p. min: Nam per to Seniores intelliguntur Presbyteri; sic enim vertit translatio ex Syriaco, & Erasmus Roterod: cui multum tribuunt protestantes, utpotè apud illos non suspecto. Et quamvis certum non sit, hos Presbyteros fuisse Episcopos vel simplices Sacerdotes. est tamen probabile Episcopos fuisse, siquidem ipse Princeps Apostolorum per hanc vocem Presbyteri intelligit Episcopos 1. Epist: cap: ult: dicens: Seniores ergo, qui in vobis sunt, obsecro consenior.

Resp: 2. Supposito quod per Seniores intelligantur simplices Sacerdotes, dist: mai. Convenerunt Apostoli & Seniores videre eodem modo, & æquali potestate, nego. diversâ conc: Convenerunt ergo Apostoli ut Judices ad definiendum, Presbyteri ut Consultores ad discutiendam controversiam juxta illud: Cum magna disquisitio fieret. Hoc namq modò Presbyteri simplices, imo

Diaconi sapientiâ & eruditione præditi, ad Consultiva suffragia admissi sunt in Conciliis. Sic *Origenes* in Concilio Arabico, *Malchio* in Antiocheno, *Athanasius* Alexandrinus Diaconus in Nicæno, in subsequentibus Conciliis generalibus, Occidentis præsertim plures alii, in Lugdunensibus I. & II. Constantiensi, Florentino, tandem Tridentino quàm plurimi admissi sunt.

Dices: Ibidem Act: 15. dicitur: *Placuit Apostolis & Senioribus cum omni Ecclesia eligere viros;* atqui per illa verba saltem, *cum omni Ecclesia* intelligitur multitudo fidelium, qui erant in Concilio; ergò non solum Episcopi, neq; soli Presbyteri, verùm etiam Laici in Conciliis, habent suas partes.

Resp: dist. min. Intelligitur multitudo fidelium, qui erant in Concilio, tanquàm motû propriò præsentés, ut definitioni acquiescerent, *conc:* tanquàm Judices & convocati, *nego.* min Dist: conseq: habent suas partes (Laici) consultandi aut definiendi, *nego.* definitis acquiescendi, *conc:* Nam illa electio mittendorum Antiochiam cum de-

creto Collegii Apostolici facta est à solis Apostolis & Episcopis, qui utiq; soli scribebant Epistolam: *Apostoli & Seniores Fratres &c.* per quem titulum innuitur per nomen *Seniores* Episcopos fuisse designatos, qui secundum phrasim Ecclesiæ soli in rigore sunt Apostolorum Fratres, cum simplices Presbyteri sint eorum filii.

Instabis Concilium generale universam representat Ecclesiam; sed Ecclesia est omnium fidelium Cætus; ergo ut Concilium sit generale, debet moraliter tota convenire multitudo.

Resp:: 1. Dist: mai: Concilium generale repræsentat totam Ecclesiam per primos Ecclesiæ Pastores, *conc:* Per alios fideles, etsi doctos, *nego.* Illos namq; non hos Spiritus S. posuit *regere Ecclesiam Dei.* *Resp: 2.* Datis præmissis, *nego* conseq; Sic enim deberet concludere Lutherus; ergo ut Concilium sit generale debet repræsentare omnem fidelium Cætum. *Tunc subsumo;* atqui omnis & totus fidelium Cætus repræsentatur per corpus Pastorum; nam quilibet Episcopus personam gerit suæ
Ec-

Ecclesiæ, quò sensû S. Cypr: Epist: 69. dicit: *Ecclesia est in Episcopo*. Unde S. August: lib: 1. de Bapt: c. 18. asserit: Concilium plenarium, in quo soli sederunt Episcopi, esse totius orbis consensum.

Insistes: Causa communis ab omnibus tractanda est juxta regulam Juris: *quod omnes tangit, ab omnibus debet approbari*; atqui causa fidei communis est omnibus fidelibus; ergo causam fidei omnes debent decidere fideles; proinde sunt in Conciliis generalibus Judices.

Resp: dist: maj. Quando ad omnes ex æquo pertinet; & sic tractanda prout ad singulos pertinet, *conc*: æqualiter ab inæqualibus tractanda est, *nego*. *Dist*: min. atqui causa fidei ad omnes æqualiter pertinet, *nego*, inæqualiter, *conc*: & nego conseq; Causa fidei pertinet ad Episcopos ut Judices & Depositores, & Doctores, ac magistros, ad alios fideles, ut Discipulos Episcoporum. Horum igitur est munus definire, fidelium verò definientes audire, & res auditas credere.

Ad-

Addes Laicos plerumq; esse doctiores Episcopis ; ergò in Ecclesiæ Conciliis, ubi de firmanda fide agitur, jus suffragii habere debent.

Resp: Dato ant: nego conseq; Aliud enim judicium merè doctrinale, quod pendet ab eruditione & doctrina; aliud est judicium decisivum, quod pendet ab authoritate & jurisdictione; Cùm ergo Laici habere non possint judicium illud decisivum, quod pendet ab authoritate & jurisdictione, cum hæc duo non habeant, sequitur eos nec in Conciliis Ecclesiæ jus suffragii habere posse.

Obj: 2. Testimonium fidei repeti debet etiam immediatè à populo fideli; ergo. *Prob:* *Ant:* Fides populorum est certum veritatis signum; ergo.

Resp: ad *Prob:* dist: ant: Fides proposita per legitimos Pastores & accepta, est certum veritatis signum, *conc:* non prius proposita per articulorum fidei determinationem, *nego.* Nemo negat, fidem populorum esse aliquod veritatis signum, cùm enim multi moribus benè instituti, & sicut charitate ita fide conjuncti, religionem Christi, ad-

454 DISSERTATIO IV.

ab omni vitiorum fæce, immunem fervent, & profiteantur, in eis adest, & veritatis Evangelicæ testimonium, imò & pro Gentilibus credibilitatis motivum; hinc teste Pliniô Juniore Trajanus Imp: cessare fecit persecutionem motam in Christianos, cum inculpatam Christianorum vitam esse intellexisset, sed non est judicium fidei: quoniam Christus non populò, sed Petro promissit, ut non deficiat fides ejus. Quoniam in difficili & ambiguo judicio non ad populum, sed Sacerdotem Levitici generis in veteri Lege Deut. 17. fieri debebat recursus, à fortiori in nova Lege.

Dices: Apost: 2. Corint: 3. populi fidelis cætum sic alloquitur: *Epistola nostra vos estis*, & ibidem, *manifestati quòd Epistola estis Christi*; atqui manifestum testimonium alicujus rei sumitur ex Epistola; ergò populus fidelis est regula fidei, consequenter &c.

Resp: dist mai: Epistola nostra ad judicandum de fide, nego. ad discernendum inter bonos & malos ministros, conc: Apostolus nullo modò dicit popu-

pulum fidelem esse regulam fidei, per quam controversiæ definiantur, sed tantum ponere discrimen inter bonos & veros ex una parte, ex altera inter malos sive falsos ministros, nomen Christi prædicantes; quasi dicat Pseudo-Ministri indigent commendatione, quali ego non indigeo, utpotè vobis notus & manifestus per opera & conversationem meam. Et hoc est, quòd dicit: *aut numquid egemus nos, veri Ministri, sicut quidam, scilicet pseudo, commendatiis Epistolis, id est laudibus missis ad vos, ab aliis, aut ex nobis, aliis missis.* Ideo statim causam hujus assignans subdit: *Epistola nostra vos estis;* quasi dicat, ego bonas literas habeo, non indigeo aliis. *Scripta in cordibus nostris,* id est semper vos in memoria habemus, scientes vestra erga nos officia, vestram fidem, quam accepistis à nobis, & acceptam conservastis puram. His omnibus Apostolus declarat curam, quam Pastores habere debent de ovibus, quæ certò Novatorum causam nullo modo juvant. Sed. Addit Apostolus: *Quæ, Epistola, scitur & legitur ab omnibus homini-*

minibus. Scitur, ait S. Thomas Lect: 1. in Caput 3. Epist: 2. ad Corint: inquam, quia per nos instituti estis & conversi, quod nullum latet; legitur autem, quia exemplô nostri, etiam alii imitantur vos. Cujus autem hæc sit Epistola, sic ostendit; quia Christi, hinc dicit: *manifestati quoniam estis Christi*, id est, à Christo informati & instructi, scilicet principaliter & authoritative. Hinc patet ad min: & negatur conseq;

Petes. 1. Quid requiritur ad legitimam convocationem Concilii generalis?

Resp. 1. Requiritur, ut hæc convocatio fiat ex autoritate S. Pontificis vel convocantis Episcopos, vel convocationi ab alio factæ assentientis. Patet ex dictis.

Resp 2. Non requiritur, ut omnes totius Orbis Episcopi ad locum Concilii conveniant. Patet ex praxi; nam in nullo Concilio generali post sæculum III. celebrato omnes totius Orbis Episcopi adfuerunt. In Nicæno namq, I. aderant solum 318. In Constantinop. I. gener. II. 150. In Ephesino gen. III. juxta plures 220. In Calcedon. gen. IV. 630.

cir-

circiter, quia duplo Patrum major numerus dicitur. Nicæni Concilii Patrum numero. In Constantin. II. gen. V. 155. vel secundum alios 165. In Constantin. III. gen. VI. 289. secundum Theophanem & Cedrenum in Annalibus, secundum Photium 170. lib. de Synodis; in Actis Synodi Act. ult. reperiuntur 160. In Nicæno II. gen. VII. 360. vel 350. secundum alios. In Constantin. IV. gen. VIII. 383. Et hæc sunt Concilia generalia in Oriente celebrata, in quibus pauci aderant Latini Episcopi, vicissim in subsequentibus, quæ in Occidente coadunata sunt, pauci aderant Græci.

Resp 3. Non requiritur numerus certus & determinatus Episcoporum. Nam ut jam dictum, in aliis plures fuerunt, in aliis pauciores. Requiritur ergo & sufficit 1. ut convocatio sit generalis ita ut omnibus majoribus Ecclesiæ Provinciis innotescat. 2. Ut nullus excludatur Episcopus, nisi sit excommunicatus. 3. Ut ex majori parte Provinciarum Ecclesiæ aliqui veniant, qui cæterorum vota & vices suppleant, ita tamen, ut si celebretur Concilium in Oriente,
suf.

sufficiat multos Orientalium convenire, & aliquos ex Provinciis Occidentis; vicissim si in Occidente.

Petes 2. Quô jure admittuntur ad Concilia generalia S. R. Ecclesiæ Cardinales?

Resp. Cardinales vel sunt Episcopi vel non? si Episcopi, de jure & vocantur, & admittuntur ut Episcopi. Si non sunt Episcopi, sed Presbyteri vel Diaconi, sunt etiam ut Cardinales, si non de jure, saltem ex consuetudine usû recepta & approbata pariter vocandi, & merito 1. quia ipsi ut Cardinales & S. Pontifici Collaterales, licet non Episcopi, ob amplitudinem suæ dignitatis & assistentiam, sunt Episcopis ipsis majores, ut habetur ex cap. *Ad Apostolicæ de judiciis* in 6. Et ex Clem. *Pastoralis eodem titulo*. 2. Quia Cardinales in suis titulis jurisdictionem habent Episcopalem, ut constat ex Cap. *Iisq; de Major. & Obed.*

Idem dic de Abbatibus & Generalibus Ordinum, qui in Conciliis admittuntur ad Suffragium definitivum non jure Divinô sed Ecclesiasticô, ut scilicet

cet repræsentantes suos subditos, ex privilegio priori à jurisdictione Episcoporum exemptos, hocq; practicum legimus in Conciliis gen. præsertim Constantiensi, Florentinò, Lateranensi ultimo, & Tridentino. Nihilofecius ante ea tempora admissi sunt aliquando in Conciliis Occumenicis; in Concilio Nicæno II. Act. 4. subscriptos legimus una cum Episcopis, *Archimandritas*, id est Abbates, & regulares Prælatos. In libro quoq; Pontificali statuitur, ut qui ab Episcopis benedicuntur Abbates, se jurejurando adstringant, accedendi ad Concilium, quotiescunq; à Papa vocabuntur.

CONSECTARIUM.

I. **S**olos Episcopos, cum iis qui privilegium habent vocis, in Conciliis gaudere jure suffragii decisivi subordinatos tamen S. Pontifici hi enim potestatem ligandi & solvendi habent annexam Episcopatui, & aliundè decretis subscribere solent, *Ego N. definiens, aut judicans subscripsi.* Nec refert quod S. Pontifices dicere solent. *Sacro approbante*
Con-

Concilio, vel de Fratrum nostrorum Consilio, quia equidem Episcopi & approbant & consilium dant, sed id non solum præstant, sed etiam judicant cum Pontifice. Dicit Pontifex de eorum consilio non iudicio, quia consilium ab eis accipit, non iudicium, nec iudicandi potestatem, quam à solo DEO habet. Dixi *subordinatos Summo Pontifici*. Quia S. Pontifex sedet in Concilio non ut simplex Præses, sed ut Princeps. Principi autem subordinantur Iudices in Senatu. Sic Pontifex non tenetur sequi maiorem partem Episcoporum iudicantium in Concilio, sed potest sua auctoritate utens, illorum iudicium, dum à veritate devient, irritare, sicut irritavit Concilium Ephesinum. II. Ariminense, & Canonem 28. Concilii Calced: Sic Julius I. cum aliquibus Episcopis omnes Arianorum Pseudo-Synodos exsufflavit, Athanasium obstrepente Arianorum multitudine, in propriam restituit Sedem, & fidem Nicænam immaculatam defendit. Sic S. Hilarius & aliqui pauciores adhærentes S. Pontifici in Concilio Seleuciæ Arianos &
Se-

Semi-Arianos superârunt. Sic *S. Augustinus* multis in locis docet *S. Stephanum* Pontificem prævaluisse contra Rebaptizantes & eorum Concilio. Sic *S. Athanasius* expressè docet, *Tractatû* ad eos, qui volunt semper ad multitudinem attendere, quandoq; pauciori numerô esse cedendum; hinc ipse non semel, spre-
tis Arianorum Conciliis, ad solum *S. Pontificem* confugiebat, qui adunatis aliquot Episcopis cuncta subvertebat, in gratiam tanti Episcopi, hæreticorum sævientium molimina. Et nisi res ita se haberet 1. Petra supra quam Christus ædificavit Ecclesiam nutaret; concusso autem fundamentô, ruit ædificium. 2. Multitudo Acephala prævaleret, cùm illa numero plurali gaudere velit, & in eis foret corpus Ecclesiæ monstruosum. Quæ quam absurda sunt, quis non videt? Hinc præclarè ait *Canus* lib. 5. de *Author. Conc.* Pondus Concilio dat Summi Pontificis gravitas & authoritas, quæ si adsit centum Patres satis sunt, sin desit, nulli sunt satis, sint quamlibet plurimi. Nec si major pars Patrum vere sentiat, Summus Ecclesiæ Pontifex repugnabit; Id enim ad

peculiarem Christi procurationem pertinet, semperq; pertinuit, ne Ecclesia in factiones duas dividatur; nec Romanus unquam Episcopus contra Patres Concilii verè sentientes dixit. Hæc ille.

2. Clamorem & vocem populi in rebus fidei definiendis supervacaneam esse, si vè talis vox consideretur ante definitionem, si vè concomitanter, si vè etiam consequenter. Et verò si antecedenter inanis est, nam populus petit & expostulat ab Ecclesia definitionem, unde nihil adhuc determinat vox populi: Si concomitanter, ipsa populi vox, ipsum ejus judicium, utpotè inter se diversum est materia judicii, minimè verò vox & judicium definiens. Sed neq; prodest magis, si consequenter spectetur, quandoquidem facta vel à S. Pontifice vel Concilio Oecumenico definitione, nulli sub interminatione anathematis licet revocare in dubium, quod semel canonicè definitum est de fide. Hanc regulam ipsi Calvinistæ, revera convicti in Pseudo-Synodo Dordrechtana secuti sunt; mota quippè circa Prædestinationem controversiâ (vide apud

apud Florimundum, Remundum & alios) inter Gomarem & Ariminum, apud Batavos Professores, priore propugnante prædestinationem necessitantem ex sententia Calvinii, ante prævisa merita; altero vero è contrà & in sensu Semipelagianorum, sub magnis prohibitum est pænis, nè quis adversus prædestinationem necessitantem insurgeret, eò, quòd eam sic Synodus esse definiisset. Mox in Hugonem Grotium, postea ad Catholicorum castra transeuntem, & alios, animadversum est.



ARTICULUS III.

Utrùm Concilium generale sit infallibile in definitionibus?

Lutherus & Calvinus dum suorum errorum partem plurimam in antecessum in Conciliis prædamnatam probè scirent, imminensq; Tridentinæ Synodi iudicium præviderent, nulla meliori viâ rebus suis prospectum iri existimârunt, quàm si Conciliorum Oecumenicorum supremam indeficientemq; ve-

ritatem inficiarentur. Suorum Magistro-
rum arrogantiam imitantes moderni Se-
ctarii tanquam pro aris suis, focisq;
pugnant, ut inerrantiæ & infallibilitatis
privilegiô Concilium generale privent.

Porro quæstio non movetur de rebus
temporalibus, imò nec de particulari
disciplina; conveniunt enim Theologi
communiter, Ecclesiam tametsi in Con-
cilio congregatam non esse circa illa
momenta infallibilem; sed tantum de
rebus ad fidem & mores spectantibus.
Suppono quoq; Concilium non Ace-
phalum, sed approbatum & S. Pontificis
calculo munitum. Unde.

Dico: Concilium generale legitime
congregatum & confirmatum à Summo
Pontifice, est infallibile in definiendis
quæstionibus fidei & morum. *Affertio*
sequitur ex dictis, supra; Ecclesiam nem-
pe, credentem sive docentem non pos-
se errare, cum generale Concilium sit
ipsa Ecclesia, ut potè eam repræsen-
tans, & ex iis quæ allata sunt pro infal-
libilitate S. Pontificis ex Cathedra de-
finientis, Cum enim S. Pontifex Con-
cilio Caput sit, quô modô fieri poterit,
ut

ut illud erret, habens præsidem talem, qui inerrantiæ privilegiò est donatus a Christo.

Prob: Quod Christus, promisit, quod omnium sæculorum propugnauerunt Patres, hoc citra dubium ut inconcussa veritas teneri debet; sed Christus promisit infallibilitatem Concilio generali legitimè adunato, eandem Patres docent & agnoscunt; ergo. *Prob: min. quoad 1. partem 1.* Christus promisit portas inferi non prævalituras adversus Ecclesiam Math: 16. atqui defacto prævalerent, si Concilium generale infallibile non esset; Si enim quidquam contra fidem aut mores definiret, quis non videt totam Ecclesiam hòc ipsò in errorem duci, quò enim caput se inclinat, & aciem suam oculi dirigunt, eo totum corpus ferri est necesse. 2. Christus infallibilis in dicendo & loquendo promisit se adfuturum in Conciliis generalibus, jam Math: 18. *Ubi sunt duo aut tres congregati in nomine meo, ibi sum in medio eorum;* hoc porro intelligendum est maxime de congregatione totius Ecclesiæ. Jam Math: 28. *Ecce vobiscum*

sum omnibus diebus usq; ad consummationem sæculi. Tum Joan: 16. Spiritus docebit vos omnem veritatem; atqui hæc promissio inanis foret, si Concilium generale infallibile non esset; ergo. Prob: min: quo ad 2. partem. S. Athanasius fidei Nicænæ Vindex Epist: ad Affricos ait: Verbum Domini per Oecumenicam Nicææ Synodum manet in æternum. S. Ambr Epist: 32. Sequor Tractatum Nicæni Concilii, a quo nec mors, nec gladius me poterit separare. S. Gregor: M. lib: 1. Epist: 24. Quatuor prima Concilia, se veluti quatuor Evangelia venerari, & pari honore V. Synodum Oecumenicam habere testatur. Plures Patres supra adduximus, alios vide fuisse apud V. Bellarminum lib: de Conciliis.

Pro intelligentia textus Math: 18. in prob: citati rectè observat Sylvius; aliquos posse dupliciter in nomine Christi convenire. 1. Si convenient in bonum finem & animò Christianò. 2. Si autoritate Christi convenient, quod fit cum autoritate ejus Vicarii conveniunt, & quæ definiunt, ejus authorita-

ritate firmanur. Qui priori modò conveniunt in nomine Christi, ut in Conciliis Provincialibus, Christus adest in medio eorum ut adiutor, non ut infallibiliter definiant, sed ut diligenter rem discutiant, etsi contingat eos errare, a Capite infallibili erudiuntur & in veritate firmanur. Qui verò posteriori modò conveniunt in nomine Christi, Christus eis adest ut infallibiliter definiant, quia S. Pontifici, & Ecclesiæ promisit infallibilitatem.

Objic: Concilium Nicænum est generale, atqui illud tantæ authoritatis non est ut censeatur infallibile, ergo. *Prob. min.* S. Aug: lib: 3. contra Maximin: dicit: *Nec ego debeo Nicænum, nec tu Ariminense tanquam prædicaturus proferre Concilium, nec ego hujus authoritate, nec tu illius detineris; ergo.*

Resp. His S. Doctor infallibilitatem laudati Concilii non negat, cum 1. dicat, *nec ego hujus nempe Ariminensis, nec tu illius Nicæni Authoritate detineris.* 2. ait: *Hoc est illud Homousion, quod in Concilio Nicæno adversus Arianos a Catholicis Patribus veritatis authoritate firmatum est.*

est. Proinde sic loquitur S. Doctor, quia frustra laborasset, si autoritate Concilii Nicæni premere voluisset Maximinum, qui illud rejiciebat, ut illegitimum, & Concilium (intellige post lapsum Patrum) Ariminense admittebat ut legitimum. Cum ergo tunc Augustino non erat oportunum Nicænum legitimum esse probare, & Ariminense spurium, supersedit ab Actis utriusque ut Scripturæ autoritate controversiam prosequeretur.

Dices: Idem S. Aug. lib. 2. de Bapt: c. 5. dicit: *Plenaria Concilia priora a posterioribus emendari posse:* atqui quod emendari potest, errori est obnoxium; ergo innuit S. Doctor Concilium Nicænum infallibile non esse.

Resp. dist: maj. Emendari in iis, quæ sunt fidei, *negō*; quæ sunt facti & disciplinæ, ac rerum experimento cognoscuntur, *conc.* Unde S. Aug. addit: *Cum aliquo experimento rerum aperitur, quod clausum erat, & cognoscitur quod latebat.* Quod certè ad fidei & morum veritates non spectat, quæ non rerum
ex-

experimento sed Verbô DEI scripto & traditione innotescunt.

Instabis. S. Greg: Nazian. Epist: 55. abhorret ab omni Concilio: hoc, ait, animo sum, ut omnem Episcoporum Conventum fugiam, quoniam nullius Concilii finem lætum & faustum vidi; atqui hoc S. Præsul non diceret; si &c. Ergo.

Resp. Intelligenda hæc sunt de Conciliis illegitimis, qualia fuerunt Concilia Arianorum sub Constantio, in quibus non dabatur Catholicis libertas suffragiorum, quale fuit Mediolanense, Ariminense &c. Ipso vivente duo fuerunt Concilia generalia celebrata, primum Nicænum, quod magnis commendat laudibus Orat. 32. Alterum Constantinopolitanum I. cui ipse adfuit.

Oppones. Concilium Constantinopolitanum II. a plurimis & magnis Ecclesiis Africanis Hispaniarum, Galliarum, Istriae, & aliquibus Italiae longo tempore non fuit receptum; atqui veritas infallibiliter definita ab omnibus recipi debet; ergo laudatæ Ecclesiae illud Concilium infallibile non agnoverunt.

Confirm: Canones Trullani varios
con-

continent errores; atqui hi Canones à Concilio Oecumenico VI. fuerunt editi; ergo.

Resp. dist. mai. Non fuit receptum, eo quod errore facti non crediderint præfatæ Ecclesiæ illud Oecumenicum esse, *conc. secus, nego.* Vide Tractatum de Incarnatione ubi agitur de tribus capitulis in citato Concilio damnatis.

Ad conf. Nego min. Nam Concilia V. & VI. nullos Canones ediderunt, ut ipsi Græci Epistolâ ad Justinianum II. Imperat: testantur. Illi ergo Canones conditi fuerunt a solis Orientalibus, qui post absolutam Synodum VI. à Justiniano II. convocati conveniunt in Palatium *Trullus* dictum, ibidem Concilium habuerunt, quod *Trullanum, Erraticum, & Quinto-Sextum* dici solet, atq; sub prætextu supplendi Synodos V. & VI. Canones 102. ediderunt. Sed quoniam Rom: Pontificis defuit præsidentia, nec hos Canones unquam approbare voluit, ideo non habent Concilii generalis auctoritatem. Nec. *Dicas s. Adrianus Pont. in Epist. ad*

Tha-

Tharasium Patr. CPolitanum citat Can: 82. ergo. Nam

Resp. Hoc non facit Canones approbando, sed allegando id, quod veritatem continet ad Græcos convincendos. Nec.

Dicas 2. *Adrianus* ibidem ait: *VI. Synodum recipio cum omnibus Canonibus suis.*

Resp Licet illa verba reperiantur in Epistola, non tamen ut Pontificia, sed ut verba *Tharassii*, citata ab *Adriano* ex Epistola Synodica, quam *Tharassius* ad *Adrianum* misit. Ad reliquas Hæreticorum obiectiones solvendas, notandæ sunt sequentes solutiones, nimirum 1. Concilia, quæ allegantur, & dicuntur errasse, vel non sunt generalia; vel 2. si sunt generalia, non fuisse legitima & approbata a S. Pontifice; vel 3. fuisse approbata quidem, sed tantum ex parte, & non secundum ea, in quibus est error; vel 4. quod adducitur ab Hæreticis, non fuisse definitionem Concilii, sed tantum sententiam alicujus Patris, vel Doctoris, quæ refertur in Concilio; vel 5. fuisse tantum
argu-

argumenta & probationes prævias; vel 6. fuisse tantum quæstiones facti non juris, & quidem facti particularis, nullam habentis connexionem cum articulis fidei & quæstione juris; vel fuisse tantum errorem in decretis morum quoad circumstantias loci, temporis, personarum &c. vel 7. Verba Conciliorum à malevolis hæreticis trahi in alienum sensum; vel deniq; omnino depravari, aut perperam citari, ut sit ab hæreticis, qui sine fraude & mendaciorum suam tueri non possunt.

Petes 1. Quid dicendum de Decretis Conciliorum Nationalium, & Provincialium?

Resp. 1. Si secundum se spectentur, sunt quidem veneranda, non tamen infallibilis authoritatis, quia Concilia particularia nullo titulô gaudent privilegiô infallibilitatis & sæpé erraverunt. 2. Si sint à S. Sede confirmata, ut dogmata fidei ab omnibus fidelibus fide Divina credenda sunt, ut infallibilis authoritatis ex ipsa S. Pontificis confirmatione. 3. Si seclusâ confirmatione positivâ & expressâ S. Pontificis, per-

pervenerunt ad communem Ecclesiæ notitiam, & neq; Pontifex neq; Ecclesia contradicant, multi censent esse infallibilis authoritatis, quia istud silentium censetur tacita & virtualis approbatio. Nam si hujusmodi decreta omnibus nota, essent falsa, nunquam Pontifex aut Ecclesia taceret, sed errori per decreta contraria occurreret. Talia sunt, ajunt, Concilia Toletana, Arelatensia, Hispalensia & alia.

Petes 2. Ut concilia generalia infallibile judicium faciant, debentne necessario confirmari a S. Pontifice?

Resp. Affirm: ex Cap: *Significasti, de Electis.* Ubi Paschalis Papa dicit: omnia Concilia per Romanæ Ecclesiæ authoritatem robur accepisse. Hinc Concilia semper solita fuerunt suorum Decretorum confirmationem a Rom: Pontifice petere. Sic Concilii Nicæni Patres scripserunt Sylvestro: *quidquid constituimus in Concilio Nicæno, precamur vestri oris consortiō firmetur.* Quibus respondit S. Pontifex: *confirmo ... meumq; chyrographum offero in vestro Sacro Concilio una parem dare consensum.* Hujus etiam confirmationis petitio-

tionem à Sylvestro testantur Patres Synodi Rom: sub *Felice* III. apud *Baronium* ad an: 484. Concilium generale II. à *S. Damaso* confirmatum tradit *Photius* de septem Synodis: *Quibus, post haud multò & Damasus Episcopus Romæ eadem confirmans. & consentiens. accessit. Et sic de aliis.*

Ratio. Suffragatur: Concilium gen: non est infallibile in suis decretis, nisi quatenus repræsentat Ecclesiam universam; atqui non repræsentat Ecclesiam, nisi Caput suum Rom: Pontificem secum decernentem habeat; nec censetur Rom: Pontifex judicare, nisi aut ipse in Persona propria præsideat, aut dum decreta Concilii confirmat. Sed.

Dices. Ut supra dictum; S. Pontificem octo Orientalibus Conciliis & Tridentino, in quibus ipse præsens non erat, præfuisse per suos Legatos, ejus personam repræsentantes, primum locum occupantes, & ante omnes Episcopos subscribentes; ergo illa universam Ecclesiam repræsentabant, erant enim suo capiti unita; ergo non indigebant ulteriori confirmatione.

Resp:

Resp: Cùm Legatis ad Concilium destinatis Pontifex soleat dare instructionem circa agenda & definienda, quod fieri solet, quando sunt pauca definienda (in Tridentino namq; aliter actum) & decernenda, si eam non sequantur definiendo cum Concilio, definitio non erit rata & infallibilis. Cum enim tunc non agant ut Legati Pontificis, Concilium non est in definiendo Capiti suo junctum, nec consequenter universam repræsentat Ecclesiam. Si verò sequantur instructionem sibi datam, probabilius est, Concilii ratam esse & infallibilem definitionem, quia tunc cum Concilio consentit Pontifex; tunc enim illa instructio fit definitio ex Cathedra, dum illi consentit, Concilium in formando decreto. Et tunc nihilominus existimamus necessariam esse confirmationem, non ut decreta Concilii aquirant infallibilitatem, quam jam habent, sed ut innotescat Ecclesiæ, omnia in Concilio ritè fuisse servata, & juxta instructionem & mentem Pontificis decreta fuisse facta, quod aliter sciri non potest, cum aliquando præter instructiones publicas habe-

habeant etiam privatas, quas forte non exhibuerunt, aut exhibere non poterant. Hinc sequitur; si Legati adsint Concilio sine instructione S. Pontificis, quidquid definit Concilium etiam iis assentientibus, non est infallibilis auctoritatis, nisi subsecuta confirmatione S. Pontificis, quia privilegium inerrantiæ, junctum S. Pontificatui, nequit Pontifex conferre Legatis.

*Solvuntur objectiones Protestantium
contra Conc: Trident:*

Opponunt: 1. In Concilio Trid: naturalis juris regula violata est; ergo nullo modo ejus judicium censeri debet irreformabile. *Prob: ant:* Jure naturali cautum est, ne quis Judicis & partis litigantis personam sustineat; atqui tamen Rom: Pontifex, totaq; Ecclesia Rom: quam sexcentorum errorum ream fecerunt & proclamaverunt Lutherus & Calvinus, Judicis & partis litigantis personam sustinuit in Concilio Trid: ergo.

Resp: 1. Ex hoc argumento sequi, quod nullus regiae Majestatis reus, nullus Reipublicæ perturbator, in judicium voca-

vocari, pænisq; subjici possit. Imo nullus Hæresiarcha, ut Arius, Nestorius, Eutyches & alii damnari potuissent, nisi jure naturali violato, cum & ii, Pontifices, Ecclesiamq; quæ illos in Conciliis damnavit, sive etiam extra, novitatis & corruptelæ circa fidem pariter accusarent. Non video, quos in sua causa velint habere Judices, nisi seipfos pro seipsis.

Resp: 2. nego ant: ad Prob: nego min: Ubi namq; agitur de bono publico, neq; Princeps aut Respublica, neq; alia suprema authoritas partis litigantis personam contra subditum sustinet, maximè si juris, non facti quæstio moveatur. Ex quo sequitur Rom: Pontificem & Ecclesiam in Concilio Trid: congregatam tum ad confirmandam fidem, à Novatoribus violatam, tum ad restituendam Ecclesiæ disciplinam, quam bella & hæreses labefactaverant, litigantis personam minimè egisse.

Opponunt. 2. Juxta Canones antiquos in Provincia sua non extra debent judicari accusati; ergò non Tridenti dijudicanda causa fuerat, sed in Germania

finienda, ubi initium habuit causa Lutheri.

Resp: 1. gratis. Etiam Tridentum in Germania situm habet.

Resp: 2. dist: ant: debent judicari in causis privatis & ubi de factis personalibus quæstio est, conc. in causis publicis, & ubi de jure quæritur, nego. Ratio, quia in factis personalibus, testes, ex quorum testimonio res facti pendent, non tam facile in loca dissita advocari possunt. Secus est in causis fidei, cum enim ad omnes spectent, ubiq; possunt examinari. Sic hæresis Ariana orta Alexandriæ in Ægypto, damnata est Nicææ in Bithynia, Nestoriana orta Constantinopoli in Thracia, damnata Ephesi in Asia minori. Nullo ergo jure elidere possunt auctoritatem Concilii ex eo, quod Tridenti fuerit celebratum, quæ & ad Germaniam pertinens, & comoda Germanis civitas erat, minimè suspecta, ut Ferdinando Imp: non Rom: Pontifici beneficiaria, quæ etiam in Spirensibus Comitibus à Germaniæ Principibus 1542. postulata fuit.

Opponunt 3. Esto hæc ita se habeant, tamen injuriosè cum Protestantibus Tridenten-

denti actum est; ergo. *Prob: Ant:* Non interfuere Concilio Protestantes, nec Principes confessionis Augustanæ; ergò cum absentes & inauditi sine injuria damnari non possint injuriosè &c.

Resp: Non aderant sua culpâ, quia invitati adesse noluerunt, hoc ipso quamvis absentes non tamen inauditi damnati sunt. Adfuerunt enim eorum scripta, quæ nomine Authorum loquebantur. Sed.

Inquiunt: Etsi fuerint invitati, tamen illis ad Concilium accedere non erat licitum, eo, quod nollent jurare in verba Pontificis.

Resp: Absq; hujusmodi juramento etiam Protestantibus libera facultas accedendi data est; & concessæ sæpius literæ liberi commeatûs; quæ nunc extant Sess: 13. 15. 18. Sed illi ipsi sunt, qui nimium diffidentes, vel adesse noluerunt, vel nonnisi iniquis conditionibus, in nullo Concilio generali practicatis adesse volebant.

Opponunt 4. Concilium illud legitimum esse non potest, in quo sublata fuit Episcopis judicandi libertas; sed res ita

se habuit Tridenti; ergo. *Prob. min: 1.*
Quia Pontificis Legati rerum proponendarum arbitrium ad se solos traxerunt.
2. Quod nihil Patribus Tridenti ad deliberandum proponeretur, nisi quod Pontifici Romæ degenti placeret. 3. Quod si fortè Episcopi liberam vocem emitterent, statim illorum ora verberabant, ut contigit cuidam Gallo; ergo.

Resp: nego calumniam in min: positam. *Ad 1.* Cùm jus proponendi penes Legatos Pontificios & Concilii Præsides solos semper extiterit, in antiquis Conciliis Oecumenicis, quorum Acta & historiam habemus, maximè Ephesino, Chalcedonensi, Constantinopolitano III. & IV. Nicæno II. miror quod hoc jus Pontificiis Legatis ademptum velint Protestantes Tridenti. Libertate sua gaudebant priora Concilia, in quibus hujusmodi forma servata fuit, cur non Tridentinum? Libertas omnino in Concilio requiritur, an in proponendo? Minimè. Sic enim Concilium non Concilium, sed domus confusionis foret, cùm in ista hypothese nulla pax, nullus ordo esset. Sufficit, ut liberum sit cuiq; super quacunq;

cunq; re proposita, sententiam ferre, quam libertatem Tridenti sublatam esse probare non possunt.

Ad 2. Per hoc non potest dici sublatam libertas judicandi, sed Rom: Pontifex Romæ degens suis Consiliis, monitisq; missis per Epistolas juvabat Patres Tridenti sedentes. Eo modò se gessit *Cælestinus* cum Patribus Ephesinis, *Leo* cum Chalcedonensibus, & alii cum aliorum Conciliorum Præsulibus, præscribendo eis, quomodo in erroribus proscribendis procedendum sit, & quæ materiæ concilialiter tractandæ. Quis autem dicet, per hoc Patribus congregatis ademptam esse suffragiorum libertatem? Ne quidem hoc Nestorius, Eutyches, Monothelitæ, Iconomachi, præsertim Photius Legatis, vel ipsi S. Pontifici objecerunt. Cæterum non obstantibus literis, liberam semper mansisse Patribus sentiendi, judicandiq; facultatem, nec ad eam quomodo lædendam hæc monita & consilia transmissa fuisse à S. Pontifice, liquet ex Epistolis Cardinalis *Farnesii*, & Card: *Borromæi* ad Legatos datis, annis 1546. & 1563.

Quare.

Gg 3

Ad

Ad 3. Si cui fortè Episcopo Gallo improprium est, quod liberius pro Galli conditione cantaret ad Petrum excitandum, id debuit contingere, quod modum privatus ille excederet, nimirumq; re ipsa cantaret, quod in numerosissimo Cætu non potest, non aliquando contingere, aut illi à privato Episcopo improprium est, cui non satis placebat illius Galli cantus. Nec enim à Legatis & Præsidibus Gallus ille reprehensus.

Synopsis Historica

Conciliorum generalium.

Quamvis nomina *Generale* sive *Universale* & *Oecumenicum* Concilium prima fronte & grammaticaliter idem sint, in sensu tamen Theologorum diversum sensum & usum habent. Constat enim plura esse generalia & universalia Concilia, ut Mediolanense anno 354. in causa S. Athanasii habitum, Ariminense anno 359. coactum, & alia, quæ tamen Oecumenica non sunt utpotè ab Ecclesia reprobata. Unde ut Concilium generale sive universale sit, sufficit quod sit

fit totius Orbis Episcoporum convoca-
ta congregatio; ut idem Oecumenicum
sive generale legitimum sit, requiritur
insuper, Ecclesiæ approbatio. Hæc ideo
dicta sint, ut intelligatur, quomodo
præc: duabus Dissert: his usi sumus no-
minibus. Igitur de generalibus Conciliis
Oecumenicis agemus, quæ octodecim
communiter numerantur. Octo in Ori-
ente coacta scilicet *Nicanum I. Constan-*
tinopolitanum I. Ephesinum, Chalcedonense,
Constantinopolitanum II. gen: v. Constan-
tinopol: III. gen vi. Nicanum II. Constan-
tinopolit: IV. gen: viii. In Occidente
decem, nempe I. II. III. IV. *Lateranen-*
sia, I. & II. Lugdunense, Viennense Flo-
rentinum, Lateranense V. & Tridentinum.
Igitur.

§ I.

De Concilio I. Nicano Oecumenico I.
& Sardicensi.

Hoc primum Concilium post tempora
Apostolorum celebratum, Nicææ in
Bythinia sub Flavio *Constantino M. pri-*
mo (probabilius) *Christiano Impe-*
ratore, & S. Sylvestro Rom: Pontifice,
anno.

1^{mò}. contra *Arium* Presbyterum Alexandrinum, primò Schismaticum, *Meletii* Lycopolitani castra sequentem, postea Hæreticum novum & impium de Filio DEI disseminantem dogma: *Erat aliquando, quando (Filius DEI Patris) ex non exstantibus factus est, non de Patris substantia genitus; ex tempore, non ab æterno; haudquaquam DEUS verus de DEO vero, sed ex nihilo creatus, minor Patre, voluntate, naturaq; mutabilis.* Alexander Patriarcha contumacem in errore Arium anathemate ferit in Synodo 100. Episcoporum sui Patriarchatûs. Sed Arius ab *Eusebio* Beroensi, Nicomediensi postea Episcopo (hic in persecutione diis immolavit, & Christum negavit, à quo tempore dicitur nunquam de Divinitate Christi bene sensisse, ab illo Ariani *Eusebiani* dicti) in Synodo in Bithynia coacto communioni restituitur, eo modo incrementum cœpit hæresis.

2^{dò}. Contra *Meletium* Lycopolitanum Episcopum, hic enim quod Idolis in persecutione sacrificasset, detrusus à S. Petro Patr: Alexandrino ab Episcopatu, cùm debuisset pænitentiam agere, aut

ad

ad aliam Synodum pro remedio recursum facere, segregavit se à Communione Patriarchæ, & ut Schismaticus jura Patriarchalia usurpavit, Ecclesiæ Ministros imò Episcopos ordinando, ac per civitates constituendo, quod munus Metropolitaram fuit, scilicet Patriarchæ Alexandrini, qui unus erat in Ægypto Metropolita.

3tio. Contra *Quatuordecimanos* in Asia Ecclesiam scindentes, hi quod Pascha celebrarent eodem die, quo die Judæi, hoc est ipsa decima quarta primi mensis, lunâ, in quemcunq; diem incidisset, non autem die Dominico 14. lunam sequente, more aliarum Ecclesiarum, primo moniti à S. Pontificibus tolerati sunt, quoniam res meræ disciplinæ fuit; sed postquam prædicare ausi fuissent, ad necessitatem salutis pertinere, hac non alia die celebrare Pascha, primò in Concilio Palestino, Pontico, Gallico confirmantibus Decretum Victoris I. male audierunt, & re ipsa fuissent excommunicati à Victore Pontifice, nisi intercessisset S. Irenæus Lugdun. Episcopus -- Eorum ergo causa ad
Sy-

Synodum Nicænam delata est, in qua 318. Patres damnârunt 1. Hæresim Arii, definientes Filium DEI consubstantialem Patri. 2. Determinârunt diem Paschatis celebrandam, non more Judaicô sed Apostolicô, non decimâ quartâ die mensis Martii, sed die Dominicâ decimam quartam Martii lunam, post vernal æquinoctium immediatè sequente. 3. Judicata causâ Meletii statuerunt, ut nudô retentô Episcopi nomine, sine ullis Episcopi functionibus Lycum incolet, seu ut in sua Lycopolitana civitate maneret. 4. Pro restauranda Ecclesiæ disciplina varii editi sunt Canones, de quorum numero in hodiernum diem controversatur. Græci & Latini fere omnes, viginti duntaxat non plures esse, aut saltem superare contendunt. Canon I. *Qui se sponte abscindunt, sive castrant, Clericos fieri vetat, id tamen permittit aliis, qui à Medicis in ægritudine vel à barbaris, vel Dominis secti sunt.*

Nota. Occasio hujus Canonis hæc fuit: Leontius quidam Presbyter, qui accusatus de familiari quodam cum quadam

dam commercio, iussus abstinere ab illius contubernio, seipsum castrandum dedit, ut sic libere ejus commercio uti posset, & nihilominus depositus est, & ad Arianos deficiens, Antiochenus factus est Arianæ factionis Episcopus. *Athan: de fuga sua & in Epist: ad Solit.* Causa vero hujus seu ratio Canonis patet ex 22. (qui Apostolici dicuntur) Canone: *si quis abscidit semetipsum, id est, si quis sibi amputavit virilia, non fiat Clericus, quia sui ipsius homicida est, & DEI Conditoris inimicus.* Sensus autem Canonis est, quod non involuntaria, sed spontanea sui ipsius procurata castratio, quantumvis hoc bono pietatis zelo contigerit, ut fecit *Origenes* depositus propterea à Presbyteratu, intelligitur.

Canon II. *Neophitos recens conversos & baptizatos in Presbyteros vel Episcopos statim post baptismum ordinari prohibet,* ex sententia Apostoli 1. ad Tim: 3.

Nota. Propter hunc Canonem *Photio* in VIII. Synodo anathema dictum.

Canon III. *Clericis inhibet subintrodu-*
gas

Etas fœminas omnes, exceptis iis, de quibus suspicio oriri non potest, ut sunt Mater, Soror, avia, amita, matertera.

Nota. Hujus Canonis autoritate fretus Basilius non permisit septuagenario Seni secum habere mulierem, sed dixisse: Lege Canonem à S. Patribus nostris in Nicæna Synodo constitutum.

Canon IV. Episcoporum a tribus saltem Comprovincialibus Episcopis, de aliorum assensu ordinationem fieri jubet, Metropolitæ Confirmationis jure servato.

Nota Occasione Meletii Canon editus, qui jura Metropolitana Alexandrini Patriarchæ invasit, ac Suffraganeorum consensum, qui tamen nullus esse potuit, sprexit.

Canon V. Excommunicatus ab uno Episcopo, ab alio suscipi & sublevari non debet.

Nota. Contra Eusebium Nicomediensem, qui Arium excommunicatum, à suo Episcopo, communioni restituit, ut dictum.

Canon VI. Patriarcharum, præsertim Alexandrini jura confirmat.

Nota. Editus occasione Meletii, qui
in

in jura Patriarchalia & Metropolitana involavit.

Canon VII. *Erigit Patriarchatum, seu confirmat Ierosolymitanum, nulla data jurisdictione, sed salvo jure Cæsariensis Metropolitæ, sub cujus jurisdictione erat prius Episcopus Ierosolymitanus.*

Canon VIII. *Eos, qui ex Novatianis ad Catholicam Ecclesiam redire volunt, suscipere jubet; si Clerici sint in Clero maneant, dummodo scriptis promittant se Ecclesiæ leges servaturos, & cum Bigamis & lapsis communicaturos. Si Episcopus fuerit, habeat Sacerdotii dignitatem; nisi forte Catholico placeat Episcopo, ei etiam Episcopalis nominis honorem concedere, si verò non placuerit, providebit ei, aut Chorepiscopatus, aut Presbyterii locum, ut in Clero prorsus esse videatur, ne in una civitate duo probentur existere Episcopi*

Nota: *nisi forte placeat. &c.* Tempore Concilii & postea poterat Episcopus in sua Diæcesi, dummodo in alia civitate, erigere Episcopatum ex licentia Metropolitæ aut Primatis. Sic S. Aug: Hyponensem Diæcesim, cum latè patens esset, in duas divisit. Modo

do hoc jus soli Rom: Pontifici est reservatum. Chorepiscopus, modo idem ac Archi-Presbyter, aut Diaconus ruralis. *Ne in una &c.* Ad illa verba attendens S. Aug: Epist: 213 alias 110. ait: *Adhuc in corpore posito beatae memoriae Patre & Episcopo meo Sene Valerio Episcopus ordinatus sum, & sedi cum illo, quod à Concilio Nicæno prohibitum esse nesciebam, nec ipse sciebat.* Hinc S. Aug: agente hic Canon in Concilio Carchaginensi III. anno 397. renovatus est, anno 2. post suam consecrationem, nam anno 395. ejus consecratio contigit. Hinc factum, cum S. Doctor ante mortem Libris retract: incumberet, populo assentiente & Primate probante, quod elegerit sibi Coadjutorem, & post mortem Successorem, sed non nisi post mortem suam consecrandum.

Canon IX. & X. à S Ministeriis illos suspendit, qui absq; prævio examine ad Sacerdotium promoti, vel aliquod crimen confessi, vel tempore persecutionis lapsi sunt.

Canon XI. *Lapsis in persecutione Imperatoris Licinii: tempus pœnitentiæ præfigit.*

Canon XII. *Illis, qui sæviente persecutione se Idololatriæ exposuerant, nempe resumendo militiæ cingulum, jam pro Christi fide abjectum, hoc enim erat signum Apostasiæ, pœnitentiam 13. annorum iungit.*

Canon. XIII. *decernit, ut extremè laborantibus, seu moribundis ultimum & maxime necessarium viaticum non denegetur:*

Nota. Per illud ultimum & maxime necessarium Viaticum multi Viri eruditi intelligunt, non Eucharisticam communionem sed absolutionem Sacramentalem à peccatis.

Canon XIV. *Catechumenorum in persecutione lapsorum præscribit pœnitentiam.*

Canon. XV. *Translationes Episcoporum, Presbyterorum, Diaconorum de una ad aliam Ecclesiam prohibet.*

Nota. Hic Canon editus occasione Eusebii Arii fautore à Beroensi ad Nicomediensem Ecclesiam translatus. Is Canon renovatus in Concilio Sardicensi occasione ejusdem Eusebii, qui post duas sedes mutatas nempe Beroensem & Nicomediensem, in sedem CPolitanam se transferri curavit. Imo & contra

tra alios Episcopos, qui altiores sedes ambientes, nihil non egerunt, ut S. Athanasium Alexandrina, & S. Eustachium Antiochenâ sede dejicerent.

Canon XVI & XVII. *Usurarios à Clero arcet, Diaconorum fastum deprimit, ipsisque inhibet nè Sacerdotibus Eucharistiam porrigant, aut inter Sacerdotes sedeant.*

Nota. Hoc Canone prohiberi Diaconis tantum, nè Presbyteris Eucharistiam porrigant; sed Canone 15. Concilii Arelatensis II. sub Siricio Pon. habiti anno 389. iisdem prohiberi, ne eam etiam populo præsentè Præsbytero tradant sub pæna depositionis in contrafacientes. Id tamen urgente necessitate eis permittit Concil. Carthag. IV. sub Anastasio Papa habitum 398. a Leone III. confirmatum dùm Can. 38. sic ait: *Diaconus præsentè Presbytero Eucharistiam Corporis Christi populo, si necessitas cogat, jussus eroget.*

Canon XVIII. *Presbyteros aliosq; Clericos in Ecclesiis, pro quibus sunt ordinati, permanere jubet.*

Canon. XIX. *Paulianistas Pauli Samosatèni Sectatores ad Ecclesiam redeuntes*

*tes baptizari præcipit, quod eorum baptismi
Verbis Evangelicis non consecratum, invali-
dum esset.*

Nota. Hoc Canone per indirectum
damnatur error rebaptizantium per le-
gitimam sequelam; si Paulianistæ ba-
ptizandi sunt, ea ratione, quòd eorum
baptisma invalidum esset, utpote verbis
Evangelicis non consecratum; ergo ali-
orum Hæreticorum, quorum baptismi
verbis Evangelicis consecratum est, va-
lidum censendum est. Hinc idem Con-
cilium Can. 8. Novatianos redeuntes
ad Ecclesiam nusquam definit rebapti-
zandos esse.

*Canon. XX. Vetat ne diebus Domini-
cis, & diebus 50. a Paschate ad Penteco-
sten fideles flexis genibus orent.*

Nota. Huic Canoni occasionem de-
derunt Quatuordecimani, qui pertina-
citer contendebant, his diebus flexis
genibus orandum esse.

Hi sunt Canones Concilii Nicæni.
Franciscus quidem *Turrianus* Canones
Nicænos 80. ex versione Arabica, *A-*
brahamus Ecchelensis 84. publicavit,
quos Melchitæ Nestoriani, Cophti, A-

byssini, Armeni, Græci multi, & Maronitæ ut genuinos agnoscunt nunc communi calculo à Criticis exploduntur. Cùm nomen Patriarchæ in eis, ut alia sileam, legatur, quod post Concilium Calcedonense primo auditum est, hoc est, circa medium Sæculi V. Non tamen negandum revera plures, quam 20. fuisse, sed esse deperditos, cum Canon de celebrando Paschate desit, qui tamen unus de præcipuis fuit juxta *Eusebium* lib. 3. de Vita Constantini, & *S. Athanasium* de Concilio Ariminensi. Nec Canon de bigamis ab Ordinibus arcendis, quem laudat *S. Ambrosius* ad Vercellensem Episcopum; Nec Canon de Scripturis sacris, cujus tamen meminit *S. Hieronymus* Epist. 3. de libro Judith loquens.

Quoniam Concilium Sardicense instar appendicis se habet ad Nicænam Synodum, quæ in illo confirmata est, pauca de illo dicamus.

S. Athanasius persecutionibus Ariatorum diu jactatus cùm per Synodum Rom. fuisset innocens declaratus à *Julio I.* ad quem appellaverat, Synodo Rom. acquies-

escere Orientales noluerunt, quamobrem ab eodem Pontifice, & duobus Imperatoribus *Constante Constantio* Synodus Sardicæ in Illyrico congregata est anno 347. ut invictis argumentis demonstrat Pater *Thomas Mamachius* quatuor Epistolis contra Joannem *Dominicum Mansium* Archi-Episcopum Lucensem, qui anno 344. epocham hujus Synodi ponit.

Præsidebat nomine Pontificis *Osius Cordubensis*, *Archidamus* & *Philoxemus* Presbyteri. Episcopi 170. *S. Athanasius* numerat 284. Episcopos, qui decretis subscripserant. Apol. 2. ex quibus 70. fere Orientales facto divortiô se à reliquis separârunt, & *Philoppoli* Conciliabulum celebrârunt. Reliqui Sardicæ *Athanasii*, *Marcelli*, *Ancyrani*, & *Asclepæ* innocentiam solemni judiciô declarârunt, fidemq; Nicænam (alia non edita professione) confirmârunt.

Ex Oecumenici Concilii gradu Sardicensem Synodum dejicere nitens *Basnagius* homo Acatholicus ad an. 347. eas adhibet machinas, quas ante illum *Illmus de Marca* adhibuit, qui con-

vocatione quidem generale dixit, non exitu, ob rationes quasdam, quas vide apud *Natalem* Sæculo IV. Dissert. XXVII. art. 3. *Basnagio* consentiunt Protestantes, omnes ea de causa fortasse, quia Can. 3. 4. & 7. jus appellationum ad S. Pontificem luculenter confirmatur.

Canones quos Synodus Sardicensis edidit 20. Græci numerant, 21. Latini, quos perdoctè explicat *Christianus Lupus* parte 1. Decretorum. Ut jam dixi Canone 3. 4. & 7. ius appellationum ad Sedem Apostolicam non instituerunt, sed confirmarunt Patres. Hoc enim ipso quòd Rom: Pontifex, ut concors est omnium Catholicorum doctrina, est jure Divino omnium Episcoporum non solum ordine, sed & jurisdictione primus, illis superior ac universæ Ecclesiæ Caput, consequens est, ut ad ipsum Episcopi, injuriam passi, appellare possint. Quare jus appellationum ad Rom: Sedem, Pontificii Primatûs appendix necessaria est. Hoc ipsum patet ex exemplis; nam ante Synodum Sardicensem S. *Athanasius*, *Marcellus Ancyranus*

nus *Asclepa* ad Julium I. Pontificem appellârunt. Quæ D. de Marca contra jus appellationum objicit lege apud *Natalem* Hist: Sæc: IV. Dissert: XXVII. art: 1. prop: 2. Solum breviter ob oculos ponam dissertissimis & clarissimis verbis conceptum Canonem quartum: *Cum aliquis Episcopus depositus fuerit, coram Episcoporum judicio, qui in vicinis locis commorantur & proclamaverit agendum sibi negotium in Urbe Roma, alter Episcopus in ejus Cathedra, qui videtur esse depositus, omnino non ordinetur, nisi causa fuerit in judicio Episcopi Romani determinata.* Hoc certè Canone non solum conceditur, potius confirmatur jus revisionis seu dandi novos Judices, Episcopos nimirum ex viciniore Provincia, sed etiam ei asseritur & vindicatur potestas judicandi appellationes factas ab Episcopis ad Rom: Pontificem, & discutiendi sententiam ab Episcopis Provinciæ latam, atq; de ea judicandi, si Episcopus depositus à judicio Episcoporum ad Sedem Rom: appellaverit; sicut revera ante hunc Canonem *S. Athanasius* depositus ab Arianis fecit.

Hoc velim notes, ideo hoc Concilium inter Oecumenica separatim non nominatur, & ideo ejus Canones a S. Pontificibus *Zosimo, Bonifacio, Cælestino, Leone*, recitantur nomine Canonum Nicænorum, quia, ut jam dixi, habetur velut *appendix & clarior explanatio* Concilii Nicæni, ut lib: 1. Hist: Pelag: scribit *Norifius* cap: 17. *Natalis* Alex: mox citatus, *Gazzaniga* & alii communiter. Vide *Gazzanigam* In Prælec: Tom: II. de TRINITATE Diff: 4. cap: 3.

§ II.

De Concilio II. Oecumenico CPolitano I.

De hoc Concilio plura jam supra sunt dicta, plurima in Tract: de SS. TRINITATE. Hic, illis quæ dicta sunt omis-
sis, pauca prosequamur; de Præsede hujus Concilii non constat, cum nullus Rom: Pontificis Legatus adfuerit. *Theodoretus* lib: 5. Hist: Eccl: cap: 8. dicit: tres intra annum CPoli habitas esse Synodos; & primæ præfuisse *Meletium* Antiochenum, secundæ sive mediæ, quæ Oecumenica est, & de qua hic agitur,
Ti-

Timotheum Alexandrinum jure suæ sedis; tertiæ Nectarium jam in locum S. Gregorii Nazianzeni Episcopatû cedentis, substitutum. In hac secunda Synodo nedum damnata hæresis Macedoniana, sed etiam conditi Canones, & editum fidei Symbolum, quod modo recitatur in Missa. Canones solum tres conditos esse probabilior est sententia, juxta Natalem Sæc: IV. Diss: 37.

Canon I. Ut ea, quæ apud Nicæam statuta sunt, à 318. Patribus immota permaneant, statuit: Insuper damnat Arianos, Eunomianos, Macedonianos, Sabellianos, Photinianos, Marcellianos, & Apollinarianos.

Canon II. Circa singularem Diæceseon ordinem, & privilegia, quæ Ægyptiis, Antiochenis, Constantinopolitanisq; debentur, ut sua quæq; Ecclesia servet privilegia, sibi per Nicænos Canones tributa. Statuens tamen ut Constantinopolitanus Episcopus habeat honoris primatum post Rom: Episcopum, propterea quod urbs illa sit Roma nova.

Canon III. De Maximi Cynici inordinata Constitutione Constantinopoli facta agens, Maximum illum nec Episcopum esse
nec

nec fuisse declarat; gesta; ejus irrita decernit.

Nota. Canonem de primatûs honore Constantinopolitanæ Sedis, qui secundum S. Greg: M. tertius est lib: 6. Epist: 31. nullus approbavit S. Pontifex ad tempora Innocentii III. qui in Concilio Later: IV. primum locum post Romanum dedit Constantinopolitano Episcopo, eô fine, ut nutantes Græcos in fide firmaret; maximè cum Orientales Sedes Jerosolymitana, Antiochena, imo Alexandrina à longo tempore id honoris Episcopo, Constan: etsi non canonicè, tamen spontè concesserint, eumq; ut talem agnoverint.

Symbolum verò, quod Nicæno-Constantinopolitanum merito dicitur, semper ab Ecclesia Rom: & quidem ut testera Catholicæ fidei receptum est, & quidem apud Græcos etiam in locum Nicæni, nomine non mutatô, suffectum. Romani autem servârunt veterem morem, ait *Author Notarum in Sandinum* recitando Symbolum Apostolorum, quo indicarent, nullam hæresim Romæ initium sumpsisse.

Vox Filioq; in Ecclesiis Hispaniarum Symbolo adjecta esse dicitur VI. sæculô labente; apud Gallos & Germanos VIII. ab Ecclesia Rom: ineunte IX. Vide *Bellarmin:* lib: 2. de Christo cap: 21. *P. Lequien:* Diss: 1 in Damasc: § 26. Plura de hac re in Tract: de SS. TRINITATE.

§ III.

De Ephesino Concilio Oecumenico III.

Cùm post Nectarium in fine Concilii Constantinopolitani consecratum, in Sede Constantinopolitana feliciter successisset S. Joan: *Chrysostomus*, Chrysostomo *Arsacius* Nectarii Frater, *Arsacio Atticus*, Attico *Synesius*; mortuôq; *Sinesio*, cùm Clerus in eligendo Successore esset divisus, aliis *Proclum* aliis *Philippum* Presbyterum optantibus; *Theodosius* Junior ex Antiocheno Clero *Nestorium* adscivit, *Theodori* Mopsuesteni Discipulum, doctrinâ & eloquentiâ celebrem, corporis macie, vestium neglectû, Sanctitatis Apostolicæ mentientem imaginem. Is omnium consensû Episcopus initiatus, hæresibus statim omnibus bellum indixit, ut suæ paulo post disse-

semi-

feminandæ viam pareret, *ut in Tract: de Incarn: jam dictum.* Error ejus palmaris fuit in Christo sicut duas naturas, ita personas esse, proinde B. Virginem *Christiparam*, non verò *Deiparam* dicendam. Hac de causa Synodus Ephesina à S. *Cælestino* Papa & Imper. *Theodosio* congregata est, & cæpta die Pentecostes decimo Kalendas Julias, an: 431. continuata per septem Actiones sive Sessiones, à 200. ferè Episcopis, ait *Vincentius Lirinensis* in *Commonitorio* cap: 29. Primæ sessioni præfuit S. *Cy- rillus Alex:* tum suo nomine, quia ex sanctione Canonum Nicænorum primus erat post Rom: Pontificem, Episcopus, ideoq; absentibus Legatis Pontificiis, ipse primum in Concilio locum debuit obtinere; tum nomine *Cælestini* Pontificis, quia ei mandaverat *Cælestinus*, ut susciperet executionem sententiæ in Rom: Synodo latæ contra Nestorium; Utrùm verò postquam Legati Ephesum appulêrê, *Cælestini* personam gesserit, non convenit. Quod si quis causam quærat, cur *Cælestinus* post *Cyrillum* Vicarium datum, tres alios nempe *Ar-*

cadium & Projectum Episcopos, & *Philippum* Presbyterum legaverit hanc reddit *D. Petrus* de Marca lib: 5. de Concordia Sacerdotii & Imperii cap: 4. §. 7. *Etenim Theodosius Imp: d Nestorii* fautoribus circumventus dissidium in Ecclesiam invecum Cyrillo imputabat, qui contentionibus ex invidia adversus Nestorium accensis, pacem Ecclesiae turbasset - - - Quare necessarium omnino fuit, ut *Cælestinus* alios præter Cyrillum legatos mitteret, qui posteriores curas ad generalem Synodum deferrent, & *Cyrilli Anathematismos* confirmarent. Anathematismis, quos habes in Tract: de Incar: *Cyrilli* confirmatis, quos superiore an: 340. in Synodo Alexand: adversus Nestorii insanias ediderat, statutum est, unam tantum esse in Christo Divinam personam, duas verò naturas Divinam & humanam sine ulla confusione & divisione junctas inter se, eoq; B. Virginem *MARIAM* vere dici & esse *Deiparam*. Quæ res ipso Natali Christi die Romam delata, Urbem complevit lætitiâ tanta, ut *S. MARIA MATER DEI &c.* ferretur omnium ore. Unde, ut observat *Baronius*

nus ad an: 431. additamentum illud accepisse creditur Angelica Salutatio clamore subjicientium S. MARIA MATER DEI ora &c.

Quidquid sit alii hoc tribuunt Cyrilli devotioni erga B. V. alii omnibus Patribus Ephesinis ut notat *Coriolanus*; certum videtur originem suam fortiri ex occasione blasphemiarum Nestorii. Cum Nestorio damnati sunt, Cælestiani, hoc est Pelagiani, qui Cælestiani dicti à Concilio, quod *Cælestius* apud Ephesium Presbyter consecratus longè notior esset, quàm *Pelagius*. Quia Pelagiani per *Tractatoriam* Zosimi Pont. & Decretum *Honorii* Imp: Italiâ pulsi, Nestorianis juncti, quasi sæderato agmine oppugnabant fidem Catholicam, ideo justo Dei judicio cum illis condemnari meruerunt.

Hæc cum legis, mirari desine, quod moderni Novatores Calvinistæ & Lutherani odiô vatiniانو licet inter se ferventes, quando negotium Ecclesiam Catholicam oppugnandi occasiones nanciscuntur, mirificè consentiant, quasi unum cætum constituerent; cum vi-
des

des Pelagianos & Nestorianos manus sibi dedisse, diffociatæq; unitatis iniisse concordiam, etsi ex parte tam falsorum dogmatum, quam fontium, ex quibus ea hauserunt, quàm disjunctissimi essent. Hæresis Nestorii concepta, præformata, imo nata est in libris *Theodori* Mopsuesteni, insensissimum gerentis animum erga Origenem, ejusq; fautores, è contra Pelagiani ab Origene suos errores mutuaverunt; hoc tamen non obstante amici facti sunt, quia hoc res postulabat, ut plures effecti, numerò etsi non veritate vincerent. At aliter accidit.

In ultima Sessione Canones VIII. sunt editi, in I. II. IV. V. Nestoriani & Cælestiani cum fautoribus & aliis damnantur. In III. à Nestorio Sacerdotio privati, restituuntur. In VI. Synodi perturbatores à gradu deponuntur. In VII. Alteram fidem à Nicæna componi vetat Synodus. In VIII. prohibet, ne ullus Episcopus in aliena Diæcesi ordinationes faciat.

Circa VII. Canonem *nota*: Hunc Canonem editum esse occasione Symbo-

li *Theodori* Mopsuesteni, quod in ea Synodo fuit rejectum & proscriptum, tametsi Ecclesia tunc ad tempus perpercit personæ (eo quod ipse *Theodorus*, antequam è vita migraret, Sabelianos, Origenistas, & quosdam alios Hæreticos impugnâsset) quæ postea in V. Synodo Oecumenica damnata est, ut dictum in Tract: de Incarn: de tribus Capitulis.

Nec omittendum, Patres Ephesinos in Synodica ad Clerum & Populum Antiochenum asserere: Deiparam Virginem *MARIAM* comitante *S. Joanne* Apost: & Evang: Ephesum ex Judæa profectam, ibiq; habitasse.

§ IV.

De Concilio Chalcedonensi Oecumenico IV.

Hoc Concilium contra errores Eutychetis coactum an: 451. Nicæam primò indictum, postea ex motivo, quod *Marcianus* Imp: qui ipse adesse voluit & noluit Constantinopoli abesse ob strepitum Hunnorum, qui in Thraciam irrupturi erant, Chalcedonem, quæ urbs Asiæ minoris, statim trans Bos-
pho-

phorum è regione Constantinopolis posita, translatum. Numerus Episcoporum, qui adfuerunt, discrepat. Alibi fere 600. alibi 630. alibi 636. leguntur. *Cecropius* Episcopus Sebastopolitanus 1200. adfuisse dicit: Act: 4. apud Labbeum Tom: 4. Conc: pag: 515. Sed ei Parum fidei est; tum quia in augendo numero non alius intemperantior est; tum quia *Lucentius* Sedis Apostolicæ Legatus in eadem Act: paulò post non plures, quam 600. fuisse subjungit; tum quia in relatione Synodi ad *S. Leonem* Pont: apud eundem Labbeum legitur: *quingentos viginti Sacerdotes interfuisse*. Certe 630. aut 636. subscripti non reperiuntur.

Concilio, excepta Act: 12. præfuerunt *S. Leonis* M. Legati *Paschasius* Lylibetanus, *Lucentius* Asculanus Episcopi, *Bonifacius* & *Basilus* Presbyteri, quibus *S. Pontifex* adjunxit *Julianum* Còensem, suum apud *Marcianum* Imp: Legatum, sive ut legationis Socium, sive ut Consiliarium.

Act: 5. contra *Eutychem* decretum est: *Unum eundemq; Christum Filium Do-*
mi-

minum Unigenitum, ex duabus naturis inconfusè, immutabiliter, indivisè, inseparabiliter agnoscendum, nusquam sublata differentia naturarum propter unionem, magisq; servata proprietate utriusq; naturæ, & in unam personam atq; substantiam concurrente, non in duas personas partitum & divisum, sed unum eundemq; Filium & Unigenitum DEUM, Verbum, Dominum JESUM Christum.

Act: 12. Præfuit *Anatolius* Episcopus Constantinopolitanus adnitentibus Legatis S. Pontificis, quod causa *Bassiani* & *Stephani*, uter habendus esset pro Episcopo Ephesino? pertineret ad disciplinam, magisq; Anatolio, quam Legatis esset cognita. Neutri Episcopatus Ephesinus adjudicatus est, alius Antistes electus est, ita tamen, ut *Bassianus* & *Stephanus*, alerentur sumptibus ex ærario Ecclesiæ Ephesinæ, solidis videlicet *ducentis aureis*, quovis annò persolvendis. Ex quo profluxit origo pensionum Ecclesiasticarum, de quibus antehac in monumentis Ecclesiasticis nulla mentio.

In Act: 6. Canones tres conditi, iidemq;

iidemq; postea inclusi iis, qui Act: 15. editi sunt; 28. numerant Latini Codices, Græci 30. Omnes, præter 28. qui confirmat jus Patriarchale à Concilio Constantinopolitano gen: II. concessum Ecclesiæ Constantinopolitanæ, confirmatos esse, visum est multis. At communior sententia est, primas tantum sex Actiones, in quibus de causis fidei est actum, calculo suo roborasse S. Leonem Pontificem; Canones verò non nisi tacita Ecclesiæ acceptatione vim obtinuisse, præter 28. contra quem statim Legati S. Pontificis, & mox ipse S. Pontifex cum sequentibus protestati sunt, sequentibus annis. Confirmatus tamen & hic Canon ab Innoc: III. ut § 2. dixi.

§ V.

De Concilio II. Constantinopolitano Oecumenico V.

Concilium Oecumenicum V. Constantinopolitanum II. à Justiniano Imp: Vigiliò consentiente an: 553. convocatum. Convocationis causam præbuere non solum famosa tria Capitula, sed

Ii

etiam

etiam *Origenis*, qui tunc instaurabantur errores. Interfuere Episcopi 165. tres Patriarchæ *Eutychius* Constantinopolitanus, *Apollinaris* Alexand: & *Domnus* Antioch: *Eustochius* Jerosolim: adfuit per legatos. Præfuit *Eutychius* Constantinop: permissu *Vigilii* Pont: qui semel, atq; iterum invitatus, & rogatus, ut præfideret, recusavit causatus Occidentalium Episcoporum paucitatem, cum frequentes ex Orientalibus Ecclesiis convenissent; siquidem pactum fuerat, ut Concilium totidem Latinis ac Græcis Episcopis constaret. Octo numerantur Confessiones seu Collationes. Posito probatoq; licere etiam mortuis anathema dicere, *Origenes* primum, ut ad hunc annum notat Baronius (quidquid dicant *Origenis* defensores) in *Annal*: deinde tria Capitula damnata sunt. *Vide Tract: de Incarn:*

Nec ulla inde injuria illata Concilio Chalced: Tria enim Capitula in eo nec approbata nec reprobata sunt; de iis actum est duntaxat post terminum *Synodi*, ut ait *S. Greg: lib: 3. Epist: 10.* hoc est post *Act: 6.* ideoq; in Appendice

dice Concilii Chalced: non in vero & legitimo Concilio Chalced: quod absolutum est Act: 6. ut à *Norifio* in *Disfert de V. Synodo* cap: 11. monstratur. Vide etiam *Natalem. Hist: VI. Sæculi.*

Præter *Vigilium* etiam ejus Successores *Pelagius I. Joannes III. Pelagius II. & Gregorius M.* Oecumenicam *V. Synodum* confirmârunt. Afri & Illyrici Episcopi secuti auctoritatem *Pelagii I.* ab obstinata *Trium Capitulorum* defensione cessârunt. Soli *Istriæ, Venetiæ, & Liguriæ* Episcopi negantes illa citra injuriam Chalced: Concilii posse damnari, in pertinacia perstiterunt, facto Schismate, quod usq; ad *Sergium I.* amplius annis centum duravit. *Baronius* ad annum 556.

Inconstantia quidem accusatur *Vigilius* Pontifex, quod semel judicaverit *Tria Capitula* damnari non posse, postea damnaverit. At *Vigilio* licuit sententiam mutare, cum in *Trium Capitulorum controversia* non disceptaretur de fide, sed de personis tantum, ut ait *S. Greg: lib: 2. Epist: 51. alias 36: In Synodo, in qua de tribus Capitulis*

actum est, apertè liquet, nihil de fide convulsam esse, vel aliquatenus immutatum, sed sicut scitis, de quibusdam solummodo personis est actitatum.

Nota tamen, persona quidem Theodori Mopsuesteni cum scriptis, in quibus hæresim Pauli Samosatani renovavit; pariter Scripta Theodoretæ Cyrensis contra S. Cyrillum ejusq; anathematismos; Epistolam Ibæ ad Marim Persam damnatam esse; persona tamen Theodoretæ & Ibæ intacta mansit, eò quòd saltem tacitè damnatis suis scriptis, in communione Ecclesiæ mortui sunt. Solum ergo Theodori persona damnata fuit, utpotè qui jam à longo tempore in Ecclesiæ Diptychis non legebatur.

§ VI.

De Constantinopolitano Concilio III. Oecumenico VI.

Hoc Concilium à piissimo Imp: Constantino Pogonato, & Agathone S. Pontifice an: 680. Constantinopoli coadunatum est ad proscribendos Monothelitas, unam esse in Christo voluntatem unamq; operationem dicentes, quam

quam *Theandricam* seu *Deivirilem* appellabant. Locus Concilii fuit *Trullus* ut legitur I. Act: Porro *Trullus* nihil aliud est, quam Imperialis Palatii Secretarium in altum porrectum, & supernè fornicatum, id est, rotundum & concameratum. In eo itaq; ædificio, quod *Anastasius* Biblioth. *Basilicam* vocat in Vita *Agathonis*, & in vita *Leonis II. Palatium* appellat, celebratum est Concilium CP: III. Oecumenicum VI. De numero Episcoporum non convenit; *Cedrenus* numerat 289. Alii 166. à quo numero non longe abest *Photius* qui lib: de *Synodis*, recenset 170. Hoc unum extra dubium est scilicet *Agathonem*. Rom. Pontificem huic Synodo præfuisse per suos Legatos. Triæ genera Legatorum Apostolicæ Sedis interfuerunt, quorum alii Vicarii *Agathonis* *Papæ* dicebantur; alii Legati totius Concilii Apostolicæ Sedis; alii Legati Apostolicæ Sedis, scilicet Episcopi *Thessalonicae* & *Corinthi*, ut ait *Petrus de Marca* lib: 5. de Concordia Sacerd: & Imp: c. 6. § 4. Quæ est etiam *Baronii* sententia ad an: 680. *Agathonis* Legati *Theodorus* &

Gregorius vel Georgius Presbyteri, & Joannes Diaconus, qui præfuerunt nomine Agathonis Synodo; Romani Concilii Legati Joannes Portuensis, Joannes Regiensis, & Abundantius Paternensis Episcopi. Adfuit etiam Constantinus Imperator non ut Judex, sed ut Defensor, ea de causa post omnes duntaxat Episcopos subscripsit his verbis: Constantinus in Christo DEO, Rex ac Imperator Romanorum legimus & consensimus. At Legati Agathonis Papæ omnium primi subscripserunt; cæteri autem Episcopi hanc formulam usurpârunt N. Episcopus designiens subscripsi. Ex quo facile colligitur Constantinum huic Synodo interfuisse aut subscripsisse. non ut Judicem controversiarum fidei, sed tanquam Concilii & Ecclesiæ defensorem.

Concilium 18. Actionibus intra menses paulo amplius 13. perfectum est. Tribus primis lecta sunt Acta trium generum Synodorum Ephesinæ III. Chalcedonen-sis IV. & Constantinopolitanæ II. generum V. Act: 4. lectæ duæ Epistolæ Agathonis & Rom: Concilii, quibus Catholicum dogma geminæ in Christo voluntatis & ope-

operationis explanabatur. Act: V. & VI. *Macarius* Antiochenus Patriarcha, tunc Monothelitarum facile Princeps, iussu Imperatoris protulit nonnulla Patrum testimonia, quibus jactabat unam in Christo voluntatem probari. Sed Legati cum Patribus vitiata esse & corrupta demonstrarunt. Act: VII. allatae Patrum auctoritates ad dogma probandum Catholicum. Reliquis Actionibus præter Monothelitarum hæresim, & scripta nempe *Heraclii Ecthesim*, ac *Typum Constantis*, damnatae sunt etiam personæ, & quidem ex iis, qui jam obierant, sceleris Principes ut *Theodorus Pharanitanus*, *Cyrus Alexand: Sergius*, *Pyrrhus Paulus* & *Petrus Constantinopolitani*. Plura habes in Tract: de Incarn:

§. VII.

De Concilio Nicano II. Oecumenico VII.

Concilium hoc indictum & coadunatum fuit contra Iconoclastarum hæresim, cujus tale est.

Initium.

Anno 723. *Tiberiade* quidam Judæus, nomine *Sarantape Jezido Saracenorum*
Prin.

Principi vaticinatus est, si suggestionibus ejus morem gereret, Imperii diuturnitatem ad 30. annos, modo ex Christianorum Templis, totiusq; regni sui finibus Imagines deturbaret. Hamô captus imprudens Princeps sacrilego edictô Imagines dejici, lacerari & comburi jussit, quod & factum est. At impius *Sezidus* spe delusus, brevi tempore superstes in pœnam tanti facinoris malè periit. Unde factum, ut ejus filius, cui nomen *Ulido*, & de Judæo præstigiatore supplicium sumpserit, & Ecclesia ornatum suum resumpserit, ac Sanctarum Imaginum restauratio permissa fuerit.

Progressus.

Hæc impietas brevi ab Hebræis & Saracenis ad malos Christianos pervenit. Nam *Leo Isaurus* Imperium tenens, instigante potissimum *Constantino* Nacaliæ in Phrygia Episcopo à suis Diœcesanis expulso, contra S. Imagines vehementer exarsit, ut gratificaretur Judæis, quibus jure jurando se obstrinxerat concessurum se illis, quidquid postulâssent, cum Imperium quod ariolando, ei fuerant vaticina-

cina-

cinati, adeptus esset. Igitur anno 10. Imperii sui ad evertendas imagines leoninum edictum publicavit, cui tum in Oriente strenuè intercessit *S. Germanus* Patriarcha Constantinopolitanus, tum in Occidente *Gregorius II.* Pontifex. Hinc barbarus nomine & moribus *Leo*, combusto Studitarum Collegiò cum instructissima Bibliotheca, quoniam Monachi illius impietatem averfabantur, & ex parte sui Patriarchæ stabant, *S. Germanum* in exilium amandavit, intrusò in ejus locum *Anastasiò* quòdam, in hac disseminanda hæresi administrò. Tandem in sua impietate mortuus *Leo* Isaurus, suæq; impietatis hæredem reliquit *Constantinum Copronymum*, qui ut non minus impius esset, an: 754. 338. suæ farinae Episcoporum còëgit Conciliabulum, in quo Imaginum cultum aboleri curavit, gravemq; in Catholicos præsertim Monachos excitavit perlecutionem; donec scelestus Imperator nomine Christianus, sed re Judæus, Manichæus, & Nestorianus Divinam ultionem in morte expertus, fætidam animam expuit.

Huic

Huic Filius successit *Leo* mitior quidem Avo & Patre; hæresis nihilominus dominata est, nec *Imagines* in templis restitui permisit. At *Leone* illô IV. de mortuô penes *Irenem* Conjugem Leonis, & *Constantinum* minorenem summa rerum erat.

Cùm autem *Paulus* Patriarcha, post *Nicetam*, Constantinopolitanus, ob simulatam fidem, & juramento firmatam Iconoclastiæ perfidiam, pænitentia ductus relicta Sede in *Flori* Monasterium secessisset, & facti rationem quærentibus spectatissimis è Senatu Patriciis, ab *Irene* Augusta missis dixisset: *Nisi Synodus universalis fiat & error, qui est in medio vestri corrigatur, salutem non habebitis; eoq; dicto designatum Successorem Tharasium* adeo commovisset, ut non nisi sub conditione coadunandi Concilii Oecumenici, oblatum Episcopale manus, Sedemq; Pauli suscepit; promissere libenter *Constantinus* & *Irene* Mater Augusta, ac pro Synodo coadunanda adlaborârunt.

Interitus.

Inauguratus *Tharasius* statim fidei suæ professionem supplicesq; pro convocatione Concilii literas misit, ad *Adrianum I. S. Pontificem*. Scripsere etiam *Constantinus & Irene*, ut Constantinopolim veniret, Concilio præfuturus, aut Legatos mitteret.

Convocatur itaq; Constantinop: Concilium, sed Iconoclastarum factione, in Urbe seditione excitatâ, maximè à militibus Prætorianis auctâ, in sequentem annum dilata est Synodi celebratio, & tandem Nicæam translata, ibiq; inchoata, octavo Kalendas Octobris annô 787. & Act: sive Sess: septem feliciter conclusa die 22. Octobris ejusdem anni. Numerus Episcoporum, qui interfuerant est incertus, non plus supra 350. circiter fuisse affirmant. Præfuerunt Legati S. P. Archi-Presbyter S. Petri *Petrus* & *Petrus* Abbas. Nec obstat, quod *Tharasius* Act: 1. Oratione sua Synodum inchoasse legatur, hoc enim egit ex permisso Legatorum. Hi siquidem contenti primum concessûs locum habere, negotium ei dederunt, utpotè Græcæ
lin-

linguæ peritissimo in iis rebus, de quibus agendum erat disponere. Cæterum eos in præcipuo capite, de quo erat controversia, jus suum usurpasse, sententiam à Patriarchis & cæteris Episcopis exigendo, observat Petrus de Marca lib: 5. de Concordia cap: 14.

Tria, ait Sadinus, in his Actionibus notanda sunt. Primum: quod *Tharafius* Act: 5. ex *Joanne Thessalon:* asseruit: *Angelos tenui corpore præditos àèreò sive igne*; id examinatum non fuisse à Concilio, tùm quia nonnulli ex antiquis Patribus tam Latinis, quàm Græcis, ejus sententiæ fuerunt; tùm maximè, quia de alia doctrina disceptabatur. Alterum quod Act: 6. legitur: *Iconomachos*, licet vocarent Eucharistiam imaginem corporis Christi, non tamen negasse in ea contineri corpus verum Christi, ac proinde Calvinistas non solum ab hac Oecumenica Synodo VII. sed etiam à Pseudo-septima fuisse prædamnatos, eosdemq; mentiri impudentissimè, cum dicunt *Iconomachos* negasse ipsum Domini corpus in Eucharistia. Tertium Act: 7. recitatum fuisse Symbolum
cum

cum addito *Filioq;* quod, ut ait *Baronius*, ad an: 787. *Iconoclastarum* fuit prima reprehensio illa, ne diceretur, *Spiritus* à Patre *Filioq;* procedere. Quod attinet ad cultum Imaginum Sacrarum, damnati sunt, tum ii, qui eas perindè, atq; idola execrabantur, quiq; asseriebant ornamenti, non venerationis causâ in templis esse collocandas; tum ii, qui è contrario volebant honorem *Latriæ* illis haberi, adeoq; falsum est, quod fingunt recentiores heterodoxi, adorationem *Latriæ* unius *DEI* propriam, ab hac *S. Synodo* adjudicatam Imaginibus Sanctorum. Sed de hoc plura alibi.

§. VIII.

De Concilio CPolitano IV. Oecumenico VIII.

De hoc Concilio abundè dictum, ubi actum de Schismate Græcorum. Hic pauca proferenda. *Hadrianus* Pontifex Epist: 2. ad *Basilium* Imp: quæ inserta est Act: 1. hujus Concilii Edit: *Labb:* tom: 8. pag: 982. scribit. *Volumus ergò per Vestræ pietatis industriam illic (Constantinopoli) numerosum celebrari Concilium.* Paruit *Basilius*, & Concilium *Oecumeni-*

menicum VIII. Cpolitanum IV. convocavit. Quot fuerint Episcopi præsentes, haud satis compertum. Actioni I. præter Legatos Apostolicos, *Donatum* Ostiensem, & *Stephanum* Nepseninum Episcopos, ac *Marinum* Diaconum, Præsides Capituli, exceptisq; Legatis Patriarcharum Orientalium, & *Ignatio* Cpolitano, duodecim tantum Antistites adfuere. Reliquis Actionibus crevit Episcoporum numerus. Nam 100. & 9. subscripserunt Concilio. Porro numeri tam exigui causa, quia non admissi Episcopi faventes Photio. Concilium inchoatum an: 869. III. Nonas Octobris, & decem Actionibus absolutum pridie Kal: Martii anni subsequenter. Act: 1. dictum anathema Photio ejusq; fautoribus, atq; *in majorem hominis detestationem*, ut scribit ex *Niceta* Baronius, scriptum anathema calamis intinctis ipso Christi sanguine. Act: ultima editi Canones 27. ad fidem, Sacramenta & disciplinam pertinentes, septemq; priora Oecumenica Concilia confirmata.

Canon IV. decernit, *Photium nunquam fuisse prius, aut nunc esse Episcopum*. Nimirum

mirum Photius nunquam fuit Episcopus, quantum ad jurisdictionem, & legitimam Episcopalis potestatis executionem, non verò quoad potestatis collatæ characterem. Nec obstat, quod *Nicolaus I. S. Pont: ad Michælem Imp: Epist: 9.* scribit: *Igitur nihil Photius à Gregorio (Syracusano homine Schismatico, Photii consecratore) habuit, nihil autem habuit, nihil dedit.* Nam eo locò dicitur Gregorium, qui & Episcopatû, & fidelium communione privatus erat, nihil dedisse Photio Sacris à se initiato, & nihil proindè Photium iis, quibus ipse contulerat Ordinis Sacramentum, nihil, inquam, dedisse Ordinationis legitimæ, nihil gratiæ, neuter enim quid hujusmodi, utpotè sacrilegus, & Schismaticus habuit, at characterem Sacramenti habuit uterq; ideoq; aliis uterq; conferre potuit. Vide *Natalem Hist: Sæc: IX. & X. Dissert. 4. §. 22.*

§. IX.

De Concilio Lateranensi I. Oecumenico IX. in Occidente I.

Gregorius VII. Pont: *Henricum Imp:* hujus nominis V. sæpè literis, ac
 lega-

legationibus paternis monuit, ut à beneficiorum *investituris* per baculum & anulum fieri tunc consuetis, nec non à simonia, aliisque sceleribus abstineret, at cum in malo obstinatus, nedum *Gregorii*, sed etiam *Gregorii Successorum*, nimirum *Victoris III. Urbani II. Paschalis II. & Gelasii II.* imo & istorum omnium Successoris *Calixti II.* monita contemneret, & anathemata non reformidaret, verisque Pontificibus illis pseudo-Pontifices opponeret *Guibertum* modò, modò *Burdinum*. Guibertum nempe *Gregorio, Victori, Urbano, Paschali*; *Burdinum* vero *Gelasio & Calixto*.

Tandem anno 1121. *Calixtus II.* è Gallia, ubi Cluniaci post *Gelasium* electus, Romam veniens, capto & in carcerem detruso pseudo-Pontifice *Burdinò, Aldebertum* Præsulem Moguntinum adversus *Henricum* Imp: in Germania Legatum instituit, isque ita strenuè suæ legationis munus implevit, ut Saxones universos commoverit, & ingentem exercitum paraverit. Mox ad deliberandum de pace cum Ecclesia ineunda deliberatum est, quæ per missos à Pontifice Legatos *Vormatiæ* conclusa est.

Hoc

Hoc ipso tempore, quô in Germaniam pro pace stabilienda irent Legati, *Calixtus II* indixit gen. Concilium anno 1122. Romæ in Lateranensi S. Joannis Ecclesia celebrandum, cui interfuit Pontifex cum 300. & amplius teste *Suggerio*; imò secundum *Pandulphium* in vita *Calixti* cum 997. Patribus, Episcopis vel Abbatibus. Quo in Concilio anno 1123. 1. Probata fuere pacis conventa *Vormatiæ* circa liberas electiones Prælatorum. 2. Rescissa sunt Acta *Burdi*. 3. Pro disciplina labefectata reformanda 22. Canones editi sunt.

§ X.

*De Concilio Lateranensi II. Oecumenico X.
in Occidente II.*

Concilium Oecumenicum X. Lateran. II. an. 1139. celebratum. Interfuerunt Episcopi circiter mille. Præfuit S. Pont. *Innocentius II*. Canones 30 conditi. Canone 15. novum latum est decretum; cum enim Sacerdotibus aliisque Clericis honor debitus non redderetur, statuitur: *Si quis suadente diabolo hujus sa-*

crilegii reatum incurrerit, quod in Clericum vel Monachum violentas manus injecerit, anathematis vinculo subjaceat, & nullus Episcoporum præsumat illum absolvere, nisi mortis urgente periculo, donec Apostolico conspectui præsentetur, & ejus mandatum suscipiat. Prohibet etiam sub eadem pæna, in eos manum mittere, qui ad Ecclesiam vel cæmeterium confugiunt. Canonibus cæteris damnati Simoniaci, Nicolaitæ, quique sacras investituras à laicis acciperent. Rescissa Acta falsi Pontificis Petri Leonis dicti Anacletus II. Damnati Arnaldistæ & Petrobusiani. Hi enim à Petro de Bruis nominati negabant parvulos nondum habentes usum rationis posse baptismi beneficiò æternam beatitudinem assequi. Illi verò nomen nacti ab Arnaldo de Brixia, qui ut narrat Otto Frisingensis de Gestis Frid. I. lib. 2. c. 21. dicebat nec Clericos proprietatem, nec Episcopos regalia, nec Monachos possessiones habentes aliqua ratione salvari posse. Cuncta hæc Principis esse, ab ejus beneficentia in usum tantum Laicorum cedere oportere. Baronius etiam in Annal. Dum Romæ esset, ait, jactare ista capit, Lai-

corum esse omnia temporalia, & ea à Clericis injustissime detineri. Quam insanam doctrinam secuti sunt postea Valdenses, seu Pauperes de Lugduno, Hussitæ, *Marsilius Patavinus*, *Joannes de Janduno* *Perusinus*, homines *Ludovico* Bavaro contra Joannem XXII. mancipati. His postea adhæsit *Vicleffus*. Ab *Vicleffo* pestifera lues manavit ad *Lutherum*, *Centuriatores Magdeburgenses*, *Molinæum*, *Volfium*, *Goldastum*, *Coringium*, ut jure *Baronius* ad an. 1141. *Politicorum hæreticorum Patriarcham* atq; *Principem Arnaldum* appellaverit.

§ XI.

De Concilio Lateranensi III. Oecumenico
XI. in Occid. III.

Adrianô IV. Pontif: mortuô *Alexander III.* ante dictus *Rolandus* electus à Cardinalibus 21 æmulum expertus est *Octavianum*, *Victorem IV.* appellatum à tribus tantum Cardinalibus electum. Pro illo Pseudo-Pontifice stabat *Fridericus* Imp. qui quasi pacis conciliandæ causâ Concilium *Papiæ* celebrandum indixit, restitit ausui *Alexander* Pont. di-

cens non esse Cæsaris congregare Concilia. Nihilominus celebratur indictum ab Imp. Papiense Conciliabulum an. 1160 à præsentibus 40. vel 50. Episcopis, ex ditionibus Friderici coactis, in quo, *Alexandrò* reprobato, probata est electio *Victoris* Antipapæ.

Alexander in Galliam secedens an. 1162. congregato Concilio, *Victorem* cum complicibus excommunicavit. Mox an. 1163. Turonense Concilium celebratum præsentibus 17. Cardinalibus, 124. Episcopis, & Abbatibus multis, in quo Acta Papiensis Concilii sunt rescissa, & *Victor* iterum excommunicatus.

Romam rediit *Alexander*, interim moritur *Victor*, sed non schisma; nam in locum mortui intruditur *Quido* dictus *Paschalis III.* Hoc sublatò substituitur *Joannes* Strumensis Abbas, qui *Calixti III.* nomen usurpat. Sed ille tandem paulò post cum *Friderico Alexandro III.* lubenter se subdidit, eum ut legitimum Pontificem agnovit, idem Venetiis cum *Alexandro* conveniens fecit *Fridericus*. Sic extincto Schismate.

Con-

Concilium illud gen. indixit, an. 1179. celebratum, juxta *Guillelmum Tyrium*, qui adfuit præsens, interfuerunt Episcopi 300. Præsede ipso *Alexandro*. Porro coactum hoc Concilium 1. ad damnandos Schismaticos. 2. ad damnandas Catharorum, Valdensium, & Albigensium hæreses 3. ad restituendam Ecclesiæ disciplinam.

Obviando Schismati præscribit modum eligendi S. Pontificem. Vide Synopsim Hist. de Cardinalibus. Anathematizat hæreticos. Tandem 27. Canones edit.

§ XII.

De Concilio Lateranensi IV. Oecumenico XII. in Occidente IV.

Innocentius III. S. Pont. hoc Concilium indixit an. 1213. celebratum 1215. trium rerum causâ. 1. ut damnarentur Albigensium, Joachimi Abbatiss, & Almarici errores. 2. ut restitueretur depravata Ecclesiæ disciplina. 3. ut modus inveniretur Terram S. recuperandi. Concilio interfuerunt Episcopi 412. In his Patriarcha Cpolitans

& Jerosolymitanus, nomine Antiocheni, Episcopus Antheradensis, Alexandrinus legavit *Germanum* Diaconum. Primates & Metropolitæ 77. Cænobiarchæ 800. Absentium Præsulum Procuratores complures. Imperatorum Orientis & Occidentis, Regumq; Oratores. Præfuit ipse Pontifex. Ergo.

1. Albigenfes damnati; damnatus libellus *Joachimi* Abb. contra Lombardum, non tamen persona; proinde ejus sanctitati non nocet damnatio. Damna-
ta *Almarici* Cartonensis impia dogmata, ejusq; ossa effossa & tradita flammis.

2. Pro restauranda Ecclesiæ disciplina varia sunt condita decreta, Canonibus 70. comprehensa.

3. Decreta est in terram S. expeditio, variis privilegiis et indulgentiis ad eam properantibus benigne concessis.

In hoc Concilio ut supra dictum Canone V. Post Rom: Pontificem prima Sedes decernitur Patriarchæ CPolitano. Can. 21. statutum ut Christiani ad usum rationis venientes *peccata sua confiteantur proprio Sacerdoti*, ac Sacrum Do-

Domini Corpus semel saltem quotannis in Paschate fumant, aliter arcendi ab Ecclesia.

§. XIII.

*De Concilio Lugdunensi I. Oecumenico XIII.
in Occidente V.*

Summus Pontifex *Innocentius IV.* ut temeritatem *Friderici* Imp. Ecclesiæ ditiones devastantis deprimeret, aliisq; Ecclesiæ commodis consuleret, ad congregandum Concilium gen: animum adjecit, at cum id in Italia coadunari non posset ob bella intestina, & factiones *Gibellinorum*, qui à parte *Friderici* stabant, & *Guelphorum* primorum hostes; Galliam petiit, ibiq; re ipsa gen. Concilium ad Festum S. Joannis Baptistæ Lugduni celebrandum indixit, an. Christi 1245. cui præter Cardinales multos interfuere Patriarchæ tres, CPolitanus, Antiochenus, Aquilejensis, Episcopi 140. Ex Palæstina venit solus Episcopus Berytensis, ex Hungaria nullus, ex Germania turbata pauci. Aderat *Baldvinus* Imp. CPolitanus, S. Ludovici Regis Orator, Comes Tolossanus,

Fri-

Friderici Imp. Procurator *Thaddæus* Imperialis Camerae Judex. His congregatis in *Ædibus* Monachorum *S. Justini* ipsò Pontifice Præside cæptum est illud Concilium.

Tribus actionibus perfectum est. In 1. *Innocentius IV.* multa dixit de constituendis moribus Præsulum, ac tyrannide *Friderici II.* coercenda. In altera Episcopus Calamensis enarravit ejusdem Imp. crimina gravissima; propter quæ in 3. Act. confixus est anathemate, Regnòq; Siciliæ, ac Imperiò depulsus. Hoc fulmine in suum Principem vibrato, percitus *Thaddæus* appellavit ad Concilium proximè futurum generalius. Sed illi reposuit Pontifex teste *Mathæo Parisien:* *Satis est Concilium generale multorum, qui Domini tui humilitatem inutiliter, non sine gravamine expectarunt - - - Et qui absunt, laqueis Domini tui reperiuntur irretiti; unde propter hoc indignum est ut sententia depositionis in ipsum ferenda retardetur, ne ex malitia sua commodum videatur reportare, cum non debeat alicui fraus patrocinari.*

Conditi Canones 17. Ex his 12. judi-

dicia regunt Ecclesiastica, ideò à Bonifacio VIII. relati in lib. 6. Decret. Reliqui de subsidiis mittendis periclitanti Latinorum Imperio CPoli. Ac decretæ expeditionis in Palestinam Dux præfectus S. Ludovicus Rex Gallicæ. Id præterea sancitum fuit, ut dies Natalis B. *MARIÆ V. DEI*q; Matris octo dierum spatiò celebraretur, ut est apud Labb.

Observat hic Petrus de Marca l. 4. de Concord: c. 17. §. 5. *Primus omnium, qui appellatione ad futurum Concilium usus est. prodit sese apud Historicos Fridericus II. Imperator.*

In hoc Concilio rubeus galerus Cardinalibus datus. Pontifex post Conciliū anno 2. Cluniacum iit, cum Rege Franciæ, & ipsius Fratibus locaturus; ubi Domini Cardinales primo capellos rubeos receperunt, sicut in illo Concilio fuerat ordinatum, ait Nicolaus de Curbio in vita Innocentii IV.

§. XIV.

*De Concilio Lugdunensi II. Oecumenico
XIV. in Occidente VI.*

Cum per Cardinalium compromissum, C^oa S. Bonaventura tunc Ord. Sera-
phici Ministro Generali electus esset
Gregorius X. hic ut Rei-Publicæ Christia-
næ prospiceret, Concilium hoc indi-
xit 1. ut ibi ageretur de Græcis ad
Ecclesiæ fidem & communionem redu-
cendis. 2. de procurando subsidio Chri-
stianis in Syria cum Saracenis pugnan-
tibus. 3. de reformanda morum disci-
plina.

Anno ergo 1274. celebratum illud
Concilium Præsidente ipso S. Pontifice
præsentibus Cardinalibus 15. Patriar-
chis 2. CPolitano & Antiocheno, Ar-
chi-Episcopis 60. aut 70. Episcopis
500. Abbatibus multis. Directione
Concilii commissa S. Bonaventuræ
Card. & Episcopo Albanensi, ut ea
quæ proponenda & decernenda erant,
provideret, & ordinaret.

In 1. Sess. præscriptus est modus
eligendi celerius S. Pontificem, de quo
supra in Synopsi de Card.

In

In 2. Nonnullæ lectæ Constitutiones pro fide. Obtinuit Pontifex à Prælatiſ omnibus Decimas reddituum Eccleſiaſti-
corum ad ſex annos pro ſubſidio belli Syriaci.

In 3. Sefs. probatæ Constitutiones variæ.

In 4. Poſt adventum Græcorum, ipſi ejurato Schiſmate ad Eccleſiæ com-
munionem recepti ſunt. Facta unione primò latinè, ſecundo græcè Symbo-
lum CPolitanum cantatum eſt cum particula *Filioq;*

In 5. Sefs. Constitutiones variæ pro-
batæ. Poſtea interfuit Pontifex cum Patribus exequiis S. *Bonaventuræ*, qui inter 4. & 5. ſeſſionem obierat, cujus funebre pronuntiavit elogium Card. *Petrus* de Tarantasia Ord. Præd. poſtea *Innocentius V.* Pontifex, ſumptò thema-
te: *Doleo ſuper te Frater mi Jonatha* 2. Reg. 1.

Sefs. 6. Duæ Constitutiones lectæ & probatæ. Sic Concilium finitum, Cardinali *Olobonô* alta voce dicente: *Recedamus in pace.*

§. XV.

De Concilio Viennensi Oecumenico XV. in Occidente VII.

Anno post mille trecentos undecimo *Viennæ* Allobrogum in Gallia celebrari cæpit hoc Concilium à *Clemente V.* Rom. Pontifice 1. ad extinguendum publica criminum infamia laborantem militarem, Templariorum olim Sanctissimum Ordinem. 2. ad damnandos Petri-Joannis Fratricellorum, & Dulcinistarum, Begardorum & Beguinorum, temporibus illis grassantes errores. 3. de ferendo terræ Sanctæ subsidio. 4. ad reformandos Ecclesiæ mores. Præter Pontificem, Cardinales multos, Patriarchas duos Alexandrinum & Antiochenum aderant Episcopi 300.

In 1. Sess: Ordo Templariorum suppressus, cassatus, & extinctus est, non per sententiam definitivam, sed per modum provisionis, & de Apostolicæ potestatis plenitudine, nec quod omnes essent rei, sed cùm omnes de iis factis infamarentur, ordo factus est inutilis. Hæretici pariter damnati.

In 2. Sess: Redituum post Templarios, relictorum translatio facta est ad Equites Rhodienses, modo Maltenses.

In 3. Promissa est expeditio sacra in terram S. à Philippo Rege Galliae.

§. XVI.

*De Concilio Florentino Oecumenico XVI.
in Occidente VII.*

Hoc Concilium Florentinum, habetur veluti quædam continuatio Concilii Basileensis, quod cum in Schismate contra *Eugenium* pertinaciter hæreret, desiit esse Oecumenicum. Major ergo pars Patrum Eugenio consentiens se contulit Ferrariam, ubi an. 1438. V. Idus Aprilis inchoatum est Concilium ad Græcos reconciliandos cum Latinis.

Interfuerunt Episcopi 140. vel 150. inter illos *Josephus* Patriarcha CPolitanus, *Bessarion* Antistes Nicænus postea S. R. E. Cardinalis; *Isidorus* non Thessalonicensis, sed Kioviensis Metropolitae, pariter ob navatam operam unionis S. R. E. Card. creatus, & *Marcus* Ephesinus. Adfuit etiam *Joannes VII. Palæo-*

laologus Græcorum Imp. Primæ sess. præfuit *Nicolaus Albergatus* Card. S. Crucis ex Ord. Carthusianorum. Reliquis ipse *Eugenius IV.* Pontifex. Quinq; & viginti numerantur Sessiones hujus Concilii; Sexdecim habitæ sunt Ferrariæ, Florentiæ verò reliquæ.

Actum est de quinq; Capitibus inter utramq; Ecclesiam controversis. 1. de processione Spiritûs S. à Filio. 2. de additione vocis *Filioq;* facta Symbolo. 3. de pane azymo vel fermentato in Euch. 4. de purgatorio. 5. de primatu Rom: Pontificis. Post multas disceptationes tandem convenerunt Græci, excepto uno *Marcô* Ephesino de articulis controversis, ad sensum Rom: Ecclesiæ, nempe 1. *Spiritum S. a Patre & Filio, tanquàm ab uno principio procedere.* 2. *Meritò additum Symbolo Filioq;* 3. *In azymo & fermentato posse Eucharistiam confici, quemlibet tamen debere suum ritum servare.* 4. *Dari purgatorium, in quo animæ, quibus aliquid expiandum restat, detinentur. Sed in eo, sive ignis sive caligo, aut turbo sive quid aliud sit, non contendimus.* 5. Rom. Pon-

tificem esse Christi Vicarium, Caput totius Ecclesiæ, & ipsi in B. Petro pascendi, regendi, gubernandi Ecclesiam universalem, à Domino potestatem plenam traditam esse.

Hæc in celebri unionis decreto reperiuntur, cui dum subscripsisset *Josephus* Patriarcha, repetens illud Simeonis *Nunc dimittis &c.* obdormivit in Domino, in Ecclesia Ord. Præd. Florentiæ sepultus.

Felix sanè *Josephus*, quia mala, quæ post mortem ejus supervenerunt, non viderunt oculi ejus. Nam pax omnium votis conclusa, si Marcum excipias, brevis admodum fuit. Græci enim vix in Patriam reversi, authore Marcô renovârunt Schisma antiquum, in quo ad hodiernum diem perseverant, post 12. aut 14. cum Ecclesia Latina reconciliationem, ut supra jam dixi. Nam S. Antonius 3. p. Chron. tit. 22. c. 13. hanc 12. appellat, alii verò apud Spondanum ad an. 1274. §. 8. eam dicunt 13. quæ in Conc. Lugdunensi II. facta est, sit consequens Florentiæ initam esse 14. Quia tamen hucusq; nulla publica facta est definitio à Græcis

cis contraria Florentinae, error Græcorum, qui à nobis dissident, cenferi debet personalis, non totius Ecclesiae Græcæ.

Post Græcorum discessum edidit *Eugenius* Decretum unionis pro Armenis erudiendis, quorum alii erant Eutychetis, plures Nestorii lue infecti. Deinde subsecuta est Jacobitarum reconciliatio, hoc est Orientalium unio aliorum adhærentium *Jacobo Zanselo Syro*, Eutychetis & Dioscori dogmata sequenti.

Volunt quidam hæc Decreta Armenorum & Jacobitarum non habere auctoritatem Concilii gen. sed Nationalis tantum, quia discesserant Græci: At alii congruenter oppositum tenent. Et hoc ipsa loquendi formula confirmat, ait enim Pontifex *Sacro sancto approbante Concilio*. Item dicit se tradere *ipsis decretum Unionis cum Græcis consummatæ pridem in hoc S. Oecumenico Concilio promulgatum*. Tandem subscribitur. *Datum Florentiæ in publica Sessione Synodali &c.*

Item cum in Concilio Trid. an.

1547.

1547. Febr: 26. Episcopus Clodien-
sis dubitasset de Bulla unionis Jacobi-
tarum, quod non pertineret ad Conci-
lium Florentinum, quod dicebat abso-
lutum quando consignata fuit Bulla u-
nionis Græcorum, Cardin. de Monte
reposuit: *Hallucinatos qui putant finem
Concilii Flor: fuisse unionem Græcorum,*
cum longè post, per tres scilicet ferè annos
perduraverit, videlicet ad an. D. 1442.
quò annò sextò Kalen. Maji celebrata Ses-
sione: Romam translatum fuit. Patere ex
diversis Constitutionibus, medio illo tempore
editis, quæ in Actis Concilii habentur. Ita
legitur Tomo 1. Act. Conc. Trid. sub
Paulo III. ut refert Horatius Justinia-
nus.

§ XVII.

*De Concilio Lateranensi V. Oecumenico
XVII. in Occidente IX.*

Cùm Conciliabulum Pisis congrega-
sent novem Cardinales à Julio II.
alieni anno 1511. eò videlicet prætex-
tū, quod non staret promissis, nec
juramento in electione præstito, de ge-
nerali convocando Concilio intra pri-

mum à consecratione biennium, pro
 reformandis Ecclesiæ moribus, & pro-
 curanda inter Princeps Christianos pa-
 ce, id videns fieri *Julius*, ut schismati
 obviaret, maximè cum Conciliabulo
 faveret *Maximilianus* Imp: & *Ludovicus*
XII. Rex Galliæ, uterq; *Julio* infensus,
 hoc Concilium Romæ in Laterano ce-
 lebrandum indixit, cui interfuere Pa-
 tres 114. duntaxat, inter quos nume-
 rabantur Cardinales 18. Patriarchæ 2.
 Alexandrinus & Antiochenus, Archi-
 Episcopi, Episcopi plures, præterea
 Abbates & Generales Ordinum multi.
 Oratores Principum imo Imperatoris
Maximiliani, cujus exemplum secutus
Ludovicus Rex Galliæ. Duravit per quin-
 quennium nempe ab anno 1512. ad
 an: 1517. Duodecim complectitur Ses-
 siones.

Præfuit *Julius II.* usq; ad Sess: quar-
 tam, quâ finitâ, cum in morbum in-
 cidisset, quintæ prefuit *Raphael* Rica-
 rius Card: Epis: Ostiensis, ac septem
 reliquis *Leo X.* in locum *Julii* demor-
 tui suffectus.

Est autem summa Concilii; Acta
 Pisa-

Pisani Conventiculi rescissa. Pænæ Card: Schismaticis, cæterisq; ejusdem Conventûs authoribus inflictæ. Simoniaca Pontificis electio irrita declarata. Dammati, qui assererent, animam rationalem esse mortalem, aut unicam in omnibus hominibus. Decreti Legati ad Principes, qui eos reducerent ad concordiam. Statutum ut Cardinalium domus, familia, mensa, supellexq; ejusmodi sint, ut modestiæ & frugalitatis speculum dici mereantur. Cautum etiam nè Cardinales partialitatem suscipiant aliquam, sed æquitatis promotores & defensores sint. Pænæ constitutæ in Clericos & Laicos blasphemix & nefarii criminis reos. *Montes pietatis* approbati & confirmati. Latæ leges à Concionatoribus observandæ, castigataq; eorum vitia. Pragmatica Sanctio abrogata, & in locum ejus substitutum Concordatum Gallicum initum Bononiæ inter *Leonem X.* & *Franciscum I.* Regem Galliæ. Porro *Sanctio Pragmatica* seu *Carolina* a *Carolo VII.* Rege Galliæ dicta, nihil est aliud quam famosa illa constitutio, in Concilio Bituricensi sub *Carolo VII.*

Gallorum Rege an: 1438. ex Decretis ferè Pseudo-Synodi Basileensis conflata, ac in tres & viginti titulos divisa. Præponit auctoritatem Concilii auctoritati Summi Pontificis. Electiones Episcoporum, quas sibi Rom: Pontifices reservârunt Canonorum Collegiis restituit. *Exspectativis præterea gratiis*, ait Guaguinus, *locum esse non sinit*, & alia plura statuit injuriosa Sedi Apostolicæ. Vide P. Laurentium Czepański in Controv: Occid: Sæc: XV. cap: 13. § 7. *Natalem* in Hist: Sæc: XVI. *Gravesonium*.

Itaq; Rom: Pontifices regiam hanc Constitutionem non secus ac hæresim perniciosam execrati, egerunt cum Regibus Galliæ, ut abrogaretur, certatumq; super hac re per annos amplius 70. Annô demum 1516. per *Concordatum* inter Leonem X. & Franciscum I. quod modò nominavi, controversia sedata est, iterumq; electiones Collegiis Canonorum abrogatæ, nominationes Episcoporum delatæ Regi, confirmatione Pontifici reservata. *Pragmaticæ* statuta partim abolita, partim

tim omiffa, partim correcta, partim approbata, ut est apud Petrum de Marca lib 6. de Conc: cap: 9. Vide laudatum Czepański loco cit: pag: 401. & seq;

§ XVIII.

*De Concilio Tridentino Oecumenico XVIII.
in Occidente X. omnium ultimo.*

Cùm Sæculo XVI. Christiani Principes (ut fileam gravissimas Turcarum irruptiones in Provincias Christianorum) bellis continuis ferè inter se contenderent; Martinus Lutherus non tam novæ hæresis, quàm prædicatorum jam diu antea errorum resuscitator, qui quassatam Rempublicam penitus conatus conterere, damnatus à Leone X. Pontifice, proscriptus ab Imperatore, sæpius etsi nec jure nec ferriò, appellavit ad Concilium generale, non ut rebus afflictis consuleret, sed tantum ut competentium Judicum potestatem eluderet, & suæ contumaciæ perfugium haberet.

Ordines Imperii in Comitibus Norimbergæ congregatis jam anno 1523.

optimo zelo suaserunt *Adriano VI.* remedium utile fore, si Concilium indiceret generale. Hi ipsi cum anno sequenti rursus in eadem Urbe convenissent, instârunt apud *Clementem VII.* *Adriani* Successorem. Ursit etiam Cæsar *Carolus V.* qui inter primas amicitiae, cum *Clemente* annô 1527. redintegratae leges, voluit hanc esse, ut quam proximè fieri posset, cogeretur Concilium generale. Sed vivô *Clemente* id fieri non potuit; Successor ejus *Paulus III.* anno 1537. indixit primò *Mantuae* Concilium, sed Dux Mantuanus conditionibus, quæ acceptari non poterant, negotium impedivit. Deinde *Vincentiam* convocatum est, ubi quædam inchoatio facta, quam tumultus bellici disturbârunt in ipso limine annô 1538. Postea ab eodem Pontifice indictum fuit, ut annô 1542. Tridenti congregaretur, at & tunc bella impediebant.

Felicior successus fuit, cum idem Pontifex annô 1544. convocavit Concilium, in ea urbe celebrandum annô sequenti: Inchoatum ergò fuit a *Paulo III.*

III. sub *Carolo V.* Imp: Rege Hispaniæ, utriusq; Siciliæ ac Indiarum, Belgii Principe &c. *Ferdinando* ejus Fratre, Hungariæ, Bohemiæ, Rege, Archiduce Austriæ; annô 1545. Martii 15. in quem Dominica *Lætare* inciderat. Sub eodem Pontifice translatum est annô 1547. Bononiam ob metum pestis. Sed à *Julio III.* qui *Paulo* successit reductum est Tridentum annô 1549. Kalen: Maji ibiq; continuatum ad annum 1552. quo per bellicos tumultus abruptum hæsit sub Marcello *II.* & *Paulo IV.* suspensum. Deniq; post intermedium 10. fere annorum à *Pio IV.* sub Imperatore *Ferdinando I.* resumptum, & annô 1563. feliciter finitum fuit.

*Ad*sunt ait Villepandus apud Bellarm: lib: 1. c. 5. de Conc: sex Cardinales, quatuor Legati, Patriarchæ 3. Archi-Episcopi 32. Episcopi 228. Abbates 5. Generales Ordinum 7. Episcoporum Procuratores plurimi. Constat Sessionibus 25. *Paulo III.* regnante 10. celebratæ, nempe octo Tridenti, duæ Bononiæ. A *Julio III.* Tridenti rursus instauratum,

tum, sed post sex celebratas Sessiones intermissum. Tandem anno 1562. reintegratum est operâ *Pii IV.* & novem Sessionibus, quæ aliis additæ, numerum Sessionum 25. explevêre, absolutum, *Ferdinando I.* Imperatore anno 1563. septimo ac vigesimo, postquam à *Paulo III.* Mantuam indictum fuerat. Illius Decretis Patres, quibus jus erat, 255. subscripsêre, *Pius IV.* ejus Acta confirmavit anno 1564. Constitutione edita 7. Kal: Febr: cavitq; ne ulli in Concilium Commentarii ac Interpretationes ederentur. Idemq; Constitutione alia edita 15. Kalen: Aug: edixit: *Decreta ejus ad reformationem jusq; positivum duntaxat spectanti: à Kalen: Maji proximè præteriti omnes obligare capisse.*

In eo Concilio tot & tam graves definitiones, atq; morum emendationes factæ sunt, quot & quales à multis Conciliis aliis, simul non sunt confectæ, tanto Christianæ pietatis incrementô, quantum fortasse, nulla unquam alia ratione post hominum conversionem ad fidem evenire visum est. Habetur deniq; in tanta veneratione, ut quamvis
ipsum

ipsum Concilium statuerit, in omnibus suis Decretis salvam semper esse & intelligi debere Pontificis auctoritatem; Pontifices tamen nunquam iis censeantur derogare in suis Bullis & Constitutionibus, in concedendis privilegiis & gratiis, nisi expressam faciant hujus Concilii mentionem, vel alioquin gratia & privilegium redderentur hoc ipso frustranea.

Synopsis Historica

Conciliorum generalium partim legitimorum partim illegitimorum.

Concilia generalia partim legitima partim illegitima, seu ex parte solum approbata sunt sequentia 1. *Sirmiense* in Panonia. 2. *Ariminense* in Italia. 3. *Quinisextum* seu *Trullanum* Constantinopoli. 4. *Francofordiense* in Germania. 5. *Pisanum*. 6. *Constantiense*. 7. *Basiliense* in Germania.

§ I.

De Concilio Sirmiensi.

Tria Concilia fuerunt *Sirmii* celebrata, quorum primum habitum est vel
anno

annô 347. juxta *Natalem*, vel 351. juxta *Baronium*, & in eo damnatus Photino Sirmiensis Episcopus qui assererat Christum esse purum hominem. Alterum Concilium Sirmienfe celebrârunt Ariani annô 357. in eo edita est formula purè Ariana, cui subscripsit *Osius* Cordubensis Episcopus, olim Arianorum flagellum. Tertium fuit convocatum 358. & in ea procusa fuit formula, in qua Filius DEI, Patri per omnia similis dicitur. Secundum & tertium totaliter ab Ecclesia Catholica reprobatum fuit; cûm utrumq; stabiliverit errorem secundum quidem rigidorum Arianorum, tertium Semi-Arianorum, rejiciendo vocem *Consubstantialis*.

Loquimur ergo de primo Concilio Sirmiensi, in quo per formulam græcè conceptam cum Anathematismis XXV. damnantur anathemate qui dicunt. *Filium DEI de non exstantibus, aut ex altera hypostasi* (sumitur pro substantia) *esse, vel fuisse tempus, aut sæculum, quando non erat.* Hæc formula à S. Hilario commendatur ut Catholica, & secundum eam partem hoc Concilium Sirmienfe probatur

tur ab omnibus, secundum aliam vero, quod vocem *homousion* omiserit, damnationem S. Athanasii exegerit semper fuit reprobatum. Hic obiter nota, huic formulæ subscripsit *Liberius* Papa.

§ II.

De Concilio Ariminensi.

Anno 359. habita est Synodus Ariminensis, cui interfuerunt 400. Episcopi Occidentales, qui rejecta fidei formulâ à *Valente* & *Ursacio* Episcopis Arianis sibi oblata Nicænam fidem unanimi consensû probaverunt, hanc ad omnia abundè sufficere judicârunt, atq; ad Constantium Imp: Legatos miserunt qui eum de gestis certiores facerent. At Legati ab *Ursacio* & *Valente* Arimini damnatis, præventi nihil effecerunt apud Imperatorem exasperatum. Unde factum, ut jussu Principis *Taurus* Præfectus Episcopos detinuerit, eosq; sic modis variis afflixerit, ut tandem quâ animorum dejectione, quâ precibus & promissis, quâ vi, dolis, & artibus, quâ longioris moræ tædiô, quâ quietis & revivendarum suarum Ecclesiarum desi-

desiderio compulsi fuerint ad subscribendum formulæ, quam *Ursacius* & *Valens* Nicææ in Thracia ediderant, quæ erat similibus verbis composita, ac tertia Sirmiensis, suppressa voce *consubstantialis* sive *homousion*. Quò ad primam partem legitimum fuit Concilium & probatum, at cum formulæ, quam, à Catholica doctrina non abhorrire putarunt, imprudentiâ lapsi plurimi aliis in exilium pulsis, subscripserunt, Concilium in Conciliabulum versum est.

§ III.

*De Concilio Quini-sexto, sive Trullano
quod & erratica Synodus dicitur.*

Cùm Synodi generales V. & VI. nullos pro disciplina Ecclesiastica Canones edidissent hanc Synodum *Trullanam* (dicta à loco in quò Concilium fuit coadunatum, unde Synodus VI. Oecumenica, cum erratica non debet confundi) celebrârunt Orientales, ut esset instar Appendicis & Supplementi, harum duarum præcedentium Synodorum Oecumenicarum, hac de causa *Quini-sexta* fuit nuncupata, *Erratica* à V. Beda. Hæc

Hæc Synodus, quæ anno 691. vel 692. sub *Sergio I.* Rom: Pont: & *Iustiano II.* cui *Rhinotmeto* cognomen ob hares præcisas, Imp: fuit celebrata ab Episcopis vel 240. vel 227. secundum alios 211. Nec de Præsede satis constat. Sunt qui *Callinicum* Pauli Constantino- politani Patriarchæ Successorem, nec defunt qui Paulum ipsum præfuisse scribunt. Paulus sanè Canonibus subscripsit, ut antiquorum Codicum testimonio ostendit *Mathæus Blastares*.

Utrum autem huic Concilio adfuê- runt Legati Sedis Apostolicæ disputa- rant Historici. *Anastasius* Biblioth: nar- rat adfuisse, ac deceptos subscripsisse: hi autem fuerunt *Apocrisarii*, seu *Respon- sales*, apud Imperatorem negotia univer- salis Ecclesiæ tum ad fidem, tum ad disciplinam pertinentia, procurare soliti, quibus Rom: Pontifices liberum de re aliqua decernendi arbitrium non per- mittebant. Neq; enim Legati à *Sergio* cum liberis mandatis ad hoc Concilium missi, ut à *Baronio* ad an: 692. & *Petro de Marca* lib: 5. de Concord: cap: 18. ostensum est, contra *Balsamonem*

Græ-

Græcum, qui contendit Conventum illum *Trullanum* habere authoritatem Synodi Oecumenicæ, quod instructus fuerit Legatis Sedis Apostolicæ. Quoniam etiamsi id verum esset, id tamen nihil momenti faceret: *Nisi enim*, addit *Baronius*, quæ in Synodis à Legatis sunt gesta, ea confirmantur a Rom: Pontifice, subscriptioneq; roborantur, nullius esse roboris convincuntur &c.

Quare post *Balsamonem* oleum operamq; perdidit *Guillelmus Cave*, dum in *Hist: Literali sæculo Monothelitico* in odium Romanæ Ecclesiæ frigidas ac inutiles rationes adducit, ut probet hanc Synodum *Trullanam* pro Oecumenica in omnibus esse agnoscendam. In hac ergo Syno. 102. Canones editi sunt, testibus *Tharasio* & *Photio*. Ex illis 102. Canonibus plures sunt optimi, jureq; laudandi, utpotè antiquam disciplinam redolentes, & ad morum reformationem perutiles. Sunt tamen etiam nonnulli, qui à Latina seu Romana Ecclesia non fuerunt approbati, uti Canon, quò 85. Apostolorum Canones decernuntur admittendi. Nec Canon 13. quò Rom:

Rom: Ecclesiæ reprehenditur disciplina, quâ Sacris Ministris usus conjugii interdicitur; Nec Canon 55. quo jejunium Sabbathi usitatum in Rom: Ecclesia damnatur. Nec 67. quô abstinentia à sanguine & suffocato Clericis sub pœna depositionis, Laicis sub pœna anathematis inhibetur. Hi, inquam, Canones ab Ecclesia nunquam recepti aut probati fuerunt. Similiter non est ex omni parte probatus Canon XXXII. quô prohibetur ne Christus depingatur in Imagine Agni, sed tantum hominis. *Vide Christianum Lupum in Notis ad præfatos Can.*

Hinc 102. Canones, ab hac Synodo conditi, qui à Rom: Pontifice approbati non sunt, vim omnino à Synodo nullam habent, quamvis multi utiles sunt. Tentavit equidem *Sergium & Joannem VII. Justinianus* ut hos Canones, præsertim *Joannes VII.* examinaret, & quos consentientes reperisset Catholicæ disciplinæ, probaret, cæteros vero refutaret pro arbitrio suo. Verum etsi justa hæc petitio videretur, ait *Baronius*, tamen quod non deceret Majestatem Apostolicæ Sedis, vel quid minimum com-
pro-

probare, quod non in legitima Synodo sancitum esset, eos *Joannes* nec ex parte voluit comprobasse. Postea tamen *Constantinum* Pontificem anno 710. Constantinopolim à *Iustiniano* arcessitum fuisse primum Pontificem, scribit *Christianus Lupus de Synodo Trullana*, qui probaverit Canones *Quini-sextae* Synodi, minimè adversantes Decretis Rom: Ecclesiae, & *Iustinianum* II. quod petierat à *Joanne* VII. id impetrasse à *Constantino* eamq; ob rem confirmasse privilegia Sedis Apostolicæ.

§. IV.

De Concilio Francofordiensi.

Hoc Concilium coram *Carolo* M. præsentibus Apostolicæ Sedis Legatis *Theophylactō* & *Stephanō* an: 794- à 300. circiter Episcopis ex Gallia, Germania, Italia & Britania habitum est sub *Hadriano* I. Pont: in eo damnati sunt *Felix* & *Elipandus* Episcopi, qui in Christo DEI Filio adoptionem asseriebant, & quòd ad hoc est approbatum. Quòd id tamen, quod Canone 2. damnat Concilium VII. generale nunquàm est probatum.

tum. At Concilium VII. à Francoford. Patribus non esse damnatum, sed id ipsis affingi ab Hæreticis communiter docent historici, de hoc alibi. Hic tamen *nota*: illud Concilium generale meritò dici non posse, cum sit solius Occidentis, sed ob *numerositatem Episcoporum, præsentiamq; Apostolicæ Sedis Legatorum*, Plenarium reperitur nominatum, ait Baronius ad annum 794.

§. V.

De Concilio Pisano.

Tria *Pisis* celebrata Concilia constat, unum annò 1134. ab *Innocentio II.* contra *Petrum Leonis Antipapam Anacletum II.* Alterum an: 1409. ad tollendum *Gregorii XII. & Benedicti XIII.* de Papatu contendentium Schisma à Cardinalibus convocatum. Tertium annò 1511. à quibusdam Cardinalibus contra legitimum Pontificem *Julium II.* Hic non de primo agitur, quia legitimum fuit, sed particulare; nec de tertio, quia illud fuit Schismaticorum Conciliabulum; sed de secundo.

Cùm nulla alia superesset via Schismatis extinguendi, Cardinales utriusq;
Mm obedi-

obedientiæ à suo recedentes Papa *Pis* convenère, ibiq; tanto ut mederentur Ecclesiæ malo, ei; de vero indubitato providerent Capite, generale hoc indixerunt Concilium annô 1409 Ad illud vocati sunt de Papatu contendentes *Gregorius* & *Benedictus* sed non comparuerunt. Secundum *Ozorium* interfuerunt 24. Cardinales, 3. Patriarchæ *Alexandrinus*, *Antiochenus*, & *Jerosolymitanus*, 300. Episcopi, & multi Religionum Prælati & Doctores. Duabus & viginti Sessionibus est absolutum. In eo electus est in S. Pontificem *Petrus Philargus* sive *Philaretus* Ord: Min: *Archi-Episcopus Mediol: & Card: dictusq; Alexander V.*

Conciliabulum vocat S. Antoninus 3. p. Chron: tit: 22. c. 5. § 2. cum non esset alicujus eorum, qui se gerebant pro Pontifice, auctoritate congregatum. Additq; *Alexandrum V.* in eo electum, annô unô *Sedem Petri tenuisse secundum communem opinionem: significans, ut ait Scholiastes, ex sua sententia Alexandrum V. legitimum non fuisse Pontificem, sed Gregorium XII.*

Nihilominus alii contradicunt affirmant-

mantes & Concilium & creatum in eo Pontificem fuisse legitimum, ut legere est apud *Raynaldum* ad annum præfatum. *Natalem Alexand: Hist: Sæc: XV. & XVI. Dis: 2. n. 9. Generale nec approbatum, nec reprobatur videtur esse Bellarmino lib: 1. de Conc: cap: 8.*

§. VI.

De Concilio Constantiensi.

Cùm per Concilium Pisanum non esset extinctum schisma, sed videbatur magis auctum, eò quod tunc tres essent Pontifices, hinc factum, ut *Joannes XXII.* qui *Alexandrô* demortuô successit, convocaverit Concilium Constantiense, & ad hæreticos *Vicleffistas* ac *Hussitas* damnandos, & ad Schisma extinguendum.

Anno 1414. Nonis Novembris celebrari cæptum Sessionibus 45. absolutum est annò 1418. X. Kalendas Majas. Interfuerunt Patres fere mille. Concilii Præses in duabus primis Sessionibus fuit *Joannes XXIII.* Tertiæ præfuit *Petrus de Alliaco* Card: Camerac. Quartæ & quintæ *Jordanus* Episcopus Alban: Card: Urfinus, reliquis usq; ad *Martini V.* ele-

ctionem *Joannes* Episcopus Ostien: Card: Vivariensis. Quatuor postremis *Martinus V.* Sess: 41. Pontifex creatus.

Sessione 12. *Joannes XXIII.* depulsus est Episcopatu, *Gregorius XII.* seu *Angelus* Corrarius se abdicavit per *Joannem Dominicum* Florentinum Cardinalem de Ragusino Ord: Præd. Quod cum *Benedictus XIII.* *Petrus* de Luna, jussus adesse atq; citatus, facere recusasset, Sess: 37. an: 1417. simul usurpata Pontificali dignitate, simul Christianorum communionem privatus est. Pontifex tamen ad mortem haberi voluit. Nec eo Paniscolæ annô 1424. vitâ functo, desinit Schisma. Duo enim Cardinales, qui partes ejus sequebantur, *Clementem VIII.* dictum suffecerunt, quô, *Alphonso* Arragoniæ Regis jussu annô 1429. VII. Kaland: Sextil: submitte se ad pedes *Martini V.* Schisma extinctum est.

Sessione IV. definitum Concilii Oecumenici auctoritatem esse Pontificia auctoritate superiorem. In 8. Sess: doctrina *Vicleffi* 45. articulis comprehensa, damnata est. In Sess: 15. damnati 30. articuli *Joannis Hufs*, & probata communio

nio sub una tantum specie. Sess: 21. anathemate percussus *Hieronymus Pra-*
gensis, & perindè relapsus, atq; *Hussius*
igni traditus, combustus est. Sess: 45.
ut apud *Labbe: Tom: 11. Conc: Legitur*
jussit Martinus V. decreta in materiis fidei
per præsens Concilium conciliariter teneri, &
inviolabiliter observari. Quibus verbis ut
animadvertit *Spondanus* ad an: 1418. si-
gnificat se non approbare, quæ *Sessio-*
nibus 4. & 5. statuta fuerant, de autho-
ritate Concilii supra Pontificem. Quan-
quam, ut idem *Spondanus & Bellarminus*
lib: 2. de *Conc: cap: 19. docet. Conci-*
lium Constantiense non definivit absolute
Concilia generalia habere à Christo potesta-
tem supra Pontificem, sed tantum in casu,
id est tempore schismatis, quando nescitur,
quis sit verus Papa, & proinde habere super
illum potestatem, non habere potestatem in
Papam certum. *Bellarmino* consentit
Eugenius IV. Pont: Cardin: noster. de
Turrecremata, qui dicto Concilio inter-
fuerunt in minoribus constituti, Roderi-
cus Episc: Calagarit. Compegius Calabrie:

Sed addunt *Decreta illa Sessionis 4. &*
5. ab una tantum Concilii parte ex Jo-

annis obedientia fuisse condita, idq; inconsultè & minùs regulariter, pluribus ejusdem etiam obedientiæ Prælati reclamantibus. "Iis tamen tanquam temerè excogitatis fidem denegat Author Anonymus Libertatum Gallicarum Defensor. At injuriam facit viro ad apicem Apostolicum vocato, & alteri ad purpuram assumpto oculatis testibus; quis dicet *Eugenium* & Cardin: de *Turcremata* hæc temerè excogitasse?

Auditis his & similibus Sessionis 4. & 5. Patronorum artificiis Emmanuel a *Schelstrate* Vaticanæ Bibliothecæ Præfectus studiò se contulit ad evolvendos antiquos codices, Acta & Gesta inedita Concilii Constantiensis referentes, ut orbi Catholico manifestum faceret *Eugenii IV.* dicta factis omnino inniti, quibus contradici non potest, ea luci dedit Antverpiæ annò 1683. adjuncta brevi Dissert: ubi ostendit Sessiones 4. & 5. concilialiter habitas non esse, eò quòd non fuerit præmissum examen debitum, plena Patrum deliberatio, nec adfuerunt suffragia libera & plurium consensus.

Porro Acta sic habent: *Post Sessionem*
3. die

3. die Veneris 29. mensis Martii, cum tres nationes, videlicet Germanica, Gallicana, & Anglicana, deliberassent Sessionem celebrare in crastinum, & capitula, quæ volebant in ea statuere; Domini Cardinales in Palatio Episcopali Constantiensi convenientes habita deliberatione inter se, obtulerunt Domino Regi, quod ipsi parati erant Sessioni in crastinum celebrandæ interesse, dummodo non fierent, neq; statuerentur alia capitula, nisi Capitula infra-scripta, quibus sic oblatis D. Rex, receptis Capitulis infra-scriptis dixit, se iturum ad Nationes in Claustro S. Francisci congregatas, & cum eis prædicta Capitula conferre velle, & de eis postea respondere.

Eadem die horâ tarda D. Rex, à nationibus ad dictos Cardinales rediens retulit quod nationes supra infra-scriptis Capitulis tantum in Sessione statuendis, non poterant concordare, sed obtinuerat ab eis, quod Sessio ad horam decimam prorogaretur, & in crastinum usq; ad illam horam viderent, si possent ad invicem concordare.

Die Sabbathi, quæ fuit Sabbathi Sancti penultima mensis Martii horâ septima ante meridiem, convenientibus in Palatio Episcopali Constantiensi D. Rege Romanorum DD.

Car-

Cardinalibus & Nationibus, fuit plurimum super infra scriptis & aliis Capitulis altercatum (& ut gesta ex aliis 4. manuscriptis Actibus referunt) quia Cardinalibus adhuc non fuerat plenè aperta materia agendorum in illa Sessione, nec etiam Ambasiatoribus Regis Franciæ. Præfati Cardinales & Ambasiatores erant deliberati non interesse in Sessione. Et licet Rex (Rom: Sigismundus) multum instaret apud Cardinales, quod interessent, tandem cum jam prælati sederent in Concilio cum mitris & pluvialibus, Rex tractavit cum Cardinalibus, & per ejus medium adhibito quodam moderamine in illa Sessione, Cardinales consenserunt interesse, & fecerunt, quod etiam interfuerint Ambasiatores Regis Franciæ, cum quibus Cardinales se conjunxerunt, & illi cum Cardinalibus. Rebus ita stantibus, celebrata est Sessio 4. & publicata in ea de authoritate Concilii Capitula.

Post Sessionem 4. die Sabbathi (ante Dominicam in Albis) quæ fuit 6. Aprilis, cum per prius inter Dominos Cardinales & Nationes, altercatum fuisset, super correctione & emendatione Capitulorum, in præcedenti Sess. statutorum, tamen ordinatum & conclusum est, quod supradicta capi-

capitula corrigerentur. Convenientibus itaq; dicta die Glor. Principe D. Sigismundo Rege Rom. DD. Cardinalibus, cæterisq; Principibus, Prælati, Regum, Principum ac Dominorum Oratoribus, Procuratoribus & aliis in Concilio Constant. existentibus in Ecclesia Cathedrali, præmissa per DD. Cardinales protestatione in Camera Paramentorum Palatii Constant. secretè facta, quod propter scandalum evitandum ad Sessionem ibant, non animò consentiendi his, quæ audierant in ipsa statui debere. Tandem 5. Sessio celebrata est; D. Andræas Laschari Electus Posnaniensis pronuntiavit Capitula. Addunt alia Gesta: Fuerunt pronuntiata definitiones per Electum Posnaniensem, quia Cardinalis Florentinus illa noluit pronuntiare.

Eadem Gesta ex 4. manuscriptis Codicibus referunt, de querelis Cardinalium, apud Nationes interpositis, quod sine deliberatione post Sessionem 2. cuncta in Concilio peragerentur, Cardinales autem licet præsentibus in sessione fuerunt, nunquam illam formam viderant, eodem enim die circa horam 7. de mane, fuit data eis copia ad deliberandum super illa, cum jam plures Prælati sederent & immineret relatio

novorum facienda Regi & Deputatis Nationum in Sachristia, in qua relatione praesentes fuere nec poterant illam videre, cum statim facta relatione perventum est ad Sessionem, quae jam parata erat, (intellige sub una obedientia Joannis XXIII.) & ita penè in omnibus Decretis Concilii factum est; Cardinalibus ita arcto & brevi tempore ostensa sunt Decreta, jam conclusa à Nationibus, ut non fuerit in eorum potestate super illis, sufficienter deliberare, imo in magnum contemptum habiti sunt. Plures Cardinales conquesti sunt de contemptu, & finaliter petiverunt, quod cum essent in Concilio 4. Nationes, una Angliae, in qua non erant viginti capita, de quibus tres solum Praelati, & Cardinales essent 16. & alii futuri; de quibus magni & insignes Doctores propter dignitatem Collegii, ut habeant vocem & auctoritatem tantam, sicut natio Anglicana, quod fuit recusatum & dictum, quod venirent ad suas nationes, ita quod nullam habent auctoritatem. Hucusq; gesta Constan. Concilii de examine, deliberatione, consensu, & definitione obortae quaestionis, an Concilium est super Papam & definitione affirmativa in 4. & 5. Sessione.

Videant ergo 4. & 5, Sessionis Concilii Constant. Defensores, nonne verum est iudicium *Eugenii IV.* & Cardinalis de *Turrecremata*? Nonne iustè *Martinus V.* iis solum suum calculum addere voluit ad instantiam Oratoris Regis Poloniæ, quæ *conciliariter* servatis servandis decreta erant? Si plura desideras; Vide P. Laurentium *Czepański* Augustianum Contr. XIV.

Ea ergò solum probavit *Martinus V.* quæ definita & conclusa fuerunt in *materiis fidei*; at ajunt adversarii, prædicta Sess. 4. & 5. decreta in materia quoque sunt fidei, quia de fide est dari in Ecclesia supremam potestatem, si igitur &c. Quomodo salvabitur de fide esse, dari in Ecclesia supremam potestatem, & tamen non esse fidei prædictæ Sess. 4. & 5. decreta? Hoc jam ex dictis constat, nimirum non alio fine fuisse facta hæc decreta, quam pro trium Obedientiarum unione, contra tres de Papatu contendentes, non autem ut obligarent omnes fideles ad fide Divina credendum in Concilio generali, non in legitimo Rom. Pontifice supremam potestatis auctoritatem esse. Adde decreta illa non
fu-

fuisse facta *conciliariter*, ut dictum, communi totius Concilii suffragiô, adeoq; à certitudine fidei deficere, cùm a *Martino* tantùm probentur ab omnibus ea teneri debere, quæ conciliariter decisa erant. Aut si vim aliquam habent, ad illud solummodo tempus sunt restringenda, quando Ecclesia non habet indubitatum Caput sive Pontificem, ut in schismate illo magno contigit.

Et ut optimè notat laudatus D. *Emmanuel*; Decreta illa sunt edita per modum Constitutionum Synodaliû, non autem in materia fidei, idq; colligitur ex Actis, in quibus Sess. 5. refertur; quod *Electus Posnaniensis* publicaverit decreta supradicta per modum Constitutionum Synodaliû & post illorum aliorumq; Decretorum publicationem adjungitur: Quod idem *Posnaniensis* legerit, quædam adjumenta in materia fidei, ut super materia *Joannis Hufs* detenti per Concilium, & de quodam *Joanne Vicleff* ibidem subjuncta.

Concilium ergo ipsum distinguit Decreta per modum Constitutionum Synodaliû à Decretis in materia fidei; primi generis appellat Decreta Sess. 4. &

5. Secundi generis Decreta, errores Hufs & Vicleffi concernentia, fit consequens *Martinum V.* in confirmatione Synodi non aliud nomine *materiae fidei* intellexisse, quam ea, quæ in materiis hæreticorum & Sacrorum dogmatum acta sunt. Concludendum ex hoc capite approbationis scilicet, incertæ fidei esse Sess. 4. & 5. decreta.

Incertæ præterea fidei ex eo manifestè probantur esse, quod, ut refert Card. de *Turrecremata*, cum post editum decretum lis exorta fuisset, an Oecumenicum Concilium tunc temporis esset, quod modo angustioris, modo angustioris esset authoritatis; cum in principio, Synodo tantum adfuerint ii, qui *Joannis* Obedientiam sequebantur, crevit deinde Sess. 14. quando *Gregorius* ministerio *Joannis Dominici* Card. de *Ragusino* illud firmavit, Cum vero Hispani demum Constantiensibus Patribus se junxere, aucta tunc maximè illius dignitas, ut non dubitaretur amplius à Catholicis de Oecumenicitate Concilii. Sancita sunt igitur illa decreta Sess. 4. & 5. à Concilio non Oecumenico, idq; absq;

absq; debita & matura deliberatione, ut dictum, excitatasq; propterea fuisse turbas in Concilio, refert *Rodericus* Episcopus Calagurit. qui hoc se ab illis, qui huic interfuere Concilio, accepisse affirmat.

Ea decreta Sess. 4. & 5. dubiæ fidei esse, præter *Martinum V.* *Eugenius* Martini in Sede Successor, qui etiam adfuit huic Concilio, non solum non dubitavit, sed etiam ex proposito illa impugnavit, dum sub nomine *Apologiæ* contra *Basileenses* scripta sua posteritati tradidit in Libello, qui incipit: *Moyse* *Servus DEI*, in quo affirmat constantissimè, dicta decreta non solum sine communi deliberatione debita, sed nec statuta fuisse uniformiter ab omnibus unius Obedientiæ Patribus; *Qui Constantiæ*, ait, *consedebant*, *unius tantum Obedientiæ Synodum faciebant*, *nec tamen hi omnes in eam sententiam convenerunt*, *sed nonnulli reclamare graviores, qui strépente multitudine superati...* (*factum esse manifestum est*) *audiri nequiverunt.*

Hoc ipsum *Rodericus* in Dialogo à *Campio* adductus: *Decretum illud*, inquit

præ-

præter id, quod factum fuit à sola obedientia Joannis XXIII. nec etiam concorditer factum, ab omnibus ejusdem Obedientia, cum reclamaverint complures S. R. E. Cardinales, complures Prælati & Doctores, affirmantes Decretum minus juridicum fore, daturumq; quandoq; occasionem schismatis, id quasi propheticò ore dixerunt & prædixerunt, quod factum vidimus in Concilio Basileensi, de quo statim.

§ VII.

De Concilio Basileensi.

M*artinus V. Sess. Concilii Constant. 44. locum futuri Concilii gen. pro reformatione morum, quæ Constantiæ fieri non poterat, de omnium consensu designavit Civitatem Papiensem, ad quam cuncti tempore indicto convenire deberent. Igitur elapsis annis quinque post finitum Concilium Constant. annò 1423 Martinus misit Papiam seu Ticinum Prælatos, qui Concilium inchoarent, Petrum Donatum Arch. Cretensem, Jacobum Episcopum Spoletanum, Petrum Abbatem de Rosario, & Leonardum de Florentia Gen. Magistrum Ord. Præd. quos*

quos alii secuti sunt Præsules. Sed *Transalpinis* nondum præsentibus, cum *Papiense* cœlum lue pestifera esset infectum, consultius visum est *Martino V.* Concilium in Urbem Senensem transferre.

In Senensi ergò Concilio confirmata est damnatio in *Vicleffitas* & *Hussitas*; approbata exauthoratio *Petri* de Luna, dicti in sua Obedientia *Benedictus XIII.* De Græcorum ad unitatem Ecclesiæ reducendorum modo actum est. Cùm verò *Alphonfus* Aragoniæ Rex *Martino V.* iratus ob negatum Regis Siciliæ titulum, causam *Petri* de Luna defendendam suscepit, & ut in Concilio Senensi denuò discuteretur urgebat, eam ob rem *Martinus V.* Concilium Senense die 19. Febr. 1424. abruptit, & ad proseguendam, commodiori loco & tempore reformationem in eo inchoatam, Civitatem Basileensem ad Concilium Oecumenicum septennio post celebrandum designavit; & reipsa *Martinus V.* anno 1429. misit *Julianum* Card. Diaconum S. Angeli, Legatum à Latere, eumq; Basileensis Concilii Præsidem instituit.

Sed

Sed mortuô *Martino V.* eodem annô *Eugenius IV.* ei in Apostolica Sede suffectus, Concilii Basileensis indictionem statim literis datis ratam habuit, & præsidendi potestatem *Juliano* confirmavit.

Hinc factum, quod Concilium Basileense in suis primordiis, hoc est in aliquot Sessionibus (de quarum numero non una omnium sententia est) veri ac legitimi Concilii formam habuerit, quamdiu videlicet *Eugenio IV.* annuente, & sub præsentia *Juliani* Cardinalis continuatum fuit.

At postquam *Eugenius* Concilium Basileense dissolvit, illudq; Ferrariam transtulit, post discessum Legati Pontificis, Synodus Basileensis sub præsidio *Ludovici* Cardin. Arelatensis continuata invitoq; Pontifice prorogata, desiit esse vera & legitima, quamvis negari non possit, eam convocatione fuisse legitimam, utpotè à *Martino V.* & *Eugenio IV.* indictam, & sub præsidio *Juliani* Sedis Apostolicæ Legati continuatam.

Ut quidam Cardinales in Concilio Constantiensi prædixerunt occasione

Nn

Sefs.

Sels. 4. & 5. Schisma Ecclesiæ immi-
nere, ita factum est; nam Patres Basile-
enses, exauthorato legitimo ab omnibus
agnito Pontificè *Eugenio IV. Felicem V.*
Antipapam opposuerunt, qui tamen ve-
ritate agnita Pontificatu se abdicavit,
seq; *Nicolao V.* subiecit. Hinc ait V.
Bellarminus *Concilium Basileense legitime
fuit inchoatum, sed illegitime terminatum.*
Vide eundem lib: 3. de Ecclesia mili-
tante cap. 16.

Nicolaus V. bono pacis solum proba-
vit aliqua, quæ gesta sunt circa censu-
ras & causas beneficiales.

§ Ultimus.

De Conciliis generalibus reprobatis.

I. *Antiochenum* tempore *Julii I.* Pontif.
& *Constantii* Imp. annô circiter 341.
in eo S. Athanasius ab Arianis damna-
tus est.

II. *Mediolanense* Episcoporum plus-
quam 354. sub *Liberio* Pont. & *Constan-*
tio Imp. præsentè, in quo fides Catholica
saltem indirectè temerata fuit, damna-
tus S. Athanasius, Eusebius Vercel-
lensis, Dionysius Mediolanensis, & alii
in exilium missi.

III.

III. *Ephesinum* .II. sub S. Leone S. Pontifice, & *Theodosio* Juniore Imp. annô 449. in quo agente *Dioscorô* mactatus est S. *Flavianus* Episc. CPolitanus Legati, S. Pontificis fugati, hæresis Eutychiana confirmata hinc *latrocinium Ephesinum dictum est.*

IV. CPolitanum sub Leone Isauro & *Gregorio* II. S. Pont. annô 730. adunatum contra S. Images, frustra renitente S. *Germanô* Patriarchâ CPolitano.

V. Iterum CPolitanum Episcoporum 838. à *Constantino* Copronymo, filio *Leonis* annô 755. coactum, in quo Christi & SS. Images iterata vice disceptæ sunt.

VI. *Pisanum* à quibusdam Cardinalibus contra *Julium* II. annô 1511. adunatum, paulò post in Concilio Lateran. V. reprobatum.





DISSERTATIO V.

DE ECCLESIAE CATHOLICAE PATRIBUS
& DOCTORIBUS.



Cum Christus Dominus dede-
rit quosdam quidem Apostolos,
quosdam autem Prophetas, alios
verò Evangelistas, alios autem Pastores &
Doctores, ad consummationem Sanctorum ---
ut jam non simus parvuli fluctuantes, &
circumferamur omni vento doctrinae in ne-
quitia hominum, in astutia ad circumventio-
nem erroris, quivis Theologus cum
S. Aug. lib. 1. contra Julianum cap.
8. dicere debet: quod tenent (SS. Pa-
tres) teneo, quod docent doceo, quod prae-
dicant, praedico. Quod ut verè tutoq;
præstare valeat, & auream secutus Vi-
ctoris Carthagenensis regulam à Martino
I. Rom: Pontifice probatam: Nihil na-
viter dicat; nihil quod non à S. Patribus
fuerit expresse traditum, vel indicatum, sciat
qui-

quinam SS. Ecclesiæ Patres, Doctoresq;
dicendi? Quanta eorum authoritas?



ARTICULUS I.

De dotibus Ecclesiæ Doctorum & Patrum.

Multi equidem sunt Doctores in Ecclesia non tamen omnes ii, quantumvis scientiâ & eruditione clari sint, Ecclesiæ Doctores sunt protinus dicendi; insigne quippe discrimen est inter Doctorem in Ecclesia & Doctorem Ecclesiæ. Etenim ut quis Doctor in Ecclesia dicatur, satis est, quod sit de Ecclesiæ Catholicæ gremio, & ab aliqua universitate legitimè instituta & probata Doctoris gradû donatus. Ut verò quis Ecclesiæ Doctor dici possit, requiruntur in eo multa. Nempé.

I. Authoritas, ut sit scilicet de numero eorum, qui sæculô Apostolorum, aut Virorum Apostolicorum vicini, vel saltem non longé remoti fuerunt, quiq; propterea fidei plantandæ adlaboraverunt, vel pro ea saltem tuenda insudâ-

runt; juniores enim Doctores, etsi in lata significatione possint dici Patres, propriè tamen Pædagogi dicuntur; *Pater enim est, qui primò generat; Pædagogus autem qui jam natum nutrit & erudit,* ait S. Thomas in cap. 4. Epist. 1. ad Cor. Lect. 5. super illa verba: *Etsi decem millia Pædagogorum habeatis in Christo sed non multos Patres. Dicit ergo (ait S. Thomas) Apostolus se Patrem eorum in Christo, quia eis primò Evangelium prædicavit. Unde assignans rationem ejus, quod dixerat, subdit: Nam in Christo JESU per Evangelium ego vos genui. Id tamen nihil impedit quin geniti ab Apostolis quiq; relate ad illos sunt filii, respectu subsequantium fidelium, quos in Christo genuerunt, Patres dici possint. Unde S. Aug. exponens illud Psal: 44. *Pro Patribus tuis nati sunt tibi filii, constitues eos Principes super omnem terram,* dicit, hos esse Episcopos, qui filii Apostolorum, Patres sunt succedentium populorum. Neq; tamen antiquitas sufficit, sed insuper.*

2. Ad veram notionem *Patris* requiritur vera fides. Quare ii, qui ex præfatis

fatis priorum sæculorum Doctoribus, apertè & pertinaciter, hæretici fuère, & permansère, Ecclesiæ Patribus annumerandi non sunt, quales fuerunt *Tertullianus, Origenes, Eusebius Cæsariensis, Theodorus Mopsuestenus* & alii, neq; ex eorum authoritate petendum est argumentum, nisi forte adducantur & testes Traditionis. Non loquor tamen de iis, qui in uno vel altero errore versati sunt circa quæstiones fidei obscuras & nondum definitas, alioquin parati sententiam deponere si Ecclesia oppositum definiret. Quo pacto S. Cyprianus summo jure inter Patres habendus est, quia sic defendit errorem rebaptizantium, ut paratus fuerit eum deponere, si per plenarium Concilium res fuisset definita; sic eum defendit S. Aug. lib: 2. de Bapt. cap: 4. Imo priusquam aliqua quæstio obscuritatem habens definiatur, necesse est, ut prius in utramq; partem disputationibus ventiletur: *Quomodo* ait, S. Doctor, *potuit ista res tantis altercationum nebulis involuta, ad plenarii Concilii luculentam illustrationem confirmationemq; perducì, nisi prius diuti-*

diutius per orbis terrarum regiones multis hinc atq; hinc disputationibus & collationibus Episcoporum pertractata constaret.

3. Requiritur ad verum Ecclesiæ Doctorem fidei conjuncta doctrina non qualiscunq; sed excellens, quæ conjunctam habeat vitæ sanctitatem. Nam licet fidem non necessario comitetur sublimis doctrina, nec sublimis doctrina inferat vitæ sanctitatem, in Ecclesiæ tamen Doctore hæc omnia amico fœdere sociata reperiri debent. Patres enim Doctores in Ecclesia posuit Spiritus S. ut essent in ædificationem corporis Christi, ac lumina, ad quæ fideles respicerent, tum in agnoscendis fidei Mysteriis, tum in moribus componendis; oportet ergo, ut præditi sint speciali & eximia Mysteriorum fidei cognitione, & rursus eximia erga DEUM pietate, & charitate, qui enim *fecerit & docuerit hic magnus vocabitur in Regno Cælorum.*

Hinc ait Vincentius Lirinensis in Commonitorio cap: 3. *In ipsa enim Catholica Ecclesia magnopere curandum est, ut id teneamus, quod ubiq; quod semper, quod*

ab

ab omnibus creditum est, hoc enim verè proprièq; Catholicum, quod ipsa vis nominis ratioq; declarat, quæ omnia fere universaliter comprehendit. Sed hoc ita demum fiet, si sequamur universitatem, antiquitatem, consensionem; Sequemur autem universitatem hoc modò, si hanc unam fidem veram esse fateamur, quam tota per orbem terrarum consitetur Ecclesia. Antiquitatem verò ita, si ab iis sensibus nullatenus recedamus, quos Sanctos maiores nostros, & Patres celebrasse manifestum est. Consensionem quoq; si ipsa vetustate omnium vel certè penè omnium Sacerdotum pariter & Magistrorum definitiones sententiasq; secutemur. Hæc Vincentius.

4. Ad constituendum Ecclesiæ Doctorem præter tria dicta requiritur Ecclesiæ declaratio saltem aliqua, tacita vel expressa Patet ex eo, quod sicut nullus quantumvis doctrinâ celebris, potest in Universitate ulla Doctoris titulò gloriari, nisi fuerit ab illa Doctoris gradu ritè donatus. Et sicut nullus potest ut Sanctus in Ecclesia coli cultû publico, quantumvis vitæ sanctitate & meritis clarus, nisi fuerit ex iis, quos in SS. Canone adscripsit

psit Ecclesia, ita potest nemo Doctoris Ecclesiae titulô gaudere, quantumvis en inenti doctrinâ, & insigni vitæ sanctitate conspicuus nisi is, quem prius ipsamet, tali titulô decoraverit Ecclesia.

Dices contra 1. p. S. Thomas Doctor Angelicus, *S. Bonaventura* Doctor Seraphicus, *S. Bernardus* Doctor mellifluus sunt vere Doctores & Patres Ecclesiae; sed hi non habent antiquitatem illam prærequisitam; ergo.

Resp: Nego min: Habent & isti Ecclesiae Doctores & Patres insigniter Sancti aliis licet longe juniores, sufficientem antiquitatem, ut Ecclesiam doctrina virtutibusq; formare & quodammodo generare potuerint. Licet enim ante illos fuerit Ecclesia, doctrina virtutibusq; formata, quia tamen suis scriptis amplam ad refellendas hæreses præbuere materiam, sicq; eam modo ab hæresis morte præservando, illam in ea fidei sinceritate servando, quodammodo regenerârunt. Insuper *S. Thomas* & *Bonaventura* ab Anno 1274. & *S. Bernardus* ab anno 1153. cûm antiquitatem habeant, meritô possunt insigni

gni Patrum & Doctorum titulô decorari; & reipsa fuerunt donati: *Bernardus* quidem longe post antiquiores Ecclesiæ Patres, unde Patrum *Posthumus* vulgò dictus, tandem post Bernardum *Thomas* & *Bonaventura*, ille quidem à *Pio V.* iste à *Sixto V.* ea potissimum de causa, quod hi duo, quasi duo fulgentia Ecclesiæ lumina Scholasticam Theologiam disposuerunt, illustrârunt, & ampliârunt; sicq; Ecclesiam suo modô, quo ad valde utilem & necessarium cognoscendi modum, regenerârunt.

Dices contra 3. P. Theophilus Patriarcha Alexandrinus qui initio Sæc: V. vixit a Concilio Oecum: V. numeratur inter Doctores & Ecclesiæ Patres, & ut talem Ecclesia honorat; atqui tamen, ejus doctrina non habuit vitæ sanctitatem annexam. Quem enim latet, quid egerit *Theophilus* contra S. Chrysostomum? Ergo.

Resp: Non requiritur (ut sit quispiam Ecclesiæ Doctor) sanctitas omnimoda & universalis per totum vitæ spatium sed finalis. Nonnulli comperti sunt aliquando in Patribus nævi nec ab eis
Theo-

Theophilum purgare contendimus, sed zelum fidei habuisse, & in communione Ecclesiæ ultimum clausisse diem nemo diffitetur, cum beatum nominent illum & ipsi Romani Concilii sub Gelasio habiti Patres. Quod causam S. Chrysostomi attinet Theophilus errore facti deceptus, infensus fuit S. Chrysostomo, non animò odii occasione Monachorum Origenistarum à Theophilo damnatorum, quos S. Chrysostomus hospitio recepit, sed non communioni restituit, ut rebatur Theophilus. Hac de causa etiam S. Epiphanius è numero Doctorum & Patrum Ecclesiæ foret expungendus, cum & ipse noluerit communicare cum S. Chrysostomo illò tempore Constantinopoli præfens, eò quod crederet eum favere Origenistis, ipse verò quamdiu vixit, adhæsit Theophilo, qui eodem detentus errore, adversabatur S. Chrysostomo.

Dices contra 4. p. Ex his sequitur quod quatuor tantum juxta Bonifacii decretum sint Ecclesiæ Doctores, nempe Ambrosius Hieronymus, Augustinus & Gregorius M. aut numeratis S. Thoma Bo-

& *Bonaventura* post decreta *Pii V.* & *Sixti V.* ad summum sex.

Resp: hoc non sequi. Nam *Bonifacius VIII.* cæteros non abnuvit Ecclesiæ Doctores, sed solum statuit, ut 12. Apostolorum & Evangelistarum & 4. præfatorum Ecclesiæ Latinæ Doctorum festa solemniter celebrentur sub Festo duplici, secundum nostram Rubricam sub Festo toto duplici, quæ solemnitas extensa est per *Pium V.* pro Festo S. Thomæ a *Sixto V.* pro festo S. *Bonaventuræ.* & novissimè à *Benedicto XIV.* pro festo S. *Leonis M.*

CONSECTARIUM.

Ad Ecclesiam spectat determinare antiquitatem, & ab ea etiam, si opus est, dispensare. Sufficit, ut declaret illos esse Patres, & uti tales, propter exhantlatos pro fide defendenda labores, haberi velit. Porro secundum morem antiquitas prærequiritur, eò quod Patres primorum sæculorum magnis floruerint virtutibus. Aliunde Pater, ut vox ipsa sonat antiquitatem importat, juxta illud *Deut: 57. Interroga Patrem tuum*

tuum & annuntiabit tibi majores tuos, & dicent tibi.



ARTICULUS II.

Utrum consensus Patrum sit regula infallibilis fidei?

§ I.

Observanda aliqua præmittuntur.

De Authoritate SS. Patrum trifariam disputari solet. 1. De unius aut alterius proprio placito, quale videtur fuisse S. Augustini de opere sex dierum. 2. De communi plurium Sanctorum consensu, à quo tamen unus & alter Sanctorum desciverit. 3. De omnium unanimi concordia; sententia. Rursus considerandum est: Sanctorum testimonia referri posse, vel ad Philosophiæ confirmanda dogmata, vel ad assertiones aut fidei, aut Theologiæ comprobandas.

Insuper & hoc benè observandum inter Doctores etiam Ecclesiæ esse duo disputationum genera. Alterum earum rerum quæ verè ad fidem spectant, doctrinamq; Catholicam; alterum earum, quæ citra jacturam pietatis ignorari, &

ab

ab indoctis & etiam à doctis possint, quod nec fidei dogmata sint, nec ab iis deriventur.

Hæc autem duo genera non est facile discernere, quia etsi nonnulla quæ alioquin per se quidem ad fidem pertinebant, ut Apostolis Prophetis & Evangelistis revelata, in dubium venire possint, antequam ab Ecclesia sint definita; sed id tamen per ignorantiam fit, qua videlicet excusantur, qui ea vertunt in quæstionem, quæ alias divinitus sunt tradita, ut vg. processionem Spiritus S. à Patre & Filio, tanquam ab uno principio ante Ecclesiæ definitionem, Græci quidem negare sine culpa potuere, tametsi id Evangelium Apostolique tradidere.

In primo ergo genere sunt, quæ Apostoli vel scripto vel verbo Ecclesiæ tradiderunt, nec non illa, quæ inde certa connexionione probantur existere. In secundo genere sunt, quæ neq; à Christo, neq; ab Apostolis accepimus, neq; ex iis certo colliguntur, quæ Christi & Apostolorum autoritate tenemus.

Hæc porro secundi generis sunt | vg.

an

an: gratia qua justificamur, sit qualitas quædam animæ impressa, unde aliæ qualitates, virtutes nempe infusæ consequantur, de quibus inter Scholasticos disputatur; sed controversia Catholicorum cum Pelagianis de gratia ad credendum, sperandum amandum, & ad totam legem implendam non est de qualitatibus, sed de Dei auxilio gratuito & speciali, quod ad primum genus pertinet. Hæc ex *Melchiorre Cano*. præmittenda duximus. Igitur.

§ II.

Resolvitur quæstio.

Non agimus hic de Patrum auctoritate circa ea, quæ naturali lumine continentur, sed quæ ad sacras literas & doctrinam fidei pertinent. Igitur.

Dico: 1. Unius aut duorum Patrum auctoritas, etiam in his, quæ ad sacras literas & fidei doctrinam pertinent, probabile quidem argumentum subministrare potest, firmum non potest.

Prob: SS. Patres spiritû humanô fuerunt locuti, qui errori obnoxius est,

&

& in eo aliquando errârunt, quod ad fidem spectare postea demonstratum est, quale est dogma de Millenario Christi regno de dilatione Visionis beatæ ad diem judicii; de iis, qui ab hæreticis baptizati sunt, rebaptizandis &c. Ergo. Nec tamen proindè Patres aut contemnendi sunt, aut spernendi, nam ut optimè dixit *Canus* lib: 7. c. 3. de autoritate SS. *Ita despicere. & pro nihilo habere, impudens est, suscipere & omnino habere pro certo imprudens.* Aliundè SS. Patres intelligunt se fallibiles esse, & errare posse singulatim sumptos; aureum de se judicium præbuit S. August: libro de dono perseverantiæ cap: 21. *Neminem, velim, sic amplecti omnia mea, ut me sequatur, nisi in iis, in quibus me non errare perspexerit; nam propterea nunc facio libros, in quibus Opuscula mea retractanda suscepi.* Hinc modum, quo Patres legerit ipse describit Epist: 19. ad Hier: *Alios ita lego, ut quantalibet sanctitate, doctrinaq; præpolleant, non ideò verum putem, quia ita senserunt ipsi, sed quia mihi vel per Auctores Canonicos, vel probabili ratione, quod*

à vero non aberrent, persuadere potuerant. Eadem vox, idem sensus Hieronymi Epist: ad Ctesiphontem. Aliter habendi sunt Apostoli, aliter reliqui Tractatores, illos semper verum dicere, istos in quibusdam ut homines errare contingit.

Dico 2. Plurium Sanctorum auctoritas, reliquis licet paucioribus reclamantibus, firma argumenta Theologo præstare non valet.

Prob: Quia multi sæpè de aliquo dogmate conveniunt SS. Patres, imo & major illorum pars, quod tamen non est de fide, quia refragantur cæteri; ergo. Prob: ant: Multi SS. Patres ut Basilus, Chrysostomus, Hieronymus, Ambrosius, Gregorius, Damascenus, & alii communiter docent, mundum & ea, quæ continet, non simul, hoc est, non in instanti, sed sex dierum spatiò fuisse producta, tamen hoc fidei dogma non est, quia oppositum tenet. S. Augustinus. Multi pariter SS. Patres Moysen in hac vita existentem Dei essentiam non vidisse tenent, nec tamen hæc illorum sententia fidei dogma est, quia contradicit S. Aug: cum Paucis aliis

aliis, & probabilis illius à multis iudicatur opinio. Ergo.

Hic tamen notandum ex Melchiorre *Cano*. Hæc equidem vera esse, sed tunc cum unius aut paucorum sententiam Ecclesia non exploſit, at ſi paucorum aut unius ſententia fuerit ab Eccleſia rejecta; tunc aliorum authoritas prævalebit, ac indubium Theologo præbebit argumentum. Exempli gratiâ rebaptizandos eſſe ab hæreticis baptizatos, docuerunt quidam Affricani & Aſiatici, quidam etiam *Melchisedech* non eſſe hominem ſed Spiritum S. tradiderunt; at cum & iſtorum, & illorum ſententia ſit rejecta ab Eccleſia, ii ſolum, qui oppoſitum ſentiunt, ſunt veritatis teſtes.

Dico 3. In expoſitione Sacrarum Literarum aut alicujus revelatæ veritatis traditione, communis omnium Sanctorum veterum intelligentia certiffimum argumentum præſtat Theologo ad Theologicas aſſertiones corroborandas.

Prob: 1. Non eſt poſſibile eos omnes ſimul errare, qui ſunt Eccleſiæ dati, ut Eccleſiam ab errore præſervarent,

alias illis errantibus erraret Ecclesia, quod est contra promissionem Christi Math: 16. *Et portæ non prævalebunt adversus eam*; atqui SS. Patres sunt ex iis, qui sunt Ecclesiæ dati, ut Ecclesiam ab errore præservarent; juxta illud Pauli ad Ephes 4. *Et ipse dedit quosdam quidem Apostolos, quosdam autem Prophetas, alios verò Evangelistas, alios autem Pastores & Doctores ad consummationem Sanctorum, in opus ministerii, in ædificationem corporis Christi, donec omnes occurramus in unitatem fidei --- Ut jam non simus parvuli, fluctuantes, & circumferamur omni ventô doctrinæ, in nequitia hominum, in astutia ad circumventionem erroris, ergo.*

Prob: 2. Hujus assertionis testes habemus ipsos Patres, qui in rebus fidei provocare consueverunt ad veterum traditionem, & arguere eos, qui ab ea discesserunt. Sic Irenæus lib: 3 adversus hæ: cap: 3. probat doctrinam Apostolorum per Successiones Episcoporum ad nos pervenisse.. Cap: 2. Hæreticos arguens objurgat eos, quod præsumant plus sapere, quam Apostoli &

eorum Successores. Clemens Alex: lib: 7. Strom: *Gloria autem tenentur desiderio, qui ea quæ ex sua natura conveniunt sermonibus divinitus inspiratis, tradita à Beatis Apostolis & Magistris, sua sponte fallaci sapientiæ simulatione, corrumpunt per alias traditiones, humanis doctrinis, resistentes Divinæ traditioni, ut hæresim constituent.* Apertius Origenes hom: 29. in Math: *Quoties autem hæretici Canonicas proferunt Scripturas, in quibus omnis Christianus consentit, & credit, videntur dicere. Ecce in Domibus est verbum veritatis. Sed nos illis credere non debemus, nec exire à prima & Ecclesiastica traditione, nec aliter credere, nisi quemadmodum per successionem Ecclesiæ Dei tradiderunt nobis.* S. Athan: Epist: ad Affros, ubi vocem *homousion* qua Arianam hæresim jugularunt, dicit Nicænos Patres non temerè excogitasse, sed à Patribus accepisse: *Episcopi non sibi metipsis adinvenientes verba, sed habentes ea à Patribus testimonia conscripserunt.* Hieronymus in cap: 11. Daniel. *Imperitissimos vocat, qui Scripturæ sanctæ intelligentiam, absq; Dei gratia & doctrina Majorum sibi vel maximè vendi-*

cant. S. August: lib: 2. contra Julianum argumenta Pelagianorum convellit auctoritate Patrum *Irenæi, Cypriani, Reticii, Hilarii, Olimpî, Gregorii, Ambrosii, Innocentii, Joannis, Basilii, Hieronymi* quod non fecisset, si argumentum ab omnium auctoritate Patrum certum & fir-
mum non existimâset.

Hanc veritatem exemplô suo testata sunt Concilia, & Pontifices ipsi, quoties enim aliquid circa fidem occurrit determinandum, singulari diligentia præcedentium Patrum monumenta scrutari consueverunt, & ubi concordés illos invenerunt, secundum eorum sententias, definitiones protulerunt. De Concilio Nicæno mox dictum, Vocem *homousion* Patribus antiquis acceptam referri à S. *Athanasio*; atq; *Eusebius* Cæsariensis ob eandem causam se voci dicit subscripsisse, in Epist: quam refert *Theodoretus* lib: 1. Hist: cap: 12. *Quandoquidem nonnullos, inquit Eusebius, ex veteribus insignes Episcopos & disertos Scriptores, in explicanda Patris & Filii Divinitate hoc vocabulo consubstantialis, usos esse cognovimus.* In Concilio Ephesino passim, ma-
ximè

ximè Act: 1. ex relatis Patrum sententiis *Nestorius* damnatus est. Patres Concilii Chalced: Act: 1. & 4. profitentur se regulam SS. Patrum amplecti; præsertim in allocutione ad *Marcianum* Imp: 3. p. Conc: c. 1. In Concilio CPolitano II. *Sequimur autem in omnibus SS. Patres & Doctores S. Ecclesiæ DEI, id est Athanasium, Hilarium &c.* Quod repetitur in eodem Concilio Collat: 3. iisdem fere verbis cum addito: *alios sanctos & orthodoxos Patres, qui in Sancta DEI Ecclesia rectam fidem irreprehensibiliter usq; ad finem vitæ suæ prædicaverunt.* Nicæna Synodus II. contra Iconoclastas decretum edidit Act: 7. his verbis: *Sanctorum nostrorum & Divinorum Patrum doctrinæ &c.* Et infra: *Hæc est fides Apostolorum, hæc est fides Patrum.*

Merito igitur Concilium Tridentinum hisce verbis veterum Conciliorum mentem ac suam exprimens; ad còercenda petulantia ingenia decernit, ut nemo suæ prudentiæ innixus in rebus fidei & morum, ad aedificationem doctrinae Christianae pertinentium, Sacram Scripturam ad suos sensus contorquens, contra eum sensum, quem tenu-

tenuit, & tenet S. Mater Ecclesia... Aut etiam contra unanimum consensum Patrum, ipsam Scripturam Sacram interpretari audeat. Ita Sess: 4. Supponit ergo S. Mater Ecclesia infallibilem esse unanimum SS. Patrum consensum in explicanda Scriptura, ac proinde in discernenda fidei doctrina, in Scriptura vel Traditione contenta; ergo.

§. III.

Solvuntur Objectiones.

Objic: 1. S. August: negat tantam esse Patrum auctoritatem, ut illis dicentibus adhærere teneamur; ergò. *Prob. ant:* S. Doctor tum lib: 11. contra Faustum cap: 5. tum lib: 2. Contra Donatistas c. 3. & alibi soli Scripturæ Canonicae infallibilem auctoritatem tribuit, quæ autem ab aliis scripta sunt, *non cum credendi necessitate*, sed *cum judicandi libertate* legenda sunt, liberum ibi habet lector, auditorvè judicium, quò vel approbet, quod placuerit, vel improbet, &c. ergò.

Resp: dist: prob: ant: Quæ autem ab aliis seorsim spectatis &c. *conc.* simul in unum dogma conspirantibus, cum judicandi

candi libertate legenda sunt, *nego. Similiter dist: conseq:* Ponit ergò Augustinus differentiam inter Scriptores Sacros seu Canonicos & alios Doctores, quod cuilibet Sacro Scriptori seorsim & singillatim sumpto cum necessitate credendum sit, *In illa verò, ait, Canonica eminentia Sacrarum Literarum etiamsi unus Propheta, seu Apostolus, aut Evangelista aliquid in suis Literis posuisse ipsa Canonis confirmatione declaratur, non licet dubitare, quod verum sit.* Cuilibet autem S. Doctori, si unus & alter dicat, non ita credendum est, ut non liceat dubitare, quod verum sit. Non tamen loquitur S. August: de SS. Doctoribus prout summo consensu aliquod dogma tradunt, ut ab Ecclesia Catholica creditum; tunc enim traditionis testes sunt, & custodes, & fides eorum est fides Ecclesiæ, ut solidè S. Doctor probat lib: contra Epist: fundam. cap: 5. & lib: 1. contra Cresconium cap: 33. Hinc præ oculis semper habenda est regula Vincentii Lirin: in Commonitorio cap: 28. *Antiqua SS. Patrum consensio non in omnibus Divinæ legis quæstiunculis, sed solum certò præcipue in fidei regula, magno nobis*

nobis studiô investiganda est, & sequenda.

Dices: Consensus Patrum est humanum testimonium, sed nullum humanum testimonium potest facere fidem indubitatam in Divinis; ergò.

Resp: 1. dist: maj. Consensus Patrum est testimonium humanum, & doctrina, quam proponunt universi, & in qua consentiunt, non est humana, *conc:* doctrina est humana, *nego.* Licet ergò testimonium Patrum, etiam in dogmate fidei docendo, aut exponendo consentientium, humanum sit, dogma tamen quod summo consensû docent, humanum non est, sed Apostolicum & Divinum, non enim illud semper docuisset Ecclesia, nisi ab Apostolis accepisset, nec Apostoli tradidissent, nisi à Christo vel Spiritu S. edocti fuissent. Hinc.

2. Dist. maj. Consensus Patrum humanum est testimonium, quatenus Patrum est, *conc.* quatenus testimonium est fidei Ecclesiæ, *nego.* Sicut enim regia diplomata regiam authoritatem non habent, prout à Ministris sunt conscripta, sed ut mandata regia continent, & ut regio sigillô sunt obsignata; ita Patrum

trum sententiæ in ejusdem dogmatis assertionem, diversis locis atq; temporibus consentientium, illudq; ut dogma fidei proponentium, per se spectatæ testimonii humani limites, non excedunt, sed ut continent doctrinam Ecclesiæ, & ut Ecclesiæ autoritate receptæ, ac veluti sigillô obsignatæ, credendæ, sunt, non Patrum sed Apostolorum, atq; Christi doctrinam continere.

Adde ipsum SS. Patrum pro aliquo dogmate consensum unanimem à Spiritu S. procedere, ut innuit etiam Apostolus ad Ephes. 4. Cum enim ibi tractent de rebus humanum captum excedentibus, non sine protectione Spiritûs S. eaq; speciali unanimis pro dogmate consurgit consensus eorum.

Instabis: Testimonium Patrum non est ideo verum, quia ipsi dixerunt, sed quia vel ratio ab illis adducta, vel Scriptura, quam referunt, persuadet esse verum; ergo eorum testimonium non sufficit per se ad fidem Divinam ingenerandam.

Ant: patet: Alioquin testimonium Patrum à Divino non distaret; fidei enim testimonium immotum esse debet.

Resp:

Resp: dist: conseq: Ergò eorum testimonium solitariè acceptum &c. *conc:* testimonium eorum consentiens, *subdist:* per se non sufficit à priori, & tanquam causa fidei Divinæ, *conc:* non sufficit à posteriori & per modum signi, *nego.* Testimonium & consensus Patrum est tantum signum & argumentum, quo colligimus, id, quod omnes SS. Patres, ut de fide proponunt esse verè de fide, seu esse doctrinam Ecclesiæ ab Apostolis traditam, & à Christo acceptam. Rursus, consensus Patrum traditionis index est & argumentum certissimum. Scriptura verò S. docet inesse traditioni Divini testimonii pondus, & in rebus Divinis esse supremæ authoritatis, ac demum non esse accipiendam ut Verbum hominum, sed Dei.

Oppones 1. Non est certum, an opera Patrum, quæ circumferuntur, & manibus modò teruntur, revera ipsorum sint, multa enim opera quæ hujus vel illius esse credebantur, in dies ut spuria & supposititia modo respuuntur. 2. Sensus quoq; sæpius in eorum reperiuntur scriptis intricati, & implexi, ut vix
ali-

aliquis sensus extrahi possit. Sic ait *Dallæus* olim Minister Parisiensis.

Resp: ad utrumq; Etsi dubium suboriri possit, vel de aliquo vg. libro, aut hoc vel illo sensu, hoc tamen dubium supra totam collectionem cadere non potest; quid enim à veritate magis alienum, quàm de iis Operibus dubium movere, quorum Catalogum texuit provida antiquitas, iisq; ut genuina adscripsit, quorum nomina præseferunt? Si verum foret argumentum *Dallæi*, à fortiori dubitare deberet, num Orationes, Libri, Epistolæ, quæ nomine *Ciceronis* circumferuntur, genuini sint ejus fætus? At de hoc nec ipse, nec ejus gregales dubium moverunt. Adde ad Divinam providentiam hoc pertinere, ut quæ SS. Patres Ecclesiæ dedit Doctores, eorum opera omnia aut perire, aut adulterari non permittat, sicut de S. Scripturæ Libris alibi dicetur. Quod ad sensum attinet. Non omnes sensus sunt tales, quales supponit *Dallæus*, alii namq; absq; omni obscuritate mentem Scriptoris ostendunt, proindè per hos explicandi sunt intricati & implexi. Qua de causa

sa tam obscure quandoq; locuti sunt SS. Patres dicetur articulus sequi:

Objic: 2. Multa ab Ecclesia leguntur reprobata, quæ communis Patrum sensus docuit, ut necessaria ad salutem. Sic S. August: lib: de peccatorum meritis & remissionibus cap: 24. censet esse de necessitate salutis, ut parvuli baptizati sumant corpus Christi, quod & modo Orientales iis exhibent ad hæc tempora. Idem Innocentius I. in suo ad PP. Milevitano Rescripto docet; atqui tamen hoc nunquam credidit Ecclesia, sed esse rem ad meram disciplinam pertinentem tenuit; ergo.

Resp: S. August: loqui de voto Eucharistiæ, nusquam de reali susceptione patet ex his. Parvulos *nec vitam æternam posse habere præter corpus, cui ut incorporentur, Sacramento baptismatis imbuuntur.* Igitur ex S. August: dum parvulus baptizatur, corpus Christi sumit, saltem in fide & voto. Ita Trid: Sess: 24. cap: 4. *Nulla necessitate salutis, sed probabilem tantum ob causam, veteres parvulos usû rationis carentes ad communionem suscepisse.* Hoc modo explicandus est Innocentius.

Ad

*Ad Orientalium morem dico esse tantummodo de disciplina, quæ in diversis Ecclesiis, ut plurimum diversa est, à qua disciplina antea vigente, tandem abstinuit Ecclesia Latina eò quod parvuli non possint discernere corpus Christi, quam tamen dispositionem exigit Apostolus 1. Corinth: 11. Cæterum non dicimus unanimum Patrum consensum, esse inconcussam fidei regulam, nisi ipsius Ecclesiæ accedat declaratio, ut hoc dogma communi consensu traditum habeatur ut fidei articulus, quod debuisset *Dallæus* ante oculos habere.*

Objic: 3. S. Thomas 1. p. q. 1. art: 8. ad 2. ait: Utitur autem, Theologia, auctoritatibus aliorum Doctorum Ecclesiæ, quasi argumentando ex propriis, sed probabiliter. Ergo.

Resp: Intelligendum esse de auctoritate singulorum seorsim sumptorum.

Objic: 4. Difficile, imò impossibile explorando invenire omnium Patrum consensum; cum multorum nos lateant opera, & non paucorum perierunt scripta; ergo.

*Resp: Cum *Gammachæo* & aliis, ille
omni-*

omnium consensus non est mathematicè summendus, ita ut ne unius quidem defuit, sed moraliter, nempe ut sit consensus omnium circiter, & ferè omnium, eo modò, quo res morales sumi debent, ita etiam *Petronius Card:* reponit in resp. ad *Jacobum* Britanniae Regem. *Tunc unanimis Patrum consensus cumulatè probatus aestimari debet, cum singularum Nationum Eminentissimi, in alicujus rei assertione consentiunt, ita ut inter illos nemo, qui semper orthodoxus, semper orthodoxis adhæsit, dissentiat.*

Objic: 5. Hæreticus non foret, qui negaret dogma aliquod, nondum ab Ecclesia definitum, quod probaret omnium consensus Patrum, ergò.

Resp: Non esset Hæreticus ex eo præcisè quod negaret dogma unanimi Patrum consensu firmatum, at foret talis ex consequenti, illativè & præsumptive quia talis præsumeret negare infallibilitatem Ecclesiæ, quæ est de fide, & in unanimi Patrum consensu elucet, tanquam in signo. Unde licet doctrina illa, quam unanimis Patrum consensus tenet esse de fide, sit de fide non est tamen de fide Catholica,

lica, & sub pæna hæresis credenda, donec fuerit supremo Ecclesiæ judiciô finita & omnibus ad credendum proposita. Unde *Ibas* Edeffenus Episcopus, qui contra communem Patrum sententiam in sua Epistola ad Marim Persam scripsit impugnando XII. Anathematismos S. *Cyrilli* contra Nestorium non est traductus ut hæreticus à PP. Concilii Antiocheni in ejus causa habiti, quia dixit se ea scripsisse ante pacem initam cum S. *Cyrillo*, quô tempore solùm Synodum Ephesinam agnovit verè legitimam fuisse. Idem dic de *Theodoreto* Cyrensi Episcopo. Ex his.

CONSECTARIUM I.

Et si autoritas unius vel alterius ex Patribus, etiam in rebus ad fidem spectantibus, se sola non faciat argumentum infallibile, specialis tamen ratio habenda est, illorum Patrum, quos DEUS posuit, quovis sæculo in Ecclesia, ut errores ac hæreses eo tempore nascentes eliderent, sicut Arianis opposuit *Athanasium*, *Hilarium*, & alios, Pelagianis, Donatistis, Manichæis S. *Au-*

gustinum, Nestorianis S. *Cyrillum*, Euty-
chianis S. *Leonem* M. & alios Doctores
aliis hæreticis sua providentiâ opposuit.
Quapropter pro Divinitate Filii DEI
contra Arianos, quales modo sunt So-
ciniani, consulendi erunt PP. *Athanasius*,
Hilarius & alii, ut *Basilus*, *Gregorius Nyf-*
senus & *Nazianzenus*, qui causam ex
professo tractaverunt, & quorum do-
ctrinam Ecclesia Catholica amplexa est,
atq; horum authoritati magis deferen-
dum, quam eorum, qui rem solùm obi-
ter tetigerunt. Eadem ratione, quia S.
Augustinus, ut ita dicam, prius ex pro-
fesso gratiam DEI contra Pelagianos
strenuè propugnavit, ejus autoritas in
causa gratiæ plurimi est facienda, quia
quos DEUS specialiter elegit, ad alicu-
jus erroris confutationem, speciali lu-
mine illustravit, ad Catholicam verita-
tem tuendam. Hinc S. Augustini doctri-
nam, maximè dum de gratia agitur, Se-
des Apostolica summo pretiò semper
habuit. Eam à detractoribus tutatus est
Cælestinus I. in Rescripto ad Episcopos Gal-
liæ. Hormisdas etiam Epist: ad Possesso-
rem ait: *De arbitrio tamen libero & gra-*
tia

tia DEI quid Romana (Catholica) sequatur & asseueret Ecclesia, licet in variis libris Beati Augustini & maximè ad Hilarium & Prosperum possit cognosci, tamen in scriniis Ecclesiasticis expressa Capitula continentur &c. Unde Capitula à Sede Apostolica ad Concilium Arausicanum II. transmissa annò 529. sub Felice IV. & ab eo subscripta, ac in Canones redacta, quæ gratiæ necessitatem concernunt ferè omnia ex Libris S. Augustini desumpta sunt. Meritò igitur Clemens XI. suo Breui dato 28. Junii annò 1704. quod legitur apud P. Serry in Vindiciis S. Augustini, Joannis Launoii libellum Traditionem nuncupatum, quo S. Augustini nomen & auctoritatem obscurare ac elevare in iis, quæ gratiam spectant, conatus est, diris devovit, repertumq; flammis aboleri mandavit. Quem secutus Benedictus XIII. Clemens XII. Benedictus XIV. qui miris laudibus doctrinam S. Augustini & Thomæ circa præfata dogmata commendarunt.

CONSECTARIUM II.

Approbatio in genere, quâ per Ecclesiam firmantur SS. PP. & Doctorum Ecclesiæ scripta, non est definitio, sed permissio; non est definitio qua determinantur ut infallibilia, & cum obligatione sequendi ut rem fidei definitæ, sed qua solum recipiuntur, & legi permittuntur ut utilia, vera, Catholica, vel probabilia. Nam illa SS. PP. scripta, vel continent fidei dogmata, vel sunt de rebus ad fidem non spectantibus, vel quosdam nævos humano modo immixtos continent: si primum, ea approbat ut vera & Catholica; si secundum, ea solum recipit, & permittit ut probabilia; si tertium, ea nec approbat, nec recipit, sed excipit, ut constat de multis à Gelasio Pont. exceptis in Concilio Rom. 70. Episcop: Cap. S. *Romana* dist: 15. Aut si non excipit, ideo non excipit, quia nondum satis constat, id, quod continent, contra fidem esse, & aliundè aliquid probabilitatis habet. Unde est, quod licet pugnantia interdum loquantur SS. Patres, & neget

unus

unus, quod alter affirmat; & utriusq; scripta approbet Ecclesia, non sequitur, quod pugnancia & contradictoria approbet, quia utriusq; approbat, quando approbat scripta, solum ut probabilia; duo autem probabilia ut talia, nec opposita sunt, nec contradictoria. Attamen in SS. PP. scriptis legendis duo periculosi scopuli permaximè vitandi sunt, nimirum, ne morosi eorum Censores simus, nec nimii assentatores. Legamus SS. Patres, Magistros nostros, cum reverentia, sed ut homines cum delectu & iudicio, alioquin non Sanctorum religione sed sui ipsius amore legens capitur, & sub veterum nomine novas opinationes invehere conabimur; ait *Melchior Canus*.



ARTICULUS III.

Regulæ nonnullæ in legendis SS. Patribus observandæ.

I. **U**T Lector diligenter attendat, quando hoc est, quò sæculò scripserit ille, cujus scripta legit, S. Ecclesiæ

clesiæ Pater, hoc enim observato, deprehendet non in hæresim lapsum, quem ut hæreticum traducere solent, Patrum olores. Sic vg. *Papianum* & *Justinum Irenæum* etsi fabulosam & hæreticam hodie de Millenario Christi in terris regno, sententiam secutos, minime hæreticos fuisse comperiet, cum illo tempore dum ipsi vixerunt, nempe *Papias* initio Sæc. II. *Justinus* medio II. *Irenæus* in fine II. sæculi, sententia illa non fuerit ut hæretica proscripta. Sic pariter *S. Cyprianus* hæreticus non fuit, docens errorem rebaptismi, nec *S. Augustinus*, quamvis animam ex traduce fieri censuit, & sic de aliis.

II. Lector observet scribentis ætatem, an videlicet juvenis esset, dum scriberet, an in virili ætate, an senili? *Experientiâ* constat unum eundemq; de eadem re judicare aliter, ut juvenem, aliter maturius re considerata, ut Senem. Hujus rei testes sunt gravissimi duo *Retractionum* libri *S. Augustini* quos ante mortem scripsit, in quibus jam senex multa retractat, quæ junior incautè protulit; unde notum illud

Iud. V. Bellarmini: *Quam aliter sapiat Augustinus Senex, quam Augustinus juvenis.*

III. Ut ad scribendi causam & occasionem attendat, hoc est advertat, contra quos, & quâ occasione scripserint SS. Patres, ut genuinum illorum attingat sensum, sic S. Hilarius non errasse videbit, dum 10. libro de Trinitate Christum Dominum omnis doloris, sensûs expertem fuisse, ac proinde nullum sensisse dolorem asseruit; advertat S. Doctorem scribere contra Arianos, Christum DEUM esse negantes, hinc intelliget Hilarius loqui de Christo non ratione humanitatis passibilis & mortalis, sed ratione Divinitatis impassibilis. Generaliter dum SS. Patres aliquod falsum dogma impugnant, videntur in alteram partem erroneam deflectere, quod reipsa non est, sic S. Dionysius Alexand: dùm Sabellium oppugnaret, accusatus est, quod dixerit, Filium Dei creaturam, à qua erroris labe se purgat in Apologetica, ad S. Dionysium Rom: Pont: Sic immeritò à multis S. Cyrillus Alexand: accusatus Apol.

Apollinarismi, in anathematismis contra Nestorium. Plura hujus rei exempla habes in Tract: de Ss. TRINITATE circa modos loquendi Patrum contra Arianos.

IV. Lector Advertat *quomodo?* An per modum concionantis, vel per modum Viri simpliciter loquentis doceant Patres; quia ut observat *Vincentius Lirin:* Verba à Ss. Patribus concionando prolata, non sunt semper in rigore intelligenda, sed aliquando ex zelo quodam & hyperbolicè dicta. Sic v.g. dum *S. Chrysostomus* concionando hortatur populum ad assiduam S. Scripturæ lectionem, non est censendus voluisse, sicut perperam putant moderni Novatores, ut omnes indiscriminatim, indocti & instabiles, rudes & ignaræ mulierculæ Divinæ Scripturæ vacarent, sub pæna salutis. Alloquitur enim multitudinem theatris, scenis, spectaculis intentam, & Divinarum Scripturarum insciam, idq; ægro ferens animò, vehementi concionantis zelo raptus, ut illos ab illis averteret fabulis, cæterisq; malorum peri-

periculis, ad Divinam scripturam legendam hortatur omnes, legendam scilicet à doctis & peritis, audiendam verò à rudibus & indoctis; vel si legendam, adhibitis cautionibus; & ex debita licentia.

V. Si Lector dura vel jam antiquata Patrum dicta reperiatur. 1. caveat, ne corrigat, nec mutet. 2. neq; etiam in usum trahat. 3. benigne interprete-
tur, reverenterq; exponat. Non mutet dico, quia hoc est Patres docere, non interrogare; nec in usum trahat, quia ad tollendum erroris periculum Ecclesia dicta hujusmodi jam antiquata, non usurpat, quamvis à S. Viris olim benè usurpata. Sic v.g. etsi ante ortam hæresim Nestorianam dicatur à Patri-
bus Christus *Homo Dominicus*, aut *Dei-
jer*, *Templum Dei* non est modo, hæc usurpanda locutio, in sensu quidem Ss. Patrum Catholica, sed per fraudem ad tegendum errorem suspecta usurpata ab hæreticis, ne cum hæreticis loqui videamur. Similiter de aliis locutionibus, ut quando Eucharistia dicitur figura Corporis Christi à S. *Basilio*, hoc
non

non servit modernis Calvinistis, qui hunc loquendi modum usurpant, ad suum errorem defendendum, alio enim sensû locutus est *Basilius*, aliô loquuntur Sacramentarii.

VI. Si quid sit obscurum, vel fidei non satis congruum inveniat, in aliquo Patris textu, explicet per ea, quæ clarius dixit in alio loco, sic vg. si quis perperam credat *S. Chrysostomum* Hom: 14. in Joan: possibilitatem DEI visionis negare, dum super illud Joannis: *DEUM nemo vidit unquam* ait: *Nam id: quod est DEUS non modo Prophetæ, non viderunt, sed neq; Angeli*, facile intelliget eum non de visione intuitiva, sed comprehensiva loqui, ex iis, quæ dicit in paranæsi ad Theodorum lapsum cap: 7. exponens illud Petri: *Bonum est nos hic esse*, ait: *Quid dicemus quando regis cubiculis adaperitis intueri licebit ipsum Regem, non per speculum, nec: per ænigma, sed facie ad faciem &c.*

VII. In interpretandis SS. Patrum scriptis, non tam ad verba; quam id sensum attendat Lector, ut docet *S. Hieronymus* Epist 101. ad *Pammachium*.

VIII. Si duos aut plures Patres opposita sentire videat, ita ut unus neget, quod alter affirmat, neutrum damnet, sed Dei providentiam adoret, quæ eos inter se opponi forte finit, ut sic ex oppositarum opinionum conflictu eruatur & elucescat veritas. Sic olim *Paulus* restitit *Petro*, *Polycarpus* *Aniceto*, *Cyprianus* *Stephano*, *Augustinus* *Hieronimo*, & multoties alibi Sanctus Sancto. Insuper non incongruum erit, ad dignoscendas in scriptis Veterum methaphoras, adnotare regulas. Quarum.

I. Cum æquè simplici ac methaphoricò sermone res eadem facilè exprimi potest, locutiones simplices frequentius, methaphoricæ rariùs usurpantur. Quippe cùm ad ea, quæ naturæ ac veritati magis accomodata sunt, & consona, ut plurimum homines ferantur.

II. Prolixam orationem, quæ rem eandem similibus locutionibus sæpius inculcat, methaphoricam esse nemo jure dixerit. Cum enim aliquo sensû falsa sit; alias ænigmatica, & ad fallendos

dos auditores vel lectores composita esset oratio. Cum itaq; Patres diu in eis locutionibus perseverent, quibus Eucharistiam esse corpus Christi, vel orationes Ecclesiæ Fidelibus defunctis utiles esse ad levamen & solatium, vel dogma aliquod hujusmodi ex controversiis inter Protestantes & Romanam Ecclesiam asserunt, & secundum nos pronuntiant; cumq; eas locutiones urgeant & inculcent, illisq; multas quandoq; impleant paginas, absurdum est, & insulsum respondere, ut Protestantes respondent, Patres illis in locis methaphoricè locutos. Certè si sumatur in manus Homilia 24. S. Joannis Chrysoستي in Epist: 1. ad Corinth: & absq; partium studio legatur, evidens erit ipsum methaphoricè non loqui, cum Eucharistiam corpus & sanguinem Christi tota fere Homiliâ vocat, eoq; sensu de illa loquitur, non raptim & obiter, sed ex proposito, data operâ, diu, prolixè, luculenter, ut Fideles ad Eucharistiam dignè suscipiendam adhortetur. Virum sanè suæ ætatis eloquentissimum tam proluxa & impor-

importuna methaphora orationem suam consultò obscurasse, ut auditores, lectoresq; suos falleret potius quam doceret, nemo sanæ mentis dixerit.

III. In probandis locutionibus methaphoricis Authores non laborant; cum enim propter seipsas in oratione non ponantur; sed simplicium vocum, & locutionum loco & vice, proprio in sensu falsæ sunt, & in alio duntaxat sensu à propria significatione remoto sunt veræ: adeoq; nemo probationem illarum affert secundum sensum proprium proximumq; cujus nimis comperta falsitas est, quam ut eum verum esse quis probare velit. Itaq; si Patres assertiones de dogmatibus inter nos & Protestantes controversis suas probent, sicut vg. mutationem panis & vini, in corpus & sanguinem Christi probant ex aliis miraculis, quæ DEUS in Veteri Novoq; Testamento operatus est, & præcipue ex verbis Christi dicentis: *Hoc est Corpus meum; Hic est Sanguis meus qui pro vobis effundetur*: Argumentò est, illorum locutiones methaphoricas non esse.

IV. Methaphoræ dubitationis & admirationis ansam non præbent; quia Methaphoricas locutiones ad literam non esse intelligendas est exploratum. Sic si dicatur. Benjamin est lupus rapax, Christus est Leo de Tribu Juda, septem vaccæ erant septem anni, Sanguis victimarum erat Testamentum & fædus; nemo dubitat, nemo miratur, quærit nemo, qua ratione hæc fieri possint. Fidem hæc propositiones superare videntur nemini. Itaq; si Patres dubitandi, & obstupescendi locum esse innuant, cum aliquod controversorum inter nos & Protestantes dogmatum asserunt & docent, ut illud credimus, vg. si asserendo panem esse corpus Christi, admirationi locum esse testentur, & quærant; *Quomodo, quod video, corpus Christi est?* Si Fideles contra hujusmodi dubia munire satagant, illisq; persuadere, ut verbo DEI (sicut par est) potius credant, quam sensibus: argumento est illos methaphorice his in locis locutos non esse.

V. In omni orationis genere methaphoræ non adhibentur. Sermo simplex, historicus, dogmaticus & familiaris me-

tha-

thaphoras nescit. Igitur si Patres in expositione literali Scripturæ Sacræ, in familiaribus Homiliis, catecheticis Orationibus aliquod dogma eorum, quæ hodie inter nos & Protestantes controversantur, asserant, sicut S. Cyrillus Jerosolym. in Catechesibus, S. Gregorius Nyssenus in Oratione catechetica, S. Augustinus in lib. de Fide & Symb. in Sermonibus ad Competentes, & ad recens baptizatos, S. Ambrosius libro de Initiandis & de Sacram. & generatim Patres omnes cum Scripturæ sacræ loca, quibus hodiernæ controversiæ nituntur, simpliciter exponunt; constat eos methaphoricè non loqui.

VI. Ineptum esset uti methaphoris, dum sermo coram auditoribus habetur, à quibus intelligi illas non posse verisimile est: aut saltem iis in casibus exponendæ sunt. Nam lex societatis jubet verba nos adhibere, quibus mentem nostram aperiamus: lex charitatis imperat; ne quos docere volumus, eos verbis obscuris, & quorum sensum assequi non possint, ducamus in errorem. Quoties itaq; Patres de mysteriis religionis

nostræ ad Ethnicos scribunt; vel Catechumenis aut Neophytis coram loquuntur, qui figuratas de rebus sacris locutiones intelligere non possunt, utpotè locutionibus adeo à communi usu remotis non assueti, certum est ea, quæ de Christianæ religionis dogmatibus, vel Sacramentis dicunt non esse methaphoricè intelligenda; vg. hæc S. Justinii verba in Apologia ad Antoninum Imperatorem methaphorico sensu accipere summæ vecordiæ est: *Non enim ut communem panem, neq; ut communem potum ista sumimus: sed quemadmodum per Verbum DEI carofactus JESUS Christus Salvator noster, & carnem & sanguinem salutis nostræ causa habuit: ad eundem modum etiam eam alimoniam in qua per preces Verbi ejus ab ipso profecti gratiæ sunt actæ, unde Sanguis & caro nostra per mutationem aluntur, Incarnati illius JESU carnem & sanguinem esse edocti sumus.* Certe cum Ethnicis Imperatoribus exponere simpliciter vellet S. Justinus, quid esset Eucharistia, ineptum est fingere, quod methaphoricè locutus sit, & id unum significare in animo habuerit verbis laudatis panem &

& vinum verbo DEI sanctificata signum esse merum Corporis & Sanguinis Christi, vel figuram Corporis & Sanguinis Christi repletam & sæcundatam: Verba enim laudata tam insolentem sensum, tamq; à nativa sua significatione alienum, Ethnicorum Principum mentibus non ingenerassent.



DISSERTATIO VI.

DE SPE



Nomine spei venit quandoq; in Scripturis sacris bonum, quod speratur, juxta illud ad Titum 3. *Exspectantes beatam spem*, id est bonum illud obtinendum post hanc vitam. Nonnunquam ille, à quo bonum illud exspectamus, juxta illud Psal. 30. *Tu es Domine spes mea*. Aliquando & magis propriè virtus, quâ aliquid à DEO exspectamus. Igitur.

Qq

AR-

ARTICULUS I.

Quid est spes, quod ejus objectum?

Spes generaliter sumpta est motus appetitivæ partis in bonum futurum arduum, seu difficile, possibile tamen adeptu. Dicitur bonum, quia propriè loquendo spes solum est de bono, & per hoc differt a timore, qui est de malo. Futurum non enim est spes de præsentis jam habito, per hoc differt à gaudio. Arduum, id est difficile adeptu, non enim quis dicitur sperare, quod statim est in sua potestate, si velit, ut habeatur, per hoc differt à cupiditate vel desiderio, quod est de bono futuro simpliciter. Unde desiderium pertinet ad appetitum concupiscibilem, spes ad irascibilem. Possibile adeptu, nemo enim sperat id, quod adipisci omnino non potest, & per hoc spes fecernitur à desperatione. At hic specialiter de spe, quæ Theologica dicitur agimus. Porro spes Theologica, est virtus divinitus animo infusa Theologica, per quam certa cum fiducia æternæ vitæ bona auxiliò Divinò obtinenda exspectamus.

Vir-

Virtus divinitus animo infusa, hoc est supernaturalis, quia sicut nullus in DEUM credere, sic nec in illum sperare potest, ut oportet, nisi adjutus auxiliô aliquô supernaturali. Unde S. Bernardus in Psal: 90. dicit: hæc Psalmistæ verba; *quoniam tu es Domine spes mea*, à nullo verè proferri posse, nisi cui intus persuasum sit à Spiritu S. Theologica quia DEUM immediatè respicit pro objecto primario & præcipuo. *Per quam certa cum fiducia* &c. hoc est æternam beatitudinem, & omnia alia quæcunq; bona salutaria, ad æternam beatitudinem consequendam necessaria & utilia, sive corporalia sive spiritualia sunt, quod constat ex iis, quæ Christus D. nos à DEO postulare, & proinde sperare docuit in Oratione Dominica; *Ea siquidem* ut loquitur S. August. cap. 114. *Ench. ad spem pertinent, quæ in Oratione Dominica continentur*, sed non ex æquo, nam beatitudo æterna primariô modô, alia autem, quæ ad illam conducunt, secundariô. Additur cum *fiducia certa*; spes enim omnipotentiâ & fidelitate DEI promittentis innititur. Unde Hebr. 6. vocat Apost. spem an-

choram animæ firmam ac tutam. Quamvis autem fiducia illa (quod bene notandum contra modernos præsumptuosos Novatores) quatenus DEUM respicit, certissima esse debeat, quia tamen ex parte nostræ cooperationis multi defectus accidere possunt, & reipsa sæpè accidunt, quibus Divinarum promissionum effectus impediatur, ideo monet Apost. ad Philipen. 2. ut cum metu & tremore salutem nostram operemur; qui enim sperat ait S. Aug. Serm. 15. ad Fratres in eremo, & non timet, negligens est, qui autem timet, & non sperat, depressus est, & descendit in profundum quasi lapis, de quo infra. Dicitur auxiliò Divinò, quamvis enim ex parte quoq; nostra ad ascensionem vitæ æternæ merita requirantur, quia tamen sine Divina gratia, quæ per Christi merita nobis confertur, nihil possumus & volumus, & in iis quæ possumus & volumus, longe potiores sunt partes gratiæ Divinæ, quam voluntatis humanæ, ideo absit, ut Christianus in seipso vel confidat vel gloriatur inquit Conc. Trid. sess. 6. c. 16. & non in Domino, cuius

jus tanta est erga homines bonitas, ut eorum velit esse merita, quæ sunt ipsius dona.

Adverte. Bona illa expectari & sperari ab homine fideli, quia juxta communem S. Thomæ & aliorum Theologorum doctrinam, fides spem necessario antecedit, cum nonnisi per fidem innotescat id, quod spes à DEO expectare debet.

Ex his intelligi potest, quodnam sit objectum illius virtutis, sive materiale, sive formale. Primum enim continet ea omnia bona, quæ nobis promissa sunt à DEO, qui est summum & præcipuum bonum nobis promissum. Alterum verò est summa DEI erga nos bonitas omnipotens, ac in promissis adimplendis fidelitas, sive ut S. Thomas quæst. unica de Spe art. 1. est omnipotentia auxilians, id est præbens aut offerens auxilia: *Spes adipiscendi vitam æternam habet duo objecta, scilicet vitam æternam, quam quis sperat, & auxilium Divinum à quo sperat.* Porro per auxilium Divinum, noli intelligere auxilium creatum, & in homine receptum, sed ipsam omnipotentiam auxiliantem, quia objectum

virtutis Theologicæ, qualis est spes, debet esse aliquid Divinum & increatum.

Petes 1. An licitum sit spem in homine, aut alia creatura ponere?

Resp. cum S. Thoma 2. 2. q. 17. art. 4. Quanquam in DEO solo ut causa principali totius boni spes collocanda sit; licitum tamen est in homine aliaq; creatura sperare & confidere, tanquam causa secunda & instrumentali, per quam secundum providentiæ Divinæ ordinem adjuvari possumus ad consequendum aliquod bonum, quod ad ultimum & summum bonum ordinatur. Hoc modo Catholico salutamus B. V. MARIAM: *Vita, dulcedo, & spes nostra salve. Quia sic est voluntas ejus, qui totum nos habere voluit per MARIAM.* S. Bern.

Hinc sequitur licitum esse etiam in propriis meritis aliquam spem ponere ex gratia DEI factis, ut causis instrumentalibus, quandoquidem sunt media à DEO ad salutem ordinata, dummodo tota fiducia refundatur ultimatè in DEUM ut gratiæ & meritorum Authorem, ut sic sit spes ordinata.

Petes 2. Utrum alteri sperare salutem sit actus spei?

Resp:

Resp: Suppositâ unione amoris, quô bonum alterius, quasi suum reputat, potest sperare alteri salutem æternam. Sicut enim eadem est virtus charitatis, qua quis diligit DEUM, seipsum & proximum, ita eadem est virtus spei, quâ quis sperat sibi & alteri. Neq; ex hoc sequitur, velle alteri bonum esse actum charitatis, non spei; Nam velle alteri bonum & charitatis & spei actus est, charitatis quidem, ut est bonum simpliciter, spei vero ut est arduum & difficile adeptû.



ARTICULUS II.

De subjecto spei.

Cûm virtus in ea resideat potentia, quæ ejus attingit objectum, & illud habet pro fine, ut ait S. Thomas q. 18. art: 1. spes verò respicit bonum infinitum ut aliquando possidendum, sequitur spem voluntati inesse, tanquam subjecto immediato, quod subjectum quo dici solet. Hoc præsupposito agimus hic de subjecto quod dicto.

Dico

Dico 1. Spes Theologica 1. non fuit in Christo inter hominēs degente, 2. nec est in Beatis. 3. Non in damnatis. 4. Non in hæreticis.

*Prob: 1. pars. Spes non fuit in Christo, quia Christus etiam protunc fuit Comprehenfor, cum comprehensione autem sive, quod idem est, cum clara DEI visione stare non potest spes juxta illud Rom: 8. *Quod videt quis, quid sperat.* Hinc si, quid speravit, non fuit beatitudo animæ, sed corporis solum, juxta illud Hebr: 8. *Propositio sibi gaudiō... sustinuit crucem confusione contemptā.* Quocirca Christus beatitudinem corporis, nominis exaltationem, & alia similia non speravit spe Theologica, sed motū quodam affectivō, qui ad spem reduci potest. Hinc ait S. Thomas hic q. 18. art: 2. ad 1. *Christus etsi esset comprehensor, & per consequens beatus, quantum ad Divinam fruitionem; erat tamen simul viator, quantum ad passibilitatem naturæ, quam adhuc gerebat, & ideo gloriam impassibilitatis & immortalitatis sperare potuit, non tamen ita, quod haberet virtutem spei, quæ non respicit gloriam corporis sicut principale obje-**

objectum, sed potius fruitionem Divinam.

Prob: 2. pars. Spes in Beatis non reperitur propter eandem rationem. Quia ergo bonum arduum possibile non cadit sub ratione spei, nisi secundum quod est futurum, ideo beatitudo cum jam non fuerit futura, sed præsens, non potest ibi esse virtus spei. Et ideo spes sicut & fides evacuatur in patria, & neutrum eorum in Beatis esse potest, ait S. Thomas hic cit: quæst: art: 3.

Prob: 3. pars. Ex S. Thoma hic art: 3. Qui pænis æternis addicti sunt in peccatorum vindictam, nullam habent spem, sin minus eorum pænæ non forent æternæ; atqui est de fide damnatorum pænas esse æternas; ergo nulla in illis spes salutis affulget, maximè cum ex inferno nulla sit redemptio.

Prob: 4. pars. Neq; spes Theologica adjacet hæreticis; hæc enim ad fidem consequitur, cum ipsa fides ostendat bonum æternum & infinitum possidendum; sed deest fides Theologica in hæreticis; ergo & spes. Fides quippe est fundamentum spei, quò submotò corruat spes, cui superstruitur, oportet. Habent tamen spem aliquàm hæretici, si-
qui-

quidem gratiis sufficientibus non privantur, & possunt converti. Ista spes innixa Divino auxilio & motivo, reduci potest ad spem Theologicam.

Dico 2. Spes Theologica est in Fidelibus Viatoribus & animabus in purgatorio detentis.

Prob: 1. Spes Theologica est in justis omnibus, tam in Viatoribus, quam purgatorio conclusis, cum sint in charitate, adeoque filii, igitur & hæredes, & spem in jure filiationis fundatam habent. Aliunde in animabus purgantibus securitas obtinendæ beatitudinis non impedit exercitium spei, eò quod adhuc beatitudo absens est, & futura & ardua est, cum solum post severam atrocemque expiationem, ac pænarum solutionem obtineri debeat.

2. Spes remanet in fidelibus peccatoribus. 1. Quia habent fidem, igitur & spem. 2. Peccatum mortale etsi immediate gratiæ oppositum sit, non tamen extinguit spem, etsi eam sicut & fidem plurimum extenuet. 3. Injunguntur peccatori omnia mandata observanda, ad hoc autem requiritur spes, tenetur enim

Chri-

Christianus aliarum virtutum exercere actus, ut pœnitentiæ, misericordiæ &c. Sed hos actus seclusa spe, homo lapsus non potest elicere, sicut nec graves superare tentationes, quæ spe veniæ propelluntur; ergo.

Petes 1. Quid? si cui suæ damnationis fieret revelatio?

Resp: Imo & talis in DEUM, adhuc sperare deberet, quamdiu enim homo viator est, etiamsi animam ageret, posset tamen pœnitere de peccatis & sperare in DEUM, ut de bono legitur latrone. S. Thomas de ejusmodi revelatione sic loquitur q. 23. de Verit: a. 8. ad 2. *Si alicui talis revelatio fieret, deberet intelligi non secundum modum prophetiæ, prædestinationis vel præscientiæ, sed per modum prophetiæ comminationis, quæ intelligitur suppositâ conditione meritorum, scilicet malorum.*

Petes 2. Quam certitudinem habet spes?

Resp: Ut jam dictum, spes Theologica secundum se habet certitudinem absolutam, respectû verò nostri, solum conditionatam. Primam part: S. Thomas jam cit: q. 18. a. 4. ex professo probat

bat authoritate Apost: 2. ad Tim: 1. *Scio cui credidi & certus sum, quia potens est depositum meum servare.* Audis certitudinem spei omnipotentiae Dei inniti; ergo ex hac parte certissima est. Altera S. D. ratio est; quod eadem est certitudo spei ac fidei, in ista quippe velut in radice fundatur. *Sic etiam, ait, spes certitudinaliter tendit in suum finem quasi participans certitudinem à fide, quae est in vi cognoscitiva.* Ulterius sic suadetur: Eadem est tendentia voluntatis in bonum, ac intellectus, qui illud idem bonum, sub ratione veri respicit; *nihil enim volitum aut amatum, quin praecognitum;* sed intellectus fidei lumine irradiatus tendit in DEUM ut verum; ergo & eodem modo voluntas spe instructa & accincta ad eundem uti possidendum inclinatur.

Altera pars pariter in Scriptura continetur & nobis inculcatur saepius, videlicet spem ex parte nostra non habere certitudinem absolutam Ecclesi: 9. *Omnia in futurum servantur incerta* 1. Corinth 10. *Qui se existimat stare, videat, ne cadat.* 2. Petri 1. *Satagite, ut per bona opera, certam vestram vocationem, & electionem faciatis.*

Nam

Nam prout spes humanæ hæret voluntati, eam timor comitatur. Quapropter erigere animos, ut firmiter sperent, debemus, Divinam spectantes misericordiam, quæ non confundit sperantes in se, at nostræ conscii infirmitatis timere debemus, ne ob latentem aliquam in sinu cordis nostri maculam indigni misericordia simus. *Debet profectò, non solum in spe esse securitas, sed etiam timor in conversatione, ut & illa certantes foveat, & iste torpentes pungat.* Hinc S. Aug: lib: toto de Correp: & gratia adhortatur, ut flagellis & pænis corripiantur inquieti, & obdurati, ut ad meliorem redeant frugem.

Ratio Suffragatur. Vita æterna ea solum conditione promittitur, si serventur mandata juxta illud Math: 19. Si vis ad vitam ingredi, serva mandata. Hinc laudatus mox August: in Psal: 99. hæc eloquitur: Tam certus esse debes de requie, de felicitate, de æternitate, de immortalitate, si feceris præcepta DEI; quam certus esse de interitu, de ardore ignis æterni, de damnatione cum Diabolo, si contempseris præcepta ejus.

Dices

Dices cum præsumptuosis: Spem etiam ex parte nostra certissimam esse, nulla hypothefi suppositâ clamat Ecclesiasticus c. 2. Qui timetis Dominum credite illi, & non evacuabitur merces vestra. Rursus Psalmista Psal: 27. In te speraverunt Patres nostri, & non sunt confusi; ergo, inferunt, omnem prædestinatum de sua salute certissimum esse.

Resp: dist: Non evacuabitur merces, nec erit confusio in Deum sperantibus, si adsint bona opera, quæ supponuntur, conc. sin minus, nego ant: & conseq. Nam nemo etsi habere videatur opera bona scire potest, utrum amore an odio dignus sit. Hinc Concil: Trid: adversus obstrepentes Lutheranos & Calvinistas definivit neminem quantumvis justum quandiu viator est, habere physicam de sua salute certitudinem. Sess: 6. can: 15. Si quis dixerit hominem venatum, & justificatum teneri ex fide ad credendum, se certò esse in numero prædestinatorum, anathema sit. Merito ergò dixit S. Aug: lib: de Correp: & gratia cap: 13. Quis ex multitudine fidelium, quamdiu in hac mortalitate vivitur, in numero prædestinatorum

rum se esse præsumat? Quia id occultari opus est in hoc loco, ubi sic cavenda est elatio.

Petes 3. Qualis in peccatoribus spes, cum ipsi destituti sint charitate?

Resp: Esse spem informem, hoc est charitate non formatam, quæ etiam est vera virtus, etsi imperfecta, quia & peccator potest sperare DEUM ejus auxiliô possidendum, imo tenetur ex præcepto: Spera in DEO & ipse faciet Psal: 36. Spe salvi facti sumus Rom: 8. Omnis qui habet hanc spem, in eo sanctificat se I. Joan: 3. Quod autem sit virtus imperfecta patet, quia non habet charitatem adjunctam. Nec tamen peccator sperat se obtenturum beatitudinem sine charitate; hoc enim foret damnabilis & perniciofa præsumptio, sed sperat saltem implicate consequi remissionem peccatorum, & ita charitatem obtinere, atq; per eam vitam consequi æternam. Quod Synodus Trid: sess: 6. cap: 6. sic explicat: Disponuntur autem ad ipsam justitiam, dum excitati (peccatores) Divina gratia, & adjuti, fidem ex auditu concipientes liberè moventur in DEUM - - -

Et

Et dum peccatores se esse intelligentes, à Divinae justitiæ timore, quò utiliter concutiuntur, ad considerandam DEI misericordiam se convertendo in spem eriguntur, fidentes DEUM per Christum sibi propitium fore.

Non modo eliciendi sunt spei actus ad donum justificationis virtute meritum Christi assequendum, verum etiam urget præceptum Divinum peculiare, quod spei actus absolute, dato tempore, jubet, imperatq: Nam opinio contraria proscripta est ab Alexandro VII. in hac propositione: *Homo nullo unquam vitæ suæ tempore tenetur elicere auctus fidei, spei, & charitatis ex vi præceptorum ad eas virtutes pertinentium. Igitur.*

Petes 4. Quò tempore urget huius mandati observatio?

Resp: Cum peregrini simus in hac vita, alteram civitatem, nempe cælestem inquirentes, illam expectare, illuc aspirare, sine intermissione deberemus, ut dicitur Oseæ 12. Spera in DEO tuo semper, nihilo tamen secius, hanc continuam actuum spei repetitionem præceptum non jubet, connitendum utiq;
nobis

nobis est, ut Christo semper hæreat anima nostra, illum credat, speret, ametq; At quia jugum suave est, hi continui actus liberæ sunt perfectionis, non legis devincientis.

Communis & vera sententia est, quæ sub primo rationis splendentis dilucuto præceptum *spei* per se omnes obligare docet cum S. Thoma hic 22. q. 22. art: 1. Tunc enim homo permaximè debet DEUM ut hæreditatem possidendam cupere, & sperare, illumq; ut finem ultimum colere, & postea frequenter repeti *spei* actus debent, nec exercitium ejus longè differendum. Et sicut sub vitæ rationalis initium, sic instante ejusdem vitæ terminò *per se* obligat mandatum hoc. Pariter urgente desperationis gravi periculò, actus *spei*, quò periculum illud declinetur, necessarius est.

Per accidens 1. Obligat præceptum istud, dum pænitentia peragenda est, neq; enim conteri quis de peccatis suis valet, nisi remittenda sibi peccata à Divina misericordia confidat. 2. Cum actus *spei* necessarius est, ad vincendas

tentationes contra alias virtutes, tunc præceptum per accidens obligat. 3. Quando urgent præcepta dilectionis DEI & Orationis, quæ impleri non possunt absq; gloriæ Divinæ confidentia. Et ideo tanta est inter ejusmodi præcepta conjunctio, ut cum unum impletur, alterum quoq; observetur. Hoc autem discrimen inter obligationem *per se* & obligationem *per accidens*. Nam quando præceptum obligat *per se* illius omissio peccatum peculiare est; secus si solum per accidens obligat. Quapropter, qui pænitendi præceptum violat, peccat contra virtutem pænitentiae, non contra virtutem spei.



ARTICULUS III.

De timore spei dote.

Spes inter duo incedit extrema, nimirum desperationem & præsumptionem; Primi extremi, defectus in eo situs est, quod aliquis existimet graviora esse sua peccata, quam ut veniam obtinere queat juxta illud Ephes: 4.

Qui

Qui desperantes semetipsos tradiderunt impuditiæ, in operationem immunditiæ. Præsumptio verò in eo posita est, quod quis credat, tametsi non sit sollicitus de mediis assumendis, habiturum vitam æternam. At spes etiam quibusdam gaudet dotibus, quibus ad salutem via sternitur, inter cæteras eminet timor.

§ I.

Quadruplex timor explicatur.

Timor in amplo significato definiri solet *fuga mali ardui futuri, quod non potest facile vitari*, ex S. Thoma 1. 2. q. 42. art. 3. Dicitur *fuga mali ardui*, eò quòd parva mala timorem non incutiant; & additur *futuri*, nempe proximè imminentis. *Quod non potest facile vitari*; nam si facile vitari potest, injicere non valet viro forti timorem. Hinc facile colligis 1. quod timor duplex spectat objectum, nempe ipsum malum, quod refugit, & causam, quæ malum minatur, estq; infligere parata; sicut spes itidem duplex respicit objectum, videlicet bonum arduum, quod assequi confidit, & auxilium, vi cuius illud re assequatur.

2. DEUM objectum esse timoris non quatenus bonus est, sed quatenus malum infligere potest. Quare non solum malum pænæ, sed ipse DEUS, qui pænam imponere valet a timore inspicitur. Hac ratione peccatum non est timoris objectum, quod facile vitari possit, utpotè nostræ subjectum voluntati; accedit quod malum, quod timor refugit, terribile est, ut ait S. Thomas hic 144. a. 2. quod autem terribile est à causa superiori proficiscitur, causa autem peccati intra nos est.

Celebris ergo partitio est timoris *in filialem, initialem, servilem & mundanum*. Partitionis hujus S. D. hanc assignat rationem. Si homo a DEO propter malum, quod timet recedit, *mundanus* timor appellatur; quippe tum magis mundus, quam DEUS diligitur. Ideo enim quis a DEO recedit, ejusq; mandata infringit, nè malum, videlicet jacturam bonorum temporalium subeat. Si homo ad DEUM convertitur formidine pænæ sibi infligendæ, *servilis* timor dicitur. Postremo si ad DEUM accedimus culpæ horrore perciti & Divinæ majestatis reve-

ren-

rentiâ excitati *filialis* timor nuncupatur. Filiorum siquidem est Patris offensam perhorrescere, eamq; ob hanc rationem cavere. Lex vetus, timore, veluti primario cardine vertebatur, Lex Evangelica amoris & dilectionis fœdus est: *Non accepistis Spiritum servitutis iterum in timore, sed accepistis Spiritum adoptionis filiorum, in quo clamamus Abba (Pater)* Rom: 8. Deniq; si ob utrumq; malum, culpæ scilicet, & pænæ Deo jungimur, vocatur timor *initialis* qui medium locum, servilem inter & filialem tenet. Incipientium enim & imperfectorum proprius est, viamq; aperit ad filialem, qui perfectis in sanctitate animabus convenit.

Timor initialis & filialis præcisè non differunt, sed solum tanquam imperfectum & perfectum distinguuntur. Timor filialis non timet culpam ut pœnam, sicut timor servilis, sed eam timet, prout inducit separationem a Deo amato. Neq; hanc separationem ut pœnam spectat, sed præcisè ut sejungit ab amato amantem. Hanc rem explicat Angelicus hic q. 19. a. 5. ad 2. ubi notat distinctionem servilis timoris a filiali specifi-

cam, ex diversa utriusq; habitudine ad DEUM. De timore vero initiali & filiali habet sic art: 9. *Timor initialis hoc modo se habet ad filialem, sicut charitas imperfecta ad perfectam.*

De timore mundano. Hic quaestio non est, hujusmodi enim timor, turpis, cujus radix est mundanus amor: amor autem mundi, mundo innititur tanquam fini ultimo; *Timor mundanus*, ait S. Thomas loco cit: art: 3. *est, qui procedit ab amore mundano, tanquam a mala radice, & propter hoc ipse timor mundanus, semper est malus.* Filialem & initialem bonum & Sanctum esse nullus dubitat, de solo igitur servili agendum.

§ II.

An timor servilis sit salutaris?

Negant Lutherani, & asserunt: illum homines magis peccatores efficere. Sed Catholicam doctrinam Trid: Sess: 6. can: 8. fancivit, & fusius Sess: 14. cap: 4. explicavit, quam circa finem Sæc: XVII. labefactare ausi sunt quidam Theologi, quarum unam supra triginta propositiones anathemate confixit Alexander VII. ex quibus XIV.

hæc

hæc est: *Timor gehennæ non est supernaturalis. 15. ista: Attritio, quæ gehennæ & pænarum metu concipitur sine dilectione benevolentia DEI propter se, non est bonus motus, ac supernaturalis. Sed notio clara timoris servilis exhibenda est.*

Timor ergo servilis horret culpam formidine pænæ, ut dixi. Porro id duobus modis contingere potest; si quis horret culpam, & ab ea abstinet ob pænam tantum, ita ut affectum reipsa conditionatum habeat perpetrandi culpam, pænâ sublata, hic timor mundanus est, turpis & malus, ut dictum. Qui culpam detestatur horrore pænæ, absq; ullo alio respectu, ita ut hanc pænam spectet ut finem proximum sua natura referibilem in finem ultimum, quem tamen finem ultimum, homo timens nec positivè includit in sui amoris actu, neq; excludit, sed præscindit, & pænam respicit, ut objectum immediatum præcisè & absolute consideratum, qui inquam sic timet, timorem habet servilem, & hic bonus est & supernaturalis.

Dico: Timor, quô se aliquis ad DEUM convertit metû pænæ est salutaris.

Prob:

Prob: 1. Ille timor salutaris est, qui expellit peccatum, quò parimus Spiritum salutis, quem Christus commendat; atqui talis est timor servilis; ergo. Prob: min: Timor servilis expellit peccatum juxtà illud Eccl: 1. Timor Domini expellit peccatum; illò parimus spiritum salutis secundum illud Isaiaë 26. Concepimus, & quasi parturivimus, & peperimus Spiritum. 70. legunt: Timore tuo Domine concepimus & peperimus Spiritum salutis: Christus ipse servilem timorem commendat. Math: 20. Timete eum qui potest corpus & animam perdere in gehennam; ergo.

Prob: 2. ex Patribus. SS. Patres timorem servilem salutarem dicunt; ergo. Prob: Ant: S. Aug: in Psal 127. disertè pronuntiat: Ille timor nondum castus præsentiam Domini, & pœnas timet. Timore facit, quidquid boni facit, non timore amittendi bonum illud, sed timore patiendi illud malum, non timet, ne perdat amplexus illius pulcherrimi Sponsi, sed timet ne mittatur in gehennam. Bonus est & iste timor, utilis est. S. Basil: Hom: in Psal: 32. Jam ait, quando timor Domini initium est sapientiæ, qui terrena sapiunt, per-
timo-

timorem erudiuntur, timor enim quasi quidam introductorius necessario ad pietatem condiscendam assumitur. Similia habent alii. Hinc Concilium Trid: adversus Protestantes decernit sess: 6. can: 8. Si quis dixerit gehennæ metum, per quem ad misericordiam DEI, de peccatis dolendo confugimus, vel à peccando abstinemus, peccatum esse, aut peccatores peiores facere, anathema sit. Et Sess: 14. cap: 4. Illam verò contritionem imperfectam, quæ attritio dicitur, quoniam vel ex turpitudinis peccati consideratione vel ex gehennæ & paenarum metu communiter concipitur, si voluntatem peccandi excludat, cum spe veniæ, declarat non solum non facere hominem hypocritam, & magis peccatorem, verum etiam donum DEI esse, & Spiritûs S. impulsus, non adhuc quidem inhabitantis, sed moventis, quò paenitens adjutus, viam sibi ad justitiam parat.

Prob: 3. Ratione 1. Timor servilis refugit malum pænæ æternæ sive gehennæ, sed fugere gehennam bonum est, sicut bonum est desiderare beatitudinem, quæ est summum bonum contrarium malo inferni; ergo. 2. DEUS vult, ut homo ipsi serviat mercedis moti-

motivô juxta illud Math: 6. *Beati pauperes spiritû quoniam ipsorum est regnum cœlorum.* Et illud Psal: 118. *Inclinavi cor meum ad faciendas justificationes tuas in æternum propter retributionem;* ergo & pænæ motivô tametsi mercenario homo Deo inhærere potest, cum in utroq; actu commodi proprii sit motivum; ergò.

Objic: 1. Timor pænæ in eo, qui est in peccato mortali, malus est, quia oritur ex amore boni proprii, quod peccator sicut ultimum finem spectat; Bonum siquidem proprium est finis ultimus ipsius peccatoris, ad quem omnia ordinat; ergò. *Probatio implicita patet:* hæc quippè est, finis ultimi prærogativa, quod omnia in ipsum referantur.

Resp: 1. Hoc argumentum multum probare, evincit enim omnia opera peccatoris peccata esse, quoniam peccator omnia ex amore sui operatur, ejusq; bonum est illi finis ultimus. Porro omnia peccatoris opera esse peccata hæresis est damnata à Concil: Trid: & à pluribus Pontificibus. *Pio V. Gregorio XIII. & Alexandro VII.*

Resp: 2. dist: implicitam prob: ad quem

quem omnia ordinat habitualiter, *conc:* actualiter, *nego*. Spectat itaq; peccator habitualiter bonum proprium, tanquam ultimum finem, sed non semper agit propter hunc finem actualiter, hoc enim bonum proprium non exercet rationem ultimi finis actualis, respectu cuiusq; operis ipsius peccatoris, sed quandoq; finis ultimi, quandoq; finis intermedii. Bonum proprium, quod suapte naturâ honestum est, nullam malitiam præfert respectu operis honesti, & suo genere boni, nec fungitur officio ultimi finis, sed solum intermedii, quia opus morale honestum non affingit huic bono proprio aliquam privationem, quæ impediat ulteriorem ordinationem, ut facit peccatum, sed contra, illud respicit præcisè & absolute acceptum, & juxta hanc considerationem in DEUM referri potest. Nec.

Inferas: Peccatorem habere taliter duos fines ultimos contrarios. Nam.

Resp: nego sequi: Sed peccator bonum proprium habitualiter respicit tanquam finem ultimum, in quem omnia opera mala actû dirigit *privativè*, sistendo

co nempe in bono proprio, & excludendo quemcunq; alium ultimum finem; opera vero honesta dirigit, in eundem finem præcisive, & absolute absq; ulla privatione, sed ut referibilem, si ita loqui fas est, in DEUM.

Dices: Glossa super cap: 1. ad Rom: ex S. Aug: in Enchir: cap: 121. ait: *Qui timore aliquid facit, etsi bonum sit, quod facit, non tamen, benè facit; ergo.*

Resp: S. Thomas hic q. 19. ad 4. Verbum illud Aug: intelligendum esse de eo, qui facit aliquid timore servili, inquantum est servilis, ut scilicet non amet justitiam, sed pœnam timeat.

Instabis: Ille timor malus est, quô pœna magis ad pœnitendum movet, quam culpa, seu horror & displicentia ejus; sed qui timore servili agitur ad pœnitendum, magis movetur pœnâ quàm culpâ; ergo.

Resp: dist: maj: Si peccator hanc comparisonem instituat, ut foret paratus peccare, nisi DEUS pœnam comminaretur, *conc:* Talis enim timor serviliter servilis. Si ab ea abstrahat comparisonem, *nego maj:* Porro peccator gehennæ metû concussus ad DEUM converti-

vertitur. A pœna quidem vitanda primum fit motus, tunc recedit a peccato, ut DEO adhæreat, sed non gradum sistit, in mera pœnæ apprehensione & timore. Hinc discrimen ut jam dictum, latum est inter timorem mundanum & servilem; quia mundanus sistit in pœna & non facit adhærere DEO, econtra verò alter; ultra quippe progreditur peccator, qui eo movetur scopô, ut ad DEUM se convertat.

Objic. 2. Timor servilis impossibilis est cum charitate, juxta illud 1. Joan: 4. *Timor non est in charitate; ergo.*

Resp. ad textum. Timor filialis non est in charitate, nego. servilis *subdist.* in charitate perfecta, *conc.* imperfecta & initiali, qualis est charitas, qua aliquis diligit DEUM propter se, & juxta Trid. totius justitiæ fontem, nego. Angelicus Doctor hic q: 19. art. 6. solutionem his verbis proponit: *Dicendum, quod timor servilis ex amore sui causatur, quia est timor pœnæ, quæ est detrimentum proprii boni; unde hoc modo timor pœnæ potest stare cum charitate, sicut & amor sui, ejusdem enim rationis est quod homo cupiat bonum suum,*

sum, & quod timeat eò privari. Fit consequens timorem mundanum quidem oppositum esse charitati, nusquam verò fervilem, quippe qui charitati imperfectæ annexus præparet etiam ad perfectum DEI amorem. Hic.

Nota. Patres nonnunquam impugnant timorem fervilem, ut malum, sed intelligendi sunt conformiter ad dicta, de timore serviliter servili & mundano; timor enim pænæ non habens relationem ad DEUM est malus, secus verò, qui dicitur timor Domini adeoq; initium sapientiæ.

Petes 1. Utrum timor servilis & filialis sint idem in substantia?

Resp. negative. Quia habent diversa objecta sive motiva. Objectum enim timoris servilis est malum pænæ, objectum timoris filialis malum culpæ, unde specie differunt. Hinc timor servilis crescente charitate minuitur, filialis autem augetur; timor servilis in Patria locum non habet, cum Sancti sint securi de perpetuitate suæ felicitatis; filialis remanet in Patria, non quidem quantum ad actum, quod timeant beati separatio-

tionem a DEO, sed quantum ad actum qui est revereri DEUM. Ille autem actus reverentiæ tunc fit, quando homo ex consideratione Majestatis Divinæ, contremiscit, & in propriam resilit parvitatē, quō timore concussus S. Petrus dixit: *Exi a me Domine.*

Petes 2. Quinam timor donum est Spiritus S.?

Resp. 1. Timor servilis hanc prærogativam non habet, quanquam perfectio sit a Spiritu S. infusa, ut ait hic Angelicus D. q. 19. art. 9. *Timor servilis non est numerandus inter septem dona Spiritus S.* Rationem dat. Quod timor ille annexam potest habere voluntatem peccandi, dona autem Spiritûs S. cum tali voluntate stare nequeunt.

Resp. 2. Timor ergo filialis & castus propriè donum est Spiritûs S. sicut & timor initialis, qui non distinguitur, nisi tanquam imperfectum, a perfecto, a timore filiali. *Unde relinquitur quòd timor DEI, qui numeratur inter septem dona Spiritûs S. est timor filialis sive castus. ibidem S. D.*

Petes 3. Daturne timoris præceptum?

Resp. affirm. Cum Angelico D. hic q.

22. a. 2. ubi primum affert textum S. Scripturæ, præceptum illud ostendentem, nam dicitur Deut. 10. *Et nunc Israël quid Dominus tuus petit a te, nisi ut timeas Dominum DEUM tuum.*



ARTICULUS IV.

De vitiis spei oppositis.

Duo sunt, ut jam supra innui, virtuti spei contraria, *desperatio & præsumptio*. Porro desperatio definiri hoc modò solet: *Est voluntas efficax abjiciendi salutem æternam, ex Divina misericordia consequendam.* Quæ definitio constare potest ex contraria virtute spei, quæ motus animi est in bonum arduum, seu beatitudinem Divino auxiliò obtinendam. In opposito ergo motu non assequendi hanc felicitatem sita desperatio est. Duplici autem ratione ad desperandum duci quis solet. 1. quod DEUM impotentem judicet ad conferendam beatitudinem. 2. quod judicat se capacem amplius non esse obtinendi æternum præmium, ob criminum multitudinem & cordis duritiam. Execrabile & peri-

culosissimum est hoc peccatum : *Nam si desperaverit lapsus, in die angustiae minuetur fortitudo sua.* Prov. 24.

Petes 1. Estne semper hæresi conjuncta desperatio ?

Resp. Ut plurimum conjungitur, quando scilicet peccator ideò desperat, quod judicium format, quo judicat, DEUM non posse illum salvare, eidemq; illius crimina condonare. Et tunc duplex est peccatum, hæresis & desperatio. Se-juncta est ab hæresi desperatio, quando peccator, absq; præfato judicio desperat, non quia judicet DEUM ipsum salvare non posse, sed quia conveniens sibi existimat desperare, ut liberius, nulloq; intuitus conscientiae morsu pungente vitiis & voluptatibus indulgere valeat. Sic vg. qui judicaret furtum licere, hæreticus esset, qui vero furatur, quia furtum sibi commodum ac congruum judicat, ut communiter evenit, peccat, sed ab hæresi immunis est.

Petes 2. An licite desperaret ille, cui facta foret de propria damnatione revelatio ?

Contensonius fortiter affirmat hominem in illa hypothese sperare posse & debe-

re, alii negant. Sed de hac quæstione jam supra dictum ex S. *Thoma* hujusmodi revelationes interpretandas esse, ut comminatorias.

Alterum vitium quod spei opponitur est præsumptio, quæ à S. *Thoma* hic q. 21. a. 2. definitur: *Inordinata confidentia in Divina misericordia.* Præsumptio grave peccatum est, & si gravius desperatio, ut inquit S. *Thomas* ibidem. *Quoniam magis proprium est Deo misereri & parcere, quam punire propter ejus infinitam bonitatem.* Porro peccatum præsumptionis committitur, dum quis gloriam assequi confidit sine ulla cooperatione, sine meritis ac laboriosis operibus, quod attenta DEI providentiâ, ejusq; legibus constitutis fieri non potest. Peccatum quoq; præsumptionis contingit, dum quis sub spe veniæ obtinendæ in peccato perseverat

Advertendum tamen ex S. *Thoma* non peccare peccato præsumptionis illum, qui peccaret sub spe veniæ obtinendæ, & cum proposito abstinendi a peccato & de eodem pænitendi: *Hoc*, inquit, *non est præsumptionis, sed peccatum diminuit,*

it, quia per hoc videtur habere voluntatem minus firmatam ad peccandum. Peccant ergo, qui in peccato persistunt spe veniæ decepti; sed propositum abstinendi a peccato, & peragendæ pænitentiae, multum malitiæ dēnit, & non est propriè peccatum præsumptionis. Non negandum tamen plures hujusmodi quoq; criminis præsumptionis reos esse vere, simulq; hæreseos lue infici, quippè vix contingere potest, aut saltem rarò accidit, ut quis præsumptionis propriè dictæ peccatum committat absq; hæresi, quod Confessariis perpendendum est serio.

DISSERTATIO VII.

DE CHARITATE.

Ultimum inter virtutes Theologicas locum occupat charitas, quia illarum finis est & meta; hæc omnium meritorum principium & forma, hæc est, in qua consistunt lex & Prophetæ totiusq; legis observantia, consortium aliarum virtutum non solum,

non excludens, sed fovens, valorem
& pretiositatem eisdem conferens. Igi-
tur.



ARTICULUS I.

Natura Charitatis Theologicae explicatur.

Antequam charitatis Theologiae na-
tura explanetur varia hujus nominis
Charitas acceptio prae oculis habenda
est. *Charitas* idem est ac amor. Porro
amor generatim sumptus, est motus
voluntatis in bonum. Triplex amor di-
stingui solet. *Concupiscentiae*, *benevolentiae*,
amicitiae. Nam 1. nobis bonum quodam
congruum optamus. 2. bonum proximo
facimus, aut desideramus, 3. mutuo
amamur.

Istius amoris amicitiae tres veluti spe-
cies assignat Angelicus hic q. 23. art. 5.
nempe *utilis*, *delectabilis* & *honesti*. Ami-
citia utilis illorum est, qui ob utilitatem
se se diligunt. Altera eorum, qui ob vo-
luptatem, quam ex amore capiunt, se
diligunt. Tertia eorum qui amicis bona
volunt amicitiae sive ipsorum amico-
rum

rum causâ. Hæc tertia vera amicitia est, duo priores similitudinem & quidem languidam amicitiae præferunt, quippè non amant aliquem per se, sed secundum quod utilitatem aut commoditatem adfert.

Amicitia porro definiri solet: *mutua benevolentia in quadam communicatione consistens*. Conditiones ad veram amicitiam requisitæ sunt. 1. Ut amor non sit concupiscentiæ, quò ut dictum, aliquis amatur propter nostrum commodum, sed sit amor benevolentiae, quò alteri bonum volumus. 2. Ut sit mutuus amor, hinc si quis non redamatur ab eo, quem amat, amans non amicus dicitur. Hinc D. Thomas ait: quod DEUS amicus peccatorum dicitur, quatenus amans, secus ut amatus. 3. Ut amor iste super aliqua honesta bonorum communicatione fundetur, quia amicis omnia sunt communia. Sub his conditionibus continetur, quod mutuus amor non lateat, quod sit animorum unitas, secretorumque communicatio, & quod alter alterius voluntatem faciat.

Amor benevolentiae erga DEUM,

alius actualis, alius habitualis. Item alius naturalis, quô Deus ut author naturæ diligitur; alius supernaturalis, quô ut gratiæ & gloriæ author amatur. Deniq; amor Dei alius est affectivus, qui animam afficit, & in corde dulciter fervet, alius effectivus, qui foras erumpit & bona operatur. Hic etiam efficax appellari solet, ut distinguatur ab amore inefficaci, qui languidum desiderium & velleitas simplex nuncupari solet. Alius remissus, alius intensus; deniq; alius est appretiativus, qui præfert DEUM omnibus creaturis; alius intensivus, qui non solum DEUM super omnia amat, verum etiam quandam sensibilem teneritudinem, fervoremq; inducit in animam.

Tandem ante oculos habendum, tria hæc, amorem, dilectionem & charitatem ita distingui, ut amor latius pateat, quam dilectio, & dilectio quam charitas. Amor quippe tam in bono, quam in malo sensu accipitur. *Erunt homines seipsos amantes* 2. ad Timot: 3. utiq; malo amore. Idem de dilectione: *qui diligit iniquitatem, odit animam suam* Psal: 10.

At

At amor non solum rationalis, sed etiam sensibilis appetitûs partus esse potest; dilectio verò solius rationalis. Caritas solum in bono sensu accipitur à Theologis, residetq; in appetitu rationali. Hinc.

Definitio charitatis Theologicæ pro habitu acceptæ hæc est: *Virtus Divinitus infusa, quâ DEUS propter se & proximus propter DEUM diligitur.* Primæ voces indicant charitatem supernaturalem esse. Additur *quâ Deus propter se diligitur*, Caritas enim DEUM amat, ut DEUS est, DEUS autem ut DEUS propter se, & a se est, ac super omnia alia à se amabilis. Diligit ergo caritas DEUM propter se & super omnia. Per particulam *propter se*, differt caritas à spe; spes enim diligit DEUM super omnia, sed in DEO non sistit, sed DEUM sibi propitium, largitorem & clementem desiderat. Additur *proximus propter Deum*, in hac particula *proximus* primo nos, deinde omnes creaturæ rationales capaces æternæ gloriæ intelliguntur. Ex his facile colligitur, circa quod tanquam objectum caritas versetur. *Primarium enim*

enim DEUS est; Secundarium proximus propter DEUM diligendus. Hinc ait S. Aug: lib: 1. de doct: Christiana cap: 23. *Cum quatuor sint diligenda, unum quod supra nos est, alterum quod nos sumus, tertium quod juxta nos est, quartum quod infra nos est; de secundo & quarto nulla praecepta danda erant.* Objectum quod supra nos est, DEUS est solus. Quod nos sumus, est persona nostra animâ & corpore conflata, de hoc non erat dandum praeceptum, quia nemo unquam carnem suam odio habuit Ephes. 5. Subdit Aug: ibidem cap: 24. *Modus ergo præcipiendus est homini, id est, quomodo se diligat, ut prosit sibi.* Quod juxta nos est, est omnis rationalis creatura æternæ beatitudinis capax, etiam Angelus, etiam homo, isq; infidelis. Quod infra nos est, sunt res omnes naturâ & statû inferiores, de quo quoq; praeceptum dandum non erat, quia creaturae irrationales capaces non sunt beatitudinis. Possunt tamen aliquo modô diligi, quatenus in DEI gloriam referuntur.

Hic tamen nota. Amor quô quis se ipsum diligit, charitatis quidem est, sed non amicitiae, quæ nisi inter duos haberi

beri potest, at benevolentiae. Quemadmodum nec creaturae irrationales, nec Dæmones amore amicitiae amari possunt, sed amore charitatis seu benevolentiae, quatenus illarum rerum conservationem ad Dei gloriam permanere avemus, ait S. Thomas hic q. 25. art. 11.

Motivum autem sive objectum formale charitatis esse Divinam bonitatem per se amabilem ex dictis sequitur. Hac siquidem ratione charitas à duabus aliis virtutibus Theologicis distinguitur, quibus perfectior est, quidquid dicant Lutherani, qui cum nos justificari per fidem dicant, volunt eam saltem in esse moris aliis virtutibus præcellere. At obstat illis illud Apostoli 1. Corinth: 13. *Nunc autem manent fides, spes, charitas, tria hæc: major autem horum est charitas.*



ARTICULUS II.

De dotibus Theologicæ charitatis.

Cum charitas, ut dictum, omnium aliarum virtutum vinculum meta & compendium sit, sicut ergo cæteris præeminet, ita præ cæteris nobilioribus gaudet dotibus prærogativisq; Igitur.

Pri-

Prima charitatis Theologicæ dos est. amicitia DEUM inter & homines, quippe *charitas infinitus thesaurus est hominibus; quô qui usi sunt, participes facti sunt amicitiae DEI.* Sap: 11. Hinc David Psalm: 138. nimis honoratos dicit amicos DEI. Ipse Christus Joan: 13. protestatur. *Jam non dicam vos servos, sed amicos.* Si vis, ait S. Hier: in cap: 7. Michææ, *verâ amicitia delectari, esto amicus DEI, sicut Moyses, qui loquebatur DEO, sicut amicus ad amicum, esto amicus ut Apostoli, ad quos Salvator ait, jam non dicam vos servos sed amicos.* At

Dices. Scelesti quandoq; à DEO amici appellantur uti Matt: 26. Christus proditorem appellavit: *Amice ad quid venisti:*

Resp: Hæc non officiunt, sed profunt. Licet enim homines perversi non sint amici ut amantes, sunt tamen amici ut amati, quatenus DEUS benevolentiam suam erga impios ostendit, significatq; se illos, non ut impios & rebelles, sed ut redemptionis pignora diligere.

Prærogativæ amicitiae sunt mutua benevolentia, bonorum communicatio. His verò mirum in modum charitas fulget.

get. DEUM nos amamus ipsius plecti bonitate, de ejusdem gaudemus perfectionibus, illi gloriam honorem &c. optamus, cor, animam, omniaq; nostra in sacrificium illi litamus. Vicissim ille infinito nos prosequitur amore: *Ego diligentes me diligo* Prov: 8. *Qui diligit me diligitur à Patre meo, & ego diligam eum.* Joan: 14. Sua verò infinita bona non tam communicat, quam effundit & prodigit, si ita loqui fas est. Gratiam nobis confert, quâ suæ nos efficit naturæ consortes. Charitatem infundit, quæ valorem æterni præmii operibus nostris instillat, nosq; ineffabilis gloriæ, quâ ipse vivit & gaudet participes reddit. Et quasi hæc parva forent, clamat: *Deliciae meae esse cum filiis hominum*, sed nedum cum istis esse cupit, verum etiam mansionem se apud eos facturum promittit, *ad eum ait, veniemus, & mansionem apud eum faciemus.* Et ne quid deesset, DEUS humanam naturam unione hypostaticâ sibi copulavit, & ad Divinitatis fastigium evexit; & ut quandam æqualitatem nos inter & seipsum constitueret, suam ad nos Majestatem inclinavit, nostramq;

vili-

vilitatem ad suæ naturæ participationem exaltavit.

Secunda dos & prærogativa charitatis est, ut sit animæ vita, sicut corporis vita anima est. *Sicut anima est vita corporis, sic animæ vita est DEUS, sicut expirat corpus, cum animam emittit, ita expirat anima, cum DEUM amittit. DEUS amissus mors animæ, anima amissa mors corporis* ait S. Aug: Serm: 5. de verbis Dom: Amor caducorum vita cordis non est, quia caducus est. Solus amor vitæ æternæ felicitas & vita cordis est.

Tertia prærogativa, quod sit donum à DEO infusum, nullis nostris antecedentibus meritis, nullaq; nostra naturali capacitate spectata. Quoniam ut ait S. Thomas Charitas amicitia cum DEO est, super æternæ beatitudinis communicationem fundata, hæc autem communicatio gratuita est, proinde & charitas, quæ infunditur cordibus nostris per Spiritum S. qui datur nobis.

Quarta prærogativa est valor, quem cæteris operibus tribuit. Habent utiq; cæteræ virtutes ex proprio objecto suam honestatem, & bonitatem, verum ut

vitæ

vitæ æternæ coronâ dignæ sunt, sigillo
charitatis obsignatas esse oportet.



ARTICULUS III.

De proprietatibus Charitatis.

In variis quæstionibus de his momentis
discurrit S. Thomas, Nos brevitati stu-
dentes, quoniam alia jam præc. articulo
præocupata sunt, hic agemus de augmen-
to, diminutione & amissione charitatis.
Suppono habitum charitatis non acquiri
nostris actibus, sed à Deo infundi, ut
jam art: præc: dictum, est enim super-
naturalis. Attamen cum ex actibus cha-
ritatis infusæ generetur aliquis habitus
dilectionis, ut docet Angelicus q. 17.
de Verit: a. 1. ad 4. Dicendum hunc
habitum ex actibus charitatis genera-
tum, non esse charitatem, quâ sumus
Dei amici & Filii adoptivi, sed habi-
tum diversæ speciei, ex actibus præfatis
ortum, ideoq; acquisitum, aliquô modo
supernaturalem, nempe ex actibus su-
pernaturalibus ortum.

§ I.

De augmento charitatis.

Dico 1. **C**haritas viæ potest augeri sine termino. Sic Conc: Vienn: contra Begardos & Beguinas, qui hæretici dicebant, hominem posse quemdam charitatis terminum attingere, ultra quem progredi non possit. At contra illos pugnant manifesta scripturarum testimonia, jam illud Prov: 4. *Suorum semita quasi lux splendens procedit & crescit usq; ad perfectum diem.* Jam Apoc. ult. *Qui justus est, justificetur adhuc* Ephes. *In charitate crescamus.* Ad Philip: 1. *Oro ut charitas vestra magis ac magis abundet,* atqui hæc falsa forent si charitas terminum præfixum haberet in via, quomodo enim charitas magis ac magis abundare posset, in termino fixo existens. Hinc meritò dixit S. Aug: Tract: 5. in Epist: Joan: *Charitas meretur augeri, ut cuncta mereatur perfici.* Et Conc: Trid: Sess. 6. cap: 10. *Hoc justitiæ incrementum petit Ecclesia cum orat: da nobis fidei spei & charitatis augmentum.*

Dico 2. Charitas non augetur extensive, sed intensive tantum. Quia etiam
mini-

minima charitas extendit se ad omnia, quæ sunt ex charitate diligenda.

Dico 3. Charitas non augetur intensive per additionem charitatis ad charitatem, hoc enim esset charitatem multiplicari, non augeri, sed per maiorem radicationem in subjecto, sive maiorem inhæSIONem.

Petes. Utrum charitas in hac vita possit esse perfecta?

Resp: Affirm. quod sic probat S. Thomas q. 24. a. 8. *Quod quidem*, ait, *contingit tripliciter uno modo sic*, quod totum cor hominis, actualiter semper feratur in DEUM, & hæc est perfectio charitatis patriæ, quæ non est possibilis in hac vita, in qua impossibile est propter humanæ vitæ infirmitatem semper actû cogitare de DEO & moveri dilectione ad ipsum. *Alio modo* ut homo studium suum deputet ad vacandum DEO & rebus Divinis, prætermisiss aliis, nisi quantum necessitas præsentis vitæ requirit. Et ista perfectio charitatis possibilis, quæ est in via, non tamen est communis omnibus habentibus charitatem. *Tertio modo* ita, quod habitualiter aliquis totum cor suum ponat in Deo, ita scilicet, quod nihil cogitet vel velit, quod Di-

vinae

vinæ dilectioni in contrarium sit, & hæc perfectio est communis omnibus charitatem habentibus. Hæc omnia intellige de perfectione ex parte diligentis, nam cum DEUS infinito amore diligibilis sit, quæ creatura hunc gradum attingere poterit, ut perfectè omnino diligatur.

Ibidem art: 9. distinguit triplicem charitatis gradum, nempe incipientium, proficientium & perfectorum. *Nam 1. quidem ait, incumbit studium homini principale ad recedendum à peccato, & resistendum concupiscentiis ejus, quæ in contrarium charitatis movent. Et hoc pertinet ad incipientes, in quibus charitas est nutrienda vel fovenda ne corrumpatur. 2. Studium succedit, ut homo principaliter tendat ad hoc quod in bono proficiat. Et hoc studium pertinet ad proficientes, qui ad hoc principaliter intendunt, ut in eis charitas per augmentum roboretur. 3. Autem studium, ut homo principaliter ad hoc intendat, ut DEO inhæreat, & eò fruatur, & hoc pertinet ad perfectos, qui cupiunt dissolvi & esse cum Christo.*

§. II.

De diminutione & amissione charitatis.

Dico 1. Charitas habitualis non potest diminui directe. Quia nulla potest assignari hujus directæ diminutionis causa. Sed tantum indirectè, in quantum per peccata venialia minuitur ejus fervor, id est impeditur per peccata venialia ejus applicatio ad ordinandum in finem ultimum materiam, circa quam peccata venialia versantur. Tandem quia peccata venialia disponunt ad mortale, quò charitas destruitur.

Dico 2. Charitas potest amitti. Contra Pseudo-Mysticos in Conc: Vienn: & Calvinum in Trid: damnatum Sess. 6. can: 23. *Si quis hominem semel justificatum dixerit amplius peccare non posse, neq; gratiam amittere atq; adeo eum, qui labitur & peccat, nunquam vere fuisse justificatum... anathema sit.* Id manifeste habetur Ezech. 18. *Cum averterit se justus à justitia sua, & fecerit iniquitatem morietur in eis.* Sed de hoc mox plura in art: sequ.

ARTICULUS IV.

Utrum in hac vita detur status amoris puri?

Nomine amoris puri intelligitur amor, quò DEUS mere diligitur propter se, seclusâ relatione, & ad timorem pænæ, & ad præmium æternæ beatitudinis assequendum. Hujusmodi dari amorem transitorium ultro fatentur Theologi, sed habitualement per modum statûs ita, ut tota vita interior in eo sita sit, admittere nefas est, hæc enim est sententia *Quietistarum*, quam renovare labente præterito immediatè sæculo, conatus est *Michaël Molinos*.

§. I.

Synopsis historica recentiorum Quietistarum.

Michaël de Molinos natione Hispanus, in Arragonia natus, maximus hypocrita sub specioso devotionis obtentu multorum sibi conciliavit animos. Sic Divinarum humanarumq; contemptor nefandam disseminavit doctrinam ad suscitanda insulsa & phanatica *Gnosticorum*, *Carpocratianorum*, *Enthusiastarum* somnia, dudum ab Ecclesia repressa & proscrip-
pta,

pta, ad renovandos impios simul & turpes *Beguardorum* ac *Beguinarum* atq; *Dulcinistarum* errores, & ad confixam & sepultam ab inferis revocandam *Illuminatorum* Sectam. Hic, teste *Joanne Pacichelli*, tum vivente, viginti & duobus annis, quibus Romæ degebat stabiliendæ *Quietistarum* hæresi, quam ipse commentus est, sedulam navavit operam. Propriam annihilationem, qua media Deo uniri possit anima & quiescere minime sollicita de his, quæ corpori obveniunt summopere inculcabat. Hinc inferebat, nullum animæ actum præmiô vel pænâ dignum esse, quod annihilatis animæ potentiis nulla esset cooperatio.

Ajebat hos solos censendos esse perfectos in vita spirituali & vere *Mysticos* qui per unum actum solummodo non revocatum, Deo semel oblatis, & totaliter uniti, resignati atq; relictî, reliquos omnes, ut superfluos suspendunt actus, & velut exanimes permanendo, nihil operando, neq; petendo, nec de beneficiis Deo gratias agendo, nec ad proprios defectus reflectendo, sed silendo

& mere passive se habendo, in absoluta permanent indifferentia de omnibus, etiam de pœna, vel de præmio, de cœlo vel inferno, salute vel damnatione. Hinc nefanda flagitia, quæ peccata esse negabat, suam traxere originem. Et hic est status ille habitualis, & immobilis, ad quem cum semel Viri spirituales pervenissent, ajebat, peccare amplius non poterant, nec mandatis aliquibus ligari &c. dictitabat.

Sexaginta & octo propositiones ex ejusdem *Molinos* scriptis collectas damnavit Innocentius XI. ejusdem jussu opera flammis addicta fuere. Ipse verò captus, cum annò 1687. in Templo Minervitano palinodiam suorum errorum cecinisset, ad perpetuos carceres, damnatus obiit Romæ 1692. Fertur illum pœnitentiam serio egisse annum ætatis 60. agentem.

Innocentius XII. annò 1699. 23. propositiones damnavit, quarum plures ad præsentem controversiam pertinent, sufficit unam commemorare quæ sic habet: *Datur status habitualis amoris DEI, qui est charitas pura, & sine admixtione motivi proprii interesse. Neq; timor panarum, neq; desi-*

desiderium remunerationis habent amplius in eo partem. Non amatur amplius DEUS propter meritum, neq; perfectionem neq; propter felicitatem in eo amando inveniendam.

§. II.

Resolvitur quæstio.

Duo sunt propositionum, de quibus modo dictum, erronea principia, ita conjuncta, ut unum alterum consequatur. Primum est, cui falsa & commentitia Divini amoris idea superstruitur. Contendebant siquidem damnatarum propositionum authores, desiderium felicitatis nostræ, ac æternæ mercedis expectationem puritati & perfectioni Divini amoris officere. Eam puritatem huic amoris (quem proinde non interessatum appellabant) ita propriam asseriebant, ut quemcunq; respectum ad nostram felicitatem excluderent. Hinc inferebant (quod est alterum principium) statum illum animæ indifferentis ad æterna supplicia, tum ad felicitatem beatam. Quæ duo principia ordinem Divinæ providentiæ pervertunt, animum truncum efficiunt, ac insensibilem

statuam, de medio industriam, vigilantiam, bona opera, merita hominis, deniq; gratiam & naturam tollunt. Ergo.

Dico. Non datur in hac vita status habitualis puri amoris.

Prob: Ille status non datur qui repugnat oraculis sacrae Scripturae, sensui communi SS. Patrum, Conciliis Ecclesiae ac decretis eorundem, quiq; jam est olim damnatus, rectaeq; rationi est contrarius atqui status habitualis amoris puri repugnat 1. Oraculis Scripturae, 2. communi sensui SS. Patrum, 3. Conciliis ac decretis Ecclesiae. 4. Jam olim est damnatus, 5. rectae rationi contrarius. Ergo.

Prob: min: quo ad 1. p: DEUS ipse 1. Math: 6. jubet & praecipit: *Quaerite primum Regnum DEI*, quod nempe amore quaeritur, amore invenitur, amore possidetur, atqui si amor iste imperfectionis cujusdam labe aspersus foret, certo primum illud salvator noster quaerere non praeciperet. 2. DEUS vix unquam sui amorem nobis praecipit & nostrae felicitatis non recordetur, primum & maximum mandatum promulgat: *Diliges*
Domi-

Dominum Deum tuum Math: 22. non DE-
UM absolute diligere juberis, sed Deum tu-
um, si tuum ergo illum possidendi spem
te habere oportet. Si DEUS ipse nostrum
se constituit, si est regnum nostrum,
corona nostra, merces nostra, felicitas
& gaudium nostrum, quomodo erit im-
perfectus amor noster, si DEUM posside-
re desiderat? 3. Christus cum nos De-
um petendi normam edocuit, commo-
nesecit quotidie petere Regnum DEI:
adveniat Regnum tuum, atqui hæc pre-
candi forma non solis imperfectis in
schola Christi, sed etiam summis ut vg.
Apostolis præscripta; qui anhelantes ad
illam beatitudinem dicebant, cum Pro-
pheta Psal: 72. *Quid enim mihi est in cæ-
lo, & a te quid volui super terram?* Item
Psal: 26. *Unam petii à Domino, hanc requi-
ram, ut inhabitem in domo Domini.* Psal: 41.
*Quemadmodum desiderat cervus ad fontes
aquarum, ita desiderat anima mea ad te Deus.*
Psal: 118. *Inclinavi cor meum ad faciendas
justificationes tuas in aeternum propter retribu-
tionem. Haec est charitas ejus, ut mandata ejus
custodiamus.* 1. Joan: 5. Apostolus, qui
continuo anhelabat ad Christum dicens;
cupio

cupio dissolvi & esse cum Christo, nos monet ut tanquam peregrinos nos existimemus, qui non habemus manentem civitatem, sed futuram inquirimus. Hebr. 13.

Prob: minor quo ad 2 p. Status præfatus repugnat sensui communi Patrum: una vox Patrum est, salutis nostræ præcipuas partes esse, desiderare DEUM, ipsumq; summo affectû spei & amoris expetere. Sic Clemens Alex: lib: 11. Stromatum ait: *Unum oportere expetere, per quem facta sunt omnia, & qui iis, qui digni sunt, promissa tribuit.* Greg: Nyssenus Epist. 57. *Præ omnibus rebus Deum optemus, solum, inquam, perenne illud bonum & nostrum.* S. Aug: Tract: 40. in Joan: exclamans exoptat: *O! si cor esset qualitercunq; suspirans in illam ineffabilem gloriam!* Similia alii habent.

Prob: 3. p. Concil: Carthag: annô 418. can 8. inter Canones Concilii Milevit. definit: *Placuit, ut quæcunq; verba ipsa Dominicæ orationis, ubi dicimus: Dimitte nobis debita nostra; ita volunt a Sanctis dici, ut humiliter, non veraciter hoc dicatur; anathema sit.* Hunc pariter statum condemnavit Concilium Vienn:

Vienn: in Beguardis. Hinc Concilium Trid: sess: 6. cap: 11. insigne hujus rei dat documentum, cum cap: 16. hæc habet: *Nolite amittere confidentiam vestram, quæ magnam habet remunerationem, atq; ideo bene operantibus usq; in finem, & in Deo sperantibus proponenda est vita æterna, & tanquam gratia filiis Dei per Christum Jesum fideliter promissa, & tanquam merces ex ipsius Dei promissione, bonis ipsorum operibus & meritis fideliter reddenda.* En quam è diametro hæc sit opposita systemati *Molinosi*, qui propugnat hominem instatu puri amoris constitutum non debere se reflectere ad suos defectus nec precari *dimitte nobis* nec curare virtutes, adeoq; neq; exercitium laboriosum mandatorum, multo minus se in mortificatione exercere, & nusquam præmii motivò agendum esse. Hinc probata manet 4. pars.

Prob: 5. pars. Status præfatus rectæ rationi est contrarius, ut patet inspicienti propositiones *Molinosi* damnatas. Nam renovando in cinere sepultos errores Gnosticorum, inducunt in Epicureismum, siquidem fornicatio & alia
ob-

obscena & horrenda in illis continentur, quæ tamen infelicis systematis Author peccata non esse definit.

Restat hic aliquas saltem propositiones Molinosii afferre ad iudicium comparativum cum S. Scripturæ textibus, ut ad oculum pateat systema impium esse, ac nedum rationi verum veritatibus fidei contrarium, ex qua comparatione hucusq; dicta confirmabuntur. Ergo.

Propositio 1. Molinosii: Annihilandæ, & prorsus destruendæ sunt potentie animæ, & hoc est vita interior. Hæc assertio opponitur textui imò Evangelico Math: 25. ubi servus otiosus & inutilis in tenebras exteriores conjici jubetur, eò quod sciens voluntatem Domini, negotiari noluerit, sed in terram pecuniam Domini sibi concreditam absconderit. 2dò, vitæ Christi, qui semper perseveravit in amando, gratias agendo &c.

Propositio 2. Velle active operari est offendere Deum, qui se solò vult cuncta operari. Hoc præterquam opponitur Apostolo ad Philip: 2. ubi jubet, ut cum
metu

metu & tremore nostram salutem operemur, aliisq; Evangelicis & Apostolicis sententiis, insuper proscriptum est a Trid: sess: 6. cap: 11. tum can: 8. ubi proscribuntur Lutherani contendentes liberum hominis arbitrium mere passive se habere, & à Concilio Arausicano can: 9. Quoties enim bona agimus, Deus in nobis, atq; nobiscum ut operemur, operatur.

Prop: 3. Vota emissa ad aliquid faciendum sunt perfectionis impedimenta. Hæc Molinosiana assertio pugnat cum Psalmo 70. Vovete & reddite Deo vestro omnes, qui in circuitu ejus offertis munera. Pugnat etiam cum Consiliis Evangelicis & operibus supererogatoriis in scriptura comendatis; nam ut ait S. Thomas 2. 2. q. 88. a. 4. 5. & 6. Actio ex voto facta nobilior & eminentior quâcunq; alterâ, eò quod per votum anima non solum fructus, scilicet opera bona, sed & arborem hoc est seipsam in odorem suavitatis Deo offerat, & consecret.

Prop: 4. Activitas naturalis est inimica gratiæ, & sicut Dei operationem sic & veram

ram perfectionem prapedit, quâ Deus vult solus sine nobis agere. Est contra clarissima Scripturæ loca, in quibus jubemur operari, mandata Dei custodire, in præceptis ejus ambulare, qui dicit: sine me nihil potestis facere, quod & Paulus 1. Corinth: 15. manifeste testatur: Non ego autem sed gratia Dei mecum.

Prop: 5. Vita interior ea est, in qua nec lumen, nec amor, nec resignatio dignoscitur, neq; verò necesse est Deum cognoscere. Pugnat cum Oratione Dominica Math: 6. tradita.

Prop: 6. Anima non debet cogitare aut de præmio aut de supplicio. Cur ergo Propheta Psal: 118. orat: Confige timore tuo carnes meas, à judiciis enim tuis timui? Cur ipsa veritas Joan: 17. dicit: Hæc est vita æterna ut cognoscant, te solum Deum verum &c. Cur Apost: ad Colos: 3. monet: ut quaeramus quæ sursum sunt? Cur S. Aug: orat: Domine da quod jubes, & jube quod vis --- ut veniamus ad te, fac nos beatos de te? Hinc idem S. D. Tract: 4. in Epist: 1. Joannis ait: Tota vita Christiani, boni de-

desiderium est. Quod autem desideras nondum vides, sed desiderando capax efficeris, ut cum venerit, quod videas, implearis.

Prop: 7. Anima non debet recordari sui, Dei, & cujuscunq; rei, & in vita interiori omnis reflexio nocet. Est contra illud ad Thess: 5. Ut sive vigilemus, sive dormiamus, simul cum ipso vivamus, & illud Gen: 17. Ambula coram me & esto perfectus, & alia. Insuper hæc sicut & 6. assertio ex consequenti docet: Abraham credentium Patrem, Moysen mitissimum, Davidem, Virum secundum cor Dei, extra statum vitæ interioris & spiritualis perfectionis fuisse, nec suæ gratiæ fideliter respondisse, quia in Deum remuneratorem aspiciebant, quia ejus mandata implebant propter retributionem. Alias Molinosii propositiones, vide apud Natalem Hist: sæc: XIII. & XIV. Diff: 15. ubi eas refellit.

§ III.

Objectiones solvuntur.

Objic: 1. Praxis docet. Viros verè spirituales & perfectos nihil desiderare, nihil petere à Deo nisi ut

voluntas ejus fiat, respectû verò cæ-
terorum omnium bonorum penitus in-
differentes esse, etiam respectû beati-
tudinis æternæ, ergo illis in statu amo-
ris puri & intimæ rationis unione stan-
dum est.

Resp: 1. nego ant. Oratio enim Do-
minica, quam Math: 6. Christus Di-
scipulis aliisque perfectis tradidit, plures
alias petitiones complectitur. Spiritua-
les quidem viri (est 2. *Resp:*) & per-
fecti, seu ad perfectionem omni stu-
diô contendentes bona temporalia non
desiderant, non petunt à Deo, nec
mala temporalia deprecantur, nisi sub
conditione beneplaciti ejus, & quate-
nus ad salutem suam, vel suorum ali-
quatenus utilia esse possunt; indiffe-
renter respectu hujus vitæ mortalis o-
mnium eventuum desideria sua ac pe-
titiones dirigunt, ac moderantur secun-
dum sacratissimam illam regulam, quam
Christus orans nobis tradidit: *Verum-
tamen non sicut ego volo, sed sicut tu vis.*
Spiritualia verò & æterna bona, ut Dei
gratiam, virtutes beatitudinem æter-
nam absolutè desiderant, ac petunt à
Deo,

Deo, quantumvis nescio, ad quem perfectionis gradum sunt evecti, & orant cum Ecclesia: *Da nobis Domine fidei, spei & charitatis augmentum, & ut mereamur assequi quod promittis, fac nos amare quod præcipis.* Iphis persuasum est, sed secundum sermonem Domini, nostram in hac vita beatitudinem esse, desiderium vehemens & efficax justitiæ. *Beati qui esuriunt & sitiunt justitiam.* Math: 5.

Sanctos indifferentes fuisse respectu beatitudinis æternæ illiusq; desiderium & petitionem perfectioni repugnare, non modò figmentum est, sed error verbo Divino contrarius, ut jam dictum. An hæc indifferentia stare potest cum illo Dividis Psal: 26. *Unam petii à Domino hanc requiram &c. - - - Exquisivit te facies mea, faciem tuam Domine requiram - - - Credo videre bona Domini - - - Exspecta Dominum viriliter age.* Hanc indifferentiam respectu cælestis & æternæ beatitudinis damnat Christus apud Lucam. *Verumtamen, ait, querite primum Regnum Dei, & justitiam ejus - - - Ubi thesaurus vester est, ibi & cor vestrum erit.*

Hinc

Hinc ait S. Aug: Epist: ad Probum.
*Propter adipiscendam vitam, ipsa vera vita
 (Christus) nos oare docuit. Vult exer-
 ceri in orationibus desiderium nostrum, quò
 possimus capere, quod præparat dare.*

Dices: Desiderium mercedis statui per-
 fectionis & amoris puri repugnat, si-
 quidem purus amor Deum diligit pro-
 pter bonitatem ejus infinitam, ergo.

Resp: Statui perfectionis & amoris
 puri repugnare desiderium mercedis
 temporalis, & à Deo distinctæ, quod
bene notandum, non desiderium merce-
 dis æternæ perficientis & beatificantis,
 quæ DEUS est. Amorem castum sive
 purum, solum desiderium, ex intuitu
 mercedis temporalis, non mercedis æter-
 næ, quæ DEUS est, excludere, jam di-
 cta probant, atq; docet idem S. Aug:
 Serm: 19. de verbis Apost: sive 179.
*Amor castus in te esse debet, quò amore
 desideres videre non cælum & terram - - -
 non fulgores nitoresq; gemmarum, sed de-
 sidera videre DEUM tuum, amare DEUM
 tuum, quia dictum est: Dilectissimi, filii
 DEI sumus, & nondum apparuit, quid
 erimus. Scimus autem, quia cum apparue-
 rit.*

rit, similes ei erimus, quoniam videbimus eum, sicuti est. Ecce propter quam visionem fac bonum, ecce propter quam noli facere malum, S. Aug: sequitur fidelis Discipulus S. Thomas in 3. lib: Sent: dist: 26. q. 11. a. 1. ad 5. facere aliquid propter aliquod commodum temporale facit actum mercenarium, non autem facere propter remunerationem æternam. Item Dist: 29. q. 1. a. 4. 1. 2. q. 114. a. 4. 2. 2. q. 23. a. 1. & q. 26. a. 13.

Instabis: S. Bernardus negat purum esse amorem filii, qui de hæreditate cogitat, sive qui Patrem amat propter hæreditatem. Sic enim Serm: 83. in Cantica ait: Amant filii, sed de hæreditate cogitant, suspectus est mihi amor, cui aliud quid adipisci spes suffragari videtur --- Purus amor mercenarius non est.

Resp: S. Bernardum loqui in hypothese, quod hæreditas sit aliud à visione & amore Patris, qualis est temporalis & terrena, non ex hypothese, quod hæreditas sit visio & amor Patris, qualis est cælestis & æterna. Dominus pars hæreditatis meæ ait David Psal: 15. Hæc est vita æterna ut cognoscant te

Deum solum verum Joan: 17. Ipse S. Bern: se explicat Serm: 8. de diversis: Nunquid enim mercenarium eum, quis aestimet, qui paternæ inhiat hæreditati, eamq; toto affectû appetit & exspectat, quam nimirum filii mercedem esse, non mercenarii Propheta testatur. Cum dederit, inquit, dilectis suis somnum, ecce hæreditas Domini, filii merces fructus ventris.

Replicabis: DEUM castè non diligit, qui propter se diligit, non propter ipsum, ait S. Bern: & hic talis non potest obedire Prophetæ, qui ait: *Confitemini Domino quoniam bonus.* Confitetur quidem, quia fortasse bonus est sibi, non autem quoniam bonus est in se. Quamobrem noverit illud in se dirigi, ab eodem Propheta opprobrium: *Confitebimur tibi, cum benefeceris ei.* Est qui confitetur Domino, quoniam potens est, & est qui confitetur, quoniam sibi bonus est, & item, qui confitetur quoniam simpliciter bonus. Primus Servus est, & timet sibi, secundus mercenarius & cupit sibi, tertius filius, & defert Patri. Itaq; & qui timet, & qui cupit, uterq; pro se agunt, sola quæ in filio est charitas, non quærit quæ sua

sua sunt: ergo intuitus proprii commodi & mercedis cum amore casto & puro cohærere non potest.

Resp: Intuitum mercedis temporalis & à DEO distinctæ non cohærere quidem cum amore casto & puro, sed intuitum & desiderium mercedis æternæ, quæ DEUS est cum amore casto optimè cohærere, & ab illo proficisci. DEUM enim ideo spectat & desiderat ut bonum suum, quia summum bonum est, & finis ultimus omnis creaturæ intellectualis, & hoc nomine expetendus. Cæterum ille solus convincitur non castè diligere, *qui magis aut certe solum diligit bonum quatenus suum & illud ad se reffert, non se ad illud, eoq; vult uti, non frui.* Qui autem DEUM diligit & cupit, ut finem ultimum, ut suum & omnis creaturæ intellectualis beatificum bonum, eoq; vult frui, id est, *ei amore inhærere propter ipsum* ut loquitur S. Aug: seipsum ad DEUM refert, non DEUM ad se, neq; diligit magis, quatenus bonum suum est, quàm quatenus simpliciter bonus est, Quare non est *amor privatus* de quo Bern:

ait: quippe qui mutat interdum vultum vel actum, affectum nunquam. Filius igitur cupiens hæreditatem Patris, Deum ut summum suum & omnis creaturæ intellectualis bonum desiderans, ut eum sine fine diligat, eoq; fruatur, mercenarius non est, neq; desiderium illud est cupiditatis, sed charitatis. Et qui flagrat hoc desiderio, illi non convenit S. Bernardi sententia: *Facit & mercenarius opus DEI, sed quia non gratis, propria trahi cupiditate cognoscitur.*

Castus certè & purus amor est, quò DEUS colitur & amatur propter mercedem, quæ est ipse, quâ DEUS amatur ut beatitudo nostra, castum etiam desiderium quo desideratur ut objectum Theologicæ spei, adeoq; ut nobis bonus. Unde S. Aug: in Psal: 55. *Nos ergo DEUM amemus Fratres purè & caste. Non est castum cor, si DEUM ad mercedem colit. Quid ergo? Mercedem de DEI cultu non habebimus? Habebimus plane, sed ipsum DEUM, quem colimus, ipse nobis merces erit.*

Insistes. Cassianus Collat. II. c. I. mercenariam spei cupiditatem definit: *in qua tam bonitas largientis, quam premi-*

um retributionis expetitur, ergo perfectus non desiderat præmium retributionis.

Resp: Perfectos non desiderare magis præmium retributionis, quam bonitatem largientis, quod perversum esset, sed præmium retributionis desiderant, quod est ipsa bonitas largientis; hoc enim Christianæ spei castum desiderium est, non mercenaria spei cupiditas. Hoc desiderio æstuans precatur homo Christianus: *Pater noster qui es in cælis, sanctificetur nomen tuum, adveniat regnum tuum.* Cum Christianæ professionis finis sit regnum cælorum, tantum abest, ut illius desiderium sit imperfectorum, alias David vir secundum cor DEI horum numero veniret, qui Psal: 41. & alibi Deum desiderat, nimiaq; siti ad eum fertur.

Urgebis. Desiderium beatitudinis quatenus bonum nostrum nunquam est sine proprii amoris admixtione qui DEI æmulationem provocat, ergo non est sine cupiditate, igitur cum amore puro cohærere non potest.

Resp: Falsa niti suppositione primam propositionem. Amor enim proprius,

Uu 5

qui

qui DEI æmulationem provocat, ille est, cujus impulsû beatitudinem nostram extra DEUM quærimus. Sed beatitudinem nostram in solo DEO quærere & desiderare casti amoris, & ordinatæ charitatis actus est. DEUM gratis, & purè castèq diligit, qui illum colit propter æterna bona, ut passim inculcat S. August: *Exigitur ergo a te, (ait) ut & tu eum gratis colas, non quia dat temporalia, sed quia præstat æterna.* In Psalm: 43. Ita colere DEUM perfectorum est. Unde ad Abraham ait DEUS Genes: 15. & 17. *Ego merces tua magna nimis. . . . Ambula coram me & esto perfectus.* Si DEI ut boni nostri & beatitudinis nostræ desiderium, cupiditatem vocare placeat, non admodum contendam de verbo; sed cupiditatem dicam ordinatam, cupiditatem perfectæ charitati non repugnantem, sicut nec ei repugnat timor castus. *Nunquam erit charitas sine timore, sed casto, nunquam sine cupiditate, sed ordinata.* S. Bernard: Tract: de dilig: DEO c: 14.

Fatendum tamen est, si regnum cælorum carnaliter cogitetur velut aliud
quid

quid a Deo, quô felices æternum simus, sic regnum cælorum non desiderari sine amoris proprii aliqua labe, neq; huiusmodi desiderium ad amorem castum & purum, sed ad spem mercenariam pertinere. Hinc S. Aug: in Psalm: 43. ait: *Ipsa æterna, vide, ne aliter cogites, & cogitando æterna carnaliter, nihilominus DEUM gratis non colas. Quid enim? Si ideo colis DEUM, quia dat tibi fundum; nonne eum culturus es, quia tollit tibi fundum? Sed forte tu dicis: Ideo eum colo, quia dabit mihi villam, non tamen temporalem. Nihilominus adhuc corruptam mentem geris; amore enim casto non colis, adhuc mercedem expetis. Ea enim vis habere in futuro sæculo, quæ hic necesse est, ut relinquant, mutare vis voluptatem carnalem non amputare.*

Dices. Majoris perfectionis est citra spem mercedis Deo servire, ergo animæ quæ ad vitæ spiritualis & puri amoris statum pervenerunt, beatitudinem non desiderant, neq; a Deo petunt, sed in sancta indifferentia sunt constitutæ, & in Dei voluntate placidissimè conquiescunt, non ut Isrâelitæ, sed ut Christi discipuli.

Resp:

Resp: Imperfectionis esse DEO servire spe mercedis temporalis, sicut illi carnales Israhelitæ serviebant; perfectioni tamen non repugnare intuitum mercedis æternæ, quæ DEUS est, DEIq; amor & perpetua fruitio: nec maioris esse perfectionis citra spem huiusmodi mercedis DEO servire; alioquin spei Christianæ exinanitio ad statum perfectionis pertineret vel necessaria esset, quod vel cogitare & absurdum & impium; pertinaciter verò defendere hæreticum est: *Bonum, quod propriè & principaliter sperare debemus (inquit Angelicus) est bonum infinitum, quod proportionatur virtuti DEI adiuvantis. Nam infinitæ virtutis est proprium ad infinitum bonum perducere. Hoc autem bonum est vitæ æternæ* - - - *Non enim minus aliquid ab eo sperandum est, quam sit ipse, cum non sit maior ejus bonitas, perquam bona creaturæ communicat, quam ejus essentia. Et ideo proprium & principale objectum spei est beatitudo æterna. Hic q. 17. a. 2. Nemo sane Catholicus consideratè dixerit, imperfectionis esse DEUM desiderare, utq; regnum DEI nobis veniat, quod*
ven-

venturum est omnibus Sanctis, quibus dicetur: *Venite benedicti Patris mei, possidete paratum vobis regnum.* Nunquid verò desiderare istud Christus non docuit, cum iussit omnibus fidelibus, etiam ipsis Apostolis, ut orarent sic: *Pater noster qui es in cælis - - - Adveniat regnum tuum?* Nunquid Ecclesia in persona imperfectorum solum canit: *Æterna fac cum Sanctis tuis in gloria numerari. Saluum fac populum tuum &c?* Si quis id dixerit, dicam illi, quod Pelagiò & Cælestio in materia gratiæ Augustinus: *Exerce contra Oratores Ecclesiæ disputationes tuas.* Cum itaq; legem credendi lex statuat supplicandi, omninò concludendum est desiderium & intuitum æternæ mercedis, quæ DEUS est, ut videndus in se, & amandus sine fine, amoris perfectioni hac in vita non repugnare, nequè à perfecta contemplatione excludi; imò vitæ contemplativæ ita proprium esse, ut sine sancto illo desiderio contemplatio hujus vitæ mera sit illusio, ut docet S. Gregorius M. Hom. 14. in Ezechielem. Cæterum contemplationis actum in hac vita continuum non esse, docet ibidem

S.

S. Gregorius neq; tamen à perfectione vitæ interioris excidere justos, qui à contemplatione ad labores & actiones bonorum operum revocantur; imò id aliquando esse melius, quidquid dicant Quietistæ, indubium est.

Dices 2. Animæ, quæ ad statum sanctæ indifferentiæ pervenerunt, nulla amplius eliciunt desideria salutis æternæ, ergò nihil petentes in Deo requiescunt. *Prob: Ant:* Istud est discrimen inter statum resignationis justorum & statum Sanctæ indifferentiæ, quod in primo desideria mercenaria salutis æternæ DEI voluntati submituntur; in altero verò nullum sit penitus mercenarium desiderium, sed generale duntaxat desiderium eorum quæ DEUS vult, quò fit, ut anima sacrificium suæ salutis DEO offerat exemplò S. Pauli, qui de se ipso scribit. *Optabam enim ego ipse anathema esse à Christo pro Fratribus meis Rom 9. ergo.*

Resp: 1. Sanctam indifferentiam ad eventus duntaxat hujus vitæ, ad prospera, & adversa, vitam et mortem, & ad solatia sensibilia; nusquam autem ad æter-

æternam salutem, & media ad illam conducentia pertinere. Ut enim ait S. Bernard: Serm: 80. in Cant: *Eò anima magna est, quò capax æternorum, eò recta, quò appetens supernorum.* Hinc.

Resp: 2. Desiderium fruitionis DEI mercenarium nemo absq; errore dixerit. Generale desiderium omnium, quibus etiam, & reprobationis, & aliorum, & suæ & peccati permissiva decreta continentur, sancta indifferentia non admittit. Illud namq; desiderium cum spe Christiana consistere non potest. Hinc.

Resp: 3. Frustra novi erroris patroni præsidium quærunt in exemplo, & verbis S. Pauli. *Optabam enim ego &c.* Duobus namq; modis à Patribus hic locus explicatur, quorum neuter desperato Quietistarum figmento favet. S. Hieronymus anathematis nomine mortem corporis, & temporalem intelligit, quam Apostolus pro salute Isràélitarum subire optaverat, non reprobationem, & damnationem æternam Epist: 151. ad Algasiam q. 9. Hanc explicationem discere potuit S. Hieronymus à S. Gregorio Nazian: qui se ut anathema Deo devo-

devovebat, ad Macedonianorum conversionem procurandam. Orat: 44.

Altera interpretatio est S. Chrysostomi, Theodoreti. S. Thomae, quæ hypothese[m] impossibile[m] spectat, & desiderium conditionatum non absolutum. Optarem esse Anathema à Christo pro fratribus meis, *si modo fieri posset*. Si per DEI legem & justitiam id liceret. Sic verba non absimilia Moyfis DEO pro populo supplicantis S. August: intellexit. q. 147. in Exodum. *Dele me de libro vitae. Securus hoc dicit, ut in consequentibus ratiocinatio concludatur, id est, quia DEUS non deleret Moysen de libro suo, populo peccatum illud remitteret.*

Objicies 2. Est possibilis puri amoris actus, quò DEUS ab anima Sancta propter suam bonitatem, sine ullo ad beatitudinem, & mercedem æternam respectu diligatur; sed hi actus repeti possunt, ut ex illis nascatur, habitus; ergo.

Resp: ad Min: Possunt repeti, sed non semper ex repetitis actibus nascitur habitus, sed quandoq; tantum perficitur. Ad summum actus amoris puri producit (si ita loqui fas est) habitum cha-

rita-

ritatis in peccatore pœnitente; illum auget, & perficit in iusto; sed in eo novum habitum non producit, cùm charitas unius sit speciei. Neq; ad habitualement puri amoris statum animam evehunt quidam puri amoris actus raptim elicti, cùm habitualis ille status proprius sit Beatorum, non viatorum, in quibus semper carnalis concupiscentiæ aliquid superest expugnandum. Nam caro in terram cogit, mens sursum tendit, rapitur amore, sed tardatur pondere, de hac re scriptura ita loquitur. Sap: 9. Corpus enim quod corrumpitur, aggravat animam, & deprimit terrena inhabitatio sensum multa cogitantem. Si ergo caro in terram vergens onus est animae, & sarcina praegravans praevolantem; quantum quisq; delectatur superiori vita sua, tantum deponit de sarcina sua. Quamdiu caro non habet statum proprium cælestis beatitudinis; quamdiu non sumus aequales Angelis DEI, in nobis caro concupiscit adversus spiritum. Ait S. August: lib: de utilit. Iejunii. Adeoq; in nemine est habitualis puri amoris status secundum legem ordinariam, quamvis sit perfecta charitas

ritas, qualis in via potest haberi, *foras*, quidem *mitens timorem* non tamen spem & desiderium mercedis æternæ, quæ DEUS est, sed DEUM diligens, ut summum & beatissimum bonum nostrum. Quam amabilitatis rationem nec ipsa Beatorum charitas excludit. DEUM enim ut bonum suum, ut beatitudinem suam, ut mercedem suam etiam æternam diligunt; quorum tamen amorem mercenarium Catholicus nullus dixerit.

CONSECTARIUM.

Homo, in quocunq; statu conditus fuisset; DEUM amare super omnia debuisset. Si in puro naturæ statu conditus fuisset, absq; ullo ad supernaturalem beatitudinem ordine illum diligere debuisset amore naturali ut naturæ Authorem, ut creatorem, conservatoremq; suum, omnisq; boni in illo ordine Largitorem, ut suæ beatitudinis naturalis objectum, ultimumq; in eo statu finem. Sed cum DEUS *magna & pretiosa* (2. Petri 4.) *promissa donaverit, ut per hæc efficiamur Divinæ consortes naturæ*;

ra; cum dederit, ut per suam gratiam filii DEI nominemur & Simus 1. Joan 3. & consequenter hæredes Dei cohæredes autem Christi Rom. 8. castus, purus, & perfectus illius amor non excludit pro hoc statu à motivo, seu incitamento eum diligendi, bona, quæ nec oculus vidit, nec auris audivit, & quæ in cor hominis non ascenderunt, quæ præparavit diligentibus, se. 1. Cor 2. Non excludit intuitum hæreditatis incorruptibilis, & incontaminatæ conservatæ in cælis filiis DEI. Hunc esse puræ benevolentiae amorem qui negaverit, Scripturæ Sacræ, Traditioni, & Theologorum Principibus contradicit. Diversi gradus charitatis ait Angelicus hic q. 24. a. 9. distinguuntur secundum diversa studia, ad quæ homo perducitur per charitatis augmentum. Nam primo quidem incumbit homini studium principale ad recedendum à peccato & resistendum concupiscentiis ejus, quæ in contrarium charitatis movent, & hoc pertinet ad incipientes, in quibus charitas est fovenda, vel nutrienda, ne corrumpatur. Secundum autem studium succedit, quod homo principaliter intendat ad hoc ut in bono proficiat, & hoc studium pertinet

net ad proficientes, qui ad hoc principaliter intendunt, ut in eis charitas per augmentum roboretur. Tertium autem studium est, ut homo ad hoc principaliter intendat, ut DEO inhæreat, & eò fruatur, & hoc pertinet ad perfectos, qui cupiunt dissolvi & esse cum Christo. Charitas igitur perfectorum in hac vita tantum abest, ut beatitudinis cælestis, æternæq; mercedis, quæ DEUS est, DEIq; fruitio desiderium excludat, vel beatitudinem suam, ac salutem æternam, ut Somniani, Quietistæ, sacrificio absoluto devoveant perfecti, ut e contra perfectio charitatis ferventius in ipsis desiderium excitet, Deo fruendi, æternumq; vivendi cum Christo.

Hunc velut Authorem fidei & consummatorem, in quo nos DEUS omni benedictione spirituali in cælestibus benedixit. Iusti in omni statu recipiunt etiam in ferventibus contemplationis initiis, & extremis probationibus, fidei explicitæ actus in ipsum elicere tenentur, ac recogitare eum, qui talem pro ipsis & pro omnibus hominibus, sustinuit à peccatoribus adversus semetipsum contradictionem Hæbr : 12. sed & desolationem extremam à Deo in
parte

parte inferiori animæ sanctæ, *ut ne fatigantur animis suis deficientes.* In illo desolationis interiori statu se promissionum Divinarum spe solari debent, & secundum superiorem animæ partem gaudere, non quidem sensibili gaudio, quo ad probationem fidei, amorisq; sui tunc à Deo privantur, sed illo, quod à charitate inseparabile est, & S. Spiritûs fructus: *communicantes Christi passionibus gaude* 1. Petri 4. *ut & in revelatione gloriæ ejus gaudeatis exultantes.* Qui contrarium docent, Quietistæ, & Spurii Mystici, omnemq; Christi JESU intuitum, & considerationem distinctam ac reflexam ab initiis ferventis contemplationis, & ab extremarum probationum statu eliminant, nonne dicere videntur: *Exinanite, exinanite usq; ad fundamentum in ea?* psal. 136. Illud utiq; fundamentum, de quo Apostolus ait. 1. Cor. 3. *Fundamentum aliud nemo potest ponere præter id, quod positum est, quod est Christus JESUS.* In quos proinde (Quietistas) optime quadrat illud S. Hilarii in locum laudatum Psalmi dictum. *Omne igitur Religionis initium, omne fundamentum spei no-*

stræ evacuari tentant, ne qua spes boni alicui relinquatur. Fundamento enim fidei quod est Christus eruto, & everso: ne ipsius quidem ætificandæ per pœnitentiam veniæ consolatio relinquatur.

Hinc asserere cogitationem de Christo JESU & ejus mysteriis, omnemq; erga ipsa devotionem à contemplatione excludi, hæreticum jure censetur, ut patet ex articulis Molinosi damnatis ab Innocentio XI. quorum unus numero 21. *In oratione opus est manere in fide obscura & universalis, cum quiete & oblivione cujuscunq; cogitationis particularis, & distinctionis attributorum DEI, ac Trinitatis, & sic in DEI præsentia manere ad illum adorandum & amandum, eiq; inserviendum, sed absq; production ætuum, quia DEUS in his sibi non complacet*

Et num. 35. Non convenit animabus hujus vitæ internæ, quod faciunt operationes etiam virtuosas ex propria electione & activitate, alias non essent mortuæ, nec debent elicere actus amoris erga B. Virginem, Sanctos, & Humanitatem Christi; quia cum ista sensibilia sint objecta, talis est amor erga illa.

At

At cum idem contemplationis, quod fidei est objectum, DEUS scilicet, divina attributa, Christus, & omnia ejus mysteria, sermones, gesta, miracula, beneficia, passionis imò & Divini quilibet effectus, saltem minus præcipuum, errant miseri homines, aliosq; in errores inducunt.



ARTICULUS V.

De Charitate erga Proximum.

§ I.

De præceptis Charitatis erga proximum.

Quid nomine proximi intelligatur, supra est dictum, nempe esse homines supernaturalis beatitudinis capaces, sive justi sint, sive injusti, fideles aut infideles amici, vel inimici, reprobi, aut prædestinati. Duo sunt charitatis præcepta; primum & maximum, quo diligimus DEUM; alterum quo amamus proximum. Hæc duo gravissima præcepta sæpius in Scripturis inculcantur: *Diliges Dominum Deum tuum Hoc est maximum*

Et primum mandatum. Secundum autem simile huic: diliges proximum tuum sicut te ipsum. In his duobus mandatis lex pendet & Prophetæ. Math. 22. Item Joan. 13. Hoc est præceptum meum, ut diligatis invicem sicut dilexi vos. Hanc dilectionem veluti characterem atq; insignem Christianæ professionis notam assignat ibidem. In hoc cognoscent omnes quia discipuli mei estis, si dilectionem habueritis ad invicem. De fide ergo est dari præceptum diligendi proximum. Præceptum hoc naturale est, quatenus naturalem amorem imperat; tali namq; amore proximum diligere tenemur, prout nobis similis in natura est, cognitus, vicinus, &c. Præcepto autem Divino eum diligere adstringimur amore supernaturali & charitatis.

Petes 1. Præceptum illud obligatne, ut peculiaribus actibus internis proximum diligamus?

Resp. Affirm: Contraria namq; sententia proscripita est in his duabus propositionibus. 1. Non tenemur proximum diligere actu interno & formali. 2. Præcepto proximum diligendi satisfac-

facere possumus per solos actus externos. Opera exteriora mortua sunt ad vitam æternam nisi charitate vivificentur; *si Charitatem non habuero, nihil mihi prodest*, ait Apost: *Noli attendere quid floret foris, sed quæ radix est interna* ait S. Aug. Tract. 8. in Epist: Joannis. Porro hic actus, quo diligere jubemur proximum debet esse actus distinctus, ab actu amoris; quo DEUM diligimus, quoniam duo sunt præcepta distincta, quorum alterum DEI, alterum proximi amorem jubet; ergo duobus actibus distinctis hæc præcepta implenda sunt. Quamvis proximum propter Deum diligere debeamus, ut advertit *Sylvius*. 1. propter Deum ut causam formalem talis dilectionis. 2. propter Deum, ut causam moventem. 3. propter Deum ut causam finalem, ideoq; cum diligimus super omnia Deum, ex toto nempe corde, hoc ipso virtualiter diligamus proximum, nihilo tamen secius distinctum præceptum primo simile nobis imponit, proximum diligendi. Ergo.

Petes 2. Obligatne perse hoc præceptum ad proximi dilectionem?

Ww 3

Resp.

Resp. Si sermo sit de proximo in communi, certum est, nos teneri actu interno, & formali & per se proximum diligere, ut in terminis docet S. Thomas hic q. 25. a. 8. Si verò sit de proximo in particulari, convenit inter Theologos amandum esse necessitate tantum urgente, vg. sublevandæ illius inopiæ, aut odii deponendi, dissidii componendi &c.

Petes 3. Præceptum istud, quo jubemur per se proximum in communi amore interno & formali prosequi, quam frequenter obligat?

Resp. Cum S. Scripturæ tanto fervore tanta verborum emphasi, & efficacia, charitatis suadent, & imperant exercitium, ut continuam nobis charitatem præcipere videantur, tam frequenter actus amoris nobis repetendi sunt, ut moralis quædam charitatis flamma continuata, in nostris præcordiis ardeat.

Petes 4. Quoties præceptum istud obligat per accidens?

Resp. 1. Dum gravis odii tentatio animum pulsatur: 2. Dum adstringimur proximo periclitanti succurrere, aut ipsum

sum necessitate quacunq; pressum levare; lex quippè charitatis absq; actu interno impleri nequit. 3. Dum gravis injuria, sive in bonis famæ, sive in bonis animæ, vel corporis proximo inferatur. 4. Dum proximus in extrema necessitate positus, nostro eget consilio, auxilio spirituali, aut temporali. In hac necessitate adstringimur monere incautum, imminetia pericula patefacere, sacramenta ministrare, feras proximi bona devastantes abigere &c.

Petes 5. Quid significat præceptum urgere ad proximi dilectionem in particulari, quantum ad promptitudinem animi?

Resp: Omnes cum S. Thoma docent nos paratum animum habere debere ad diligendum quemcunq; in singulari, si necessitas occurreret. Porro hæc promptitudo in eo consistit, quod animus noster re ipsa charitate ardeat erga proximum suum in communi. Ab hac communitate neminem excludit charitas vera. Experimentum habere vis, an insit tibi charitas erga proximum tuum in communi? Vide promptus.

ptusne sis in occasione vel oblatae, vel acceptae injuriæ ad diligendum Fratrem tuum in singulari. Qui ergo amare recusat hos aut illos occasione data, proximum reipsa non diligit; quoniam promptitudo animi ad diligendos Fratres singulos, effectus est charitatis in communi. Charitas illa in animo imprimit hanc dispositionem, inclinationem, & præparationem; relinquit in sinu cordis ignis scintillas, quæ occasione oblata continuo accenduntur.

§ II.

Regulae servandae in dilectione proximi.

Diliges proximum tuum sicut teipsum.
 Ut particula illa *sicut teipsum* perspicuè explicetur, S. Thomæ verba hic transcribenda sunt, qui q. 44. a. 4. ait. *Modus autem dilectionis tangitur, cum dicitur sicut teipsum, quod non est intelligendum, quantum ad hoc, quod aliquis proximum sibi aequaliter diligat, sed similiter sibi. Et hoc tripliciter: Primo quidem ex parte finis, ut scilicet aliquis diligat proximum propter Deum, sicut seipsum propter Deum diligere debet, ut sic sit dilectio proximi*

ximi sancta. Secundo ex parte regulæ dilectionis, ut scilicet non condescendat proximo in aliquo malo, sed solum in bonis, sicut & suae voluntati satisfacere debet homo solum in bonis, ut sic sit dilectio proximi iusta. Tertio ex parte rationis dilectionis, ut scilicet non diligat aliquis proximum propter propriam utilitatem vel dilectionem, sed ea ratione, quod velit proximo bonum, sicut vult sibi bonum; ut sic dilectio proximi sit vera. Ex hac doctrina nonnullæ regulæ fluunt in proximi dilectione servandæ.

Regula 1. Proximus à nobis diligendus est amore affectivo & effectivo; qui ex corde puro & conscientia non ficta proficiscens, proximo bona cupit, & hic amor est affectivus, ac pro viribus & circumstantiis bona confert; hic est effectivus simul. Per bona, autem hic intelligo vera & Divina. Amor quippe noster mutuus illius, quo Christus nos dilexit, amoris imago & similitudo esse debet; Mandatum novum do vobis, ut diligatis invicem, sicut dilexi vos. Joan: 13. Non ideo autem nos Christus dilexit, ut dignitatibus, titulisq;

lisq; nos ornaret, ut divitias terrenas nobis conquireret, & similibus, quæ mundi sunt, nos satiaret; sed ut amicos Dei, suiq; viva membra nos constitueret, ut Sancti, Deiq; amatores essemus. Igitur amandus proximus, ut Deo vivat, ut filius Dei sit, atq; Dei filiorum hæreditatem in cælo assequatur. Hæc amoris affectivi officia erga ipsum sunt. Amore autem effectivo, impedimenta & obstacula, quæ ipsius remorantur salutis negotium, auferenda sunt. Opem, auxilio aut opere, aut consilio, quibus in salutis via ipsum adjuvemus, quantum in nobis est, ipsi convenit à nobis suppeditari.

Regula 2. Fraternæ dilectionis characteres Divinè explanat, & nobis ante oculos ponit Apostolus 1. Cor: 13. *Charitas 1. patiens est in perferendis proximi defectibus, moribus nostris dissimilibus & sæpè pugnantibus. 2. Benigna est in conversatione illius, inq; illius curandà salute. 3. Non amulatur neq; apertè neq; occultè nec per cuniculos, sive proximi merita silendo, sive illius virtuti aut detrahendo, aut*
sub-

subtiliter labes & umbras aspergendo, ejusq; prosperitati nullo modo invidet.

4. *Non agit perperam*, id est perversè contra aliquem. Nullus enim injustè agit contra illum, quem diligit sicut seipsum, ait S. Thomas in hunc locum, juxta illud Isaiaë 4. *Quiescite agere perversè*, v. g. fraudes intentando. 5. *Non inflatur*, ostendit, ait S. Thomas, quomodò charitas facit vitare mala, quibus aliquis deordinatur in seipso. v. g. ob dotes sive corporis, sive animæ, sive divitias, sive nobilitatem, animiq; magnitudinem. 6. *Non est ambiciosa*, ut in proximum arroganter dominetur. 7. *Non quærit, quæ sua sunt*, sed hæc posthabet, ut proximo egeni succurrat, ut ejus necessitatem levet. 8. *Non irritatur*, injuriis laceßita, ut vindictam sumat, aut quidpiam mali rependat. 9. *Non cogitat malum*, sed salva veritate, omnia in bonam partem interpretatur; quia ut ait S. Thomas, *charitas non permitit hominem per varias suspiciones & temeraria judicia cogitare malum de proximo*. Ideò 10. subditur: *Non gaudet super iniquitate*, sed

pec-

peccata detestatur; quia congaudet veritati. 11. *Omnia suffert*, absq; turbatione, suffert omnes defectus proximi, omniaq; adversa, ut vitam assequatur æternam. 12. *Omnia credit* ob authoritatem Dei revelantis. 13. *Omnia sustinet*, ob desiderium æternæ felicitatis; 14. *Omnia sperat*, quæ promittuntur à Deo innixa Omnipotentiae Divinae auxilianti.

Regula 3. Præcipua officia charitatis fraternæ describit Apostolus cap: 6. ad Gal: *Alter alterius onera portate, & sic adimplebitis legem Christi.* Ut pacis vinculo & Christo & nobiscum agglutinemur, sola charitas, quæ propter Christum omnia suffert, hanc cordium conjunctionem inducere, & conservare valet. *Nunc verò cum in hac vita, id est, in hac via sumus, onera inviceni nostra portemus, ut ad eam vitam, quæ caret omni onere, pervenire possimus.* ait S. Aug: lib: 83. Quæst: 71. Hinc & Apostolus de se dicit: *Omnia omnibus factus sum ut omnes lucrificerem.*

Regula 4. Certum indicium est nos diligere Deum, si diligamus proximum.

Tibi

Tibi & mihi illudere vales, dicens, te amare Deum. Si dixeris te amare Deum falsitatis te revincere non possum, aliter, quam ostendendo, te diligere Deum non posse, cum proximum tuum aut odio habes, aut ut oportet, non diligis. Si ergò cupis noscere, an verus Dei sis amator, qualem te esse ipsum nomen *Christianus*, jubet & præcipit; vide, qualis tuus amor sit erga proximum; sicq; ex illius mensura aut defectu, istius mensuram aut defectum accipies, & videbis; cum duo hæc mandata sic conjuncta sint, ut unum sine altero stare nequeat. Aurea sanè S. August: assertio in Epist: ad Galatas numero 45. *Cum ergo in duobus præceptis dilectionis Dei & proximi perfecta sit charitas; cur Apostolus solum proximi dilectionem commemoret? Nisi quia in dilectione Dei possunt mentiri homines, quia variores tentationes eam probant; in dilectione autem proximi facilius convincuntur eam non habere dum iniquè cum hominibus agunt. --- Unde & Joannes dicit: Qui non diligit Fratrem suum, quem videt, Deum, quem non videt, quomodo-*

modò potest diligere? *Mentiebantur enim quidam dilectionem Dei se habere, & de odio fraterno eam non habere convincebantur, de quo judicare in quotidiana vita, & moribus facile est.*

CONSECTARIUM.

In id ergo omni studio incumbe, ut amor tuus in proximum sit sincerus, fervens, sæcundus, & constans, modò in auxilio vel consilio egenti ferendis, modò in ejus defectibus dissimulandis, qui dissimulari possunt, quod benè notandum; modo in ejus erratis placidè corrigendis. Et hic in proximum genuinus amor moraliter certum faciet te amore quoq; Dei flagrare; cum amor in proximum sit fructus amoris in Deum. Ex his quoq; facilè colligis, quam verum sit à dilectione Dei & proximi universam pendere legem & Prophetas. Si enim sincerè diligis Deum illius mandata fervas; hoc enim indicium Divinæ dilectionis in Evangelicis & Apostolicis scriptis exaratum sæpissimè legimus. Si proximum revera amas, omnia officia æquitatis, beneficentiæ, ho-

hospitalitatis, justitiæ erga ipsum exerces. Ea quippe ei præstas, quæ ab aliis tibi rependi velles; & quid tibi fieri nolles, neutiquam illi facies. Quoniam ergo tu nunquam decipi in contractibus, opprimi in foro, derelinqui in angustiis, calumniari, traduci, aut aliquod damnum subire, fraudibus circumveniri, dolo capi, aut quid simile pati vis; nihil quoq; hujusmodi proximo inferre audebis, quoties illum Christi charitate dilexeris. Ea mensura metieris fratrem tuum, qua ipse remediendus esse cupis.

§ III.

Ordo in charitate servandus.

Imprimis præ oculis habenda est divisio amoris; alius dicitur innatus seu necessarius, qualis est amor beatitudinis in communi; alius liber, & eligens; alius naturalis, alius supernaturalis; alius Dei, alius creaturarum; alius fruens, alius utens, alius concupiscentiæ, alius amicitiae. Amor concupiscentiæ quandoq; pressè, interdum latius accipitur. Pressius accipitur pro

ap-

appetitione bonorum temporalium & sensibilibus, quæ bona ab Evangelista in tres species secantur, nempe honorum, divitiarum, & voluptatum sensibilibus. Latius accipitur concupiscentiæ amor prout appetit bona, quæ conducunt ad felicitatem tum animæ tum corporis.

Nunc ordo, qui in amore servari debet, exponendus. Primus autem ordo, quem in amando servare debemus est ipsiusmet amoris ordo. Si enim à S. Augustino quæras, quid sit bonus amor? Respondet, quod sit ordo amoris, seu amor ordinatus. Et si petas in quo situs est hic ordo? Responsionem exhibet lib: 19. de Civit: Dei cap: 13. *Est parium dispariumq; rerum sua cuiq; loca tribuens dispositio.* Unicuiq; diligibili suum tribue locum; si superioris sub-sellii sit, superior illi in corde tuo locus concedendus; si inferioris, inferior. Quisq; secundum mensuram suæ bonitatis diligere debet. Mensura dilectionis amantis est mensura bonitatis, quæ in re amata reperitur. Porro quàm ejusmodi ordo amabilis sit, inde innotescit, quod illum justitia pax & decor comi-

comitantur. Quæ enim major justitia, quam suum cuiq; tribuere? Quid magis decorum, quam parium dispariumq; ordinata rerum dispositio? In hac mirabili rerum harmonia pax, concordia, & tranquillitas tum universi hujus oculis pervii, tum Divinarum gratiarum splendent.

Duplex distinguitur ordo, alter amandi, alter subveniendi, ut docet Augustinus Epist: 148. *Charitas quæ tanquam nutrix fovet filios suos, non ordine amandi, sed ordine subveniendi infirmiores fortioribus anteposit.* Ordo amandi ex objecti dignitate, ordo subveniendi ex egestate personæ, quæ ope nostra indiget, accessitur. Uterq; ordo sub præcepto cadit, ut docet S. Thomas hic quæst: 44. a 8 & ex se est manifestum: quia objecta diligenda non sunt æqualis bonitatis, & amabilitatis, proinde ordo servandus in eorum dilectione.

Porro ut quamdam perspicuam ideam formare valeas tum personarum, tum bonorum, quæ ordine servato nobis diligenda sunt, primò personas, deinde bona oculis subjicio. Inter personas pri-

mum omnium Dominium DEUM tuum diligere debes. 2. Temetipsum. 3. homines. 4. homines sanctiores & DEI donis fulgentes, minus sanctis præferre debes; justos peccatoribus; superiores inferioribus, parentes uxori & filiis. In bonis; spiritualia seu supernaturalia, nempe gloria, beatitudo, gratia, merita primum locum occupant. Secundum bona naturalia, quæ corpus spectant, ut vita, integritas membrorum, sanitas & similia. Tertium bona exteriora, ut honor, fama, bona fortunæ. Tandem bonum commune antecellere bonum privatum debet. Hæc quantum ad amorem appreciationis. Quo ad amorem attentionis, ordo aliquando præposterus servandus est. *Attamen in bene ordinata actione, sæpè aut etiam semper ordo oppositus invenitur; Nam & circa proximi curam, & plus urgemur & pluries occupamur, & infirmioribus Fratribus diligentiori assiduitate assistimus; & paci terræ magis, quam cæli gloriæ jure humanitatis & ipsa necessitate intendimus. Nam & vera in hoc est charitas, ut qui indiget amplius, accipiat prius; & rursus in eo cara est veritas, si ordi-*

nem tenemus affectu, quam illa ratione. Sic S. Bernardus Serm: in Cantica. Hæc ut clarius pateant, breviter distinctis quæstiunculis sunt explicanda.

Petes 1. An quisq; se ipsum magis quam proximum diligere debet?

Resp: Cum amor erga se ipsum regula sit amoris in proximum; & juxta illud Eccles. 14: Qui sibi nequam est, cui alii bonus erit? concludit S. Thomas hic art: 26. art: 4. vel minimum nobis peccatum committendum non esse, ut à peccato proximum liberemus. Quid enim nobis prodesset totius mundi & omnium hominum lucrum, si anima nostra detrimentum subiret.

Petes 2. Teneturne homo propriam vitam corporalem magis diligere, quam vitam corporalem proximi?

*Resp: Affirmativè, ut enim S. Aug: lib: de mendacio cap: 6. ait: Si quis pro alterius temporali vita ipsam suam temporalem perdat, non est jam illum diligere sicut se ipsum, sed plus diligere quam se ipsum, quod sanæ doctrinæ regulam excedit. Pro-
pinquior est enim homo sibi ipsi præ omnibus aliis. Hæc tamen intelligenda*

sunt servatis servandis, nempe si comparatio fiat inter privatos. Nam nemo dubitat exponendam esse vitam temporalem ob bonum commune Reipublicæ, ob vitam Principis, ac alterius personæ ad commune bonum custodiendum necessariae. Ea etiam de causa licitum est propriam vitam periculo proximo mortis exponere, pro vita privata proximi, qui ad promovendam DEI gloriam aptior sit. Idem dicendum, si vitam tuam expone- res ad servandam vitam Patris, Do- mini, intimi amici, & Benefactoris; à quibus maxima beneficia recepisti. Item ministrando non modo spiritualia, verum etiam temporalia peste infectis; hujusmo- di enim exempla plura reperies in Histo- ria Ecclesiastica; & favere videtur id, quod dicitur Joannis 15. *Majorem charita- tem nemo habet, ut animam suam ponat quis pro amicis suis.* Vide S. Thom: in 3. dist: 29. a. 5. ad 3. Hinc colliges: Si absoluta comparatio fiat vitæ cum vita, nunquam est licitum vitam propriam pro alterius vita amittere. Si verò ratio movens non sit alterius vitæ absoluta præservatio, sed virtutis, honestatis aut amicitiae amor; amor,

amor, dico, non carnalis, sed charitatis, tunc licitum est alteri servandæ vitæ modos & instrumenta, cum periculo amittendi propriam, ministrare. Hinc etiam licitum non est pro amici honore, fama, bonisq; vitam mortis periculo exponere; quoniam honor, fama, bonaq; temporalia inferioris, vita humana superioris ordinis est. Perturbatur ergo charitatis ordo, si hæc pro illis prodigatur. Quare cum periculo vitæ (nisi aliud adsit motivum) non teneris succurrere proximo in extrema necessitate constituto. Pro Reipublicæ vero, civitatis & Principis conservatione non modo licet, sed etiam urget præceptum periculo mortis, propriam obicere vitam, & bona exponere. Quare milites in loco sibi destinato cum vitæ periculo consistere tenentur.

Petes 3. Tenemurnè cum vitæ periculo & bonorum temporalium jactura succurrere extremæ necessitati spirituali proximi?

Nota: Extrema spiritualis necessitas ea est, in qua homo constitutus æternum, nisi adjuvetur, periturus est. Gravis, à qua liberare se quidem valet, sed non

nisi cum magna difficultate. Communis, in qua sine gravi difficultate, absq; alterius ope, immunis evadere quis potest. Exemplo illustratur: Moritur infans inter peste infectos derelictus sine baptismo, nisi cum tuæ vitæ periculo baptismatis gratiam ei conferas. Adultus peccati mortalis reus, & eliciendæ contritionis ignarus, damnandus est, nisi te mortis periculo objicias, ut illum instruas. In gravi etiam necessitate constituti peccatores inveteratis habitibus gravati, qui copia laborantes Confessarij difficile elicere possunt actum contritionis. Tandem, qui in communibus peccandi periculis reperiuntur, in communi necessitate considerantur.

Resp: Affirm: ex illo r. Joan: 3. Sicut Christus animam suam posuit pro nobis. (Utiq; extremè laborantibus.) & nos debemus animam pro fratribus ponere. August: lib: de mendacio cap: 6. Temporalem vitam pro æterna vita proximi non dubitabit Christianus amittere. Vide S. Thomam hic q. 26. a. 5. Si autem tua vita sit necessaria bono communi Ecclesiæ vel Reipublicæ; tunc ordo charitatis servan-

vandus est, salus communis præferenda est unius privati saluti.

Si autem spiritualis necessitas proximi gravis tantum fuerit, & sit persona privata, tum vitam tuam præferre ejus necessitati debes, dummodo ex officio non tenearis, quod bene notandum; quia persona tuâ ope egens se ipsam à gravi necessitate liberare valet. Econtra si communis foret necessitas, ut tempore pestis, aut devastationis hostilis, si nullus adsit, qui sacramenta ministret, cum periculo vitæ etiam id facere debes, quoniam tunc periculum grave commune fideles manet. Ex his sequitur, si in gravi necessitate omnes devinciuntur titulo charitatis, in eadem & charitatis, & justitiæ titulo tenentur ad id Pastores, & omnes, qui ex officio præsumt; tunc enim contractus justitiæ populum inter & Pastores initus potissimum urget. Hæc quidem de jactura temporali, quam quis pati tenetur, ut proximorum animabus suppetias ferat. At de jactura spirituali aliter loquendum. Hinc.

1. Ut saluti spirituali proximorum
con-

confulas, non debes te probabili, rêvera tali, periculo exponere. Nam periculum probabile peccandi, peccatum probabiliter inducit; nunquam est licitum perpetrare aliquod vel leve peccatum, ob totius universi lucrum. Dixi *revera tali*; nam si probabilior & major fit perseverantiæ tuæ spes, tunc subire forti animo periculum poteris, precibus, & spe Divini auxilii munitus.

2. Nec ad horam velle privationem gratiæ seu charitatis ob aliorum salutem licitum est. Quia nobis prius & potius, quam aliis Divinæ amicitiae bonum desiderare & velle debemus; alioquin magis alios, quam nos ipsos diligeremus, qui diligendi modus est inordinatus amor. Insuper ad hoc conatus nostros semper conferre debemus, ne gratiâ Divina excidamus. Hinc.

3. A fortiori illicitum omnino est, velle in perpetuum carere beatitudine ob salutem proximorum; quia, ut dictum, talis voluntas est contra ordinem charitatis. Licitum vero est velle ad tempus dilationem beatitudinis ob proximorum salutem. Id enim suadet exem-

exemplum Pauli ad Philip: 1. *Coarctor autem è duobus, desiderium habens dissolvi, & esse cum Christo; permanere autem in carne propter vos. Vide S. Thomam in Commentariis, ubi inter alia dicit: Id est necessaria vita mea propter vestram utilitatem.*

Petes 4. Qui sunt in dilectione præferendi?

Resp: S. Thomas hic q. 22. a. 6. Cum principium dilectionis sit DEUS, aut ipse diligens; necesse est, quod secundum propinquitatem majorem ad alterum istorum principiorum major sit dilectionis affectus. Ille ergo proximus, qui alterutri horum principiorum, nempe DEO & tibi propinquior est, cæteris paribus præferendus est.

Hic adverte: quod obligatio servandi hunc ordinem prælationis tunc sit gravis, quando urget extrema necessitas succurrendi alterutri proximorum. Si enim aut levis, aut gravis tantum est necessitas, turbatio ordinis non erit mortalis absolute loquendo; spectandæ enim sunt circumstantiæ. Primum igitur succurrendum est Patri & Matri æqua-

æquali necessitate urgente; quia parentes sunt nobis magis conjuncti. Pater præferendus Matri, quod sit nobilius principium. Primum ergo omnium parentibus succurrere debes in pari necessitate, quia debitum contractum cum illis præcedit quodlibet debitum posterius. Sub alia tamen consideratione uxores & filii præferendi parentibus, ait Angelicus art: 9. & 11. Uxor quantum ad amorem intensivum & cohabitationem, cum sit una caro cum marito, omnibus præferenda est; quæ prælatio non impedit priorem ordinem respectu parentum. Filij etiam comparatè ad Patrem diligentem præferendi sunt parentibus. *Alio modo*, ait, S. Thomas, *comparatur ordo dilectionis ex parte ipsius diligents; & sic magis diligitur, quod est conjunctius, & secundum hoc filius est magis diligendus quam Pater.* Parentes ergo & filios præferre debes amicis, benefactoribus, magistris & aliis, ob conjunctionem naturalem & primam. Fratres absolute præferendi sunt cæteris minus propinquis, affines postponendi sunt consanguineis.

§. IV.

De inimicorum dilectione.

Petes 1. An dabatur in veteri lege præceptum diligendi inimicos?

Resp: Affirm: Quia hoc præceptum includebatur in præcepto de diligendo proximo; quia inimicus proximus est. Unde Eccles. 10. legimus: *Omniſ injuriæ proximi ne memineris, & nihil agas in operibus injuriæ.* Aliunde omnem vindictam sibi DEUS reservavit. *Mea ultio est, & ego retribuam.* Deut 32.

Nonnulli quidam cum Maldonato contrarium defendunt ex illo potissimum Math: 5. *Audistis, quia dictum est antiquis; diliges proximum tuum & odio habebis inimicum tuum.* Ego autem dico vobis diligite inimicos vestros &c. Divus Thomas omnium Patrum voce exponit locum hunc Math: in 3. Dist: 31. q. 1. a. 1. ad 2. *In veteri lege etiam homines tenebantur ad dilectionem inimicorum, sicut patet per auctoritatem.* Unde quod dicitur, odio habebis inimicum tuum, non est ex lege sumptum; quia nusquam hoc in litera invenitur; sed est additum ex prava interpretatione Judæorum, qui ex eo, quod præcipiebatur dilectio proximi

con-

concludebant, quod inimici erant odiendi.

Hoc repetit 1. 2. q. 107. a. 2.

Petes 2. Quid imponit præceptum hoc ut affirmans est, quid vetat ut negans?

Resp: primo modo jubet tum interiorem dilectionem, tum exterioram beneficentiam, juxta naturam præcepti affirmativi, obligantis semper, sed non pro semper. Quatenus negativum est, semper & pro semper urget, ita ut nunquam liceat vel ad momentum odio habere inimicum. Vi hujus præcepti tenemur omnem vindictæ affectum deponere, offensam ex corde remittere, nullum inimico malum velle.

Porro affectus, quò inimicum diligere debemus situs est in amore universali, quo proximum diligere tenemur propter DEUM, ab hoc siquidem universali amore in proximum excludere inimicos non possumus, ut docet S. Thom: hic q. 25. art: 8. Ubi duo statuit: primum in amore generali erga proximum includendos esse inimicos; alterum, necessariam esse animi dispositionem & promptitudinem ad peculiarem inimici dilectionem, necessitate urgente.

Hinc

Hinc 1. Illicitum est excludere inimicos à generali dilectione vg. oratione facta pro aliqua communitate ex mera liberalitate, nulla quippe ratio excludendi eos subesse potest, nisi inimicitia.

2. Illicitum est signa generalia benevolentiae inimicis denegare; quod autem signa specialia attinet; talia inimicis exhibere non est de necessitate praecepti, nisi secundum praeparationem animi, ut scilicet subueniatur eis in articulo necessitatis, secundum illud Prov: 25. Si esurierit inimicus tuus, ciba illum, si sitit, da illi potum; ait S. Thom: cit: q. a. 9.

Petes 3. Licitumne aliquando inimicum non salutare?

Resp: Odi causa nunquam licitum est. Licet verò 1. ob delicti punitionem, si is, qui salutationem negat, auctoritate polleat vindicandi injuriam, ut sunt Superiores, Judices. 2. Dum charitas erga inimicum hoc suadere videtur, ut si vg. ex tali negatione speretur inimici emendatio. 3. Cum certe praevideatur ejusmodi officia accipienda esse in signa vilipendi. Aliquando non licet

licet modo, sed oportet etiam talia negare officia, ne si exhibeantur, coniventiæ suspensiones præbeantur, juxta Joan: Epist: 2. *Si quis venit ad vos, & hanc doctrinam non affert, nolite recipere eum in domum, nec ei Ave dixeritis. Qui enim dicit illi Ave communicat operibus ejus malignis.* Quod de Hæreticis intelligitur, applicari verò, magna tamen moderatione potest aliis, qui Hæreticis simili sunt. Hæc tamen officiorum communium omissio aut suspensio illicita esset; si oportuna ad lucrum spirituale inimicorum agnosceretur.



ARTICULUS VI.

De Correctione fraterna.

Correctio fraterna definitur à S. Thoma hic q. 33. a. 1. quod sit *spiritualis eleemosina à charitate dimanans, qua quis secreta admonitione malum proximi, quatenus illi noxium est, removere studet.* Correctio duplex est, altera fraterna, quam descripsi, altera judicialis, quæ actus justitiæ est, bonumq; justitiæ spectat. Hæc

ab

ab iis solum præstari potest, qui publicâ authoritate præditi sunt; illa omnibus communis est: *Et mandavit illis unicuiq; de proximo suo.* Eccles: cap: 17.

Petes 1. Quæ sunt conditiones, ut præceptum fraternæ correctionis urgeat & obliget?

Resp: Plures sunt, ad quatuor commodè revocari possunt. 1. Gravis peccati notitia, moraliter certa, non dubia, aut probabilis. Quod tamen intellige, nisi periculum gravis damni immineret, & cum peccatum in malum proximi vergeret, essetq; emendationis spes; tum sola probabilis dubitatio sufficeret ad delinquentis emendationem faciendam. Dixi *gravis peccati notitia*, intellige mortalis, vel etiam venialis, quando illud viam aperit ad mortale, vel etiam si venialia habitualia essent. Etiam peccatum mortale ex ignorantia sive invincibili, sive invincibili commissum, vi hujus præcepti corripiendum est, quia hujusmodi homines illuminandi & edocendi sunt.

2. Conditió, ut spes habeatur emendatio-

dationis, saltem probabilis, si non certa; illa enim difficulter haberi potest.

3. Ut sit temporis & personæ oportunitas. Quare sæpe potest & debet correctio differri, dum expensis circumstantiis existimatur proximo futura salubrior alio tempore. Quia finis correctionis fraternæ est salus spiritualis proximi.

4. Ut commodè præstari valeat.

Petes 2. Utrum tam justī, quam peccatores corrigere debeant proximum delinquentem.

Resp: Affirm. Quia quisq; potest peccatum dimittere, aut officium resignare, si est Prælatus, aut etiam humiliter peccatum suum recognoscens, alium monere rogando, & tunc magnum facere potest profectum.

Petes 3. Utrum Prælati Ecclesiastici peccent subditos corripientes, dum ipsi sunt peccati labe polluti?

Resp: Communior sententia negat; nisi forte adsit scandalum, vel aliqua alia circumstantia. Idem judicium de Concionatoribus; quamvis enim Divinæ veritatis explicatio ex officio potissimum

simum peracta, actio sacra sit, tamen non ejusdem sanctitatis est ac Sacramenta, quorum administratio in peccato mortali facta, sacrilegio ministrum inficit. Tamen cum Cajetano & alijs, multi talem concionatorem peccati mortalis reum faciunt.

Petes 4. Tenenturné subditi suos Superiores corrigere.

Resp: Affirmat: S. Thomas. Correctio enim cum sit actus charitatis, ad eos omnes se extendit, quos charitate prosequi debemus; sed præcepto charitatis tenemur Superiores diligere; ergo, Peculiares tamen conditiones hanc subditorum in Superiores correctionem comitari solent, ut virtutis actus evadat; ut scilicet non cum protervia, & duritia, sed cum mansuetudine, & reverentia corrigantur. Unde Apost: dicit 1. ad Tim. 5. Seniore[m] ne increpaveris, sed obsecra ut Patrem. Hæc S. Thomas.

Petes 5. Qui sunt Superiores, qui ad correctionem speciali jure tenentur.

Resp; Prælati subditos, Parentes filios: domini famulos, mariti uxores, tutores pupillos, Parochus oves, Confessarij pæ-

nitentes &c. corrigere peculiari jure adstringuntur.

Petes 6. Hæc major superiorum obligatio efficit ne, ut in mores subditorum inquirere debeant?

Resp. Duplicem correctionem Prælati peragere tenentur, unam judicialem, alteram fraternam; debito inquirendi in subditorum vitam, moresq; obstringi Superiores, cum pro tribunali corripere subditos velint, nullus dubitat; hoc enim munus eorum exigit. Quare si se ipsis id peragere nequeant, exploratorum operâ uti possunt, & sæpius debent. Sicut enim Pastor canes alit, ut ad gregis custodiam latent, sic Pastorem spiritualement suos habere speculatores convenit. Verum in id omni studio incumbere Prælati debent, ut ad officium istud viros prudentiâ, zelô & charitate præditos feligant, odiô & invidentiâ omnino vacuos. Ad hanc itidem diligentiam adhibendam tenentur vi præcepti correctionis fratarnæ. Hæc S. Thomas tradit hic q. 33. art. 2. ad 4.

Exe.

Executio tamen eorum, ut fatear, non levi juncta est difficultati, videlicet, cui viæ inhærere, quibus regulis Prælati uti debeant, ne ad alterutrum extremorum aut oscitantia, aut severioris diligentia declinent. Varias quidem regulas varii assignant; verum nisi ipsi sint peculiari acumine & dexterritate præditi, nisi juges preces Deo fundant pro grege commisso, cætera vix profunt.

Prima regula. Cum Prælatus ipse lustrare loca valet, in quibus delinquere subditi solent, non debet aliorum uti ministerio. Ejus quippè præsentia multum roboris habet & efficaciam ad continendos, atq; in ordinem redigendos subditos. Prælatorum aspectus, ob quamdam intimam dignitati majestatem, vimq; occultam, tali rubore & timore subditos perfundit, ut facillimè se contineant, vitentq; delinquendi occasiones.

Secunda, ut in exploratores eos minime mittant, qui naturali levitate, & curiositate, ad aliena scrutanda crimina feruntur; sed viros graves, beneq; moratos ad id muneris eligant.

Tertia; Summopere cavendum est Prælati, nè nimium morosi & suspiciosi sint; nihil quippe gravius subditis, quàm superior tetricus, & diffidens, qui ob levissimas conjecturas citissimè malum suspicatur. Si tamen Prælati nimium est remissus, nullus dubitat, illum hoc modo observantiam plurimum relaxare; illud curet, quod dicitur: medium tenuere beati.

Petes 7. Qui est ordo in correctione fraterna servandus.

Resp: Ordo hic præscribitur Math: 18. *Si peccaverit in te frater tuus, vade & corripe eum inter te & ipsum solum. Si te audierit, lucratus es fratrem tuum. Si autem te non audierit, adhibe tecum adhuc unum vel duos, ut in ore duorum vel trium stet omne verbum. Quod si non audierit eos, dic Ecclesiae. Si Ecclesiam non audierit, sit tibi sicut Ethnicus & Publicanus.* Tria hic servanda præcipiuntur. 1. Ut secreto frater corrigatur; 2. Ut si secreta admonitio inutilis foret, unus & alter adhibeatur testis; 3. Ut is Superiori denuntietur, qui nihil ex secreta correctione profecit. Si Superiorum judicium

cium neglexerit, tunc pænarum severitate plectatur, & veluti membrum recisum à corpore, instar Ethnici & Publicani tibi sit. Hunc verò ordinem, non rem consilii esse, sed præcepti clare docet S. Thomas hic q. 33. a. 7. Ubi ostendit, quam sit jurè naturali consentaneus ordo, quem in fraterna correctione peragenda, servandum Christus jubet. Nam 1. ordo iste salutem æternam, quæ bonum supremum est, spectat; 2. famam peccantis custodit, quæ est bonum ordinis inferioris; 3. quod si hæc in totum servari nequeat, saltem quo ad fieri potest, parcè lædatur. 4. Non advocentur testes, si prosit privata admonitio. 5. Si testes adhibendi fuerint, non vocentur duo, si unus sufficiat.

Hinc tamen advertas cum præceptum ordinis istius affirmans sit, quod quemadmodum cætera præcepta ejusdem generis, pro semper non obligat, sed juxta circumstantiarum diversitatem obligationem imponit. Spectandum itaq; criminum genus, & peccantium indoles. Si peccatum publicum fuerit

& notorium, aut damnum tertio inferens, aut communitati noxium, ordine prætermisso superiori referendum est si præsertim nulla sit ex occulta admonitione concipienda fructûs fiducia, propter peccantis contumacem pravitatem, pariter ordinis servandi non urget præceptum.

Porro ut S. Thomas q. cit. a. 8. ad 3. adversit: *Testes possunt adduci propter tria. Uno modo ad ostendendum, quod hoc sit peccatum, de quo quis arguitur, ut Hieronymus dicit: Secundo ad convincendum de actu, si actus iteratur, ut Augustinus dicit in Regula. Tertio modo ad testificandum, quod frater admonens fecit, quod in se fuit, ut Chrysostomus dicit. Et vi hujus delationis nequid quidem juridice procedere Superior, increpare tamen reum potest, ut sic pænarum saltem metu in ordinem redigat.*

CONSECTARIUM.

Sola peccata occulta, quæ cedunt in damnum peccantis, præcepto correctionis subjacent. Secus alia, quæ aut sunt notoria notorietate sive *juris*, sive *fa-*

facti sive formæ; aut quæ vergunt in damnum tertii, Reipublicæ, Communitatis. Porro quæ vergunt in damnum tertii, sunt v.g. furta, adulteria, iniustitiæ, contumeliæ, calumniæ & similia. Quæ Reipublicæ vel temporale vel spirituale respiciunt, sunt, monetæ adulteratio, civitatis proditio, homicidia frequentia, literarum falsificatio, doctrinæ hæreticæ, falsæ, erroneæ, laxæ disseminatio; conspiratio adversus Superiores, tranquillitatis & pacis perturbatio &c. & alia, quæ à Personis spiritualibus cum sæcularium scandalo perpetrantur. Audiamus S. Thomam cit. q. 33. art. 7. Quædam enim peccata occulta sunt, quæ sunt in nocumentum proximorum vel corporale, vel spirituale; puta, si aliquis occultè tractet, quomodo civitas tradatur hostibus; vel si hæreticus privatim homines è fide avertat. Et quia ille, qui sic occultè peccat, non solum in se peccat, sed etiam in alios, oportet statim procedere ad denuntiationem, ut huiusmodi nocumentum impediatur. Quoniam crimen v.g. hæresis bonum commune suâ naturâ inficit, ac destruit. Porro bonum commune privato præferendum est, proinde

neglectâ secretâ correctione, referendum est judici crimen illud. Ad quid? & quem in finem? Non quidem ut puniat delinquentem, sed ut malum imminens bono publico caveat, nempe; *ut hujusmodi nocumentum impediatur*. Quippè Judex hac denuntiatione habita, inquirere in delinquentem valet, ejusq; vitam & mores observare. Accedit præceptum *Alexandri VII.* qui peccuarii Bullâ datâ 1660. *Licet alias &c.* jubet hæresis crimen, tametsi occultum deferri statim S. inquisitionis Tribunali, omisâ correctione fraternâ. Hic tamen advertas, quod facilius spes concipi potest, profuturam secretam correctionem, cum de peccatis agitur, quæ non adversus bonum commune, sed in damnum privatæ personæ cedunt. Idcirco servanda est in his regula correctionis fraternæ. Hinc validiora futuræ emendationis argumenta haberi debent, quam cum correctio fieri debet de peccato, quod in damnum cedit peccantis; semper enim innocens reo præferendus est, commune bonum particulari. At addendum, nec additi pænitebit, nimiam credulita-

tatem, nimium custodiendæ famæ reorum zelum, & ipsi nocenti, & ipsi reo, ne quid plus dicam, persæpe nocere.



ARTICULUS VII.

De Vitiis charitati oppositis.

Vitia charitati opposita ad decem reducit S. Thomas hic q. 34. & seq; 1. est *odium DEI*, & proximi, quod dilectioni contrariatur. 2. *acedia*, quæ pugnat cum gaudio, quod de bono Divino percipitur. 3. *invidia*, quæ gaudio de bono proximi opponitur. 4. *discordia*, quæ cum charitatis affectu pugnat. 5. *contentio*. 6. *schisma*. 7. *bellum*; 8. *rixa*. 9. *seditio*, quæ exteriorem pacem opere perturbat, 10. *scandalum*, quod charitatis beneficium impedit.

§ I.

De odio DEI & proximi.

Oidium DEI generaliter primò accipitur, quod in omni peccato
mor-

mortali includitur, ex eo, quod omnis graviter peccans à DEO desciscit, & ad creaturam se convertit; at odium sic sumptum speciale vitium non est, nec peculiarem malitiam includit, ab ea distinctam, quæ in peccatis residet. Secundo peculiare & expressum, seu, ut ajunt formale, quod specialem gravissimamq; malitiam præfert, Divinaeq; dilectioni directè opponitur; & est *aversio a DEO, qua voluntas illum detestatur, prout peccata prohibet, pœnasq; infligit.* Voluntas quippè id detestatur, quod sibi repugnat; & quia DEUS absolute inspectus; vel ut est bonorum causa, voluntati non opponitur; nequit hac ratione illum odio habere; quia vero, prout prohibet vitia, pœnasq; infligit, pravæ voluntati infestus apprehenditur, ideo sub hac consideratione à malis odio habetur. Hoc odium formale duplex, unum abominationis, alterum inimicitiae; illud rectè DEI naturam aggreditur, illam destruere cupiens, si posset; hoc malum illi optat. Hoc peccatum omnium scelerum gravissimum parvitatem materiæ non admittit, nisi forte

imperfecta deliberatio crimen minuere valet. Immane flagitium optare DEO ne sit, aut aliqua perfectione careat, aut de ejus offensa gaudere.

Odium proximi est *expressa malevolentia*, qua illi malum optamus. Peccatum sanè ex se mortale; cum omnis, qui odit fratrem suum homicida est. 1. Joan 3, fieri tamen veniale potest aut materiæ parvitate, aut imperfecta deliberatione, si aut animo non deliberato, aut levissimum malum proximo exoptes. Lætitia de malis proximi nostri ex odio adversus illum proficiscitur. Ex his.

CONSECTARIUM.

I. **N**unquam licere ob commodum & utilitatem propriam privatamq; malum aliquod proximo optare; hoc enim meritò damnatum est ab Innocentio XI. in propositionibus 13. 14. 15. Etsi licitum sit gaudere de alicujus infirmitate, aut alia temporali ærumna, ut ad meliorem frugem redigatur, quia ordo charitatis præfert bonum spirituale temporali; Summa tamen vigilantia in his desideriis, quamvis inefficacibus,

bus, opus est, ne sub specie boni spiritualis, aut communis, lateat privatæ vindictæ cupiditas. 2. Qui animo deliberato grave malum proximo imprecat, grave crimen perpetrat, v.g. si quis dicat, *infernus te devoret, mors te comprehendat* & similia. Qui has & similes cantilenas usurpant, iræ impetum in excusationem adhibere solent, verum hi peccatis peccata accumulunt. Quod quandoq; ira rationem prævenire valeat; nullus dubitat, sed & indubium est, quod iræ assentiri animo deliberato peccatum sit. Porro tunc animo deliberato consentientes homines censentur & sunt, cum non illico iram cohibent, sed repetitis actibus in eadem persistunt, & in imprecationes frequenter labuntur. Neq; à gravi crimine semper excusantur, quod non animo dispositi sint, ut malum, quod imprecantur, eveniat; sicut pleriq; dicere solent, præsertim parentes, cum libris maledicunt, sed quod, ut iræ obsequantur, talia proferunt; peccant siquidem eo ipso, quod deliberatè iræ consentiunt. Dolent utiq; defervescente ira se talia protulisse, & hallucinantur se

non

non peccasse, propterea quod passi ne expleta, peccati sentiunt stimulos, quos habere nollent. Duo spectanda sunt, ut maledictionis gravitas deprehendatur; 1. damni magnitudo, quod sibi vel alteri quisq; imprecatur. 2. animi deliberatus assensus, ut docet S. Thomas hic 22. q. 76. a. 3. Videndum ergo qua animi deliberatione, quo scandalo, qua contumelia, quod mali genus proximo optetur. Hæc omnia spectanda sunt, ut maledictorum iniquitas expendatur. Quid autem dicendum sit de maledictionis genere, quæ in ipsas creaturas irracionales à multis contorqueri solet; hæc scribit Angelicus laudata q. a. 2. *Maledicere autem rebus irrationalibus, inquantum sunt creature DEI, est peccatum blasphemicæ, maledicere autem eis, secundum se consideratis, est otiosum & vanum, & per consequens illicitum.*

§ 2.

De Acedia.

Petes. **Q**uid sit acedia? Resp. Est tristitia deliberata de bono spirituali, quod ad nos pertinet. Dicitur deliberata, ut se-

fecernatur à tædio illo, quo affici solent vel pii homines, aut ob naturalem corporis habitudinem, aut ob dæmonis tentationem, DEIq; permissionem, cui si resistent, ferent cum tentatione proventum. *Quod ad nos pertinet;* quia cum tristamur de bonis Divinis, prout DEI sunt vg. de illius Majestate, sanctificatione &c. odio DEI potius, quam acedia peccamus. Si vero quempiam tædet Divinorum bonorum, quatenus nobis communia sunt, ut si quis tristitia afficiatur, quod sit filius DEI, æternæ gloriæ capax, Sanctorumq; concivis, is propriè acedia delinquit. At si quis tristatur de cæteris virtutibus, vg. de jejunio, paupertate, castitate & aliis, non peccat acedia pressè acceptâ, sed generatim sumptâ, quæ ad illius peccati speciem revocatur, cujus esset omisio, nempe illius boni aut virtutis, quæ displicet. Vitium hoc mortale aut veniale est, ex diversitate materiæ, quæ tristitiam parit. Acedia pugnat cum virtute charitatis, ejusq; præcepto, de quo Apost. ad Philip. 4. *Gaudete in Domino semper, iterum dico gaudete.* Paucis
rem

rem enucleat S. Thomas hic q. 35. a. 2. *Tristitia*, ait, *qua quis tristatur de bono spirituali, quod est in actibus singularum virtutum, non pertinet ad aliquod vitium speciale, sed ad omnia vitia. Sed tristari de bono Divino, de quo charitas gaudet, pertinet ad speciale vitium, quod acedia vocatur.*

CONSECTARIUM.

Acediam esse vitium capitale, prout definit S. Thomas q. cit. art. 4. quia sex parit filias, quæ sunt 1. *desperatio*, qua quis diffidit de æterna beatitudine, ut sibi impossibili; 2. *malitia*, qua DEI bona contemnuntur. 3. *Rancor* seu indignatio in eos, qui nos ad spiritualia & Divina bona hortantur. 4. *Pusillanimitas*, qua quis animum despondet, refugitq; ea exequi, quæ ad salutem, ducunt. 5. *Torpor*, qui languor quidam est adversus præceptorum observantiam. 6. *Evagatio mentis* ad illicita, ad quæ nimium se diffundit. Vide S. Thomam loc. cit. ad 2.

§. III.

De vitio Invidia.

Invidia est tristitia de bono alieno apprehen-
so,

so, ac si esset malum proprium, & propria gloria & excellentia infestum. Tristitia dicitur, quia licet circa bonum versetur, illud tamen ut malum ipsius invidentis apprehendit, quod inde suam decrescere excellentiam censeat. Additur de bono alieno, quia tristitia de bono proprio ut malo existimato, non invidia est, sed acedia nuncupatur. Quatenus infestum est propria gloria, quia tristitia ob aliam rationem concepta non invidia, sed vel odium, vel indignatio, aut quidpiam aliud est. Duplex invidiæ species. Altera, quæ tristatur de bonis humanis proximi, nimirum de divitiis, dignitatibus, & similibus, quæq; invidia humana nuncupatur. Altera, quæ tristatur de bonis gratiæ alterius, vocaturq; invidia fraternæ gratiæ. Hæc, ait Angelicus hac parte q. 36. a. 4. ad 2. ponitur peccatum in Spiritum sanctum, quia per hanc invidentiam homo quodammodo invidet Spiritui S. qui in suis operibus glorificatur.

CONSECTARIUM.

Invidia suâ naturâ est peccatum mortale; veniale effici potest, vel indeliberatio.

ratione consensûs, vel materiæ parvitate. Est simul capitale peccatum, ut *Angelicus* mox laudata q. a. 4. docet quoniam ex illa alia proficiscuntur vitia, nimirum odium, susurratio, detractio, exultatio in proximi calamitatibus, & afflictio in rebus prosperis.

§. IV

De Discordia, Contentione & Schismate.

Petes 1. Quid est discordia?

Resp: Est voluntatum dissensio à bono Divino & proximi, in quo convenire debent. Opponitur concordia, quæ corda & voluntates simul unit. Est suo genere peccatum mortale, quare Spiritus S. Prov. 6. detestatur eum, qui seminat inter fratres discordias. Vide S. Thomam q. 37. a. 1.

Petes 2. Quid sit contentio? *Resp:* Est verborum altercatio ad impugnandam veritatem. Seu ut eam definit *Angelicus* q. 38. a. 1. Contentio est impugnatio veritatis cum confidentia clamoris. Subdit vero: Si autem contentio dicatur impugnatio falsitatis cum debito modo acrimoniæ, sic contentio est laudabilis.

CONSECTARIUM,

At acrimonia nunquam in personas, sed in errores tota semper fit, eoduntaxat fine, ut surdæ aures vellicentur paululum, & à sopore excitentur; ac potissimum ut error magis magisque contemnatur. Summâ prudentiâ, summâ parsimoniâ opus est in hujus remedii usu, ne limites satis angustos transiliamus. In scribendo potius, quam dicendo esse debet illius usus; in mutua disputatione & colloctione verba mitissima sint, eorumque prolatio temperata. In scripto usus frequentior; ejusmodi enim stylo salibus asperso usi sunt Patres Sancti, præsertim S. Hieronymus; ejus inter scribendum stylus purus & tersus est, & teste Erasmo lib: 5. Epist: 19. cum ipso Cicerone certare videtur. Inter disputandum fuit vehementis ac præservidi ingenii, suosque adversarios præsertim hæreticos acriter exagitavit, & Plautino sale defricuit. Hinc Vigilantium, cujus impia dogmata, à modernis Sectariis resuscitata, impugnavit, appellat, *Dormitantium, Dæmoniacum, Cauponem,*

nem, Calaguritanum, Mutum Quintianum, virum libidini frana permittentem, furiosum, Samaritanum, Judæum, Sacrilegum, Magistrum cerebrosum. &c. Quas in speciem acriores objurgationes S. Hieronymo non ira expressit, sed zelus pro DEI gloria, & fidei integritate justissime accensus. Unde ipse S. Doctor Epist: 53. ad Riparium ait: fatebor tibi dolorem meum, sacrilegium tantum Vigilantii patienter audire non possum. Non est crudelitas pro DEO pietas. Ejusmodi salibus abundat etiam S. Chrysostomi aureum os, in sermonibus ad populum; leguntur etiam apud Augustinum & Bernardum.

Petes 3. Quid est Schisma?

Resp: Est ab unitate Ecclesiæ deliberata separatio. Separatur autem quis ab Ecclesia, dum aut ejus membris communicare renuit, aut debitam Capiti obedientiam præstare recusat. Ex hoc.

CONSECTARIUM.

Non omnis quidem inobediens est schismaticus, ut patet, omnis tamen Schismaticus est inobediens. Schismaticus enim præter inobedientiam, contu-

macem addit rebellionem, quâ ab Ecclesiæ communione recedit. Hinc etiam sequitur, quod omnis Hæreticus est Schismaticus; non tamen omnis Schismaticus eo ipso est Hæreticus; cum re ipsa consistere possit schisma absq; hæresi, ut contigit Sæculo XV. quando occasione trium Pontificum maximum schisma diu duravit. Porro Schisma purum charitati & obedientiæ oppositum esset, si quis crederet unam sanctam Ecclesiam Catholicam sub visibili Capite Romæ Pontifice constitutam, omnesq; articulos fidei ab eadem propositos; superba tamen rebelliq; voluntate, nollet Papæ subesse, ejusq; obedire mandatis. Si vero primatum aut potestatem Summi Pontificis insuper negaret, hæreticus simul esset. Paucis: quamvis schisma & hæresis duo sint crimina distincta, & absolute sejungi queant, vix tamen, ac ne vix quidem verum schisma re ipsa sine aliqua hæresi reperitur, ut notat Angelicus hic q. 39. A. 1. ad 3. *Cæterum nullum Schisma est, quod non sibi aliquam hæresim consingat, ut rectè ab Ecclesia recessisse videatur.* Plura de gravissimo hoc scelere

ere scindente Ecclesiæ unitatem legatur Angelicus tota laudata quæstione 39.

§ V.

De Bello.

Cum bellum sit *conflictus multorum contra multos extraneos, vi & armis jussu Principium peractus. Conflictus multorum contra multos*, dicitur, ut secernatur à duello; & à rixa, quæ est pugna paucorum contra paucos. *Contra multos extraneos*, ut distinguatur à seditione, quæ fit inter homines ejusdem regni aut Provinciæ, invito Principe. Bellum aliud est *defensivum*, aliud *offensivum*, utrumq; servatis debitis conditionibus justum est, quidquid dicat cum Manichæis Lutherus, qui bellum adversus Turcas damnavit. Constat ex infinitis penè locis S. Scripturæ; absq; ulla reprehensione, imo jussu Dei bel-
larunt multi, quorum prælia narrant S. Paginæ veteris Testamenti, ut *Abrahami, Moysis, Josue, Judicum, Regum, Machabæorum*.

Petes: 1. Quæ requiruntur conditiones ad belli justitiam necessariæ?

Resp: Angelicus hac parte q. 40. tres assignat: Primo quidem requiritur *authoritas Principis* cujus mandato bellum est gerendum. - - - Secundo requiritur *causa justa* ut scilicet illi, qui impugnantur, propter aliquam culpam impugnationem mereantur. - - - Tertio requiritur, ut intentio bellantium sit recta, qua scilicet intenditur, vel ut bonum promoveatur, vel ut malum vitetur. Vi hujus ultimæ conditionis interdicta in bello est sævitia, crudelitas, fraus, religionis irreverentia, & alia hujusmodi.

Petes 2. Quæ notitia de belli justitia necessaria militibus est, ut parere Regi præcipienti bellum valeant?

Resp: Duo militum genera distinguenda sunt; alterum subditorum Regis bellantis, alterum alienigenarum. Milites alienigenæ antequam Regis exteri militiæ nomen dent, belli justitiam perspectam habere debent; isti enim cum liberi sint, nullo obediendi prætextu excusari valent; neq; executores sententiæ Regis sunt dicendi, sed potius ipsi

ipsi sententiam ferunt, bellumq; inducunt, cum partes Regis bellatoris sponte suscipiunt. Hi ergo rei evadunt omnium malorum, quæ bellum consequuntur, obnoxii, nisi de justitia belli certi sint. Milites autem subditi Regis bellum inferentis ut sint immunes à culpa, satis est, ut ipsis bellum probabile appareat; probabile verò illis est, quoties non constat de injustitia. Præsumere quippe isti debent proprium Regem non nisi justa bella gerere. Executores hi sunt sententiæ à Rege latæ; illorum ergo minime interest sententiam in examen revocare, alioquin universa imperandi & regendi fundamenta submoverentur.

§ VI.

De Rixa, Seditione & Duello.

Hæc tria magnam cum bello vicinitatem habent; quare *Angelicus* rixam definiens, eam appellat bellum privatum, quod inter privatas personas agitur, non ex aliqua publica auctoritate, sed magis ex inordinata voluntate; & ideo
rixam

rixa semper importat peccatum, intellige respectu aggressoris, nam in eo, qui se defendit, nullum erit, si fiat cum moderamine inculpatae tutelae. Rixa filia irae est, ait *Angelicus* q. 41. a. 2.

Seditio est tumultus ad pugnam unius partis Reipublicae contra aliam. Si sit contra principem, est rebellio à pura seditione sejuncta. Rebellio quippè subjectionem & obedientiam Principi debitam excutit omnem; seditio verò servatâ Principi obedientiâ contra Ministros & principatus partem arma stringit.

Duellum est pugna singularis ab utraq; parte ex conditio acceptata, loco & tempore assignato cum periculo occisionis, aut gravis vulneris. Ex eo, quod pugna sit singularis à bello distinguitur; duellum est singulare certamen praesertim inter duos. *Dicitur ex conditio*, id est, mutuo inito pactô ad pugnam tali loco, & tempore ineundam. Non est duellum, si tempus tantum, aut locus solum, non assignato tempore pugnae, indicatur. Quare pugnae subita irâ ortæ, tam-

et si

etsi mutuo pugnantes se percutiant, non sunt duellum, v. g. si quis ob exortas inimicitias dicat inimico: *in platea te expecto, ut pugnemus*, tempore non definito; aut contra: *vespere tecum praelabor, ubicunq; te obvium habuero*. E contra si diceret: *sume arma, hic in platea, statim pugnemus*, duellum est tempore præsenti & loco designatis. Dicitur cum periculo occisionis aut gravis vulneris. Quoniam si certamen sit absq; ullo periculo vulneris, aut occisionis, sed ad vires exercendas, aut pugnis se se tundendos, duellum non est, quia non est peractum armis aut instrumentis sua naturâ aptis ad occisionem. E contra duellum est, si quis alterum provocat, aut provocationem acceptat, loco & tempore ad pugnam designatis, non animô se lædendi, sed honoris defendendi motivô, etiam sub morali certitudine, quod nullum indè damnum sit secuturum, eo quod amici se se interponent, ad mutuam pacem conciliandam; omnia namq; adfunt, quæ ad verum duellum requiruntur, & sine causa

sa se tales duellum nolle interius comminiscuntur. Tale etiam duellum scandalum parit, & est lege naturali prohibitum, & ab Ecclesia vetitum

Pænæ graves constitutæ sunt in provocantes & acceptantes duellum, ad illudq; cooperantes. 1. Concilium Trident: sess: 25. cap: 19. excommunicationis pænam inurit Dominis, qui locum ad duellum committendum inter Christianos concesserint. 2. Qui pugnam commiserint, & qui eorum patrini vocantur, excommunicationis, ac bonorum omnium proscriptionis, ac perpetuæ infamiæ pænam incurrunt, & ut homicidæ juxta sacros Canones puniri debent, atq; si in ipso conflictu decesserint, perpetuò Ecclesiastica careant sepultura. 3. Etiam, qui consilium in causa duelli tam in jure, quam in facto dederint, aut alia ratione ad id quidquam suaserint, aut spectatores fuerint, excommunicationis, ac perpetuæ maledictionis vinculo subjiuntur. Pius IV. in *motu proprio* edito anno 1560. eandem excommunicationem indixit, eamq;

eamq; extendit ad duellum privatum, sicut & Gregorius XIII. Clemens vero VIII. anno 1592. præfatam excommunicationem Sedi Apostolicæ reservavit, decrevitq; incurri à provocantibus, etiam pugna non secuta. Et anno 1602. Regularibus privilegiatis facultatem quoq; ademit absolvendi ab hac censura intra Italiam. Hinc Regulares privilegiati à duello absolvere possunt in his locis, scilicet extra Italiam sicut ab aliis casibus extra Bullam cænæ, servatis tamen de jure servandis conditionibus, uti latius dicetur in Tractatu de Pœnitentia, ubi Decretum S. Congregationis sub Urbano VIII. hac de re editum, adferemus, Deo T. O. M. adjuvante.

Epilogus.

Ad te, charissime Discipule, à quo exordium sumpsit, revertatur oratio mea; fidei Catholicæ veritatem & sinceritatem brevi compendio complexus sum; regulas, ad quas continuo respicere debeas, ante oculos tibi posui hoc
fine

sine, ne unquam terminos, quos posuerunt Patres nostri, transgrediaris. Lumen fidei tibi semper affulgeat, sic in via Domini currendo nullum patieris offendiculum. Sed quia non tibi soli, verum etiam aliorum commodo vivis, hoc ipsum lumen fidei aliis instillare cures, est necesse; hoc ut praestes fidem spei junctam, ac à charitate Dei & proximi formatam habeas. Si enim verborum ratiocinio, argumentorum efficacia incredulos in Christi obsequium subigere ac captivare non poteris, morum innocentiam, virtutum ac operum sanctitate illorum animos emollire, religiosamque humilitate eorum supercilium devincire studebis.

Rationem saltem ab omnibus non requireret supremus Judex Christus Jesus, quod ad veram fidem incredulos non reduxerint, sed in omnes, praesertim eos, quos in lucem populorum posuit, severissime adimadvertet, si pravo exemplo suo ansam eis dederint, ut in incredulitate persistant; ut scite ad hanc rem S. Chrysostomus ait: *En*

nos

nos sumus causa, ut illi in errore permaneant. Jam pridem doctrinam suam damnassent, & nostram approbassent, nisi vitā nostrā retraherentur. Verbis Philosophari perfacile, sed inquirunt operum probationem. Itaq; horum nos pœnas dabimus, non solum eorum, quæ ipsi commisimus, sed quorum auctores fuimus, ut nomen Dei blasphemetur.


Porro ut incredulorum oculis fulgeat morum nostrorum candor, ut vitæ nostræ integritas illorum animos permoveat, altius hæreat mentibus nostris Divinæ Majestatis præsentia, fide genita, spe nutrita, charitate roborata. Recognita fidem tuam annulum pretiosissimum esse, quo animæ tuæ cum Deo sponsalia obsignantur fides tua secretiora Dei arcana reseat, tibiq; communicat, quod ultimum est amicitiae argumentum, quod credentium Patri Abrahamo Deus ostensum voluit dicens: *ambula coram me, tanquam amicus in mea præsentia; & esto perfectus.* Erige animum, exere vires, & conatus omnes, ut Deum, quem præsentem fide credis, spe assequaris, dicasq;

dicasq; cum Bernardo: *Tu Domine una es omnium laborum, ac molestiarum mearum spes; tu cogitationum operumq; finis; tu principium ac meta totius vite mee.* Ad hanc propositam spem, seu ad tutam & firmissimam anchoram confugere te oportet. Facessant spes vanæ, miseræ, incertæ, quæ corda nostra saturare nequeunt, & in solo Deo sit spes nostra, quia ille solus implere cor nostrum potest, ille solus non deserit sperantes in se. Charitate præsentia Dei mirifice roboratur, præterquam enim quod amans non solum est coram, sed in ipso amato; amor iste charitatis omnia nostra sibi vindicat, & in omnes dominatur affectiones nostras. Charitatis istius vis est & efficacia, ut universalem legis observantiam exequatur. Eadem charitate Deum, nos & proximos complectimur mirabili servato ordine. Mutuo sese amores isti pariunt, mutuo nutricuntur, mutuo flammæ augent, mutuo propriam conservant vitam, nec alter sine altero vivere potest. Sic in præsentia Dei constitu-

stitutus frequentatis vocibus dicas sicut ore ita corde cum Ecclesia Catholica: *Da nobis fidei, spei & charitatis augmentum, & ut mereamur assequi quod promittis; fac nos amare quod præcipis, qui nos gratis salvasti per fidem. Ad Ephes: 1. in quo per spem sanctificamus nos. 1. Joan: 3. qui charitas est, & qui in charitate manet in te manet, & tu in eo. 1. Joan: 4.*

Ad M. D. Gloriam.





[Faint, illegible text from a manuscript page]

des enim apertissime
tione . nova Sermon
Sermon. 51. de Ver
onem prout vult
do se habet ut om
thoritate an a ratione
do arguit: Unde
2. contra hanc
gustinus lib. 1. de m
trum missis suis, pa
Prob. 2. ex con
Pater. 2. us, qui in
intellectus Pereno
fessionis lumine ac
velavit tibi (hoc est,
sunt consentienti: car
Filium Dei vivum
Christus laudatur
tione naturali
credere fideles
obsequium Christi
necessaria esset
hominum. 2. im
fides nostra. 1. et
tellectum in obsequ
deles in captivitate
in Apoc. 2.

Biblioteka Jagiellońska



stdr0027170

